

**AMEDEUS
PACIFICUS, SEU
DE EUGENII 4. ET
AMEDEI
SABAUDIAE...**

Pierre Monod





~~7-13-D-4~~

~~24~~

AMEDEVS
PACIFICVS,

SEV

DE EVGENII IV. ET
AMEDEI SABAVDIÆ DVCIS

IN SVA OBEDIENTIA FELICIS
Papæ V. nuncupati Controversijs

COMMENTARIVS

*Jussu Serenissimi Ducis ab eius Historio-
grapho digestus.*



PARISIIS,
Sumptibus SEBASTIANI CRAMOISY,
via Iacobæa, sub Ciconijs.

M. DC. XXVI.

Cum Permissu & Approbationibus



SERENISSIMO
DVCI
CAROLO
EMANVELI.



RACVLI vox est,
SERENISSIME
Dvx, Filiorum filios,
Parentum Coronam
esse. Neque temere Principum
sapientissimus pronunciat, non
liberos modò ipsos, sed quandam
quasi liberorum catenam ma-
ioribus suis gloriæ Coronam
aptare: Non enim iisdem spa-
tijs fama, virésque hominum,

decurrunt: ista, etate marcescunt; illa, efflorescit illustrius; Quò fit, ut Auis, Atavisque tantò iucundior à Nepotibus accedat gloria, quantò diuturniore lucta à cõtumaci temporis obliuione studiosius vindicatur. Facis igitur, SERENISSIME CAROLE, quod te, & püssimũ Nepotem decet, ut non modò Heroicis virtutibus tuis maiorum famam augeas, sed illam, fatali inuidia, vel incuria nebulà circumfusam, splendori suo reddas. Ceteris Principum in eo fere Consilia stant, si Decessorum suorum, aut existimatione, quamuis fugiente securi, aut congestarum opum opinione formidabiles videantur: quibus verò generosior indoles maius

aliquid suasit, ardua maiorum
vestigia pressisse, in summis fa-
ma conatibus habuerunt. Tua
verò, DVX INVICTISSIME,
adolescens virtus ijs gloria no-
bilitata est rudimentis, ad quæ
vix ambitiosa senum vota festi-
nant, effecitque ut non tam
maioribus tuis vitam, quàm
illi immortalitatem tibi deberet:
Quæ enim de eorum magnani-
mitate, liberalitate, victorijs, ac
in Religione progaganda trium-
phis propè incredibilia fama ce-
lebrat, facile Posteritas credet,
quia maioribus ausis, illorum
miraculis fidem addidisti, inso-
lentiam detraxisti. Credet iam
non inuita Posteritas Imperato-
rias legiones triumphata Bohe-
mia, Austria, & Germania su-

Anno 1282.

perbas in Sabaudia finibus ad Paterniacum à Philippo Comite vinci se posse didicisse; Quia Potentissimos, florentissimosq^{ue}, si quos unquam misit Iberia, magni Regis exercitus in ipso Subalpina Prouincia aditu, uno magnanimi pectoris tui propugnaculo, veriùs quàm Alpium tuarum munimentis repressos, penè vidit diriguisse: Credet Amedeum Quintum coniuratis in se vicinorum Principum cedijs unum omnium inuidia suffecisse, intèrque medias acies exultantem Magni nomen sibi peperisse: Quia te vel Hereticorum audacià, vel Æmulorum artibus, vel temporum iniquitate in eo vidit astuario positum, ut cùm eos patereris infestos,

quos non sola vicinia, sed necessitudinis iura beneuolos facere debuerant, inter tamen tot assultantes fluctus, scopuli instar infractus, excelsusque consisteres, ac Magni nomen etiam uiuus sine inuidia possideres, quod plerisque mortuis vix præfica concessit adulatio. Credet in Amedei viridis semper nouis laurorum virētibus castris, quasi in Achillis Christiani schola celeberrimos Principes adolescere contendisse, qui Potentissimi, bellicosissimique Regis votum nuper in oculis tuis Auenione conceptum, vel auribus usurparit, vel fama referente didicerit; quod tanto illustriore præconio posteritas celebrabit, quanto maior illi ex modestia tua,

*qua id silere me iubet, commen-
datio existet. Credet Humber-
torum, & Amedeorum pietate
(à qua Praconum fidei nomen
Pontificis calculo meruerunt)
factum esse, ut plurimi in O-
riente, schismate, erroribûsque
suis eiuratis in Catholica fidei
castra felici instabilitate transi-
rent, quia te subactis hostibus
(quorum in Deum & homines
fidem perduellis Geneva corru-
perat) geminatâ victoriâ adeò
feliciter spectavit triumphãtem,
ut plenis agminibus, quibus
mortalem vitam Clementia tua
indulserat, iisdem Pietas tua
aternam aperiret. His MAGNE
CAROLE virtutibus coronam
texere mihi videris nimio lumi-
ne, & pretio ignotam, quam A-*

uorum tuorum lato capiti circumponas; quibus nihil contigit honorificentius, quàm tanto Nepote gloriari, cuius laudes, & feliciter illis accrescant, Et propriarum sint argumenta virtutum.

Quanquam neque satis habes (quæ tua est, SERENISSIME DVX, in maiores tuos pietas) si illos ex tuis virtutibus aestimari facis, nisi etiam ipsorum Innocentia studiosissimus patronus accedas: & hanc igitur Coronam Pijssimo Nepoti Atauus optimus debebit AMEDEVS, quòd famam suam temerè, ne dicam impiè, proscissam, tuis auspicijs integritati suæ sentiat restitutam. Qua in re ita claritati generis tui consultum esse

voluisti, ut singularis obseruan-
tia, qua VERTICEM EC-
CLESIAE ROMAE, eiusq;
Pastorem summum veneraris,
quasi gentilitium ederes argu-
mentum. Nam cum maiores
tui Romanos Antistites gregis
Dominici Pastores primogeni-
tos, operose adeò semper colue-
rint, ut isti de eorum ingenito
propè obsequio non vulgari gra-
tulatione sibi applaudant, vel
unum ex illis existimari temerè
aliquid in Pontifices ausum,
contumelia tibi, tuis, ipsisque
adeò Pontificibus visa est non
diutius ferenda: Eo maxime
sacrorum arbitro, qui felicem
generi tuo VRBANI Quinti
memoriam videtur instauratu-
rus. Huius enim Auspicijs A-

medeus viridis (quem FORTEM
ATHLETAM FIDEI vocare
consuerat) victricia in Orien-
tem Crucis signa circumtulit : ac
consanguineum suum Joannem
Paleologum, Purpure primum,
dein Ecclesiæ Romanæ Græco
schismate damnato reddidit :
Sicut igitur Diuino Consilio fa-
ctum est , ut VRBANVM habere-
mus Christiani Orbis spes , quã-
uis auidas , superaturum ; ita
VRBANO AMEDEVM in te ,
DVX INVICTISSIME , haud
defuturum , vel eo argumento
significare voluisti , quòd qui ne
Regios quidem generis tui Cine-
res Sedi Apostolicæ pateris non
esse deuotissimos , te , tuosque su-
perstites , Regiam scilicet prolem ,
sibi intelligat addictissimos. Eo

*fine latior prodit in lucem AME-
DEVS, Amedeus inquam PA-
CIFICVS, tuis Bellatorum ma-
xime CAROLE defensus auspi-
cijs; Amedeus ætatis suæ constãti
omnium voce SALOMON, tuo
Æui nostri DAVID fortissime
ductu securus: Qui tuis in se-
meritis id præter cætera (DEO
cui inter Cœlites famulatur ex-
orato) rependet, ut sicut ipse
Imperij diuturnitate omnes fa-
milie suæ Principes, ita tu ipsum
longissimè superes.*

SERENITATI VESTRÆ

Fidelissimus Historiographus.



ÆQVO LECTORI.

AEQVITATEM tuam,
mi Lector, primùm con-
uentam volo, fauentiæ
tuæ securus, si Æquum amas. A-
mabis verò, sat scio, operis huius
Æquitatem, illius si occasionem
didiceris, scopum attenderis, mo-
dum, rationemque scribendi ex-
penderis; quæ tria paucis tibi sug-
gero.

OCCASIONEM igitur huic
Commentario præbuit Religio-
sissimum illud obseruantiaæ stu-
dium, quo Serenissimi Sabaudia
Duces Sedem Apostolicam, illiús-
que moderatores supremos sem-

per coluerunt. Cuius studij adeò illustria dedere documenta, vt vni ferè Principum Christianorum sint, quos nunquam nominatim Roma vltici censurarum suarum fideratione perstrinxerit. Imò verò adeò experta est beneuolos, & obsequentes, vt primum illis secundùm Reges locum, & vicariam ad Stratoris munus operam hoc rescripto Benedictus eius nominis duodecimus assignarit.

Bulla Benedicti XII. ad Comitem Armonem, An. 1339. 6. April.

Ipsū D. Papam cū de Coronatione exhibit, per fr̃um ducet Comes Sabaudie, nisi Reges ibidem fuerint eū ducentes; unico tamen Rege ad hoc pr̃sente, & ducente, idem D. Comes ab altero latere Papam ducere debet. Et meritò, cū tam incensa in Pastorem summum charitate flagrant, vt celeberrimum inter eos Thomam, quem nulla pr̃liorum discrimina terruerant, v-

Parad. lib. 2.
cap. 65.

nus de vexato Friderici Imperato-
ris artibus Pontifice, mœror pro-
strauerit. Quamquam moriens ea
consolatione frueretur, quòd su-
perstites liberos haberet, quibus
nihil antiquius esset, quàm Se-
dis Romanæ perpetua defensio:
quò factum est, vt Innocentius
IV. alterum ex illis Patri cog-
nominem Ecclesiæ Protovexilla-
rium (Confalonarium vocant)
crearet, alterum Gulielmum no-
mine, Patrimonio Ecclesiæ, Vr-
bique Romanæ præficeret; qua in
administratione tanta integritate,
& magnanimitate versatus est, vt
nonnisi eo sublato Pontificem e-
uertere se posse infensissimi eius
hostes sperarent; vnde illum me-
dicatâ potione clam oblata per
summum flagitium interemerunt.

Paradi. cap.
62. li. 2. Hist.
Sab. edit. an-
no 1602.

Posterius verò ita se gesserunt, vt
qui inter eos Ducis nomen primus

Eug. 4. epist.
ad Amed. an.
1437. 15. Kal.
Mart.

assequutus est (Amedeus nempe
noster) hæc ex adyto Romano iam
olim audire meruerit: *Quemad-*
modum maiores tui Ecclesie Dei, &
Apostolicæ Sedis quieti, paci, & uni-
tati consilijs, & auxilijs, etiam perso-
nis proprijs astiterunt, ac fidem Catho-
licam longis finibus, & limitibus am-
pliari adiuerunt, exterminantes etiam
gladio seuissimos hostes, qui illius glo-
riam obtenebrare conati sunt: Ita, & te
ad has necessitates felicibus auspicijs ser-
uatum esse ostendas, ut in tempore op-
portuno tua PROTECTIONE, tua
cura, tua opera defensentur.

Neque sanè de nihilo maiores
Amedei tam illustri præconio
commendabat Eugenius. Et enim,
ut reliquos taceã, recens erat me-
moriam inuictissimi illius Pontifi-
cum Achillis, Amedei cognomen-
to viridis, quem Italicæ simul, Ec-
clesiasticæque libertatis aduersus
Bar-

Barnabonis, & Coniuratorum insultus vindicem, & assertorem acerrimum Urbanus V. & Gregorius XI. profitebantur, atque adeò ipse Carolus IV. Imperator agnoscebat, quicum in finem Vicariam ipsi in vniuersa Italia potestatem contulerat: *Ut ad honorem, commodam, & defensionem Sanctæ Matris Ecclesiæ* (verba sunt imperatoris Amedeum alloquentis) *in tantis opportunitatibus tuæ virtutis industria suffrageris; præsertim cùm Dominus noster S. Pontifex adeò grandem erga te gerat benignitatis affectum, ut pro tua persona ad infra scriptos effectus nobis singulariter direxerit sua vota, & c.* Verùm ne Italiæ finibus eximiam Pietatem suam circumscriberet Amedeus, Romanæ Sedis amplificandæ gratia, nullis externis auxilijs, suorum dumtaxat virtute fretus, O-

Ex. Bulla
Car. 4.

rientem penetrare non dubitauit;
tam felici successu, vt Ioannem
Palæologum ex Anna Sabaudica
Patris sui Sorore progenitum, è
Bulgarorum seruitute ereptum,
Solio suo reddiderit: neque aliud
tam præclari facinoris ab Impe-
ratore præmium, quamuis studio-
sè interpellatus, optaret, quàm vt
hic schismate eiurato Romano
Antistiti dicto audiens fieret:
Quod cùm Imperator facturum
se recepisset, ac deinceps nonnul-
lorum artibus de sententia dimo-
tus tergiuersaretur, Amedeus è
vestigio Constantinopoli digres-
sus, Peram colligendis copijs de-
legit, & iam incredibili magna-
nimitate infidelitatem vlcisci pa-
rabat, cùm Ioannes misso Patriar-
cha, oppigneratísque apud Co-
gnatum Diademate, & Sceptro
Imperiali, iustam eius indigna-

tionem placauit , ac demùm , vt
fidem suam liberaret , Romam
non multò pòst venit , vbi præ-
eunte in verba Urbano V. Catho-
licæ Religionis leges professus ,
æternum Sabaudici nominis mo-
nimentum statuit. Non potuit
Urbanus effusa lætitia gestiens
non agere , atque habere vberri-
mas Amedeo gratias ; his igitur
verbis animi sui sensa expressit.

*Ad tuæ consolationis augmentum tibi
lati præsentibus referamus , quòd Ca-
rissimus in Christo filius noster Ioannes
Palæologus Imperator Græcorum , illu-
stris Consanguineus tuus , secundùm
quod olim per ipsum , & te fuerat
Peræ ordinatum , ad Sedem nostram
reuerenter accessit , præmissisque per
eum abiuratione schismatis , & pro-
fessione Catholicæ fidei , ac opportu-
no præstito iuramento de parendo man-
datis Ecclesiæ , atque nostris , die vice-*

Ex Epist. Ur-
bani V. ad
Amed. Sab.
Com. ann.
1369.

5
sima prima mensis Octobris proximè
præteriti in Basilica Principis Apo-
stolorum eum solemniter, ac Paterna
recepimus Caritate, de quo Ecclesia
Sancta Dei letatur in Domino, spe-
rans ipsius Imperatoris ministerio sub-
ditos sibi Populos ad gremium eus-
dem Ecclesiæ reuersuros, &c. Datum
Romæ Non. Nouemb. Pontif. nostri
Ann. 7.

Hæc cùm vtriusque Palladis de-
licium Serenissimus CAROLVS
EMANVEL reuolueret, gaude-
rétque in suis Decessoribus agno-
scere illius Pietatis imaginem,
quam erga Sedem Apostolicam
semper aluit; facere non potuit
quin scriptorum quorundam in-
temperantiam coërceret. (Quos
enim familiares non habet alter
hic Augustus, qui verè, vt de suo
canebat Ausonius,

quantùm cessat de tempore belli,

*Indulget Clarijs tantum inter ca-
stra Camænis;*

*Vix posuit celeres stridentia tela sa-
gittas,*

*Musarum ad calamos fertur ma-
nus; otia nescit?)*

Qui scriptores, vel maledicen-
di lasciuiâ, vel veri indiligentiâ
Amedeum VIII. Sapientissimum,
Religiosissimúmque Principem in
Basileensium Patrum conuentu ad
Pontificiam dignitatem vocatum,
fœdis calumnijs lacerarunt, aliis-
que, vt eadem deinceps auderent,
præiuerunt. Is igitur pro summa
illa obseruantia, qua Romanos
Antistites semper veneratus est,
hunc ex integerrima familia næ-
uum emaculare studuit, tum com-
municatis cum eruditissimo An-
nalium Ecclesiasticorum auctore
tabulis; tum hac edita defensione,
in qua illustribus euinceret docu-

Illis nempe
quas in To-
mum 16. inse-
ruit.

In epist. ad
eundem an.
1433. Non.
Mart.

In Breui ad
Ludo. Du-
cem.

mentis, Amedeum illum non mo-
dò Sedi Apostolicæ iniquum non
fuisse, sed ipsum Eugenium tan-
tis cumulasse beneficijs, vt fateretur
iste Amedeum *reliquos omnes
Christianos Principes in hoc officij ge-
nere facile superasse*: eaque Nicolaus
Eugenij successor in se, totamque
Ecclesiam eiusdem Amedei meri-
ta agnosceret, *vt ea omni amplitu-
dine fauorum prosequi, & quidquid
sibi factu possibile videretur recorda-
tioni eius, & honori tribuendum
decerneret*. Ac præterea seuerè iu-
beret, *vt ea omnia inducerentur, quæ
vel temporum iniquitas, vel maleuolo-
rum proteruia in tantum Principem
excogitasset*.

Habet igitur Serenissimus Dux
Cõsiliij sui auctores ipsos summos
Ecclesiæ Antistites: stimulos ad-
mouent innocentia patrociniū,
familia decus, eximia in Sedem

Apostolicam pietas, & obseruan-
tia, quam nec in maioribus, ne-
dum in se, vel minimo aspergi
næuo patitur.

Hinc scopus, in quæ scriptio ista
collineat, facile sese aperit: pro-
positum enim mihi est Eugenium
semper verum, legitimúmque
Pontificem agnoscere, & venera-
ri: Actametsi in plerisque fortas-
se hominem se esse verbis, factís-
que ostenderit, vero propius exi-
stimare, quod de eo in sua retra-
ctatione Pius Secundus prodidit:
*Illum scilicet falsò de multis accusa-
tum, & Cardinales qui Basileam ve-
nerant ob priuatas inimicitias bono,
& sancto viro notam inurere voluisse.*
Quæ igitur historicè in hoc Com-
mentario ex antiquorum momu-
menti deprompta legentur, quæ
alicuius noxæ reum illum facient,
eo dumtaxat fine hîc recensentur,

Pius 2. in Bul-
la Retract.

Extat in Con-
cil. Lateran.
Sess. xi.

vt Amedeum à temeritate absol-
uant, qui tot grauissimis, doctis-
simisque viris accesserit, apud quos
Eugenius haud vulgari inuidiâ
flagrabat. Faciunt ad eundem fi-
nem, quæ ex actis Synodalibus
Basileensibus de Concilij auctori-
tate in medio ponuntur. Scio e-
nim, & profiteor cum eodem Pio
Secundo, *eum qui Romana secundum
Canonicas sanctiones præficitur Eccle-
sia, quàm primum electus est in sacro
Collegio, supremam à Deo potestatem
sine medio consequi, & per ordinem
in omnem diffundere Ecclesiam, eiúsque
peccata Diuino Iudicio relinqui.* Scio
Leonis X. Constitutionem de ijs,
quæ post Basileensis Concilij ad
Ferrarienses translationem sequu-
ta sunt, integram, illibatâque
esse, conseruandam : Neque illa
hunc in Commentarium refero,
vel asserendi, vel disputandi cau-

sa, quæ summis Pontificibus deinceps haud ita probata esse satis intelligo. Quorsum igitur? Vetus parcemia est, posteriorem diem prioris magistram esse. Multa nimirum nunc expedita sunt, & obuia, quæ retrofioribus erant admodum perplexa temporibus. Ut igitur non satis sanus haberetur, qui nunc in ea contumaciter niteretur, quòd plurimos olim renitentes habuerint; Ita prudenter parum faceret, qui veteribus insultaret, quòd ea non viderint, quæ doctior nobis ætas aperuit. In his multa pono, quæ de Pontificis in Concilium auctoritate Eugenij temporibus disputabantur: Quæ si ex ea, quæ id ætatis apud doctissimos viros, & celeberrimas Academias inualuerat sententia, æstimabat Amedeus, quis eis meritò possit succensere? Imò verò

quis nobis , si ea dumtaxat referimus , quæ passim ea ætate vsurpata ?

Κὰν βεγοῖς

Αἱ δὲ ἄλλαι πως φεγνίδες σοφώτεραι.

Vt igitur certa nobis esse debent, quæ Amedeum sequuta ætas illis de rebus, vel statuit, vel exposuit, ita minimè dubium esse potest innoxio errore à plerisque tunc, & pronuntiata, & credita. Lapsum itaque Amedeum ingenuè fate-
mur, sed innocenti lapsu; Basileenses autem, qui ei in lubrica via præiuerunt, ut à culpa minimè vindicamus, ita plurimos illorum in Ferrerorum, Lucemburgiorum, & aliorum virorum pietate præstantium albo ponimus, qui schismatistæ tempore ei se Parti ad-
dixerunt, quam tutiorem conscientia minimè temeraria sug-

gerebat. Quos, vel eò maiori laude dignos nemo ibit inficias, quòd in eorum numero esse noluerunt, qui ne vel ad horam videantur errasse, semper errant, infami pertinacia constantiæ famam aucupantes: superbissimi mortalium, qui videri Dij non homines volunt; quem enim, qui se hominem cogitarit, errasse puduerit? Quos igitur hortatores ad tantam dignitatem capeßendam inuitus audierat, illos in ea sponte deserenda non reluctantes adeò lætis oculis spectauit Amedeus, vt tum primum verè felix sibi suisque videretur, quum Felix nuncupari respuit. Et sanè si nulla nisi de innocentia felicitas, felix, atque iterum felix Amedeus, quem neque error nocentem fecit, & resipiscencia innocentissimum demon-

strauit. Hic operis scopus.

Scribendi modus à me susceptus, qui doceat magis quàm delectet ; qui in alienis eruendis, & proponendis, quàm in suis dilatandis exultet ; qui denique ut alienæ fidei totum tribuat, nihil suæ arroget. Quòd si plura descripsi, quæ iam alij publici iuris fecerunt, commodis tuis seruire me credidi, ut ad manum simul haberes, quæ hoc de argumento pluribus locis dispersa sunt : & fateor inuidiæ vitandæ gratia, pluscula verbis alienis quàm meis dicere voluisse, quæ si in Conciliorum voluminibus, aliisque probatis libris impunè leguntur, huc à me translata nemo iure vitio vertat. Propria tamen ab alienis discerni velim, ne modestiæ nostræ a-

cerbior interdum aliorum zelus officiat. Quæ verò lucem nondum viderunt, ut sunt epistolæ plures, & Pontificum rescRIPTA, ea scias ex instructissimo Serenissimi Ducis tabulario fidelissimè deprompta, tum ut fidem huic Commentario facerent, tum ut quendam quasi gustum tibi præberent eorum, quæ (si te, mi Lector, huic prælusioni fauentem habuero) integram Sabaudicæ gentis historiam aliquando daturus, non vulgari uti, spero publicæ utilitatis commodo, optima fide comparavi. Nam cùm Regia Sabaudicæ domus nullis non Regum, Principūve Christianorum familijs iam olim inserta sit, rara quædam, & eximia suis habet in Archiuis, quæ non modò

ad suam , sed ad aliorum etiam
Principum laudem , vtilitatém-
que pertineant. Fruere interim
istis , & in ijs Amedeum , imò
Deum ipsum quem tantopere a-
mauit Amedeus, ama.





AMEDEI

A Concilio Basileensi in Pontificem electi; Sub Allegoria Astrorum Solem eligentium;

PROSPHONEMATICVM.



ELICI *silua lucem occultabat
opacans*

*Orbis amor, cælique amor, & spes
viuida amoris,*

*Quâ vitreis ridet fugiēs Lemanus in undis,
Squamososq. greges florēti pascit in auro,
Ripaliaq. herbas concordi murmure adorat,
Indomitas ponitque iras. Sol dignior axe,
Lucis & imperio, quo lucem sponte tegebat,
Sēque efformabat cælo, radiosque premebat,
Vt premeret cælos; tumido felicior ostro
Neglecto, meliôrque ostro, & magis agnitus
ipsis*

*Quo latuit tenebris. Illum fortuna triumphos
Fastidisse suos, quos illi ingesserat vltro
Indoluit, celerésque rotas, & lubrica fata
Neglecto fregisse iugo: mirantibus astris
Augustum spoliasse iubar, cum purpura solum
Ambitiosa suis arderet vincere flammis;
Erubuit status Regem spreuisse Ducales
Ambitio, maiora parans, tantámque latere
Virtutem invidit; Tacitum irrisere decorem
Coniurata suis educere sidera siluis.
Et solem donare axi, qui lumine auito
Splendorem capiēdo daret, proprióque decore
Augeret luci pretium, maioráque ferret
Rheda, quàm illa daret sceptris & sceptra
foueret;*

*Qui Sol antè foret quã Solem nosceret axis;
Solis & imperium natiuo ferret in ostro,
Sole ipso & Stellis maior. Sed qualis inēptus
Est Solis splendor, qui nolens sidera cogit
E tenebris proferre diem? Non aurea gemmis
Scintillat pretiosa chlamys, nec purpura red-
dit*

*Natiuo augustum pretio, sed velat amictus,
Qui radios horrere docet; non serpa pyropis
Casariam ditant fluido quæ insultet in auro,
Sed rigidis intonsa comis vilescit, & ipso
Neglectu terret; Non sceptro innixus apricas
Dum tangit facit esse vias, sed spinea virga
Natantes firmat gressus; Non regia opacis
Osten-*

Ostentat confusa onycis, sed pinea silua
Vix capit errantē; soliū est in gramine lentis
Intextum ramis, non flauo murice pictum.
Sed lucet sine luce chlamys, vulgaris amictus
Cōdendo diffundit opes, peregrināque fulget
Lux tenebris animata suis: argentea spargit
Canities angusta faces, & legibus orbem
Virga rudis premit, & vili fastidit in auro
Sustentādo axes; animat tot silua smaragdos
Quot frōdes, ornat vinaci & murice stratum.

Regia liberior cœlo stellatur aperto,
Florenti ridetque solo; Sol aureus, aurum
Et patrias dū linquit opes, mendicāque luxus
Ornamenta fugit, PROPRIO SPLEN-
DOR BEATVS.

Qui te, digne astris, ô Sol pulcherrime, siluis
Abscondit, lucēque tegit qua sidera viuūt?
Ostrum spreuisti immortalī dignior ostro;
Te maiora vocant; astra elegere serenīs
Imperiis natum; currus tibi debitus axis
Sole alio fugiente diem; qui lumine terras
Implesti, nunc imple axē; tibi pōpa relieta est
Sorte tua minor; illius nunc sidera debent
Imperijs seruire tuis, & in axe triumphos
Illustrare tuos; Te Solem deligit ather.
Sol genuit potuisse legi, stellāsque periclis
Exultare suis, durata & fronte stupentes
Alloquitur sensus, Errarunt sidera cū me

*Indocili officio Solem voluere; reliqui
Augustum imperium, nimio ne pondere
pressus*

*Immoreter regno; sensi quæ pœna regendi;
Pūgit adhuc spiritus animū cruciata potestas;
Vixi alijs nimium, tandē mihi viuere cordi est.*

*Hoc unum tardasse nocet. Vix nata parētum
Sceptra pati potui. Libertas agnita nullis
Imperijs emitur, satis est me inflectere corda,
Et cœlo formare animum; insperata quietis
Attigit extremos portus mea cymba; procellas
Naufragijs experta suis, non sustinet ultra
Irritare neces, victa & tentare pericla;*

*Imparego tanta moli. Proh digna sereno
Pugna legi cœlo; radios ne fulgeat abdit
Sol tenebris, stelle quo luceat axe latentem.
Abducunt; fugit ille decus, fugientis & astra
Nituntur firmare decus. Cū lucidus error
Induit Astra.e formam, vultūque sereno
Subridens lentē augusto facta obuia Soli
Attonitum premit; O maior splendore, futura
Vix atas tante credet miracula laudis;
Viciisti inuidiam inuidia; tibi gloria crescet
Quò reliquis posuit metas; Nunc purpura
lucem*

*Erubuit neglecta suam; tibi Fama coronas
Appendet satiata malo: sed vera profari
Silicet oranti, turpe est ambire quietem,
Si cunctis nocitura quies; te publica vota*

*Astrorum, mundo errante, elegere, quadrigā
Assueta quò lucere gas, animésque labore.
Ærumnas sentire Orbis tu legifer Orbis
Sol debes; & qui rexisti sepè labantem,
Nunc patrio augurio debes firmare ruentem;
Iustitia adstringet, legúmque seuera potestas:
Sirenuis; culpa est, nostras contemnere leges;
Si recti te tangit amor, si libera cæli
Cura, labor tibi cura foret, mundóq. cadenti
Felicem prabere manum. Percussit acerbis,
Non fregit pectus monitis Astræa, paratum
Antè mori placida quā dulcia relinquere Pacis
Otia. Nec stellæ incæptis cessere periclis,
Diuersis rediere armis; verùm irrita semper
Durato cecidere sinu, obstinata latendi
Firmabat cura ingenium; sed vincere Solem
Insidijs natura suis, & cedere Soli
Edocuit, candore ipso monstrante triumphos;
OFFENDI COELVM NISI PVGNAM
CEDERET ASTRIS.*

*Inuitum hoc fregit pectus ne frangere nosset
Culpa; malo cessit, ne culpis cederet; Axis
Pæna fuit cùm pugna fuit, victoriæ cæli
Iudicio adscribenda Axi, cui maximus error
Non errasse foret. Vix legibus innuit, orbis
Agnouit Solem. Alipedes duxere quadrigam
Felici cursu, Solique arrisit Olympus,
Sol quamvis fleret. Monstris natura perēptis
Lætiæ portenta dedit; Saturnia sæcla*

*Æternum admifere diem. At dum publica
floret*

*Spes radijs animata fuis, & amabilis omnē
Spē superās Sol luce implet, Sol alter in axem
Erupt, Rhedámq. suam nullo omine raptam
Indignans, Solem se stellis eſſe, minaci
Indicit ſceptro. Stupere duos luceſcere Soles
Sidera, & in Solem Solem torquere ſagittas:
Ille tumens veteri ſceptro, hic felicior ipſo
Neglecto imperio; cauſa ille audentior, aſt hic
Augurio meliore micās, animoque minorem
Eſſe probās ſortē: exitio tātū agnitus alter,
Hic notus fama, & ſceptris; felicior ille
Hoc Sole aduerſo, qui regnum luce tueri
Magnanimū duxit, telis cū vincere poſſet.
Certauiere tamen; clara hunc pars ætheris, illū
Ara focis tutata fuit; nec vincere utrique
Sorte datum, et ſi pugna fuit, quò cedere poſſet
Riuali occumbente ſuis erroribus alter;
Et ſpōte imperium nullo aduerſante, ſequenti
Redderet, & lucis ſceptrum cedendo probaret
Inuitum accepiſſe. O ſceptro maior, & Orbe,
Prodigio vincente fidem. Sol lucis habenas
Ceſſit ſponte datas, & Solem reddidit Aſtris
Vnitum, radióſque ſuos ſeruire coëgit,
Felici exemplo; varios nam ſidera Soles,
Eiſi aſſueta pati, diuiſo & creſcere ſceptro,
Indignata alium nitida ſupponere Rheda,
Hoc ſpernente faces: cū nullus clarior axem*

Signasset radijs, signata est meta futura
Ætati, ne aliquis stellas illudere tentet,
Hoc facibus ludente suis, ut vinceret Astra.
Sed qui Fama tuam potuit superare reliq̃ta
Luce tubā, inuidia didicit stimulare venena
Inuidia, monstróque nouo, cedendo stupentes
Irritare faces, nocuit vicisse triumpho
Felicem errorem; nebulas offundere cœpit,
Et turbare diē, infidū expumādo venenum,
Et rabiē cruciando suam, satiatáq. mōstra.
Nulla tamen te larva teget, maioráq. mōstris
Lumina, neglectis viues sublimior Astris.
Quòd si Solarem impietas obnubere crinem
Audeat, innatam rabiésq. inuoluere lucem,
Tot Soles paritura dabunt tua lumina terris,
Quot lucem sensere tuam, Generisq. mi-
cantem

Agnosunt Patrem, Soles habuisse parentes,
Et Soles peperisse alios, qui noscere cælo
Occasum nequeunt, dubia & succedere nocti.
Sola tibi natura fuit, quò clarior euo
Lucescas, totiésque nouis oriare trophæis,
Quò geniti Soles accepta luce triumphant,
Vt posthac renouāte diem splendore, triūphis
Inuidia aternis intexere nesciat umbras.

P. P. ORINGIANVS.



FELIX V.

A MALEDICORVM
conuitio vindicatus.



VILIBET infelix felicia nomi-
na perdit :

*Non nisi qui felix sit calamus
redimit.*

*Conditio hoc grauior : calamos quaque hora
profanos ,*

Sacula felices non nisi rara ferunt .

Est igitur felix calamo qui fractus iniquo ,

Protinus insigni redimitur calamo.


Ludibrium vilis calami tua Gloria, FELIX,

Infelix, calamum hunc ni reperisset, erat.


EMANVEL THESAURVS.

ELOGIA AMEDEI.

NICOLAVS PP. V. *In Epist.
ad Ludow. Sab. Ducem.*

LEM se ad Vnionem, & Pacificationem Ecclesiæ in oculis nostris, & omnium fidelium exhibuit AMEDEVS; vt quidquid nobis factu possibile viderimus, suæ recordationi, ac honori, & vtilitati dilecti filij Nobilis viri LVDOVICI Ducis Sabaudia eius nati, ac ipsorum Illustri Domui libenter tribuamus.

Idem in Bulla an. 1448. 15. Kal. Febr.

T AMEDEI honor, fama, & reputatio illæsi, & integri remaneant, Literas, Processus, Mandata, & Decreta quæcumque, &c. contra præfatum AMEDEVM, Felicem V. in sua Obedientia nominatum, decernimus, & declaramus nullum effectum penitus sortiri: Sed per-

inde haberi debere ; ac si nullatenus emanassent: Eaque omnia, & singula cum inde sequutis, in Registris ipsius Eugenij prædecessoris, & nostris, & alijs locis quibuscunque aboleri, & deleri mandantes, omninò tollimus, & cassamus, irritamus, & annullamus.

*PIVS PP. II. apud Gobelin.
lib. 7. Comment.*



MEDVS procul ab armis in montibus Regnans, nunc horum, nunc illorum Arbitrarij eligebatur, atque vnus omnium existimabatur, qui sibi, & alijs rectè consulere nosset: diu ad eum quasi ad alterum SALOMONEM hinc Itali, hinc Galli pro Consilio de rebus arduis recurrerunt.

ONVFRIVS Lib. 3. de Pont. creat.



MEDVS in solitudine Ripariæ Gebennensis Diocesis vitam ANGELICAM agens, in Pontificem Romanum electus est.

FRANCISCVS GONZAGA

Episcopus Mantuanus , Tertia

parte Histor. Ord. S. Franc.

in Prou. S. Bonau.

Conu. 45.



MEDEVs defuncta vxore,
relictâ Ducali cura Ludouico filio, studio rerum diuinarum, ac cœlestium contemplatione allectus, cum paucis suorum in agrum Gebennensem secessit, & prope Lacum Lemanium cœnobium construxit, ibique diu, noctûque fidelissimè Altissimo Domino famulabatur. Cuius odor SÂNCTITATIS in omnem terram, vbi fides CHRISTI colebatur, effusus cùm esset, in Concilio Basileensi ad Summum Pontificatum ex illo cœnobio assumptus fuit, Felîxque nuncupatus; cui supremæ dignitati, concordix gratiâ, sese postea VOLVNTARIE abdicauit.

PHILIPPVS BERGO-
MENSIS in Chron.



VM PACIS, & HUMILITATIS amator existeret
AMEDEVS, mortuo Eugenio Pontifice, nullis pulsatus precibus, Nicolao Pontifici eius successori humiliter cessit, & in loco pristinae humilitatis rursus redijt, & c. Deficiens demum in senectute bona post obitum etiam MIRACVLIS MVLTIS clarus effulsit.



NOs infraſcripti Theologi Com-
mentarium hunc ab Hiftoriogra-
pho Sereniſſimi Ducis elaboratum, ex
præſcripto Illuſtriſſimi, ac Reuerendiſ-
ſimi Archiepiſcopi, ac Sacræ Inquiſi-
tionis, legimus, ac diligenter examina-
uimus: In quo non modò nihil contra
fidem, aut bonos mores inuenimus, ſed
ſingularem auctoris induſtriam proba-
uimus, qui in aſſerenda optimi Princi-
pis **A M E D E I** innocentia, S. Eccleſiæ
Romanæ, Summorúmque Pontifi-
cum, atque adeò ipſius Eugenij Quar-
ti, (quem vt verum, legitimúmque
Pontificem reueretur) auctoritatem
agnoscit. Erit igitur ex vtilitate publi-
ca, & maximo Hiftoriæ Eccleſiaſticae
commoðo, vt opus hoc publici iuris
fiat. Auguſtæ Taurinorum, Idib. Mart.
1624.

Fr. Ioannes Baptiſta Ferrerius Ord.
Prædicatorum, Sacræ Theologiæ
Doctör, Prior Sancti Dominici Tau-
rinen.

Fr. Ioannes à Moncalerio Capucinus.

Iosephus Alemannius Rector Collegij
Taurinensis Societatis I E S V.

Imprimatur.

Philibertus Millictus Archiepiscopus
Taurinen.

Fr. Camillus Ballianus Inquisitor Tau-
rinen.

Argenterius, pro Serenissimo Duce.



AME-



AMEDVS PACIFICVS,

SEV

DE EVGENII IV. ET
AMEDEI IN SUA OBE-
dientia Felicis Papæ V.
nuncupati con-
trouersijs

COMMENTARIVS.

IHEATRVM aperio, in ^{I.} ^{Propositio.}
quo pertinacibus scissa dis-
fidijs Ecclesia laborabit,
gemet, eluctabitur, ac de-
mum, vt assolet, victrix
magno totius Reip. Christianæ plausu
triumphabit. Scenam ingredientur
Pontifices, Imperatores, Reges, Prin-
cipes, & præcipua tum occidentis, tum
orientis orbis capita, abreptis in partes

A

studiis, prout cuique aut pietas, aut priuata commoda, aut ambitio, non aliena minùs quàm sua cordi fuere. E V G E N I V S id nominis Pontifex quartus, & A M E D E V S Sabaudiaë Dux, in sua obedientia Felix Papa quintus nuncupatus, primarum in hac scena partium actores spectabuntur: Sed ne quid incertis rumoribus, odio, vel assentationi datum videatur, è suis fontibus rei memoria erit arcessenda.

II.

Basileense
Concilium
indicitur.
*Const. conc.
sess. 39.*

*Basil. conc.
sess. 1.*

Constantiaë decretum fuerat vt decimo quoque anno generalia Ecclesiaë comitia coirent: indixerat in eum finem Basileaë Concilium Martinus V. quo sublato, Eugenius Pontifex summus Iulianum S. Angeli Diaconum Cardinalem sedis Apostolicaë legatum, & præsidem eò destinarat.

Inchoatur.

Finis eius.
sess. 1.

Initium Concilio factum die Iouis 19. Iulij anni M. CCCC. XXXI. præuijs solennibus formulis. Triplex finis ei propositus, *heresum extirpatio, bellorum inter Principes Christianos extinctio, & morum in Ecclesia reformatio.* Diu deinceps ab incepto opere vacatum, prorogata sessione secunda ad 15. Kal. Mart. anni sequentis. Qui dies Ecclesiaë funestus illuxit; in eo enim semen-

tis iacta est eorum omnium dissidio-
rum, quæ per totos sexdecim, & eo am-
pliùs annos continua propagatione
proserpserunt. Decreto quippe edito
statuerunt P P. *Omnes cuiuscunque di-*

Concilio Pa-
mam subiicit.
sess. 2.

*gnitatis sint, etiam Papalis, Concilio obedire
teneri, in his quæ pertinent ad fidem, &
generalem Reformationem Ecclesie Dei in
Capite, & in membris. Ad hæc, nullum
quavis authoritate, etiam si Papali dignita-
te præfulgeat, Concilium dissolvere, aut aliò
transferre posse, statutis pænis in quosvis,
qui contra moliri, aut decernere aliquid
tentarent.* Perculit ea res Eugenium,

Cômouetur
Eugenius.

fenisitque invidiam facti; verùm ne Ba-
sileenses audax initium contumaciori-
bus ausis propellerent, festinato con-
silio Æmulatorum spes anteire parat.

Abrogat itaque pro potestate legatio-
nem Cardinali Iuliano, & toti Conci-

Renocat le-
gatos suos &
Concilium
abrogat.
Tacitus.

lio authoritatem: Prudentior fortè,
certè acceptior futurus, si lentio rem
iram fecisset: *nihil enim æquè bona consi-
lia pessumdedit, quàm spretis quæ tarda, cum
securitate, prematura, vel cum exitio pro-
perare.* Faciebat sanè ab illo æquitas

causæ; quid enim turpius quàm mem-
bra, capiti; liberos, parenti; Patri fa-
milias, seruos; oues, Pastori moderari

Et instè, si
caurè.

Epist. ad Leon.

velle? Pontificem verò summum vniuersalis Ecclesiæ Caput, non Concilium modò Chalcedonense Leonem alloquens appellat, verùm ipsi Basileenses, quorum de ipso Eugenio loquentium hæc sunt verba: *Nemo erit nostrum qui pedes eius ut beati Petri nõ osculetur, qui ut Vicarium Christi non honoret, erit Concilij C A P V T.* & Cardinalis Iulianus in responsione sua ad legatos Eugenij.

*Concil. Basil. sess. 14.**Edition. Colon. p. 114.*

Quidquid in sacris statuitur Concilijs, sua etiam (hoc est Pontificis Rom.) auctoritate statuitur, qua semper ibi refulget ut prima, & precipua, Caput, & directrix. Nos enim unum Ecclesiæ corpus sumus, ipse huius corporis Caput sub capite Christo. Si caput, vnde membris in illud auctoritas? Certè nisi illi (ut cum Hieronymo loquar) exors quædam, & ab omnibus emittens potestas detur, tot in Ecclesia efficientur schismata, quot Sacerdotes. Eugenium ista absoluebant, nisi causæ confidentiâ seuerioribus remediis se implicuisset.

Lib. con. Lucif. ferian.

III.

*Intercedunt Basileenses abrogationi.**sess. 3.*

Namque vbi se Patres damnatos intellexere priusquam auditos, exarsere scilicet etiam illi qui neque liuore, neque ambitione iuerant in sententiam: ne quid tamen turbidè agerent, per oratores suos Ludouicum de Palude

PACIFICVS. 5

Lausanensem Episcopum, & M. Henricum Staſter Decanum Traieſtenſem Eugenium adierunt, cauſam dicturi, ſi audiret; interceſſuri eius decreto, ſi obſtinaret. Dum vltro, citroque com-
meatur, exaſperantur animi, incendi-
tur vlcus, contagio à Prælatiſ in Prin-
cipes gliſcit: & in eo res erat, vt vel eo
ipſo probaretur cauſa Concilij, quòd
pluribus placeret. Iam erant illæ vo-
ces in omnium ore, Piſaniſ Patribuſ ^{Rumores} varij.

bene ceſſiſſe, quòd Concilio Pontifi-
cem ſubieciffent, fruſtra fuiſſe alia
omnia priuſquam Conſtantieneſ hanc
viam inirent. Actum propè de Eccleſia
ſuperioribuſ anniſ, niſi Pontificeſ in
ordinem cogere licuiſſet. Cur verbis
inuidia ſit, ſi de innocenti exemplo tra-
hantur? quid plura? Ineunte anno tri-
geſimo tertio Baſileam venit abſ Reli-
gioſiſſimo Imperatore Sigifmundo de-
ſignatuſ Vulielmus Bauariæ Dux Con-
cilij Proteſtor, adſunt Principum, Re-
gumque Legati frequentes. Abrogan-
tur in publico conceſſu Eugenij Re-
ſcripta, dieſ ei indicitur, fama eiſ la-
ceratur, propè abeſt, vt ex albo Ponti-
ficum eradatur. <sup>Eugenij acta
reſcinduntur.
ſeſſ. 9 & 10.</sup>

IV.

Vrebant iſta Piſſimi Principiſ Ame-
Amedeuſ Sa-

baudix Dux
Legatos Basi-
leam mittit.

dei Sabaudix Ducis mentem de publi-
ca Pace semper sollicitam : Neque par-
erat, vt qui iunior componendis Eccle-
siae rebus in Constantiensi Concilio v-
tilem adeò nauarat operam, nunc senilem
prudentiam conciliandis animis
exercitam, in tanto rerum discrimine
desiderari pateretur. Episcopum igitur
Bellicensem vnà cum aliis, & generis
claritudine, & multo vsu Illustribus
viris Basileam allêgat, consiliis suis ap-
primè instructos. Duo potissimùm in
mandatis habebant, Pacem vt omni
via Francos inter, & Burgundos com-
ponere, & prorumpentes in Ecclesia
motus comprimere studerent; adeò in-
census Caritate Amedei animus nihil
nisi pacis artes reuoluebat : Sed quo-
niam Principi magna gerendi auido,
præcipua rerum in famam laboranda
sunt, oratores suos in primis sollicitos
esse iussit, honorificus vt in eo confesso
locus ipsis attribueretur : neque diffi-
le fuit illis obtinere, quod cupiebant,
priùs quàm oratores Ducis Burgundix
venissent, quibus cedere, vt indecorum
videbatur, ita præire neutiquam spe-
randum. Tandem in eum modum

Controuerfia
pro Sede O-
ratorum,

Composita.

composita controuerfia, vt dexter Bur-

gundioni locus, post Patriarcham Alexandrinum; sinister post Antiochenum Sabauda assignaretur: addita declaratione, hunc quàm proximum à Burgundione esse honoratiorem. Reclamauit tamen Amedeus his auditis, & per literas cum patribus grauitè expostulauit, *in sedibus Oratorum suorum prægrauari se non ferens*, vt constat ex ea Epistola, quæ inter acta Concilij excusa legitur: Sed placet recitare quam super ea re oratores Amedei Contestationem ad patres habuerunt, ne quo præiudicio domini sui dignitas læderetur.

V.

In nomine Domini Amen. Tenore presentis publici instrumenti cunctis pateat euidenter, & sit notum; Quòd anno eiusdem Domini 1433. indictione XI. die verò Veneris, septima mensis Augusti, Pontificatus Sanctissimi in Domino Patris, & domini D. Eugenij diuina prouidentia Papæ Quarti, coram Reuerendissimis in Christo patribus, ac dominis Iuliano Diacono S. Angeli Germaniarum legato, in Sacrosancto generali Basiliensi Concilio in Spiritu Sancto legitimè congregato Presidente Antonio Ostiensi, Branda Portuensi, Ioanne Tit. S. Laurentij in Lucerna, Ioanne Tit. S. Petri

Protestatio
Legatorum
Sabaudien-
sum pro loco
honoratiore.

A iiij

ad vincula Presbyteris, Alfonso S. Eustatij, & Dominico S. Maria in via lata Diaconis miseratione diuina Sacrosancta Rom. Ecclesie Cardinalibus, necnon Ioanne Alexandrino, Ioanne Antiocheno Patriarchis, Amedeo Lugdunensi, Hugone Rhotomagensi, pluribusque Archiepiscopis, Episcopis, Abbatibus, ac venerabilibus doctoribus, & magistris dictum Sacrum Concilium facientibus, & celebrantibus in congregatione generali tenta, & celebrata in Ecclesia Maiori Basiliensi existentibus, & congregatis in nostrum Notariorum publicorum, & testium infra scriptorum ad hac vocatorum, & rogatorum presentia, pralibatus Reuerendiss. Cardinalis in manibus quendam Papiri cedula concernentem certam ordinationem circa assignationem locorum in sessionibus, congregationibus generalibus, & alijs actibus publicis, & priuatis Sacri concilij Dominis oratoribus Illustrissimi Principis D. Amedei Sabaudie Ducis ad auisandum, & de super deliberandum propositam, non nullis protestationibus interuenientibus, ad legendum eandem, alteri videlicet mihi Petro Bruneti exhibuit, atque dedit, quamque alta, & intelligibili voce de mandato eiusdem D. Cardinalis legati, & Prasidentis legi, huiusmodi verborum sub tenore. Sunt

Ambasciatores Illustrissimi Principis D. Ducis Sabaudia, videlicet Dominus Episcopus Bellicensis, & alij sui collega contenti acceptare locum quem eis assignat hac Sancta Synodus in sessionibus, congregationibus generalibus, & alijs actibus publicis, & privatis; Ad sinistram partem, immediate post Patriarcham Antiochenum, nisi de nouo subueniant aliqui Regum, vel Ducum Ambasciatores, qui iure suo precedere debeant ad euitationem cuiuscumque turbationis, & scandali: Protestatione tamen prahabita, & admissa per Sanctam Congregationem generalem, quod possint, & valeant probare quoties opportunum fuerit, & eis videbitur: Quod antequam erigeretur Comitatus Sabaudia in Ducatum, Comites Sabaudia, qui fuerunt pro tempore à trecentis annis praeteritis, continuò fuerunt Duces Chablasij, & Auguste, & sic se semper intitularunt in suis Patentibus literis, cum titulo Comitatus Sabaudia, prout Dux Sabaudia modernus est Dux Chablasij, & Auguste, & ita intitlatur hodie in suis patentibus literis cum Ducatu Sabaudia, & propterea debere precedere in honoribus Creatione posteriores, & cum protestatione quod casu quorum Dominus non haberet ratum, & gratum, quod possint redire ad priorem locum,

Principes Sabaudia trecentis annis ante Basileense Concilium erant Duces.

& prosequi iustitiam suam, & cum istis protestationibus, & causis expressis Dominus Episcopus Bellicensis continuabit in loco assignato ut Episcopus Ambasciator, alijs Ambasciatoribus eiusdem Domini nostri in suo loco remanentibus. Qua siquidem ordinatione lecta, & per verbum, Placet, acceptata, locoque prius per Sacrum Concilium post Dominum Patriarcham Antiochenum ad partem sinistram iuxta ordinationem huiusmodi, eidem Episcopo Bellicensi assignato, & acceptato, Regratiatioque per eundem Sacra congregationi de dicta gratiosa ordinatione, ac protesto quod dictus locus honorabilior erat, quàm locus ab alia parte post Reuerendum Patrem Dominum Episcopum Niuernensem, Ambasciatorem Illustriss. Domini Ducis Burgundie, ipse Dominus Episcopus Bellicensis nomine Ambasciatorio quo supra, de huiusmodi ordinatione, protestatione, & ceteris premisis petijt à nobis Notarijs, & scribis infra scriptis sibi fieri, atque tradi unum, vel plura, publicum, vel publica instrumenta, ad futuram rei memoriam, &c.

VI.

Amedeus Legatos mittit ad Eugenium.

His ita confectis, ad reliqua se accingunt, quæ sibi fuerant mandata; sed illis dum sedulò insunt, quid interim Amedeus apud Eugenium mo-

liretur audiamus. Præmiserat alios ad eum oratores Petrum de Menthone D. Montistroterij, Ludouicum de Montheolo, & Philibertum de Rupe, qui cum ad componendas Basileenses controuersias hortarentur, vt ex eiusdem Eugenij rescripto constat, in quo præter cætera hæc habentur. *Ceterum non amouentes cogitationes nostras ab ijs rebus, quæ statum Catholica fidei concernunt, certis aduisamentis per venerabilem fratrem nostrum Archiepiscopum Ebredunensem à nobis postulatis annuimus, vt ea ab ijs, qui in Basilea existunt tractari, & ad effectum deduci possint. Et quia huiusmodi aduisamenta statui Reip. Christianæ atque vniuersali Ecclesiæ salutaria sunt, gratum nobis erit si tanquam Catholicus Princeps operam dabis, quod huiusmodi aduisamenta iuxta facultatem à nobis concessam ad executionem, & effectum deducantur. Datum Romæ apud S. Petrum An. In. D. 1432. 17. Kal. August. Pontificatus nostri an. 2.*

Rescribit
Eugenius.

VII.

Cum verò tribus illis Articulis, propter quos Concilium dissoluerat Eugenius, nequaquam acquiescere in animum induceret, suos Amedeus iterum vnâ cum Imperatoris, Francorum Regis, & Ducis Burgundiæ oratoribus,

Iterum Legati Sabaudienses Eugenium adeunt.

Respondet
Eugenius.

Amedei in se
beneuolen-
tiam commē-
dat Eugenius.

Romam ire iussit, ne quid intentatum relinqueretur : interclusis tamen ob Venetorum, & Mediolanensium bella itineribus, cūm peruenire non potuissent, sic ad eum rescripsit Eugenius. *Intelleximus Excellentiam tuam misisse suos oratores, qui unā cum oratoribus Carissimorum in Christo filiorum nostrorum Sigismundi Romanorum Imperatoris, ac Caroli Regis Francorum Illustrum, & dilecti filij Nobilis viri Philippi Ducis Burgundiae, qui huc venerunt, & debebant ad nos accedere super comprobatione Decreti cuiusdam facti in Concilio Basiliensi. Verūm propter guerras circumvicinas non potuisse ad urbem venire, hoc perinde habemus, ac si illi ad nos venissent, & ita est nobis grata, & accepta tua bona voluntas, & diligens opera, quam in Concilio pro honore nostro, & sedis Apostolicae demonstrasti, pro quibus tuam prudentiam in Domino summis laudibus commendamus. Verūm ante aduentum dictorum oratorum iam conclusimus super materia illa, cūm venisset huc cum literis praefati Imperatoris Ambasciator Venetorum, quem remisimus cum Bullis opportunis prout notum erit tibi. Hortamur tamen tuam deuotionem, ut quemadmodum haecenus fecisti, sis intentus, & feruens ad*

defensionem, & conseruationem nostri honoris, ac dignitatis, & auctoritatis Apostolicae Sedis, quam velle impugnare ad praesens non expedit, neque conducit Ecclesia vniuersali, quae per debilitatem capitis, ut ipsa debilitetur, necesse est. Hoc igitur considerans, dilecte Fili, mades, & exhorteris Praelatos tuae ditionis in Concilio existentes, ut non permittant auctoritatem nostram, & Romanae Ecclesiae suppeditari; & quod haecenus à sanctis Patribus constitutum, & huc vsque seruatum est, ut id quoque obseruetur in posterum totis viribus operam praestent, ut sic agens apud Deum merearis consequi aeterna praemia, & apud homines laudem, & gloriam consequaris. Datum Romae 1433. Prid. Id. Ian. Pontif. nostri an. 3.

VIII.

Non de nihilo Eugenius magnam in optimi Ducis Zelo spem collocarat; nullus enim Principum erat, qui adeò constanter in tuenda ipsius auctoritate incumberet. Nec Christianae Reip. salutem tantum, aut Pontificiae dignitatis Maiestatem, sed singularem etiam cum Eugenio amicitiam studij huius incitamentum habebat. Fidem facit Epistola proximo mense Martio data. *Iam pridem, inquit Pontifex, à multis fide dignis audiuimus, & quotidie a venera-*

Eugenium
inter, & Ame-
deum priuata
amicitia.

Amedei in se
merita extol-
lit Eugenius.

*bili fratre nostro Ioanne Episcopo Ambia-
nensi Referendario nostro audimus, & vera-
citer informamur, quantum tua nobilitas
sit intenta, & omne studium suum apponat
ad honorem, & statum nostrum, & Romanæ
Ecclesiæ conseruandum. Accessit etiam fida
relatio super hoc dilecti filij Ioannis de Gri-
boual Cubicularij nostri, qui tuas credentia-
les literas ad nos tulit, & commissa sibi per
te, nobis fideliter, & prudenter exposuit;
Ex quibus optima voluntas tua nobis inno-
tuit, quæ etiam cognita dudum erat. Et pro-
pterea regramur tibi, ac fidem, & deuo-
tionem tuam plurimum in Domino commen-
damus, hortantes te, ut in similibus iustis
operibus perseuerans, quibus multos alios
superasti, te ipsum superare coneris. Nos e-
nim recognoscentes merita tua, quantum
cum Domino poterimus, studebimus tuæ Ex-
cellentie complacere, sicut tibi prefatus E-
piscopus nunciabit, & super ijs nonnulla
commisimus predicto Cubiculario nostro ad
tuam presentiam venienti, & ideo velis ei-
dem in his, quæ tibi referet parte nostra su-
per ista materia adhibere credentie plenam
fidem. Datum Romæ, apud S. Chrysogonum
an. 1433. Pont. an. 3.*

IX.

Prorogari
suspensionem
Eugenij po-
stulat.

Quibus verò officiis perfunctus sit
Amedeus, seu vt aduersariorum Euge-

nij potentiam infringeret, seu vt facultatem criminantibus tolleret, seu denique vt inuidiam factorum eius minueret, etſi ex toto non ſit traditum, plurima tamen ad nos peruenerunt, ex quibus de reliquis facilis erit coniectura. Nam cùm flagrantibus vtrunque odiis multa multi in vulgus iactarent, ederentque ſcriptis, prout partibus impliciti erant, tandem 14. Iulij eiufdem anni trigefimi tertij dies à Concilio Pontifici dicta erat, vt ſe ſiſteret; Reſuſcitant, contumaciæ inuſta pœna xi. Septembris; & niſi interceſſiſſet Imperator, triginta dierum impetrata prorogatione, prona erant omnia ad extrema quæque: Quibus vt occurreret Amedeus participato cum Burgundione Conſilio, Prolationem aliam, ſicut in votis habebat Eugenius, à Patribus extorquere aggreditur. In eum finem vtriuſque Oratores communi ſtudio libellum ſupplicem Præſidi Iuliano porrigunt die Veneris ſecunda Octobris, cui in hæc verba reſponſum eſt.

Quod Sereniſſimus D. Imperator nuper omnia ſeruitia per ſe Eccleſiæ Sanctæ Dei impenſa per ſuos Oratores reſerauit, ſupplicans, vt præmiſſorum intuitu ſacrum Concilium

Concilij
Reſponſio.

prorogare vellet terminum datum Papa ad 30. dies; quod Concilium cum magna difficultate fecit, unam in decreto apponens clausulam, quod nulla alia ad cuiusvis instantiam dabitur dilatio. Nihilominus tamen Concilium non intendit procedere ad depositionem Papa, nisi consultis Dominis Principibus, quodque Domini in deputatationibus singulis supra huiusmodi cedula deliberabunt, & respondebunt. Multa id temporis agitata, prout quisque mollioribus vel acrioribus consiliis tutiùs res geri opinabatur. Incidit in manus meas scriptum per eos dies ad Ducem Burgundiæ missum, in quo potissimæ rationes referuntur, quæ prorogationem dissuadebant. Primò considerandum est (ait autor) quod Papa duobus, & viginti continuis mensibus per Concilium fuit expectatus, requisitus, & monitus, etiam per Reges, & Principes, ut adhereret sacro Concilio, ut reuocaret dissolutionem per ipsum factam, & plures dilationes super hoc sibi datas: quod facere recusavit. Sed pendentibus dilationibus misit ad Reges, & Principes literas, & nuncios, fecit impugnari, & diffamari Concilium propter sibi acquirere fauores: propterea cum sufficienter & amorosè fuerit expectatus, & non fuerit sequutum

Rationes,
quæ proro-
gationi ob-
stabant.

sequuntur nisi malum, nullo modo videtur alia dilatio danda. Secundò, pendente dilatione data ad instantiam Imperatoris, si alia daretur super eodem ad instantiam aliterius, non esset sufficiens honorum Imperatoris. Tertio, omnes, & singuli iurarunt decreta Concilij conseruare, & custodire facere quantum in ipsis est. Nunc dare dilationem esset contra decretum venire, in quo est clausula derogatoria, videlicet quòd non possit prorogari ad instantiam cuiuscumque. Quarto, semper Papa quæsiuit quòd darentur dilationes, sperans aliquam causam superuenire, quæ posset operari dissolutionem, sicut pestem, carentiam victualium, guerram, turbationem, ac seditionem in Concilio, quam aliàs procurauit per literas, & nuntios. Quintò, dare dilationem, & tempore pendente Concilium dissolueretur, Bohemi sumerent maiores vires, & debilitarentur Ciuitates, quæ se opponunt eis, & sperant habere prouisionem à Concilio; & si Concilium esset dissolutum, concordarent se cum eis, & tunc diffunderentur per Alamannias, & ad alias nationes. Sextò, dare dilationem erit dare occasionem Prælatiis existentibus in Concilio recedendi, qui ibidem fuerunt ferè tribus annis cum maximis expensis, & laboribus; Reges verò, & Principes qui nondum

miserunt, retardarent Ambasciatores suos. Septimò, non petitur dilatio, nisi ad evitacionem schismatis, & scandali, ac ad iustificationem Concilij, ne videantur nimis leuiter recessisse ab eo; sed hoc non videtur sufficere, nisi si fuerint certi, aut saltem sperent verisimiliter obtinere ab eo adhesionem puram, & sicut petitur: & ad hoc respondetur quod cum ad monitionem, & requisitionem Ecclesiæ, ac multorum Principum, & ultimæ Imperatoris noluerit adherere, & distulerit 22. mensibus, & ultra, non faciet ad requestam cuiuscunque alius, sed efficietur durior, sperans posse pacificare Principes, ut remaneant secum, & sic erit magis obstinatus. hæc & alia id genus iræ proprii, & Eugenio offensi.

X.

*Rationes in
oppositum.*

Cæterum non deerant sibi, & causæ Amedeus, aliique Pontifici æquiores, aliam esse contendentes huius, aliam Constantiensis Concilij rationem, in eo neque satis certum fuisse quis ex tribus legitimus esset Pontifex, & ipsorum consensione factum esse, ut Concilij iudicium subirent, nunc minimè dubitari posse quin Canonicè Eugenius fuerit electus; & ipsum non modò non consentientem, sed renitentem ad iudicium trahi. Magnum illum

Francorum Regem, Imperatorémque Carolum cunctis Principibus in oculis esse debere, qui Leonis quamuis pessimis de criminibus insimulati, auctoritatem semper reueritus est, exemplóque suo Patribus in Concilio Romano præiuit in hæc verba: *Nos sedem Apostolicam, quæ est caput omnium Ecclesiarum iudicare non audemus. Nam ab ipsa nos omnes, & Vicario Dei, scilicet Pastore eius, iudicamur; ipsa tamen à nemine iudicatur, quemadmodum antiquitus mos fuit.* Ut ut sit, maximam omnium, quæ in Ecclesia Dei esse possunt, controuersiam, non esse in tantas angustias coniiciendam: bona consilia, mora valescere, impetum sceleri proximum, non nisi à famæ suæ prodigis periculum imminens grauiore periculo redimi; hætenus Eugenio apud sapientissimos quosque festinatam sententiã præiudicasse non leuiter: cur igitur pari præcipitatione illum absoluant, & suam apud Reges, & Principes integritatem corrumpant? Vel sapiant nocentis casu, vel innocentem fateantur.

Papa Iudicem in terris non habet.

Anastaf. Biblioth. in Leone

3.

XI.

Valuerunt ista apud Patres, & prolationem obtinuerunt specie magis quàm reapse salutarem: assultantibus,

Prolatio data.

Eugenius
conciliatur
Basileensibus.

Sessio 16.

Confirmat a-
cta Concilij.

Reuocat om-
nia, quæ con-
tra Concilium
fecerat.

quippe, & aures Eugenij continuò verberantibus Imperatoris, & Christianorum Principum monitis, frangi se passus est, vt ad conditiones eas pacis descenderet, quas Basileenses postulabant; quæ conditiones in ea Bulla describuntur, quam decimo quinto Decemb. eiusdem anni trigesimi tertij Romæ dedit, & Basileæ in Concilio nonis Februarij anni sequentis recitata est, assidente Imperatoriâ magnificentia Sigismundo, Vulielmo Bauariæ Duce, aliisque Imperij Principibus, & Baronibus: Summa est, *quòd cum certis de causis Eugenius Basileense Concilium legitimè congregatum pro extirpatione heresum, Pace populi Christiani, ac generali reformatione Ecclesiæ, in Capite, & in membris dissoluisset, & ex illa dissolutione orta essent graues dissentiones, & grauiores oriri possent, decernere se, & declarare præfatum generale Concilium Basileense à tempore Inchoationis suæ legitimè continuatum fuisse, & esse, prosecutionemque semper habuisse, continuari, ac prosecutionem habere debere ad prædicta, perinde ac si nulla dissolutio facta fuisset. Quinimò prædictam dissolutionem inanem, & irritam fuisse. Præterea reuocare se duas literas (addit*

alias quasdam suo nomine fictas, & vulgatas fuisse, quarum autor non esset: quod moneo, vt lector meminerit multa per hæc tempora partium studio in vulgus exisse e mentita, & calumnijs foeda, quorum ipsa partium capita nihil nossent) *à se promulgatas in Concilijs præiudicium; & quidquid per se, aut suo nomine in derogationem eiusdem sacri Concilij, seu contra eius auctoritatem factum, & attentatum, seu assertum est, cassare, renuocare, irritare, & annullare: vitrum autem fuerit legitima Citatio, & defensio, velle se stare iudicio ipsius Concilij.* hæc quam cautè, & sapienter ab Eugenio scripta, factæve sint, aliorum esto iudicium; Enimuerò Basileenses his acceptis literis nihil antiquius habuerunt, quàm vt decreta renouarent, quibus statutum erat, *obedientiam à Papa Concilijs deberi in his, quæ ad Ecclesiæ reformationem in Capite, & membris pertinent,* vt sic non sua modò, sed etiam Pontificis auctoritate stabilita viderentur. Certè cùm recruduere contentiones, hoc maximè Eugenium zelo, velut suo, conficere nitebantur, qui præter vim sibi factam, quid opponeret, non habebat.

Subiicit se
Concilij iudicio.

Damna inde
sequuta.

Sessio 18.

XII.

Redierat Ecclesiæ pax redintegrata Amedeus

B iij

*fancita Pace
et agit seculum.*

Concilij cum Pontifice consensione : & ea rerum facies erat, quæ Principibus Christianis non modicam tranquillitatis spem exhiberet ; magna sanè omnium voluptate , sed nostri in primis Amedei , qui per eos ferè dies ad optatum solitudinis Portum cymbam suam appulerat, vt in eo abstruentibus Aulæ curis expeditior quiesceret. Sed quoniam exemplo suo fecit Amedeus, orbis vt Christianus agnosceret nullum adeò virtutum sterile sæculum esse, vt non illustri aliquo facinore clarescat, neque morum colluuiem eò vsque Principum Aulas scēdasse, vt purioris sanctiorisque vitæ desiderium quorundam mentibus non altè infideat, enitendum nobis est, vt facti huius memoria, quàm fieri poterit incorrupta in posteros abeat.

Disponit res suas.

Iam diu erat cūm Amedeus secum ipse agitabat consilium abdicādi Principatus, & se totum Deo deuouendi : constituendæ tamen erant prius res domesticæ, publicæve , ne quod ex eius absentia detrimentum Resp. pateretur, collocandæ in primis filiæ, & Regum Principūque potentissimorum necessitudinibus stabilienda Do-

mus; Primogenito coniux optanda è Regali Lusignanorum apud Cyprienses stirpe, componendæ cum Montisferratenfi Marchione controuersia, vt quietum, & securum filio Imperium relinqueret: his itaque constitutis Princeps belli pacisque artibus clarissimus adiectis ad paternam hæreditatem vltra, citràque Montes amplissimis Prouinciis, Ducali dignitate auctus, affinitate cum maximis Regibus contracta, firmato sanctissimis legibus Imperio, restituta bis Ecclesiæ Pace, tandem quod multis ante annis prouisum, deliberatùmque habebat, reipsa exequi, & perficere aggreditur. Sylua est Ripallia descriptio. altissimis opaca nemoribus ad ripam Lacus Lemani è regione Losannæ, vix duobus, tribusve stadiis abs Thononensi oppido sita, amœnissimis hinc inde pratis, vinetis, & sationibus distincta: quam à vicina lacus Ripa, Ripalliam vulgus vocabat. Amauerat locum huc iam à primis annis Amedeus, in eoque domum Regiâ magnificentiam fabricarat: huic Paradisum addiderat, in quo Cerui, Damæ, quæque alia sanguinis humani innocentes feræ sunt, impunè stabulabantur.

XIII.

Vnde illi mēs
solitariae vitæ
capessendæ.

Verùm vt erat etiam inter remissiones animi, & Ludicra ipsa, pietatis retinentissimus, Monasterium quoque magnis sumptibus inibi extruxerat, aduocatis è celeberrima Agaunensium Fratrum ordinis S. Augustini Abbatia Religiosis viris, qui Deo famularentur, & ipsi (cùm eò se laxandi ex grauioribus occupationibus animi causa reciperet) ad pietatis studia facem præferrent. Siue igitur ex frequenti cum sanctissimis Cœnobitis consortio, seu insito, & propè innato quodam rerum diuinarum studio, quo iam inde à prima adolescentia tenebatur, seu, quod verius existimārim, longa rerum experientia edoctus, quàm fluxa, & inania sint illa, quæ homines tanti facere solent, opes, honores, & dignitates etiam summæ, in altam quandam omnium istarum rerum despicientiam venit, quæ illum sensim ad tranquillum, omnisque agitationis expertem secessum quærendum impulit.

Calamitosissi-
ma Christiani
orbis facies.

Cogitabat secum vir sapientissimus quot, & quàm funestas in amplissimo orbis Christiani theatro tragœdias quadraginta illis annis, quibus sceptrum tenuerat, excitatas viderat, & peractas.

Replicabat animo horrendas illas tempestates, quas Burgundionum, & Aurelianensium rabies, immissis ad eam penitus subuertendam Anglis, in vicina Gallia conciuerat; quas nisi singulari quadam prudentia, & autoritate, multisque laboribus magnam partem sedasset, conclamata Nobilissimi Regni salus videbatur. Recurrebant funestæ illæ cladēs, quibus quassata, & lacerata erat Italia Venetis in Mediolanenses sæuientibus, & Aragonensibus contra Francos pro Regno Neapolitano digladiantibus. Obuersabatur oculis Hispania, quam sub infantia Ioannis II. & licentiore vita Catharinæ Matris eius, nec non fratrum Aragonensium, Aluarique Lunensis Tyrannide, gementem; & extremum propè spiritum viderat exhalantem. Tenebat mentem foeda illa, & monstrosa Ecclesiæ facies, quæ tot annis tria capita prætulerat, in quibus resècandis adeò sibi fuerat desudandum. Audiebat quàm cruenta Angliam bella funestarent, post exortas in ea purpureæ, candidæque Rosæ factiones. Denique quocumque circumferret oculos, nihil nisi atrox, turbulentum, & in ipsa pace infidum se se

ostentabat, quod rerum humanarum
 tædium in sapientissimo pectore maxi-
 mum afferret. Illud præterea tacitus
 perpendebat, fortunam, siue illam Pro-
 uidentiam; seu alio nomine dixeris,
 hæcenus ferè sibi fauisse; quare cùm
 natura sua versatilis sit, & inconstans,
 receptui canendum priusquam illa se
 auerteret, & reliquum vitæ gratis Deo
 agendis pro tot, tantisque collatis be-
 neficiis impendendum. Nec desunt,
 qui asserant non lentos ei stimulos à
 Nepte sua accessisse: Margareta scili-
 cet à Sabaudia Theodori Monferra-
 tensis olim coniuge, quæ marito orba-
 ta nuntium mundo remiserat, vt inter
 Religiosas Diui Dominici alumnas
 sanctimoniam non vulgarem Albæ
 profiteretur, spreto Ducis Mediola-
 nensis thoro, qui eam (etiam interpo-
 sita summi Pontificis autoritate) à
 proposito reuocare modis omnibus
 tentarat: audita quippe virtutis eius
 fama, quam miraculis haud obscuris
 Deus illustrabat, vinci se Amedeus ab
 infirmiore sexu in hac virtutum palæ-
 stra minimè decorum existimabat.

Margarita à
 Sabaudia
 Sanctitate vi-
 tæ celebris.

XIV.

Amedeus fo-
 cios adlegit.

His igitur accensus facibus, cum ali-
 quot è præcipua nobilitate viris agere

cœpit, qui ætate prouecti, laborum pariter consiliorumque eius in moderanda Republica fuerant participes.

Ac primò, cum ijs, crebra de diuinis rebus miscere colloquia, incertos rerum humanarum exitus, fortunæ mobilitatem, pronas in deterius hominum mentes sub aspectum ponere; quàm fœlices porrò essent illi, qui extra omnem hanc aleam positi vetus illud, atque ab ipsis gentilibus toties vsurpatum præceptum attenderent, Deum sequere? Quid verò insipientius, quàm mentes nostras æternitati natas, tum demum ad æternarum rerum cogitationem vocare, cum nos non cætera modò omnia, sed ipsa etiam deficit cogitandi vis, & perspicacia? His aliisque in eundem sensum sæpe iteratis, vbi commotos sensit, tandem omnes animi recessus illis aperuit: satis se hactenus in ancipiti Imperij Circo decurrisse; eundem penè sibi ad Regni, qui ad vitæ spatium ingressum patuisse; &, si senum sit publicis præesse rebus, totam vitam suam senium fuisse; horrere adhuc animum quoties reuolueret, quàm lubrica sit hæc arena, quàm frequentibus Euripis subdola, quàm tristibus

Oratio eius ad illos, cuius argumentum exstat tum in Testamento ipsius, tum in Diplomate quo filium sibi suffecit.

exercita naufragijs ; illos ipsos testes esse , quanta contentione cursus iste sibi fuerit emetiendus , ne vel populariter exerraret , vel adducto nimis gyro æmulos incurfaret : quoniam igitur Deo Auspice satis feliciter prouectus , non longè abesset à meta , vltimum dumtaxat superesse ætatis flexum , in quem mortalium , immortaliumve oculi essent intenti , cæteros de isto æstimaturi. Prospiciendum itaque vt aliquando sibi viueret , qui patriæ , qui suis semper vixerit : æquum esse , vt quoniam ordine vitæ mutato iuuenis senum curas non refugit , senex iuuenum otium nanciscatur ; non illud quidem iuuenili lasciuijæ conterendum , sed æternitati imputaturus. Constituta domi omnia , foris amicos Principes , longa pace diuitem , securumque statum , liberos adultos , & iam Imperio maturos : quid ni igitur eos vocaret ad clauum , exoneratoque in primogenitum gubernandi pondere , tranquillam deinceps , & quietam in secessu vitam ageret , propitiando numini intentam ? Et quidem nisi ætate , longisque curis fracta valetudo aliud suaderet , in oculis sibi esse Lotharios , Hugones ,

Exempla Re-

Pipinos , Carlomanos , Rachisios ,
 Bambas , Veremundos , Sigibertos ,
 Elteredos , atque ex decessoribus suis
 Humbertos , qui Gallicis , Italicis ,
 Hispanicis , Anglicis Sabaudicisque
 sceptris , & purpura valere iussis ,
 aut in solitudinibus latuissent , aut
 Cœnobitico iugo collum inseruif-
 sent : Nunc quoniam vires ad tan-
 tum onus ferendum minimè suppe-
 ditent , quantum in se esset eorum
 vestigijs insistere statuisse ; neque e-
 nim inuenire se quocum melius quàm
 secum esset : iam diu se vsu doctum
 quàm difficilè vitiorum cateruatim
 irruentium impetus feratur ; vici-
 num malum semper aliquid ex suo ,
 etiam castigatissimis mentibus alli-
 nere ; facilem esse transitum ad plu-
 res ; Antonijs , & Hilarionibus ex-
 cutere mentem suam dissimilem
 multitudinem posse : turbam rerum ,
 hominùmque desiderent , qui se pati
 nesciunt ; satis diu scenam alijs à se
 instructam , sibi , Deoque deinceps
 scenam esse velle ; cum in vsum in
 vicino Ripalliæ nemore septem illas
 quas viderint turres contiguas à se
 erectas , in quibus vnà cum sex alijs

gum, qui Mo-
 nasticam viam
 professi sunt.

ciusdem propositi viris reliquum vitæ degeret, si non cœnobita, at certè cœnobitis ibidem agentibus, vtili familiaritate coniunctus: nihil magis animos honestate induere, dubiósque & in prauum inclinabiles reuocare ad rectū, quàm bonorum conuersationem; paulatim enim descendere in pectus, & quandam quasi legem imponere frequentem sapientis oculum; occursum ipsum Religiosorum iuuare, & esse aliquid, quod ex pijs viris, vel tacentibus proficias; hanc sibi deinceps scholam perpetuam, in qua se ipsum dediscere doceatur, vt Deum agnoscat. Viderint itaque illi an quem hætenus mundanæ militiæ, cælestis deinceps Ducem habere velint? immò verò in illorum manu esse, vt quem tot annis Principem agnouerint, Commilitonem nūc suum experiantur; certum quippe sibi esse non contubernio modò æquales, sed tota vitæ ratione pares eos habere, qui se ipsi focios adiunxerint. Meminerint quoties communem secum fortunam sortiri honorificum duxerint, nec vlllo periculi, mortisve terrore à proposito abduci se posse iactarint; tantum potuisse sacramenti reueren-

tiam: in medio esse, vt posteritas per eos
sciat exempli vim, fideique constan-
tiam in castris Dei, quàm mundi non
esse minorem.

Stupor ingens primùm, deinde pu-
dor circumstantium animos incessit.

Arduum prima specie videbatur Du-
cis consilium, sed quid non molliat
tanti viri socia virtus? duceret igitur
quò vellet acclamant, quamlibet au-
lam eo absente solitudinem sibi fore,
eo præsente quamlibet solitudinem
celeberrimæ aulæ loco futuram; neque
passuros vt minùs reuereâtur sanctioris
vitæ auspicem, quàm militiæ Ducem.
Non tenuit lacrimas Amedeus, effusi
gaudij non dubium pignus: ruit igitur
in amplexus, & singulorum dextras
stringens, quasi nouo sacramento in
sua verba addictos osculo dato Mau-
ritianos milites inaugurauit. Pergere
deinde & secum ire iussos, Ripalliam
abduxit, vbi per eos dies multa cum
illis, multa cum cœnobij moderatore
in occulto agitauit, quæ ad nouam mi-
litiam stabiliendam pertinebant.

Acquiescunt
eius monitis.

XV.

Conuenerant interea Thononum è
triplici ordine dilecti viri, quos ad pu-
blica comitia Amedeus euocarat. Pla-

In Comitiiis
Ripalliënsibus
suam mentem
publicè ape-
rit.

cuit in Ripallienſi Palatio ea celebrare, cunctis mirantibus, & inter ſe diſceptantibus quorſum euaderet adeò inſolentis loci delectus. Affulſerat indiſta dies ſeptima Nouembris, & Regiâ magnificentiâ cuncta erant inſtructa: aderant in diſpoſitis ſubſellijs hinc Epiſcopi, & Prælati cæteri, illinc Cancellarius vnâ cum reliquo Magiſtratu, nec non è nobilitate proceres, affuſique circumquaque ex tertio ordine delecti. Medius in altiore Podio ſederat Amedeus; latera eius tegebant, humiliore tamen in ſede, Ludouicus, & Philippus eius liberi: paulò inferiùs, Humbertus, ex impari matre Ducis frater, vnâ cum duobus Sabaudix Mareſcallis. Silentio per Præcones indiſto, concionem inſtituit Amedeus, in qua multa de adminiſtratione ſua per continuos quadraginta, & eo amplius annos diſſeruit; quanto pacis, quanto ſecuritatis ipſorum ſtudio cuncta rexiffet: curas præterea, labores, & pericula commemorauit (modestiæ tamen vbique memor) quæ pro Reipublicæ ſalute toties exhauserat; nec pueritiam quidem ſuam vacaſſe à grauioribus munijs: emeritam pridem ſibi eſſe ſtipendia, miſſionem,

nem, quam ne gregario quidem militi neget quisquam, haud quaquam Principi inuidendam: liberos sibi esse iam adultos, ijs artibus institutos, eaque indole præditos, ut in partem Regiminis nullo Reip. damno, magno sui leuamento vocari possint.

Hæc cum singulari prudentia, auctoritate, & caritate disseruisset, mussitantibus, ut assolet, multis, nemine contra hiscere auso, tabulas proferri iussit, quas in eum usum paratas habebat: Ac primum eas per Notarium legi, quibus Ludouicum primogenitum (abrogato ei Comitatu Geneuensi) Principem Pedemontium constituebat, quæ dignitas tum primum primogenitis huius domus tradi cœpta est. Placuit hoc loco potissimas publici instrumenti clausulas recitare, ut quæ fuerint huius instituti primordia, quæve Amedei scopus, melius intelligatur. *Qui siquidem* (ait Notarius post solemnes principij formulas) *Dominus noster Dux, sedula meditatione perspiciciens quanta morum venustate Principum liberi sint alendi, quantaque magnanimitatis alimonia sit cordibus eorum impingenda, ut cum in eis indolentis virgula flecti potest, prona virtutum semina*

XVI.

Ludouicum
Primogenitū
Principem
Pedemontium
creat, nouo
exemplo.

Diploma
Principatus
Pedemontij.

*infundantur, & impressi honoris characteres
adeò solidentur, quòd dum dominiorum fa-
stigijs sublatis sunt, Deum potissimè timeāt,
& suis terminis contenti ceteros non spernāt
reuereri; considerans quantum illustis eius
primogenitus Dominus Ludouicus de Sa-
bandia Comes Gebennensis à suis puerilibus
annis, quibus titulo Comitali praeditus ex-
stitit, irrefragabiliter nixus est scientia, &
moribus erudiri; volens propterea ipse domi-
nus noster Dux diuino instructus exemplo
quo talentorum auctorem maioribus extolli
nouit, & humi abdicatione pessundari, de-
creuit ipsum primogenitum, Deo Laudes,
morum grauitati persistentem, maioris di-
gnitatis titulo extollere, ut perinde suae cer-
nens etymologiam dignitatis iuueniles mae-
stitias exuat, & suo compos animo illis insi-
stere studeat, quae Reip. propagationem con-
spiciunt, & salutem: idcirco ipse idem Do-
minus noster Dux ad persuasionem attingen-
tium, Vassalorumque & subditorum po-
stulationem, ex eius certa scientia, & volun-
tate spontanea, Principum, Pralatorum, Ba-
ronum, & aliorum suae ditionis Procerum
participato Consilio, ad Laudem Dei, cuius
opem humiliter inuocauit, ad Sacri Romani
Imperij exaltationem, dictum pristinum
titulum Comitatus Gebennensis ab eodem*

illustri eius primogenito protinus abdicauit, illumque in semet reuoluens, & retinens eundem illustrem eius primogenitum Dominum Ludouicum coram eo prouum stantem (procubuerat siquidem in genua fidelitatis sacramentum patri præstiturus) pro se, & suis liberis, & liberorum liberis masculis, naturalibus tamen, & legitimis ex suo proprio corpore de masculo in masculum legitimè descendantibus dumtaxat, Principem Pedemontium constituit, stabiliiit, & ordinauit, & ad huiusmodi Principatus nomen, titulum, & dignitatem singulâque præeminentias eiusdem extulit, præfecit, & sublimauit, &c. Addidit tamen multas exceptiones, tum vt filium in officio contineret, tum vt autoritatem suam sartam tectam conseruaret; voluit quippe, vt in ijsdem tabulis haberetur, licere sibi quoties vellet hoc instrumentum rescindere, vtque integra administratio, dum in viuis esset, ad ipsum pertineret: vsum præterea cudentæ monetæ vetuit, aliâque addidit quæ longum esset recensere. Quibus omnibus (subdit Notarius) sic adiectis, & reseruatis, successiuè, illico, & incontinenti in præsentia dictorum testium, & mei publici Notarij, vt supra stipulantis

Prafatus dominus Dux Sabaudia ad magnam Plateam Ripallia profeetus, circumstantibus quampluribus alijs Pralatis, Baronibus, diuerforumque Principum Ambasciatoribus, aliisque multifaria Procerum, & peritorum comitiua, Praefatum Dominum Ludovicum de Sabaudia eius primogenitum (quem hodie cingulo militari, & ordine eius Collaris insigniui) praesentem, & hamiliter pro se & suis quibus supra liberis, masculis, & legitimis recipientem, de ipso Principatu Pedemontium, eiusque dignitate sub, & adiectis modis, reservationibus, & conditionibus superscriptis, per traditionem nudatiensis inuestiuit, &c.

XVII.

Philippum
Secundogeni-
tam Comita-
tu Geneuensi
donat.

His peractis, Philippum Secundogenitum militari cingulo donatum (Equestris torquis insigne in tempus dilatum) Comitem Geneuensem (supremo tamen iure sibi, suisque successoribus reservato) instituit.

Testes è prae-
cipua nobili-
tate.

Subscripserunt utrique instrumento testes aduocati *Franciscus Episcopus Gebennensis, Ioannes Episcopus Losannensis, Ogerius Episcopus Maurianensis, Ioannes de Belleforti Cancellarius, Humbertus Bastardus Sabaudia, Manfredus ex Marchionibus Salluciarum Marefcallus Sabaudia, Iacobus Dominus Miolani, Richardus*

Dominus Montiscanuti, Ioannes de Montelupello, Dominus Chautagnia, Ludovicus Bastardus Achaïæ (qui deinde fuit Marefcallus Sabaudiaë) Lancelotus Dominus Luyriaci, Henricus de Colomberio, Claudius de Saxo, Franciscus de Thomatis audientia generalis, Petrus Marchandi Confiliij ultra montes residentis Praesidentes, Humbertus de Glerens, Dominus Viriaci magni, Ioannes de Compesio Dominus Gruffaci, Rodolphus de Alingijs Dominus Codrey, Petrus de Mentone Dominus Montistrotterij, Robertus de Monte Vagnardo milites, & Guilielmus de Foresta scutifer.

His magno apparatu in platea celebratis, reuertitur in Aulam Amedeus, medius inter Principem, & Comitem filios, cunctisque adhuc expectatione suspensis, rursus in Podio recedit, ac postquam Populis suis nouum Principem gratulatus est, oratione ad Ludouicum conuersa, grauem in primis, ac piam habuit cohortationem, vt cum ad Reipub. administrationem forti animo capessendam erigeret. Summa fuit, vt constantem in Dei cultu, & obsequio obseruantiam, perpetuum erga necessarios, & sanguine sibi iunctos amorem, paternam erga subditos

XVIII.

Ludouico vi-
ces suas in
tota ditione
committit.

caritatem, fidem erga alienos inuiolabilem, iustitiam præ cæteris integerrimam suaderet: Porróque meminisset illis artibus Rempublicam à filio conservandam, quibus fuisset à Patre stabilita. Sibi quidem in animo fuisse omnem omnino imperij curam exuere, ut vniuersam humeris eius imponeret, neque dubitare se quin par sit oneri ferendo: ne tamen iuventutem eius grauioribus frangeret laboribus, rematuriùs cum sapientibus deliberata, non detrectare se quin in arduis Reip. negotijs consuleretur, imò verò pro sua autoritate iubere, ut quoties vsus esset eum vel per se, vel per suos adiret Ludouicus, grauiissima quæque deliberaturus. In eum finem delectos à se de præcipua nobilitate sex viros rerum vsu, scientiâ, & experienciâ exercitatiùs, qui sponte abdicatis omnibus alijs sollicitudinibus, sibi assiderent, vnâque secum ita Deo in secessu tranquillo toti famularentur, ut cùm necesse esset in patriæ caritatem incumberent, eâque suo consilio senes tuerentur, quam viri fortiter manu propugnassent.

Atque ut scirent omnes qualem in

filium potestatem transferret, à Bolo-
merio (qui à secretis ipsi erat) rescri-
ptum publicè legi mandauit, quod su-
per ea re condiderat in hæc verba.

XIX.

Tabula pote-
statis Lu. Ioui-
co permittit.

*In nomine sanctæ & indiuiduæ Trinita-
tis perenniter triumphantis. Amedeus Sa-
baudia, Chablasij & Augustæ Dux, &c.
Illustri primogenito nostro Ludonico de Sa-
baudia Principi Pedemontium salutem, &
felicem vitæ, ac morum propagationem. Ser-
uire Deo regnare est. Regnum eius queren-
tibus cuncta adiunguntur, & singula offeren-
do, centupla accipiuntur. Operosus ergo pa-
ter ille familias, qui licet denario humanis
cum indiuiduis pepigerit, nouissimòsque
prioribus equauerit pænis annuere, quàm co-
hibere censetur, ut quamquam ampla seges
sulcis abdita frugem polliceatur uberiores,
nos talem talibus laceßiti caducibus extrema
vitæ exitum præstolari vereamur, & à quo
talenta recepimus segniùs occurrere, quàm
præueniri debeamus. Cùm igitur diuini Spi-
ritus opitulante gratia, à quo bona procedunt
vniuersa, nostris puerilibus ab annis, quibus
inclita recordationis Illustris Dominus geni-
tor noster ad æterna vocatus, nòsque ad sue
ditionis gubernacula, vlla sine disceptatione
assumpti fuimus, iam fere quadraginta an-
norum trium lustro tanta rei sarcinam hu-*

meris nostris impositam, non sine solerti attingentium Prælatorum, Baronum, Procerū, & peritorum aſſiſtentia conſiliariorum, pacis tranquillitate, ſubditorum quiete, ac dominij fœcundatione geſtauerimus, ex his, & alijs de manu Omnipotētis beneficijs ſuſceptis nos indelebiliter obnoxios meritiò reputantes, affectemūſque hac extrema cui noſtri parte debitum ſoluere, mundanāque deliramenta deſerere, & illa fœlici Commercio ad æterna commutare; Proſpicientes ætatem virentem, morum venuſtatem, & alia virtutum primordia, quibus Omnipotentis clementia perſonam veſtram dotare dignata eſt: nolentes præterea illam mundanis maſſitijs ſinere interem, ſed potiùs ſicut à lumbis noſtris proceſſit, eſſeque noſtrum continuat, & in typo noſtrammet repræſentat, exaggeratis diuturnis præmeditationum ſcrutinijs, virorūque orthodoxorum perſuaſionibus, non lapſu, vel extemplo, ſed ultro, & animo deliberato ſalutiferas ædes militares illius ſanctimonia inclyti patièdo victoris Patroni noſtri Mauritiij Thebæorum Ducis, quas in conuentu noſtro Ripallia inſtrui fecimus nuper ingredi decreuimus, Aliſſimo, quemadmodum ſalubre nouerimus, indefeſſe famulantes, noſque mole noſtri Principatus partim exonerare, & illius regimine vos, vt plurimum

Amedeus de ſecellu diu ſe deliberaſſe proſitetur.

onustam reddere, ut dum tempus habemus
 ceriere valeamus quàm in vos tanta rei ge-
 rende congeries perspicaciorem intellectum
 præbeat, expertarum rerum agnitionem au-
 geat, procerum peritorum consilia roboret, &
 rei familiaris praticam iugiter exhibeat mi-
 tiorem. His itaque & alijs laude dignis moti
 considerationibus, vos ex nunc, & quousque
 expressè contrarium gesserimus, Locumte-
 nentem nostrum generalem hac in serie con-
 stituimus, votisque liberam, & omnimodam
 potestatem impartimur pro nobis de cætero
 quæcumque Principatui nostro tam genera-
 liter, quàm specialiter incumbentia gerendi,
 exercendi, regendi, remunerandi, donandi,
 largiendi, exponendi, quittandi, remittendi,
 indulgendi, nos, & nostra obligandi, iuran-
 dique, & alia peragendi in omnibus, & per
 omnia, ac si propria adessemus in persona,
 etiam si talia forent, quæ separatim manda-
 tum exigèrent, vel magis speciale. Decer-
 nentes presentium patrocinioliterarum quæ-
 cumque nostro nomine gesseritis, perinde va-
 lere, illumque obtinere perpetuæ soliditatis
 effectum, quem, & ac si per nosmet gesta ad-
 essent. Verùm ne quæ utiliter agere putamus
 aliquorum subuertantur suggestionibus in
 hac largiflua potestate vobis attributa, pactò
 expresso adijcienda decreuimus, quæ sequuntur.

Reseruationes.

Primò, quòd in quibuscumque arduis occurrentibus, maturo Procerum, & peritorum consilio insistere debeatis, dignitatésque Marchionales, & Comitales, dum se casus ingesserint, conferendas arbitrio nostro reseruetis: confederationes verò, quae interdum subdolis versutis illaqueant potius quàm dissoluant, absque nostri iussu inire expressè prohibemus. Guerras etiam, quae facultates subditorum prodigiis sorbent hiatribus, exosas habeatis, nec sine expresso assensu nostro facere, aut alias suscitare audeatis. Dominium autem nostri Principatus, illiusque praeminentias, sicut diutius, magnisque cum discriminibus parte sunt, citra consensum nostrum nequaquam diminuatis, vel alias alienetis, sed quantum cum salute poteritis tueri, & augere studeatis. Monetas itaque quas iusta debet ponderare statera, ne publica omittere possint commercia, nullatenus deteriorabitis, nec quicquam in illarum detrimentum citra nostri assensum patiimini immutari: finantias equidem fiscales quibus moles gerendarum rerum dirigitur, occultari non permittetis, sed per manus Thesaurarij nostri generalis uniuersaliter recipi facietis. Iustitiam inflexibili animo extolli facere curabitis, illamque quantum rite poteritis cuiuspiam reiecta ac-

ceptione instabitur accelerari. Homagia etiam, fidelitates, & alia subditorum officiariorumque inramenta nomine nostro recipietis, & ipsos officarios velut nostros constituetis. Prælaturas utique ditionis nostræ ne ad manus deveniant incapaces, nec ad illas pro indignis immeritisve aliquorum importunitate instetur, sine scitu nostro conferri non instabitur. Etiam beneficia Ecclesiastica ad collationem nostram vacatura nobis remittetis conferenda. Et generaliter omnia alia animo indefesso facere curabitis, quæ ad honorem, & utilitatem nostri, & consequenter vestri noueritis faciendæ. Et licet noscamus ad præmissa vobis collata nostrorum applaudere vota subditorum, expressè tamen mandamus, & districtè iubemus vniuersis, & singulis officarijs, fidelibus, subditis, stipendiarijs nostris quibuscumque statu, & autoritate fungentibus, quod ex tunc in antea vobis vestrisque literis, iussibus, & mandatis pareant efficaciter, & attendant tanquam primogenito, generali que locum tenente nostro, & ac si propria illa ageremus in persona. Datum Ripallie die Dominica septima Nouembris anno Domini millesimo quadringentesimo trigesimo quarto, indictione decima tertia, per Dominum, presentibus illustri eius filio Domino Philippo de Sabaudia Comite Ge-

bennensi, necnon Dominus Frācisco Episcopo Gebennensi, &c. Idem ferè qui suprā testes enumerantur, quibus adduntur Guilielmus Dominus Aula nouæ, Amedeus de Chalam, Ioannes ex Comitibus Vallisbergie, Guilielmus de Gebennis, Petrus de Grolea, Guido Gerbasij milites, Urbanus Siniserij, Rodolphus de Fesiniaco, Iacobus Orroy, Antonius de Draconibus, & Antonius de Romagnano doctores.

XX.

Mauritianæ
Militiæ pri-
ma institutio.

Militum ve-
stis.

Postquam ab-
dicauit Pon-

Quæ vbi in concessu recitata sunt, reliquis ibidem consistere iussis, in proximum penetrale sese Amedeus abdidit, abiectoque paludamento, omniq; alio ornatu, vestes induit, quas in eum vsum sepositas habebat. Idem sex socij fecere; nec mora, cum ecce Amedeus vnà cum illis medium se se infert, non iam ampliùs diademate conspicuus, sceptro insignis, purpura refulgens, sed in vili penula Heremitam potiùs, quàm Ducem præferens. Vestis omnibus erat talaris è panno rudiore, & villoso cinericiij coloris, zona latiore præcincta, atque ad pedes demissa; pallium humeros tegebat, cui capitium erat annexum, ea ferè forma, qua etiamnum hodie Parlamentorum Præsides in Gallia vtuntur; sed erat eadem capitij,

pallij , tunicæque materia , baculus illis in manu retortus , qualis Prisci æui heremitis appingi solet , promissa barba , & capilli de industria intensi , venerandæque canitie conspicui augustiores faciebant. Crux aurea de collo suspensa pectori imminens , pietatem augebat : vnicum id natalium insigne retinuerant ; cætera demissionem , paupertatemque spirabant.

tificatum , pileum rubrum retinuit , quæ malè deinceps nonnulli Commilitonibus attribuerunt.

Commota tam insolenti spectaculo comitia , adeoque stupore defixi omnes , vt altum quoddam silentium latè omnia obtineret. Vbi verò receptis animis se se collegerunt , intenti in Patrem , & liberos , quò tandem hæc eruptura essent auidè præstolabantur ; sed repentè auditi eiulatus , visæque filiorum innocentes lacrimæ , liberam gemitibus in omnium pectoribus viam laxauerunt. Confusæ plorantium , suspicientium , etiam inuidentium voces sic cuncta miscuerant , vt cùm omnes loquerentur , nemo audiretur ; certabant singuli ad Amedeum accedere : sed cùm omnes irruerent , religione tacti , nemo erat qui se se illi admouere auderet ; manus eius osculari vnum omnium erat votum , sed tam eos reue-

Motus animorum viso Amedeo.

rentia deterrebat, quàm amor stimula-
bat. Amedeus vt motum comprime-
ret, osculo liberis impertito, cæteris in
commune valere iussis, priuatim singu-
los se admissurum magna beneuolen-
tiæ significatione recepit.

XXI.

Comitia sol-
uantur.

Ita soluto Conuentu cuncti domos
suas primùm, ac deinde vicinas latè
Prouincias facti huius fama impleturi
discedunt. Amedeus cum socijs nouo
ordini fundamenta positurus, in optato
secessu delitescit, tanto clarior factus
orbi vniuerso, quantum obscurus esse
amauerat. Commilitonum nomina di-
ligenter inuestiganti, duo duntaxat
occurrerunt, Henricus de Colombe-
rio, & Claudius de Saxo, cæteros ætas
inuidit. Scio Monstreletium & Ala-
num Carterium illis temporibus vi-
cinos, imò verò annales nostros Galli-
cos, in quibusdam ab his, quæ tradita
sunt esse diuersos, vt cùm multum auri
vestibus Amedei, & sociorum circum-
ponunt, Militum numerum augent,
eisque vitam luxu diffluentem obij-
ciunt: sed illi, aut incerta pro com-
pertis tradiderunt, atque ita cæteros
in fraudem induxerunt, aut, quod pro-
pius vero est, qui Amedeum in hoc se-

Primi Equites
Mauriciani.
Mōstreletius
non satis hu-
ius instituti
gnarus.
Parad histor.
Sab. lib. 3.
cap. 29.

cessu secuti sunt, corruptis sacrae illius militiae legibus licentiores vitam agentes, argumentum spectantibus dediderunt de iniurijs eadem temere assue-
randi, quae in progressu videbant: nos ex publicis autoritatibus, & illorum temporum actis manu exaratis certiora hausimus, quae posteritati traderemus.

XXII.

Quibus ut maior fides accedat, ea oculati, & locupletissimi testis auctoritate firmabimus; is erit Aeneas Syluius (qui deinde Pontifex maximus Pij secundi nomen tulit) meminit iste non semel cum in epistolis, tum in libris de Concilio Basileensi, tum in opere de statu Europae, Ripalliensis secessus: sed maxime in Commentarijs vitae suae, quos (ut doctissimis viris placuit) sub Ioannis Gobelini Amanuensis sui nomine vulgavit, ut ita personatus liberius in laudes suas spatia retur. Referam hoc loco paulo pluribus, quae libro septimo ex proposito his de rebus commemorat. *Sabaudia*, inquit, *in Alpibus sita est, quae Galliam ab Italia determinant, & à mari Ligustico usque ad Heluetios tenditur. Arelatensis Prouincia partem Sabaudia contingit, partem Delphinatus, & Rhodanus magnam percurrit partem, preci-*

Aeneas Syluij
de Mauricia-
nis militibus
testimonium.

Ioann. Gobelini.
lib. 7. Com-
ment. Pij 2.

pua Sabaudienſis dignitas circa Lemanium Lacum, cui, & Gebenna, & Lauſanna nobiliores Ciuitates adiacent. Sabaudienſem domum ex gente Saxonica profeſſam memorant: olim Comites fuere. Sigismundus Imperator in

* Imò Camberij tempore Concilij Conſtant.

** Conſtantienſi Concilio, extincto Comitatu, Ducatum erexit; Primus eius gentis Dux Amedeus fuit, cuius Imperium, & ultra, & citra montes latè patuit. Duodecim Pontificales Eccleſiæ in eius ditione fuere. Vxorem duxit ex domo Burgundica*

* Imò amitā, erat enim ſoror Ioannis, & Philippi Audacis filia.

*Philippi Ducis * ſororem: filiarum alteram Philippo Duci Mediolanenſi tradidit, alteram Ludouico Regi Siciliæ, cuius ſuprà fecimus mentionem. Ludouico filio primogenito coniugem ex Cypro copulauit: affinitate omnibus ſerè Chriſtianis Regibus iunctus*

Elogium Amedei.

eſt: Fortunatiſſimum, vicinorum miſeriæ fecerunt: in Gallia Burgundionum, & Armeniacorum diſidia flagrauerunt, & Angliæ furor Regnum vexauit: in Italia Veneti, & Florentini aduerſus Mediolanenſem Principem odio implacabili contendunt. Amedeus procul ab armis in montibus regnans, nunc horum, nunc illorum arbiter eligebatur, atque vnus omnium exiſtimabatur, qui ſibi, & alijs rectè conſulere noſſet. Diu ad eum quaſi ad alterum Salomonem hinc Itali, hinc Galli pro conſilio de rebus arduis

Æui ſui Salomon.

arduis recurrerunt. Et paulò pòst: *Hic igitur relicto Ducali fastigio, & omni seculi pompa procul ciecta, gubernatione subditorum primogenito commissa, ad Heremum concessit. In ripa lacus Lemani è Regione* Ripallia de-
Losannæ altissima fuerunt nemora, & sub scriptio.
*his prata decurrentibus aquis irrigua: horum magnam partem muro cinxit, inclusit-
 que Ceruos, & Damas, & quæ non sentiunt
 in homines, feras; Propè in litore lacus Ec-
 clesiam ædificauit, Sacerdotes induxit, præ-
 bendas erexit, & dignitates aliquas, &
 mansiones construxit, in quibus Canonici
 commodè degerent: nec procul hinc Palatium
 magni operis construxit, fossa, & propugna-
 culis oportunè munitum: in eo septem man-
 siones fuere, sex æquales, dignæ, quæ Car-
 dinales reciperent; nulli sua defuit aula, nul-
 li camera, & anticamera, & secreta quedam
 cubicula, seu preciosarum rerum receptacula.
 Septimam Principi dicatam nemo Rege, aut
 summo Pontifice iudicasset indignam. Hic
 Amedeus habitauit, quem sex Proceres se-
 cuti sunt grandæui, & ætate pares, quorum
 uxores iam pridem obierant, nemo non sexa-* Milites Mag-
gesimum annum attigerat: & quoniam E- riciani.
*questris ordinis milites fuerant, & sæpe in
 bellis ordines duxerant, nec sine gloria mili-
 tauerant, in ipsa mutatione secularis habitus*

sub Amedeo Decano, & magistro suo professionem induerunt, & Sancti Mauritiij appellari milites voluerunt: neque enim procul ab eo loco Sanctus Mauritius cum Legione Thebea pro Christi nomine Martyrium pertulit. Cuncti penulam, & pallium, & cingulum, & baculum retorium, quibus Heremitas uti videmus, assumpserunt, & barbam prolixam nutriuerunt, & crines intonsos gestauerunt. Loco Ripallia nomen fuit, mille passibus ferè ab oppido Thononio distanti. Cardinalis Sanctæ Crucis cum iret secundo in Galliam de pace acturus, huc nauibus appulit. Amedeus per Syluam quam diximus muro cinctam obuiam venit ad portam, quæ erat in litore. Spectaculo dignares, & quam posteri vix credant: Princeps sæculi Potentissimus, Gallis, atque Italis metuendus, quem aureis vestibus ornatum purpurati admodum multi circumsistere consuessent, & secures præire, atque armatorum sequi cohortes, & turba potentium, nunc sextantum Heremitis præcedentibus, & paucis sequentibus Sacerdotibus, in veste vili, & abiecta legatum Apostolicum excipit, veneratu digna societas visa; Crucem Auream Heremita in pectore gestauerunt, id tantum nobilitatis signum retinere, cetera contemptum sæculi præ se ferebant. venire in am-

*plexus Cardinalis, & Amedeus, & multa se
inuicem caritate deosculati sunt. Nec sa-
tis Cardinalis aut admirari, aut collaudare
conuersionem Principis poterat, &c.* Hæc
diffusiùs recitauì, vt quale fuerit Ame-
dei propositum in hoc vitæ genere in-
stituendo intelligeretur, quod ex eius-
dem Amedei testamento, aliisque au-
toritatibus publicis confirmabitur.

XXIII.

Vt igitur in pauca contraham, quæ
ad hanc nouam militiam pertinent,
hæc ferè sunt, quæ spectauit Amedeus:
Vt scilicet multiplicibus curis sepositis
quietam ageret reliquam vitam: in
eum finem turres illæ in Ripallienfi
nemore iuxta Monasterium ædificatæ,
in quibus non Monasticam (falluntur
qui scripserunt) sed secularem vitam
non vulgari pietate coleret. Ne tamen
secularem prorsus vitæ rationem duce-
re videretur, certas leges sibi, sociisque
dixit, quas ab his etiam obseruari vo-
luit, qui propositum eius deinceps æ-
mularentur. Ac primò suum institu-
tum, Ordinem militare appellauit,
eique à Diuo Mauricio Sabaudix Pa-
trono nomen imposuit, crucemque
auream pro insigni addidit (hæc vera
Mauricianorum Equitum origo, ple-

Mauriciano-
rum Militum
institutum.

*Onufrius Kræ-
tzm, &c.*

Ordo est mi-
litaris, & que
Secularis.

Magistrum habet quem Decanum vo- cant.	risque omnibus ignorata) huic ordini magistrum præposuit, quem Decanum appellauit (à quo nomine fluxit error eorum, qui decem socios ei attribue- runt) cæteros, commilitones. Sabau- diæ Ducibus ad eos cooptandos ius summum esse voluit, participato ta-
Vestitus.	men cum militibus consilio: vestis ge- nus eisdem attribuit quale suprà de- scripsimus, pannosum scilicet, & de- missionem spirans. Continentiam illis indixit quàm diu in eo loco agerent, missionem enim à Decano suo impe- trare poterant: nocturnis, diurnisque
Preces.	precibus in monachorum vicinorum templo adesse iussit: Parsimoniam in victu singularem esse voluit, habita ta-
Victus ratio.	men ætatis, & conditionis eorum ra- tione; quod ex annuo canone illis at- tributo facilè colligitur: ducentos dumtaxat florenos auri singulis pro se, famulisq; suis assignauit, Decano verò, sexcentos, ita tamen vt iste suis sumpti- bus omnia ædificia facta recta procu- raret: delectus rationem haberi man- dauit, vt scilicet homines grandæui, vt plurimum sexagenarij, è præcipua no- bilitate cooptarentur, quiq; rebus ge- rendis, & maximè legationibus obeun-
Quales eli- gendi.	
Occupatio- nes.	

dis inclaruissent, vt nimirum quendam quasi Senatum constituerent, in quo grauissima quæque negotia componerentur: ita fiebat, vt non suæ saluti modò, sed etiam publicæ vtilitati in hoc ordine constituendo consuleret Amedeus.

Quæ ne quis ad libitum ficta suspicetur, præter ea quæ ex eius diplomate suprâ descripta sunt, concepta Testamenti ipsius verba cauebunt. *Item quia prænominatus Dominus noster Dux testator autore Deo iam erexit, & fundauit iuxta dictum Monasterium suum Ripallie à parte venti unum Conuentum S E P T E M MILITVM SECVLARIVM, & pro illorum statu, & incolatu septem domos contiguas in ipso loco cum membris opportunis sub clausuris, dote, & ordinationibus infra scriptis, videlicet in toto circuitu, & extra omnia adificia dictorum Monasterij, & domorum militarium vnâ bonâ, & sufficientem clausuram murorum, seu nemorum. Et extra ipsa mania ab extrâ bonâ, & profunda fossalia in ambitu dumtaxat nemorum, prædictis domibus, & adificijs militaribus deseruientium pro defensione, & securitate dicti Monasterij, & domorum militarium prædictarum, vult, iubet, & or-*

XXIV.

Confirmator
hactenus tra-
dita ex Ame-
dei Testa-
mento.

Equitum seu
Militum nu-
merus.

clinat idem testator infra biennium post ipsius decessum per dictum eius heredem infra scriptum votiuè compleri, & perfici ea, quæ de præmissis post mortem eiusdem domini testatoris restarent perficienda. Item decreuit idem dominus testator, ut dicit, quòd tam hac vice, quàm in futurum post decessum, vel recessum alicuius ipsorum septem militum per ipsum dominum testatorem, dum vixerit in humanis, & post eius decessum per suos successores Duces Sabaudie viuentes pro tempore, ad quos idem Dominus testator ipsorum militum de nouo assumendorum, quotiens opus erit, electionem cum aliorum militum tunc ibidem degentium consilio vult, & disponit perpetuè, & pleno iure pertinere, eligantur, & assumantur ad gremium dicti Conuentus viri egregij, in ordine militari constituti, etate prouecti, in actibus militaribus honorabilibus, & longinquis viaggijs, ac peregrinationibus, Principum Consilio, & legationibus, ac alijs virtuosis, & arduis negotijs diu commendabiliter exercitati, prudentia, & probitate comprobati. Et ab omni opprobrioso crimine immaculati, mundanaque militia, ac pompa pro felici vita suæ conclusionem, & salute sponte renuntiare, & deinceps continenter, & virtualiter viuere dispositi, qui tanquam Pro-

Electio.

Quales eligendi.

Quid præstare teneantur.

ceres, & consiliarij prefatorum domini nostri Ducis testatoris, ac eius successorum Ducum Sabaudie, eorūque Patrie, in ijs praesertim, quae militaria, & alia ardua politica concernunt negotia, in casibus occurrentibus, & de quibus eis dare consilium licebit, fideliter ipsis dominis, & Patriae consulere valeant, ac etiam teneantur, prout idem Dominus testator singulariter confidit, & hac de causa post honorem Dei, ad huiusmodi foundationem pro Reipub. totius patriae suae utilitate asserit se specialiter esse motum. Item decrevit idem Dominus testator ut dicit, quod ipsi septem milites habeant perpetuè à domibus suis praedictis plenum, & liberum accessum ad Ecclesiam dicti Monasterij Ripariae; dum ibidem diuina celebrantur officia die, ac nocte pro Missis, & alijs horis Canonicis audiendis, suisque orationibus dicendis, ac deuotionibus exequendis: ita quod Abbas & Canonici ipsius Monasterij sint in spiritualibus ministri, & seruitores militum praedictorum. Item decrevit idem dominus testator, ut dicit, quod unus ex Praefatis septem militibus per ipsum dominum testatorem dum vixerit, & post eius decessum per successores suos praedictos Duces Sabaudie cum aliorum militum dicti Conuentus Consilio eligendus constituatur, Et sit Decanus

Finis huius
sacrae Militiae.

Exercitia
Pictatis.

Quam obe-
dientiam pro-
fiteantur.

aliorum sex militum, ac eis præsint, & imperet
 in, & circa honestam modum viuendi, cui ceteri
 in omnibus licitis, & honestis obedire te-
 neantur: pro cuius quidem Conuentus mili-
 tarius dote, ac ipsorum militum congrua susten-
 tatione Præfatus Dominus testator asserit se
 decreuisse, & velle dare, & assignare perpe-
 tuè, & securè prædicto conuentui mille, & o-
 cties centum Florenos auri parui ponderis, va-
 lente, seu computato pro quolibet ipsorum Flo-
 renorum duodecim grossos moneta communis
 ipsius Domini testatoris annua reuoluta, in
 & super rebus, & locis convenientibus; Volens,
 & disponēs idem dominus testator, quod De-
 canus qui fuerit ibidem pro tempore, inde per-
 cipiat, & percipere debeat singulis annis sex-
 centum Florenas, & quilibet aliorum sex mi-
 litum, ducentos Florenos ponderis, & valoris
 prædictorum, pro suis suorumque seruitorum
 particularium victu, & vestitu; Ita tamen
 quod idem Decanus pro tempore existens suis
 proprijs sumptibus debeat manutenerere co-
 perturam omnium domorum, & adificiorum,
 nec non supportare onus victus, & vestitus,
 ac salariorum seruitorum communium ipsius
 Conuentus, cum alijs super hoc fiendis per ip-
 sum dominum testatorem ordinatis: idcirco
 præfatus dominus testator singulari deuotione
 ductus ad prædicta fundationis complementum,

Decani redi-
 tus,

Item aliorum.

ut dictū est, vult, & disponit, & iubet, &c. si forsitan idem dominus testator in vita sua foundationem huiusmodi quoad dotem, & ædificia iam inchoata, clausuramq; ac fossalia prædicta morte præuentus (quod absit) non adimplerit, hæres suus vniuersalis infra-scriptus omne, & quicquid præmissorū omnī cōplemento, tēpore obitus ipsius domini testatoris defuerit, perficere, & complere teneatur.

Ex his nemo non facilè intelligit quàm religiosa fuerit Amedei mens in hoc instituto capeffendo, quàmque aliena ab eo fūco quem inuidiosè nonnulli, alij per calumniam ipsi adlinere tentarunt, de quorum imposturis suus erit infrà dicendi locus.

Erit tamen fortasse aliquis cui tam impensa Amedei in Mauricianos Equites curā suspicionem iniiciet, vilefcere tum cœpisse ordinem, quem ab Annunciatæ Virginis nomine clarum fecerat Auus eius Amedeus Viridis, ideoq; illū (quod in alijs Prouincijs cōtigisse scimus) antiquo, vel abrogato, vel fastidito, nouo vni illustrando, & promouēdo attendisse. Sed erat vir sapiētissim⁹, & antiqui moris tenacior, & auitæ gloriæ studiosior, quàm vt vetera nouis, non sine leuitatis nota, posthabe-

XXV.

Ordinem Annunciatæ Virginis illustrat Amedeus,

Num. 16.

ret. Tantùm igitur abest vt maiorum institutis quicquam decedere pateretur optimus Princeps, quin cùm de Mauriciano ordine sollicitior videbatur, Virgineum (velut, præcipuum Serenissimæ Domus ornamentum) Primogenito conferebat, vti suprâ ex tabulis eius obseruatum est. Imò verò hoc ipso anno priusquam Ripalliam migraret, Comitia sodalitiij huius edixit ad Petram Castri (vbi scilicet prima illius iacta sunt fundamenta) in quibus hæ leges conditæ, & ad primas additæ sunt decimotertio Februarij: Vt scilicet audita Sodalis cuiuslibet morte, cæteri omnes atrati incederent, totisq; nouem diebus ab Equestri Torque ferèdo abstinerent. Vt defuncti Torquis solemniter ritu offerretur: Vt admissionis ordine seruato in iustis persoluendis nullo discrimine Sodales incederent. Vt qui aliquam in se notam infamiæ suscepisset, ad petitionem Heraldij à Sodalitij Magistro missi, Torquem redderet. Vt denique Sodalium nulli integrum esset, vllum Torquatæ cuiusuis alius militiæ insigne admittere. Quibus Legibus ab Amedeo Duce, & Magistro supremo sancitis subscripsere Ludoui-

cus Marchio Saluciarum, N. Comes montis Reuelli, Antonius de Grolea, Humbertus Bastardus Sabaudia, Ricardus Montis Canuti, Ioannes Chautagnia, Manfredus Saluciensis Sabaudia Marescallus, Ludouicus Morea.

Quæ quidem leges ad eas additæ sunt, quas idem Princeps primo Maij anni M. CCCC. IX. tulerat Castellione Dombarum. Earum exordium è Gallico de verbo expressum sic habet.

Rescriptum
Amedei in
quo declarā-
tur initia hu-
ius Ordinis.

Nos Amedeus Comes Sabaudie, Dux Chablasy, & Auguste, Marchio in Italia, Comes Genuensis, & c. Omnibus, in quorum manus presentes venerint, notum facimus; Quod cum felicis memorie Dominus, & Avus noster Amedeus Sabaudie Comes Excellentissimus, & Potentissimus Princeps, qui in Apulia diem obiit extremam; ad honorem Dei, Beataque Virginis, & xv. MYSTERIORVM Meius, nec non omnium Sanctorum, & totius Curia cælestis instituisset Ordinem Collaris nodis intertexti, in symboli modum, eiusque ordinis (in quem non nisi xv. ad legi possent) tum ipse, tum Successores eius Princeps, & Magister fuerit; Atque ad eiusdem conservationem certa quedam Constitutiones, & Leges edita fuissent, quæ tum ad vitarationem, tum

ad funus Sodalium è viuis abeuntium pertinere, quarum Constitutionum non satis constans eſſet memoria, periculúmque eſſet, ne in dies magis, ac magis ex hominum mentibus deleantur; Cúmque idem Auus noster Cænobium Ordinis Carthusienſium fundaeſſet, & dotaſſet in oppido Petre Caſtri Diœceſis Bellicenſis, in quo quindecim Sacerdotes ſingulis diebus ſacris myſterijs operarentur: Atque hunc quidem Ordinem prædictus Auus noster, & felicis recordationis Excellentiffimus, & Potentiſſimus Princeps, ac Parens noster, nõsque ipſi hæcenus obſeruauerimus: Hinc eſt, quòd nos dictus Comes de conſilio cariſſimi, & dilectiſſimi Patruſi noſtri Ludouici de Sabaudia Principis Moreæ, & cariſſimorum, dilectorúmque conſobrinorum, & fidelium noſtrorum D. Odonis de Villars, Domini de Baucio, D. Humberti de Villars Seiffel, Domini Sancti Hippolyti, & Orba; nec non dilectorum, & fidelium Conſiliariorum D. Ioannis de la Baume domini de Valuſin, D. Bonifacij de Chalan Mareſchalli Sabaudie, & D. Antonij de Grolea; Volentes ut in poſterum Leges, & Conſtitutiones eiufdem Ordinis obſeruentur; Eas colligi, & quidquid ad eundem Ordinem pertinet in vnã ſummam redigi mandauimus, ſecundum

*quam perpetuò deinceps , & inuiolabiliter
obseruentur.*

Non adscribam hîc, ne sim longior, singula Constitutionum capita, quæ in Historia nostra Sabaudica magis appositè referentur. Et ab his quoque fusiùs hoc loco enarrandis abstinuissem, si ab olido pruritu temperarent lasciuientiũ quorundam scriptorum manus , quæ Harpyiarum instar sacra, profana contactu suo polluere non cessant. Diceres illos in fœtutinis , & olenticetis educatos Camerinam secum trahere, qua vel ipsa Pæsta corrumpant. Quid enim à Principe Christiano vel cum Religione magis, vel magis cum fortitudine coniunctum potuit excogitari, quàm se, suorũque fortissimos diuino cultu ita mancipare, vt serui, vel captiui instar, insertum Catenæ cololum præferre non dubitaret? Hîc tamen impuri oris homines , vt omnia calumnientur, nescio quos ab Idalia crobylos, nexus, & flores somniant, Principi nusquam cogitados. Crucem alij velut sacre militiæ tesseram ferebant, eam Amedei Maiores Gentilitia familiæ suæ arma esse voluerunt, vt Religionis propagandæ studium, sibi

Refelluntur
impuræ quo-
rundam im-
posturæ circa
Ordinis hu-
ius principia.

propè innatum profiterentur. Verùm, vt auitæ laudi nouos stolones viridis infereret Amedeus, felices numellas fabricauit, quibus generosissimum quemque suorum vinciret, tum suo, tum Aui sui Amedei magni exemplo permotum. Hinc arcani characteres F. E. R. T. Torqui aureo sapienter intexti, vt quoties, vel ipse, vel Socij suum insigne aduerterent, illius fortitudinis æmulatione succenderentur, qua Sarracenis fugatis, Rhodos esse in libertatem asserta. Verùm ne in catena seruilem auersarentur conditionem, Bullam de ea suspenderat, quæ Salutatam ab Angelo Virginem exprimeret, tum cùm Rex Regum, ac Principum Princeps *Formam serui accipiens habitu inuentus est vt homo*. Ac ne quod Pietatis deesset argumentum, in honorem quindecim Mysteriorum, quæ in B. Virgine veneramur, totidem sacræ huius Militiæ Sodales esse iussit, totidémque Mystas, qui Deo pro illorum incolumitate litarent.

Quæ omnia non vnæ Amedei nostri Tabulæ suprà recitatæ plana faciunt, sed ipsum Amedei viridis huius sacræ Militiæ autoris Testamentum tam a-

pertè declarat, vt nullus dubitationi lo-
 cus relinquatur: sic igitur habent verba
 Testamenti. *Item prefatus Dominus A-*
medeus Comes Sabaudie Testator in sue
mentis consideratione reuoluens honores, be-
neficia, & commoda suis temporibus habita
& obtenia gratiâ, & misericordiâ Omnipoten-
tis Domini, qui ipsum cum laude, & ho-
nore non modico tam contra hostes Christia-
næ fidei, quàm eius inobedientes Rebellen, &
contrarios sua mirabili potestate victorem
fecit in pluribus. Ad laudem Domini nostri
Iesu Christi, Patris, & Filij, & Spiritus
Sancti, & gloriose genitricis Beata Maria,
sanctorumque & sanctarum Dei, & totius
Curie Cælorum vt peccatis suis propitiatores
existant, vult, disponit, & ordinat quòd in
castro suo Petreæ castri fundetur, & fiat,
construatur, & fabricetur vnam veneran-
dum Cænobium seu Monasterium sub nomi-
ne, & ad honorem Beata Virginis Mariæ
Patrum Heremitarum ordinis Cartusienfis.
In quo sint, & adesse debeant perpetuò
QUINDECIM Patres Cartusienfes ad
honorem QUINDECIM GAUDIO-
RVM INTEMERATAE VIRGI-
NIS MARIAE, qui ibidem singulis die-
bus debeant, & teneantur Missarum solem-
nia, & alia diuina officia celebrare pro re-

medio animæ suæ, & prædecessorum suorum; Necnon pro remedio animarum aliorum dominorum, & militum, qui de ordine cellaris sui fuerunt, sunt, & esse contigerit in futurum. Cuiquidem monasterio totum castrum Petra castri, & ambitum suum, unà cum toto territorio in quo situm est ab introitu dicti castri, ubicumque supra rupem dat, & legat, unà cum omnibus, & singulis arboribus, plateis, ingressibus, egressibus, pertinentiis, & appendentiis uniuersis; & ipsum Monasterium, & Fratres prædictos in eis instituit.

His auspicijs Orientem ingressus Amedeus, Imperatorem Ioannem libertati, deinde Solio suo, atque ad extremum Romanæ Ecclesiæ ingenti Christiani Orbis gratulatione reddidit. His cunabulis verè Sanctis, verè Religiosis increuit Sabaudici Torquis Nobilitas, cui, qui de procaci ingenio suo inuerecundas adiiciunt è Papho Conchas, & arcanos characteres petulanti interpretatione fœdant, velut sacrilegi impostores apud veritatis tribunal meritò vapulabunt. Sed hanc laudem Amedeo nostro posteritas debet, quòd pro singulari sua in res sacras pietate, & in Auum suum obseruantia,

Reli-

Religiosissimi Ordinis verum institutum latere non sit passus, relatis in publicas auctoritates legibus, quas nascenti Militiæ dixerat Auus, nouisque hoc ipso anno editis, quibus antiquæ illustrarentur, ac confirmarentur. Sed ut è diuerticulo in viam redeamus;

Crediderat Amedeus, cum se abderat, constantiorem fore in Ecclesia pacem, quàm euentu didicit: videbat quidem animos partium, quasi ex longa, & graui valetudine emerfos, non tam morbi reliquijs, quàm suspicionibus inquietari: Sed sanum esse corpus iudicabat, idque solum procurandum, ut sanitati assuesceret. Triennium ferè tenuit ea pax, quam Eugenio cum Basileensibus reconciliato factam diximus, crebris tamen initio motiunculis, mox grauioribus offensis labefactata. Procedentibus enim Basileensibus ad morum instaurationem, & multa molientibus contra Pontificiam auctoritatem, occulto paucorum odio, manifesta (quanquam fortasse non ita prudenti) aliorum caritate; tandem apparuit impetum offensionum languisse, memoriam valuisse; nec tam inductam & coalitam, quàm opertam fuisse vete-

XVI.

Basileensis
Concilij pro-
gressus.

E

*Iterum turbæ
Eugenium
inter, & Con-
cilium.*

*Epist. ad Le-
gatos suos in
Append. Conc.
p. 219.*

*Græcorum
aduentus.*

rem cicatricem. Non ferebat Eugene-
nius Indulgentias non de sua auctori-
tate promulgari, tolli appellationes ad
Sedem Apostolicam, Annatas, cæte-
ræque iura Pontificia sine suo consensu
abrogari, aliæque tentari, de quibus
grauiter, modeste tamen in epistola
quadam exposulabat. Et verò non-
dum satis confirmata potentia mitiori-
bus consilijs tuenda, Patientiæ fama
quærenda, benignitate, & caritate in-
notescendum erat: valuítque apud
plerosque eius contatio, quam eò vs-
que adhibuit, dum spes fuit concordiæ
retinendæ; sed cùm Imperatoris Græci,
& Patriarchæ Constantinopolitani ad-
uentu erigeretur omnium animi, Pon-
tifice eos ad se modis omnibus trahen-
te, Basileensibus nullas non artes ad-
hibentibus, vt Basileam, vel Auenio-
nem tenerent, vtrisque diuersos vnio-
nis modos proponentibus, Oriente
Latinorum insaniam ridente, qui sibi
ipsi dissentientes aliorum vnionem
tentarent, tandem Eugenius euicit,
vt Græci Venetijs exscensionem face-
rent, Ferrariam venturi, qua in vrbe
corum, vt aiebat, commodo consul-
turus, reuera vt Basileenses dissiparet,

Concilium edixerat. Qua de re monendum è vestigio Amedeum Pontifex duxit, datis ad eum his litteris, *Eugenius, &c.* Dudum tua Nobilitati notissimum esse credimus cum sepenumero antea, & ad extremum in mense Mayj praterito Græcorum oratores ad nos venissent, seque ad sanctissimam, optatissimamque unionem nobiscum paratos esse profiterentur, post multa fuimus ab eis magna cum instantia requisiti, ut rem istam deferri non pateremur: quin potius opera, & diligentia nostra ad optatum finem perducituraremus. Asserebant omnes, qui quesiverant eos in unionem perducere, potius mortem eorum, quàm Ecclesiæ unionem querere: cumque nos hoc tante necessitatis articulo constringi videremur, neque alium modum ad eam sanctissimam unionem consequendam nobis superesse apertissimè cerneremus, eorum petitionibus libenter annuimus, Galeasque, & alia necessaria parare iussimus, licet cum magnis laboribus, & impensis, easque Galeas cum oratoribus nostris, unà cum oratoribus tunc Basileensis Concilij, & alijs requisitis Constantinopolim misimus fiduciam habentes in Domino, ut sanctissimum opus, quod nostris mentibus inspirauerat, bono, & felici fine concluderet, ne-

Eugenius Amedeum de Græcorum appulsu, & indicatione Ferrariensis Concilij certiore facit;

que ipso Deo miserante destituti sumus spe,
& desiderio nostro. Nam, quod ad tuam
consolationem scribimus, die octava præ-
sentis mensis Carissimus in Christo filius
noster Ioannes Imperator Græcorum, & Ve-
nerabilis frater Ioseph Patriarcha Constan-
tinopolitanus cum Magna Prelatorum, No-
biliarum, & aliorum Græcorum multitudine,
ac Armeniorum Procuratoribus, cum Ga-
leis prædictis Portum Venetiarum applicue-
runt, venturi quàm primùm ad hoc sacrum
œcumenicum Ferrariense Concilium. Quæ
ad consolationem tuam significauimus, quem
veluti fidelissimum Principem non dubita-
mus plurimum gaudiij suscepturum. Ecce
manus Domini magnificata est in virtute,
adduxit enim ad nos filios nostros per multa
annorum spatia à nobis antè diuisos, ut
una mentium fide, una pietatis actione
nobiscum conueniant, exultent, epulentur,
& delectentur in letitia: Parati sumus illos
rota mentis alacritate suscipere, cum illis ad
consequendam huiusmodi unionem omni
studio, omni industria, omnibus denique
viribus laborare, nec quicquam nobis pos-
sibile premittere, quò minùs tam diuinum
opus debitum sortiatur effectum. In qua re
operas, & fauores tuos plurimum adiu-
menti speramus allaturos. Quare exulta

in Domino, dilecte fili, illique nobiscum offeras hostias iubilationis, & laudis, qui fecit nobiscum misericordiam suam: accingere denique, Princeps inclyte, ut hoc sanctissimum opus orationibus, eleemosynis, & ieiunij's iuves; Deinde per tuos oratores ad hoc sacrum Concilium æcumenicum quàm primum transmittendos, & alios prout prudentia tua melius videbitur, opportunis fauoribus, & auxilijs assistas. Conuertentur enim ad te inferiorum oculi, præsertim fidelium tibi subditorum, putabuntque omnes sibi faciendum esse, quod à tua nobilitate fieri videbunt. Ipsi quoque Græci ex istis tuis facinoribus, hac tua assistentia, & obseruatione Sedis Apostolica, quid honoris, obedientiæ, & deuotionis eidem debeant Sedi exemplum accipient: sicque operatio tua erit magistra publica disciplina, & multorum salute lucrum facies animæ tuæ. Enimverò, dilecte fili, nihil virtuti tuæ accommodatius, nihil progenitorum tuorum gestis conuenientius in præsentiarum potest accedere, nihil folio gloriæ Principatus tui dignius, quàm ut tantorum bonorum particeps fias, & sis inter primos virtute, meritis, & exemplis: nihil ergo est reliquum, quàm ut quæ suprà præmissimus exequaris: ad quæ licet ipsa te animi tui magnitudo

impellat, tamen ne nostrum desit officium, si quid adjuvare potest adhortatio nostra, te hortamur per viscera misericordiae Dei nostri, qui inter Principes terrae magnum te fecit, ut ea omnia parato, ac volenti animo intendas, quemadmodum de tua fide, bonitate, caritate, & virtute precipuam in Domino fiduciam obtinemus. Datum Ferrariae an. 1437. 4. Id. Febr. Pont. an. 7.

XXVII.

Basileenses
Eugenio dic
dicunt.

Actum de suis rebus existimabāt Basileenses, si Concilium Ferrariæ procederet: nullum igitur non lapidem moverunt, ut Græcos auerterent, omnibusque Christi fidelibus schismaticis terrorem inijcerent: & afferebantur quotidie ex Italia rumores novi, quibus Eugenij fama non modicè onerabatur. Vnguem in ulcere non pono, hoc dico,, persuasum fuisse quam plurimis seu inscitiam, seu arte maleuolorum, non nisi cum Christiani nominis opprobrio Romanam sedem ab Eugenio insideri; non iniquum modò illum in alios, sed in se ipsum quoque, qui pro libidine facta sua infecta velleret, & quam dederat fidem de non disturbanda Basileensium congregatione; nulla Sacramenti Religione rescinderet, Hac, & id genus alia passim iactata,

offensionum auidi, lætis auribus; modesti, inuitis, sed tamen credulis excipiebant: atque ut pristinas iras reuoluentibus prona est vindictæ cupiditas, facile fuit sopitos ignes exsuscitare, lata in Pontificem sententia, qua dies illi diceretur, decretis velut in contumacem pœnis, si intercederet.

Occalluerat ad has minas Eugenius, **XXVIII.** seu factorum conscientia, seu partium studijs securus. Illis igitur pro autoritate increpitis, Principes Christianos certiores de tota re facere pergebat; Sed Amedeum (cuius autoritas per ea tempora suffragij prærogatiuam ferre apud omnes obtinebat) ante alios, cui sua omnia aperire, perveteri amicitia consueuerat. *Iam intelligis (ait, expositis Basileensium atrocibus minis) dilecte fili, quid egerimus, quidque illi moliti sint, & moliantur in dies. Opus enim iusti ad vitam, fructus autem impij ad peccatum, præstolatio impiorum furor. Ingredere igitur (te per viscera misericordie Dei hortamur) ut bonus operarius in agrum Dominicum, & quemadmodum maiores tui Ecclesie Dei, & Apostolicæ Sedis quieti, paci, & unitati, consilijs, & auxilijs, etiam*

Eugenius hortatur Amedeum, ut Ferrariensi Concilio adhaereat.

Sabaudi
Principes fi-
dei propagā-
dæ studioſiſ-
ſimi.

Amedei au-
thoritas.

*personis proprijs ostiterunt, ac fidem Catho-
licam longis finibus, & limitibus amplia-
re adiuvant, exterminantes etiam gladio
sauiſſimos hostes, qui illius gloriam obtene-
brare conati sunt: Ita & te ad has necessita-
tes felicibus auspicijs ſervatum eſſe ostendas,
ut in tempore opportuno tua Protectione, tua
cura, tua opera deſenſentur, quantum tui
animi magnitudo, gravitas, & ſapientia
viderint expedire, ne homines temerarij
Populos debiles, & infirmos terrendo, & ſe-
ducendo corrumpant. Quod cum feceris, &
per ipſam rem iuſtitia, & tuis dignis exemplis
reliqui in hoc Dei opere contra ſeditioſos ipſos
facile praeualebunt, quia non relinquet Domi-
nus virgam peccatorum ſuper ſortem iuſto-
rum, ut non extendant iuſti ad iniquita-
tem manus ſuas. Circa quæ commiſimus
aliqua venerabili fratri Episcopo Canalli-
cenſi Nuntio noſtro tibi referenda, cui velit
tua Celſitudo fidem credulitatis plenariam
adhibere. Datum Ferrariæ an. 1437. 15.
Kal. Mart. Pont. 7.*

XXIX.

Eugenius Lu-
douico in
eundem ſen-
ſum ſcribit.

Addidit Eugenius alias ad Ludoui-
cum Principem perhonorificas, in qui-
bus præter cætera hæc habentur. *Præ-
tereā quamquam ſcimus Dilectum filium
nobilem virum Amedeum Ducem Sabaudie
ad incrementum fidei, noſtrum, ac Eccleſia*

Romana statum sincera voluntate dispositum, & superuacuum esse suam SERENITATEM hortationibus incitare, tamen magnitudo rei postulat, ut etiam à superuacuis hortationibus non desistamus. Propterea filialem tuam deuotionem requirimus, & hortamur in Domino, ut dictum Ducem ad hoc ardentem, tuis suasionibus ardentior effficere studeas, ut in hac nascenti perturbatione Ecclesie reminiscatur, & ea effficere studeat, ut secum in deuotione, & fide certet, & seipsum superare conetur. Quibus in rebus Prefatus Dux, ac tua nobilitas nihil Deo gratius, fidei, & Ecclesie salutaris, nobis acceptius, & sue Celsitudini, & tibi conuenientius effficere potest, & ob id dictam Sedem, & nos plurimum obligatos effficietis, &c.

Amedei pietas erga sedē Apost. commendatur.

Quin, & ad ipsos Amedei Consiliarios eiusdem argumenti epistolam Pontifex eodem tempore scribendam duxit, cuius initium sic habet, *Eugenius, &c. Venerabilibus Fratribus, & dilectis filijs Consilio dilecti filij nobilis Viri Amedei Ducis Sabaudia salutem, & Apostolicam benedictionem, &c.* cætera ferè, ut in superiori.

Eadem Consiliarijs scripta.

XXX.

Cogitauerat Eugenius conciliatis sibi Gracis, Reges, & Principes Chri-

Tarbæ inualescunt.

Sess. 26.

Sess. 27.

stianos facile Ferrariam suos Oratores
 inissuros, vt in partem eius gloriæ veni-
 rent, quæ ex Orientalis schismatis ex-
 tinctione redibat; sed ea erat Concilij
 renitentis autoritas, quæ multos sibi
 coniunctos detineret, multos anxietate
 distraheret, plerosque omnes à Ponti-
 fice abstereret, itavt quam principio
 anni posse inchoari synodum credide-
 rat, vix fine habuerit initium: grassan-
 tibus autem inter partes odijs, valuer,
 qui Basileæ maioribus ausis promptio-
 res, & zelo magis, quàm ex vsu præsen-
 ti, pridie kal. Aug. Monitorio edito
 rursus Eugenio comminati sunt, in
 quo de multis, iisque grauissimis cri-
 minibus postulabatur: & quia sessione
 quarta decreuerat, vt Pontifex à crean-
 dis Cardinalibus pendente Concilio
 abstineret, eique decreto non à Præsi-
 dibus modò Concilij, sed ab ipso quo-
 que Eugenio autoritas accesserat; alio
 decreto 6. kal. Octob. edito, Basileen-
 ses purpura illos exuerunt, quos postea
 ab eodem Pontifice ea donatos intel-
 lexerant. Quo ipso tempore Eugenius
 nouo rescripto Ferrariense Concilium
 indixit, Basileense dissoluit, acta eius
 omnia deinceps irrita esse iussit, exce-

ptis ijs, quæ ad Bohemos pertinerent, suisque literis, cum alios Principes Christianos, tum Amedeum nostrum denuò hortari institit, ut in suas partes transirent, missò ad singulos illius Bullæ exemplari, qua Basileensium conventum abrogabat, quam quia Colonienses ediderunt, non repeto. Quas autem Amedeo inscripsit, sic habent.

In Append.
Conc. pag. 215.

XXXI.

Iterum Eugenius Ferrariense Concilium suadet.

Cum Basileense Concilium ad Civitatem Ferrariensem pro æcumenico Concilio ibidem celebrando, tam propter Occidentalis, & Orientalis Ecclesiarum unitatem, quam reformationem Ecclesiæ, ac pacem Christiani Populi totis viribus Deo auctore procurandis, ac alijs iustis causis transfulerimus, pro ut tua Celsa nobilitas per copiam presentis us introclausam latius videre poterit, tibi tanquam nostro, & Romana Ecclesiæ filio inter ceteros Catholicos Principes carissimo, huiusmodi translationem significandam esse duximus: Eandem tuam nobilitatem enixè rogantes, ac in Domino exhortantes, ut cum per Dei gratiam speremus, imò certi reddamur, quod Carissimus in Christo filius noster Ioannes Romaorum Imperator illustris, ac venerabilis frater noster Ioseph Patriarcha Constantinopolitanus, cum magna Prælatorum Græcorum multitudine, pro quibus con-

ducendis Galeas, & ceteras alias res opportunas, atque inter nos conuentas misimus, circa Kalendas mensis Nouembris proximè futuri ad præfatum Concilium proculdubio venturi sint, tuos Oratores, iuxta rei huius magnitudinem sufficiens mandatum habentes, ad ipsum æcumenicum Concilium, & hanc Dei causam, quæ cæteris rebus præponenda est, quàm primùm poteris transmittere velis. Et insuper Prælatos in tuo dominio, & territorio existentes, exemptos, & non exemptos, qui de iure, siue antiqua consuetudine ad generalia Concilia accedere tenentur, hortari, atque requirere velis, ut quàm celerrimè poterunt ad dictum Concilium veniant, ut in eo, Spiritus Sancti gratia suffragante, per tuorum assistentiam, ac sapientiam, ac aliorum Catholicorum Principum, ac Prælatorum, ea Deo propitio tractentur, & agantur, quæ ad ipsius Dei laudem cedant, fidei Catholice incrementum, Pacem Christianorum, & exaltationem Ecclesie sue sanctæ. Datum Bononia, an. 1437. 12. Kal. Octob. Pontif. an. 7.

XXXII.

Ferrariâ Florentiam transfertur Concilium,

Conuenerant iam pridem Basileam omnes Prælati Sabaudienses, neque integrum erat Amedeo illos reuocare; maximè cùm è Gallia nulli in Italiam commearent. Vnus igitur Aymericus

Antistes Montis Regalensis non inuito Amedeo Ferrariam tenuit, reliqui Basileæ confederunt, verito Duce conscientijs ipsorum vim inferre. Interea Ferrariæ pestis sæuire, adeoque inualefcere, vt alia Concilio sedes fuerit deligenda. Florentiam Eugenius maximè omnium ex vsu suo esse duxit. Eò igitur cùm migrasset, nihil antiquius habuit, quàm sua cum Amedeo nostro participare consilia; ipso enim quo Ciuitatem ingressus est die, has ad eum literas dedit. *Cùm variæ nobis, multiplicésque semper hætenus incubuerint sollicitudines ad commissum desuper officium pastoralis curæ gregis Dominici debite exequendum, & omni ex parte laudabilis sollicitudo est visa circa rem vñionis Orientalis Ecclesiæ cum ecclesiâ Occidentali, quæ Dei miseratione nostris temporibus oblata est: Ad quam tractandam, vt dudum iam feliciter cæpimus vñionem, ac ipso Domino, & Deo nostro propitio obtinendam totis animi, & corporis viribus properamus. Et licet multos hætenus in ea re perpeßi fuerimus labores, pluribus tamen anteaëtis mensibus, immixta laboribus ipsis multa, ob superuenientem in Ciuitate Ferrariensi pestem; subymus etiam mortis pericula, quam vigentem, & continuo*

Eugenij literæ ad Amedeum.

inualescentem multis , ac penè omnibus in eodem loco pro œcumenico Concilio existentibus, & locum etiam propter hoc desiderantibus, ea ratione declinare supersedimus, ut si fortè per hyemis aduentum, ut verisimile erat, ea cessaret pestis, inchoatam huiusmodi unionem Orientalis Ecclesie, in loco ubi cœpta fuerat ad optatum finem perducere-mus: cùm verò ea pestis per ipsam hyemem, ut antea, perseueraret, nullique amodò dubium videretur quin per ver, & astatem continuò perseueraret, ne tantum, & diebus nostris incomparabile ex huiusmodi morbo pestis intercipi, aut aliquo modo turbari posset, & liberum esset omnibus pro Dei gloria in hoc sacro œcumenico Concilio in nomine Domini Sabaoth celebrandi nobiscum utriusque Occidentalis, & Orientalis Ecclesie, accedente consensu, dictum œcumenicum Concilium, prout ex copia translationis, quam hîc mittimus introclusam, videre poteris, transfutimus ad Ciuitatem Florentinam, locum quidem ad id idoneum, & semper aliàs, quoties de ipso futuro Concilio tractatum fuit, nominatum, tanquam omnibus nationibus, & populis, ut audiebamus, valdè gratum. Ea autem translatione facta, & cedula de nostro, & Romana Curia descensu ex more publico in loco affixis, iter ingressi, tandem Duce

Domino, ipsam Florentinam Ciuitatem præfenti die applicuimus, ubi magna cum Cleri, & Populi alacritate suscepti fuimus. Quod tua CELSITVDINI ad gaudium facimus notum, eandem in Domino exhortantes, &c. ferè totidem verbis, vt in proximè superioribus. Datum Florentie An.

1438. 6. Kal. Febr. Pont. an. 8.

XXXIII.

Exasperabant ista vehementiùs Basileenses, qui kalendis Octobris anni superioris Eugenium publicè contumacem pronuntiarant, & post aliquot dies Ferrariense Concilium ab eo indictum damnarant, multa Pontifici atrocia obijcientes, ac præsertim violatam fidem; quòd cùm ante aliquot annos declarasset & iurasset se deinceps à nouitatibus, & grauaminibus, seu præiudicijs inferendis huic Sacro Concilio, aut suppositis eius, & adherentibus eidem realiter effectum destitutum, idem tamen Concilium dissoluere tentaret. Hæc, aliæque id genus sæpe retractata, adèd incenderunt animos eorum, qui Basileæ remanserant (secesserant enim Cardinales omnes, vno excepto Arelatenfi) vt quo tempore Eugenius Florentiam cogitabat, ei ab omni vsu, & administratione Pontificiæ dignitatis interdicere, non sint

Basileenses
Concilium
ab Eugenio
indictum
damnant,
Sess. 28.

Sess. 29.

Etque admi-
nistratiõe
interdicunt.

veriti. Describam hoc loco decretum ab ijs editum 9. Kal. Febr. anni 1439. prout in eiusdem Concilij actis habetur, vt ex eo prudens Lector conijciat, quibus fluctibus fidelium mentes id temporis agitantur, maximè in illis partibus, vbi vix erat, qui pro Eugenio loqueretur, & passim per omnium ora volitarent, quæ sequenti scripto continentur.

XXXIV.

Decretum de
suspensione
D. Eugenij
Papæ IV.

Sacrofancta generalis Synodus Basileensis in Spiritu sancto legitimè congregata uniuersalem Ecclesiam representans, ad futuram rei memoriam. Audiuit omnis Ecclesia à plurimo tempore, quo pacto hæc sancta Synodus inter cetera ob reformationem ipsius Ecclesie Dei in capite, & in membris specialiter congregata, cum sua decreta salubria passim contemni prospiceret, abusuūque deformitatem continuari, atque etiam plus solito inualefcere in Diuina Majestatis offensam, & uniuersi sacerdotij, atque totius Christianæ Religionis ruinam miserabilem, videretque periculosissimum schisma per erectionem alterius prætenti Concilij, isto durante, & alia plurima scandala imminere Populo Dei, & uniuerso orbi perturbationem non modicam, ex resistentia, quam aduersus debitam reformationem Ecclesie, & salubri huius

huius sanctæ Synodi opera, Dominus Eugenius Papa Quartus diuisionem assiduam •
 fouendo, & libitum propriæ voluntatis, decre-
 creis, & ordinationibus Synodalibus præfe-
 rendo, præstare videbatur, impulsæ est post
 longam plurimo um annorum expectatio-
 nem, super regimine Ecclesiastico salubrem
 prouisionem querere, & ipsum Dominum
 Eugenium inducere, ut ea, quæ saluti sui
 ipsius, & vniuersæ Ecclesiæ congruebant, in
 tantis tamque urgentibus necessitatibus age-
 re curaret, cum hoc ipsum eidem sanctæ Syn-
 odo maximè liceret, atque incumberet, ex
 ea autoritate, quam à Christo immediatè
 accepit, cui vniuersi fideles cuiuscumque sta-
 tus, etiam si Papalis existant, obedire tenen-
 tur in his, quæ pertinent ad fidem, extirpa-
 tionem schismatis, & reformationem Eccle-
 siæ in capite, & in membris, veluti deter-
 minatio vniuersalis Ecclesiæ in sacris scri-
 pturis fundata, & in celeberrimo Concilio
 Constantiensi promulgata, diffiniuit; adij-
 ciens, quòd quicumque contumaciter ipsi v-
 niuersali Concilio obedire contempserit in
 prædictis, & pertinentibus ad ea, condignæ
 pœnitentiæ subiiciatur, & debite puniatur,
 ad alia iuris remedia, si opus fuerit, recur-
 rendo. Et tandem pridie Kal. mensis Augu-
 sti nouissimè præteriti, decreuit hæc sanctæ

Sess. 4. & 5.

Sess. 26.

F

Synodus, terminum sexaginta dierum peremptoriè præfigere, infra quem præfatus Dominus Eugenius coram eadem Synodo per se, vel per alium compareret, si qua super prædictis, & alijs in dicto monitorio expressis, ceterisque in futurum proponendis, quæ tunc non sine rationabili causa tacebantur, pro sui excusatione, vel defensione duceret proponenda. Quo termino elapso, siue dictus Dominus Eugenius compareret, siue non, hac sancta Synodus ad ulteriora procedere decrevit, cognoscendo, & terminando, prout Ecclesiæ Sanctæ Dei, Spiritu Sancto dictante, videretur expedire. Sed (quod cum dolore referimus) ipse Dominus Eugenius infra assignatum terminum, neque per se, neque per alium comparere voluit, aut minimam excusationem, si quam haberet, transmittere: imò correctionem effugere volens, dissolutionem, translationemque Concilij, quam de iure non poterat, de facto, pendente termino, attentavit: cum tamen iam altera vice dissolutionem huius Concilij per eum attentatam revocasset, declarans eam irritam, & inanem, dicensque ipsum Concilium pro reformatione Ecclesiæ in Capite, & in membris legitimè inchoatum, continuatum fuisse, & prosecutionē habere debere, perinde ac si nulla dissolutio facta fuisset.

Sessio. 16.

Quibus attentis, elapso dictæ citationis termino, suam contumaciam in publica sessione promotores, & procurator fiscalis huius sacri Concilij accusarunt. Exigentique iustitia, hæc sancta Synodus in eadem sessione contumaciam ipsam Domini Eugenij sufficienter accusatam declarauit, ipsūque contumacem reputauit, decernens, eius absentia non obstante, ad vltiora procedendum fore, prout ipsi sanctæ Synodo videretur; consideratis necessitatibus, & utilitatibus vniuersalis Ecclesiæ. Et quamquam attenta contumaciæ magnitudine, eadem sancta Synodus absque vltiori expectatione in ea re procedere potuisset, volens tamen nihilominus cum omni mansuetudine, & benignitate procedere, ad instantiam inclite memoriæ Sigismundi Imperatoris Romanorum, & venerabilium Archiepiscoporum, caterorūque Illustrum Principum electorum sacri Imperij, per sexaginta dies adhuc censuit differendam, ut per huius sanctæ Synodi patientiam probaretur, si ipsius Domini Eugenij animus ad salutem sui ipsius, & vniuersalis Ecclesiæ inclinari vellet. Confestim autem plenius innotuerunt ea, quæ aduersus hanc sanctam Synodum, & eius supposita, in pratensa dissolutione iam attentata, ipse Dominus Eugenius perpetrauerat, transferendo hæc

Hæc, & id genus alia huius Synodi caute legenda sunt, ob multas grauissimas rationes, quibus auctoritas Papæ astruitur, quæ his cleuatur.

sacrum Concilium in Ciuitatem Ferrariensem, si contra ipsum, aut aliquem Oratorum suorum ulterius procederetur. Et precipiendo sub pœnis, & censuris grauissimis, quas tamen inferre non poterat, suppositis huius sacri Concilij, ut ab eo discederent: qua in re decreta sanctæ Synodi Constantiensis, & istius manifestè violabat, transferendo Concilium pro libito voluntatis, præter consensum ipsius, ac etiam usurpando auctoritatem supra sanctam Synodum, de reformatione Ecclesiæ in capite agentem, non rectè sentiens (ut videbatur) de auctoritate sacrorum Conciliorum, & determinationibus vniuersalis Ecclesiæ fidem concernentibus, tam in ipso Constantiensi Concilio, quàm in isto promulgatis, super obedientia, quam Summi Pontifices Synodis vniuersalibus exhibere tenentur, ac esset schisma introducens, & aliud Concilium isto durante erigens, quod non fore Concilium, sed conuenticulum schismaticorum, iam præcedentibus decretis fuerat declaratum, ad dissolutionem Concilij iam semel per ipsum reuocatam, iterum redeundo, & ex modo dissolutionis, ac pœnarum adiectionis, supra Concilium iurisdictionem in facto reformationis assumendo, se non Concilio, sed Concilio sibi obedire teneri, factis suis protestando, Merebatur-

que tantarum, tamque grauium offensarum in Ecclesiam Dei, & scandalum ipsius iam pluries attentatum, ad praiudicium fidei, multitudo, ut illico in ipsum Dominum Eugenium iusti iudicij sequeretur ultio, pro ipsius, & vniuersalis Ecclesiae salute: Sed non immemor hæc sancta Synodus materna pietatis, adhuc expectare voluit, si forte ipse Dominus Eugenius à tanta inobedientia resipiscens, conuerteretur ad cor, euidentissimisque iuribus, & rationibus declarauit, hanc dissolutionem, & translationem nullas penitus esse, nulliusque roboris, & momenti, cum omnibus inde secutis. Intermissa quoque celeriori condignarum inflictione pœnarum, hæc sancta Synodus eas dumtaxat pœnas aduersus præfatum Dominum Eugenium tunc promulgare duxit, quæ aduersus Romanos Pontifices sacra generalia Concilia dissoluere, & perturbare tentantes, ordinata fuerant: ut videlicet, nisi infra quatuor menses à die dissolutionis, & translationis per eum attentatarum, resipisceret cum satisfactione reali, ab omni administratione Papali esset ipso facto suspensus. Quæ quidem Papalis administratio ad generale Concilium deuolueretur. Et si hanc pœnam per duos menses sustineret animo indurato,

post quatuor prædictos menses contra ipsum usque ad priuationem inclusiue per Concilium generale procederetur. Quas pœnas hæc sancta Synodus ipsum Dominum Eugenium, si non respiceret cum satisfactione reali (ut præmittitur) declarauit, & non solum declarauit, sed etiam expresse decreuit incursum. Cum verò iam, & prior terminus sexaginta dierum indulgentiarum post contumaciam accusatam, & alius quatuor mensium post diem prætense dissolutionis, & translationis huius Concilij per ipsum Dominum Eugenium attentatarum, elapsi sint, & pendens ipsis dilationibus, nulla correctio, aut emendatio conspiciatur prouenisse, imò potius continuatio abusu, & deformitatum in offensam diuinæ Majestatis, & interitum animarum, rebellioque, & inobedientia Domini Eugenij aduersus sanctam Synodum vniuersalem, & decreta ipsius, procuratio insuper assidua erectionis illius prætensi Concilij Ferrariensis, per transmissionem literarum ad diuersas regiones, & conuocationem plurimorum ad idem Concilium, quod fore conuenticulum schismaticorum, iam declaratum commemorauimus. Ex quibus autoritatis sanctorum Conciliorum pessundatio, & reformationis Ecclesiæ Dei extinctio, & inductio schismatis inauditi

per erectionem alterius pratenſi Concilij, iſto durante Concilio, ac denique determinationum Eccleſiæ vniuerſalis paruipenſio, in laſionem irreparabilem Catholice Fidei ſequeretur, niſi diuina pietas ſua Eccleſiæ in tantis languoribus ſubueniret. Vrgetur tandem hac ſancta Synodus, ne tanta mala diſſimulando aſſenſum illis præſtare videatur, ne facilitas veniæ, incentiuum tribuat delinquendi, ſeu malè agendi, cum leniora remedia non proficiunt, vtiliorem, & ſalubrem adhibere medicinam, atque poſt varias expectationes tandem ſaluti vniuerſalis Eccleſiæ prouidere, & ad ſuſpenſionem ipſius Domini Eugenij ab adminiſtratione Papali (quam pœnam ſacra Conſtantiensis Synodus Romanis Pontificibus in varijs caſibus cenſuit inferendam) procedere, alias pœnas duriores adhuc pro ſua manſuetudine differendo, vt ſaltem per compulſionem iuſtitie cum temperamento miſericordie, ipſius Romani Pontificis animus ad ea, quæ ſunt ſalutis, & pacis in reformationem debitam Eccleſiæ vniuerſalis, & anime ſue, & totius populi Chriſtiani ſaluiferam ædificationem, ipſiùſque Eccleſiæ futuris temporibus pacificationem gratiſſimam, & autoritatis ſacrorum Conſiliorum conſeruationem valeat inclinari. In virtute

igitur Omnipotentis Dei, in cuius nomine hæc sancta Synodus congregata existit, & à quo immediatè potestatem super uniuersos fideles cuiuscumque dignitatis, etiam si Papalis existant (ut præmissum est) accepit, eadem sancta Synodus prædictum Dominum Eugenium Papam Quartum manifestum contumacem, & in aperta rebellionem persistentem, ac notoriè incorrigibiliterque Ecclesiam Dei scandalizantem, omnibus præmissis tam coniunctim, quàm diuissim attentatis, ab omni administratione Papatus in spiritualibus, & temporalibus suspendit, ac suspensum esse declarat, processura tandem ad ulteriora usque ad sententiam finalem inclusiue, si opus fuerit ipso Domino Eugenio non amplius vocato, prout utilitati, & necessitati Ecclesie Spiritu Sancto distante conspexerit expedire. Omnem autem ipsius Papatus administrationem in his omnibus, quæ in spiritualibus, & temporalibus, ad solum Papam, & Sedem Apostolicam de iure pertinere noscuntur, eadem sancta Synodus ad seipsam decernit, ac declarat esse deuolutam, ne propter gubernationis defectum, Ecclesia interim varia discrimina pati possit, decernens itritum, & inane quidquid durante hac suspensione, per ip-

Hæc omnia
irrito conatu
attentata Cō-
cil Later. de-
clarauit,
Sess. II.

sum Dominum Eugenium ratione Papatus factum fuerit, vel attentatum. Omnes quoque Reges, Principes, Communitates, & alios cuiuscunque status, & dignitatis existant, hæc sancta Synodus monet, & requirit, & eisdem in virtute Sanctæ Obedientiæ, & sub Diuini obtestatione iudicij mandat, Ecclesiasticis verò personis quacunque dignitate, etiamsi Cardinalatus, Patriarchali, aut Pontificali præsulgeant, sub pœnis, quas ipso facto incurrant excommunicationis, & suspensionis ab omnibus dignitatibus, & beneficijs, & officijs, quocunque nomine nuncupentur, etiam si forent Metropolitane, aut Cathedrales Ecclesiæ, siue in titulum, siue in commendam obtineant: Vicarijs autem Gubernatoribus, Vassallis, Feudatarijs, & subditis Romanæ Ecclesiæ, sub pœna priuationis ipso facto omnium Feudorum, & aliorum quorumcunque iurium, & priuilegiorum, quæ ab ipsa Romana Ecclesiæ obtinent, districtè præcipit, ut durante hac suspensione pretextu cuiuscunque iuramenti, subiectionis, aut promissæ fidelitatis, eidem Domino Eugenio nullatenus obediant. Ipsos quoque ad iuramenta huiusmodi, & promissiones durante ipsa suspensione, nullatenus astringi declaramus, sed ad hoc sacrum Concilium

in omnibus recurrent , pro quibus ad Romanum Pontificem recurrere soliti sunt. Intendit enim hac sancta Synodus mundè, iuste , ac sanctè necessitatibus quorumcunque providere , &c. Decernit autem hac sancta Synodus huius decreti publicationem in presenti sessione factam, eiusque affixionem in valuis maioris Ecclesiæ Basileensis, vim habere monitionis, citationis, & executionis; & ita uniuersos arctare , ac se personaliter comprehensè, & eis intimatum fuisset. Datum in sessione publica in Ecclesia maiori Basileensi solemniter celebrata, nono Kalendas Febr. anno à Natiuitate Domini 1439.

XXXV.

Quis plurimorum super hoc decreto sensus,

Nemo sanè est , qui nunc non intelligat , quàm multa in hoc decreto contineantur , quæ iure merito Censuram Ecclesiæ passa sint: Verùm quàm facile nobis est ex euentis saniora consilia æstimare , & virtutem Eugenij, quam non fefellit exitus, honorare, tam certè obscurum erat illis temporibus, cui parti tutius esset adiungi, cum celeberrimæ toto Orbe Academiæ, Parisiensis, Colonienfis, & Louanienfis, Concilij authoritatem supra Pontificiam extollerent , & recens memoria Synodi Constantienfis (quam vt sacra-

tissimam, & Ecclesiæ vtilissimam omnes venerabantur) Basileensibus, qui eius se nomine tuebantur, magnam æstimationis accessionem faceret.

XXXVI.

Græci reconcilian-
turi in
Concil. Flo-
rentino.

Quamquam aliunde ingens Eugenio accrescebat fama ex rebus feliciter cum Orientalibus gestis: Eo enim auspice non Græci modò errores suos exuerunt, sed ipsi quoque Armenij missis Oratoribus in eandem fidei consensionem sponte concesserunt; quod vtrunque duplici decreto testatus est Pontifex, altero prid. Non. Iulij, altero 10. kal. Decembris eiusdem anni 1439. edito. Verùm, vt institutum teneret Eugenius, de singulis Amedeum certiores facere nunquam omisit. Postridie siquidem quàm decretum promulgarat, hanc ad eum scripsit Epistolam. *Eugenius, &c. Gloria in Altissimis Deo, & in terra pax hominibus bonæ voluntatis. Iuuat, dilecte fili, in vocem exultationis erumpere, & gestiente animo cum Angelis miscere letitiam, quandoquidem ineffabile gaudium, quod erit Christiano populo, nuntiamus. Tanto quippe mens nostra diuinæ consolationis rore perfunditur, ita exhilaratur cor nostrum, vt quod sentimus explicare nequaquam valeamus, solá-*

Exstat inter
acta Conci-
lij Floren.

Epistola Eugenij
ad Amedeum.

que in gratiarum actione, & voce laudis
 requiescat affectus noster. Ecce enim, quod
 ardentissimo studio, & indefessa pietate o-
 lim, & longè antequam ad Pontificatus a-
 picem assumeremur optauimus, Orientalis,
 & Occidentalis Ecclesie diuturnum perni-
 ciosúmque dissidium post quadringentos
 quinquaginta annos Diuina tandem mise-
 ratione sublatum est. Qua in re licèt om-
 nem pro viribus diligentiam adhibuimus,
 quantum Dominus donare dignatus est,
 totum tamen infinitæ illius bonitati tribui-
 mus, sine cuius opere totum est inane, quod
 geritur. Namque ab ipsis nostri Apostolatus
 inityjs, omni studio elaborauimus, ut v-
 triusque Ecclesie vnio fælicissima sequere-
 tur, & post multas hinc inde missas lega-
 tiones, aduenerunt ad nos anno præterito
 adducti, & hætenus sustentati sumptibus
 nostris Carissimus in Christo filius noster
 Ioannes Paleologus Romæorum Imperator
 Illustris, & bona memoria venerabilis fra-
 ter noster Ioseph Patriarcha Constantino-
 politanus, & Locumtenentes Alexandrini,
 Antiocheni, & Ierosolymitani Patriarcha-
 rum, Legatique Trapezuntij Imperatoris,
 Iberorum, Ruthenorum, & Valacorum,
 cum Metropolitanis, & Clericis, ac Nobilibus
 plurimis, & multitudine copiosa: Audi quo-

que huius sacratissima unionis, laboribus plurimis, marisque periculis se se exponere nequaquam cunctati sunt, sacro œcumenico Concilio (quod intra Italiam, & ubi nos commodè interesse possemus, fieri magna cum instantia postularunt) adesse cupientes. Ad- uenerunt autem ad disputandum parati, sine contentionis tamen vitio, aut pertinaciæ studio. Nos itaque Diuini, humanique Iuris professores omni ex parte congregare curauimus, qui cupientibus veritatem aperirent. Deoque largiente, postquam eis tam ex scripturis Diuinis, quàm ex sanctis Patribus Latinis pariter, & Græcis, veritas est per omnia patefacta, libentissimè consenserunt inuente veritati, Spiritumque Sanctum ex Patre simul, & Filio procedere professi sunt, summamque Romanæ Ecclesiæ, & sanctæ Sedis Apostolica autoritatem, quam improbè nimium quidam opprimere nituntur, græte recognouerunt, atque in reliquis consenserunt, prout ex decreto inde confecto, quod his inclusum mittimus, tua Excellentia apertius discet. Audemus sanè in Domino gloriarì, atque confidentissimè dicere, id nostra ætate peractum esse, quo nihil maius, nihilque dignius ab ipso Apostolica predicationis tempore Catholica vidit Ecclesiæ. Neque vero is eris finis diuinorum mirabilium,

sed diuina miserationis latior campus aperitur, ut Sol ille iustitiæ, qui in Oriente iam ortus est, ad ipsas quoque infidelium tenebras radios suæ lucis extendat, fiatque salus domui, atque ad extremum terræ, omnēque vno ore, & vno spiritu glorificent Deum, & Patrem Domini Nostri Iesu Christi. Expectantur ecce in dies cum nostris Nuntiis ad id missis, & iam pro foribus adesse nuntiantur Armenij, gens magna, & celebris, parati se per omnia Romana Ecclesiæ, & sanctæ Sedi Apostolica subdere, eiusque mandatis, & doctrinis incunctanter obedire. Merito itaque, dilecte fili, cum in re, iam tam multa, in spe, etiam plura teneamus, omnipotenti Deo hostiam contulimus Iubilationis, & laudis: Tibique ista insinuanda putauimus, ut nostrorum in Domino gaudiorum particeps factus, diuina pietati nobiscum gratias referas, hortamur, ut Christiana deuotionis affectu per tuum dominium letanias, Processiones, orationesque publicas fieri iubeas: Partim referendo gratias pro acceptis à Deo muneribus, partim orando, ut complere dignetur Omnipotens suum opus, & barbaras nationes in sua feritate gloriantes, sub sacratissimæ Christiana fidei iugum mittere. Et quoniam spes adeò lata se se undique aperit,

pio monemus affectu, ut ad eripiendos ab infidelibus, à quibus indignissimè opprimuntur, illarum partium Christianos nobiscum animum intendas; Iam enim Deo inspirante Classem, terrestresque copias proximo vere parare intendimus, sperantes quòd qui cœpit in nobis opus bonum, ipse perficiet, ac per huiusmodi nostra studia à iugo miserabilis servitutis Catholicum gregem propitius, ac benignus eripiet. Confidimus autem negotium facillimè, felicissimèque successurum per tuam, reliquorumque Christianorum Principum opem, atque operam. Accingere itaque, fili, ardentique animo concurre ad hæc studia pietatis, ex quibus, & in hoc saculo gloriam consequeris, & in futuro cum Pïjs, fidelibusque Principibus, qui ab initio Deo placuerunt, conscribi mereberis: Nos enim te per alias literas nostras, & Nuntios requiremus, non ambigentes te nihil à tua, maiorumque tuorum Pietate, ac Nobilitate degeneraturum. Datum Flor. An. 1439. Non. Iul. Pont. an. 9.

Nondum hæc Amedeus acceperat, cum longè diuersa Basileensi è cœtu allata animum eius haud vulgariter cruciabant:angebatur quippè non mediocriter ob diuersa Basileensium studia,

XXXVII.

Amedeus
quid agat
incertus.

Pius 2. in Bulla
Retract. sue.

& sinistros rumores, qui de Pontifice tota Gallia, Germania, Hispania, & magna Italiæ parte inualescebant. Rarus erat in illis partibus, qui Eugenium defenderet. Atque ut Pius II. in Re-tractatione sua loquitur, *aduersus Concilij dignitatem mutire aliquid, crimen Heresis fuit; una omnium vox Concilium Eugenio præferebat, de sedis Apostolicæ præcellentia, aut silentium, aut contemptus; Concilium, Concilium cuncta sonabant.* In hoc æstu post varias cunctationes tandem Basileenses 25. Iunij Eugenium Pontificatu lapsum his verbis declararunt.

XXXVIII.
Decretum
depositionis
Eugenij,
Sess. 34.

Sacrofancta generalis Synodus Basileensis, in Spiritu Sancto legitimè congregata, vniuersalem Ecclesiam representans, ad futuram rei memoriam.

Obserua hæc omnia irrita esse post abrogatam à legitimo Pontifice Patribus auctoritatem.

Prospexit Dominus de excelsis sancto suo, de Cælo in terram adspexit, ut audiret gemitus Ecclesiæ plorantis super perditionibus animarum pretioso Iesu Christi sanguine redemptarum, & malis innumeris, quæ in Religionem Christianam irruerunt. Et quoniam iustus est ipse Dominus, & iustitias dilexit, in unum hominem, per quem scandalum venit vniuerso Orbi, & quo grauiter peccante, atque correctionem spernente, ira super omnem populum venire videtur, iudicium

cium facere disposuit, per ministerium Ecclesie sue congregata in nomine ipsius Christi Saluatoris omnium, qui ait: Vbiunque fuerint duo vel tres congregati in nomine meo, ibi ego sum in medio eorum: & qui de peccatore nolente Ecclesiam audire dixit: si Ecclesiam non audierit, sit tibi sicut Ethnicus, & publicanus. Eiusdem quoque diuina prouidentia prouidens resistentias, & oppugnationes, quas aduersus reformationem Dei Ecclesie, & auctoritatem sacrorum generalium Conciliorum ipsam Ecclesiam representantium, ac bonum publicum totius Religionis Christiana suscitaturus erat in tempore suo Eugenius Papa Quartus, quantaque scandala, diuisiones, & schismata facturus in orbe, sacram Synodum Constantiensem excitauit per Spiritum Sanctum, ut declarationem veritatis fidei Catholicae toti orbi explicaret, dicentem, quod Concilium generale uniuersalem Concil. Const. Ecclesiam representans potestatem à Christo Sess. 4. immediate habet, cui quilibet cuiuscunque dignitatis, etiam si Papalis existat, obedire tenetur in his, quae pertinent ad fidem, extirpationem schismatis, & reformationem generalem Ecclesie in capite, & in membris. Item quod si quis cuiuscunque status, vel dignitatis, etiam si Papalis existat, qui mandatis, statutis, siue

ordinationibus , aut praeceptis ipsius Concilij generalis in praedictis , & pertinentibus ad ea contumaciter obedire contempserit, nisi resipuerit condigna Pœnitentiae subijciatur, & debite puniatur, etiam ad alia iuris subsidia (si opus fuerit) recurrendo. Qua si quidem declaratione viam parauit miserator Dominus , per quam Ecclesia Dei in praefatum Eugenium multiplices excessus (qui addeò notorij sunt , quòd nulla tergiversatione celari possunt) perpetrantem , & contumaciter Ecclesiam audire, ac praeceptis , statutis , & ordinationibus Synodalibus obedire contemnentem , iustum iudicium ferre haberet: Iuxta cuius veritatis declarata dispositionem , hæc sancta Synodus Basileensis in Spiritu Sancto legitimè congregata , uniuersalem Ecclesiam representans , necessarium esse iudicans , ut cui pia non prodest correctio , debita non parcat abscessio , postquam in multa longanimitate , patientia , & mansuetudine post plures admonitiones expectauit eundem Eugenium , ut salutarem emendationem , & excessuum praedictorum correctionem efficere , tandem cum amplius differri non possit , quominus Catholica fidei , & saluti uniuersa Christiana religionis sub auxilio Spiritus paraclisi prouideatur , ne ex ulteriori protelatione

iustitie, sanguis pereuntium animarum de nostris manibus requiratur, sed cum diligentia salubre regimen gregi Dominico prabeatur, ut postquam veritas de terra militantis Ecclesie orta est, & iustitia de cælo prospexit, Deus ipse donet benignitatem, & terra nostra proferat fructum salutarem, oriatûrque simul nostris diebus iustitia, & abundantia pacis: eadem sancta Synodus pro tribunali sedens, per hanc suam sententiam diffinitivam, quam fert in his scriptis, pronunciat, decernit, & declarat Gabrielem prius nominatum Eugenium Papam IV. fuisse, & esse notorium, & manifestum contumacem, mandatis, seu præceptis Ecclesie uniuersalis inobedientem, & in aperta rebellionem persistentem, violatorem assiduum, atque contemptorem sacrorum Canonum Synodaliū, pacis, & unitatis Ecclesie Dei perturbatorem notorium, uniuersalis Ecclesie scandalizatorem notorium, Simoniacum, periurum incorrigibilem, schismaticum, à fide deuium, pertinacem, hereticum, dilapidatorem iurium, & bonorum Ecclesie, inutilem, ac damnosum ad administrationem Rom. Pontificij, omni titulo, gradu, honore, & dignitate se reddidisse indignum. Quem propterea eadem sancta Synodus à Papatu, & Romano Pontificio ipso iure pri-

Saniota de
eo post res-
piscentiā suā
ipsimet Basi-
leenses reu-
lerunt.

uatum esse declarat, & pronunciat, ac ipsum ab iisdem amouet, deponit, priuat, & abijcit, decernendo nihilominus contra eundem ad executionem etiam aliarum iuris pœnarum, ad quas hac eadem sancta Synodus, hac eadem sua sententia ipsum condemnat, ulterius fore procedendum. Ac idem inhibet, ne deinceps pro Papa vel Romano Pontifice se quouis modo nominet, seu gerat, omnesque Christicolæ ab ipsius obedientia, fidelitate, ac iuramentis, & obligationibus eidem quomodo libet præstitis, absoluit, & absolutos esse declarat: ac omnibus, & singulis Christi fidelibus inhibet sub pœnis fautorum schismatis, & heresis, ac priuationis omnium beneficiorum, dignitatum, & bonorum ecclesiasticorum, & mundanorum, & alijs pœnis iuris, etiam si Imperialis, Regalis, Cardinalatus, Patriarchalis, Archiepiscopalis, aut Episcopalis dignitatis, aut etiam si Communitates, Vniuersitates, & Collegia existant: qui si contra inhibitionem fecerint, sint autoritate huius decreti, ac sententia ipso facto priuati, & alias iuris incurrant pœnas, si eidem Gabrieli notorio schismatico, periuro, heretico, scandalizatori incorrigibili, pertinaci priuato, deposito, amoto, & taliter declarato, tanquam Summo Pontifici obediant, pa-

reant, vel intendant, aut eum quouis modo sustineant, vel recepent, aut sibi auxilium, consilium, vel fauorem praestent. Nec non pronunciat, decernit, & declarat eadem sancta Synodus omnes, & singulos processus, inhibitiones, sententias, censuras, & constitutiones, ordinationes, & alia quacunque per eum, aut alios quosunque factos, & facta, quae possent praemissis obuiare, irritos, & inanes, ac irrita, & inania, nulliusque fuisse, aut fore roboris, vel momenti. Datum in sessione nostra publica, in maiori Ecclesia Basileensi solemniter celebrata 7. Cal. Iulij Anno à Natiuitate Domini 1439.

XXXIX.

Audax sanè facinus, & ab antiquis Ecclesiae institutis alienum; tamen enim (vt Basileenses supponebant) alicuius culpæ reus fuisset Eugenius, meminisse debuerant quid olim ijs respondisset Ennodius, qui ausi fuerant à Theodorico Rege Arriano visitatorem contra Symmachum Papam anno Domini quingentesimo postulare: *Aliorum hominum causas Deus voluit per homines terminare, sed sedis ipsius praesulis, suo sine quaestione reseruauit arbitrio: Voluit Petri Apostoli successores caelo tantum debere Innocentiam, & subtilissimi discussoris in-*

Decreti superioris iniquitas.

Pontifex Summus nullius iudicio in terris subijcitur.

Can. aliorum 9. q. 3.

dagini inuiolatam exhibere conscientiam.

Et rursus. *Sanctorum patet voce Pontificum, dignitatem Sedis Romanæ factam toto orbe venerabilem, dum illi quidquid fidelium est ubique submittitur, dum totius corporis caput esse designatur, de qua mihi videtur dictum per Prophetam: Si hæc humilietur, ad cuius confugietis auxilium, & ubi relinquetis gloriam vestram? Hinc celebris illa vox Patrum in Concilio Roma.* 4. *Symmachus Papa Sedis Apostolicæ Prasul ab huiusmodi oppositionibus impetitus, quantum ad homines respicit, sit immunis, & liber, cuius causam totam Dei Iudicio reseruamus.*

XL.

*Quæ contra
tunc tēporis
differerentur.*

Hæc quamquam verissima sint, non deerant tamen, qui alia omnia differerent: valuisse ista aliquando in Ecclesia, cum priuati Pontificum mores, aut corruptionem, aut calumniam paterentur: ut nemini homini fas sit in illos inquirere, at Ecclesiæ integrum semper fuisse inuigilare an in ijs, quæ ad fidem pertinerent, aut vacillarent ipsi, aut cæteris titubandi occasionem præberent. Bonifacium martyrem hoc vidisse cum diceret, *huius (Papæ scilicet) culpas isthic redarguere præsumit mortalium nullus, quia cunctos ipse iudicatu-*

*Can. Si Papa.
distinc. 46.*

rus, à nemine est iudicandus: nisi deprehendatur à fide deuus: pro cuius perpetuo statu vniuersitas fidelium tanto instantius orat, quanto suam salutem post Deum ex illius incolumitate animaduertit propensius pendere. Porro ea, de quibus Eugenius insimularetur, ad fidem pertinere ex Decreti Constantiensis autoritate contendebant. Idémque decretum esse in Concilio Basileensi, & in adhæsione ab ipsomet Eugenio facta receptum, & iuratum: nunc igitur manifestè teneri ipsum, neque ab hæresis suspitione absolui posse occinebant. Etenim si decretum illud contra fidem erat, & ipse à fide deuierat, qui sua illud autoritate confirmarat: sin cum fide minimè pugnaret, legitimúmque decretum esset, quí se ab hæresis macula purgaret, qui legitimo Ecclesiæ decreto parere recusaret? Quod vel maximè vim habere Basileenses prædicabant, cum statutis illis ab Apostolica Sede auctoritas accessit, ac proinde Gregorium illum magnum huiusmodi decreta non minùs se quàm sancta Euangelia reuereri affirmare solitum. Nemini verò dubium esse quin, & illud Constantiense à Martino Quinto, & nouum hoc Ba-

Hæc passim
Basileenses
inculcant in
responsioni-
bus suis Syno-
dalibus.

Negant ta-

men plerique
Acta Con-
cilij Constan-
tensis con-
firmata, nisi
quæ Martini
v. electionem
sequuta sunt.
Quæ verò
circa primas
sessiones Ba-
sileensis Con-
cilij declara-
uit Eugenius,
præterquam
quòd vi ex-
pressa videri
possunt, non
satis manife-
stam confir-
mationē ha-
bent.

*Concil. Basf.
sess. 38.*

*Julian. in E-
pist. ad Eugen.
ad quem ta-
men iam his
temporibus
transierat.*

XLI.

Motus ani-
morum varij.

sileense ab Eugenio fuerit confirma-
tum, ac proinde illi minimè integrum
ea mutare, idque tentantem iure sus-
pectum in fide censendum pronuntia-
bant. Denique ut maiorem sibi apud
omnes fidem conciliarent, hoc semper
in ore habebant, & scriptis consigna-
bant. *Notum se facere vniuersis Catholi-
cis, quòd nullum sensum in suis decretis,
quæ Eugenius reprobant, haberent, nec ha-
bere vellent, nisi quem sacra Synodus Con-
stantiensis habuerit in declarationibus suis,*
quibus Papam Concilio submisit: quarum
declarationum vigore Ioannes 23. &
Benedictus essent depositi, Martinus
electus, & tot Cardinales, Prælati, &
Sacerdotes creati; quorum creatio ir-
rita magno cum Ecclesiæ damno cen-
senda esset, si vitiosa Martini electio cre-
deretur. *Quin si vitiosa Martini electio*
(aiebat Iulianus Cardinalis Eugenium
alloquēs) fuit, nec sanctitas vestra Papa erit,
quæ per Cardinales ab illo factos electa est.

Hæc aliæque innumera toto Chri-
stiano orbe iactabant Basileenses, qui-
bus non de vulgo tantum homines, sed
doctissimi quique, ac integerrimi haud
parum percellabantur. Hinc illi ani-
morum motus, & ingens tota Ecclesia

trepidatio, multis in dies ab Eugenio deficientibus, plerisque omnibus, qui modestiores videri optabant, neque Concilio auscultantibus, neque Eugenio accedentibus, cunctis incerta expectatione suspensis. Amedeus, ut in hoc ancipiti rerum statu conscientiae consulere suae, eo utebatur temperamento, ut dum se melior dies aperiret, apud utrosque Oratores suos haberet; ne quid tamen labis vlla ex parte sibi aspergi sineret, hac protestatione statim edita cauendum esse duxit.

XLII.

In nomine Domini Amen. Huius publici instrumenti tenore cunctis appareat cui-denter, & sit notum; Quod anno Domini 1439. Indictione 2. die vero vigesimo mensis Iulij, existente, & personaliter constituto Illustrissimo Principe Domino nostro Domino Amedeo Sabaudiae Duce, &c. Coram Reuerendo in Christo Patre D. Ioanne de Grolea Apostolico Protonotario, Praeposito Montis Iouis velut authentica persona, Ripallie in Camera Cubiculari ipsius Domini nostri Ducis. Ipse enim Illustrissimus Dominus noster Dux Sabaudiae animaduertens circa varietates, & alias multiplices differentias, & contrarietates praesentialiter existentes inter D. Eugenium Papam, & sacram Basi-

Amedeus
protestatione
facta sibi cau-
et.

leenſe Concilium, in præſentia duorum teſtium, ac mei Notarij, ac Secretarij ſubſcriptorum, Proteſtatus eſt, & tenore huius inſtrumenti profitetur, Quòd ſi forſan eius procuratores, Ambaſciatores, vel alij nuntij, tam in curia Romana, quàm in dicto ſacro Baſileenſi Concilio, vel alibi per eum deſtinati, & deſtinandi quicquam eius nomine comparuerint, dixerint, fecerint, aut peregerint, aut in futurum comparerent, facerēt, dicerent, ſeu aliàs quouiſmodo peragerent, quod à vera obedientia, & debito Catholica, & vniuerſalis Eccleſiæ quomodolibet deniaret, quod abſit, vel quæ fortè, in poſterum ipſi D. noſtro Duci aliter præiudicare, ſeu impingi, vel imputari poſſent, eiùſque honori, conſcientiæ, aut debito; Illa ex nunc prout ex tunc, & ex tunc prout ex nunc ſicuti verus Princeps Catholicus, & obediens Eccleſiæ filius non admittit, nec illis annuit, ſed potiùs denegat, & penitus contradicit. De quibus præmiſſis omnibus, & ſingulis ipſe Dominus noſter petijt à me Notario, & Secretario ſubſcripto ibidem præſente fieri vnum, & plura tenoris eiùſdem publica inſtrumenta, quæ iugiter poſſint, & valeant dictari, corrigi, augeri, & minui dictamine ſapientum, facti tamen ſubſtantia in aliquo non mutata. Acta fuerunt hæc die, loco, &

*indictione suprascriptis, presentibus spectabili Domino Claudio de Saxo milite, D. Ra-
uoyrie, & D. Bolomej, D. Neriaci Consilia-
rijs D. nostri Ducis testibus, ad hec astanti-
bus: in cuius rei testimonium prefatus Domi-
nus Prepositus sigillum suum duxit appo-
nendum, &c.*

XLIII.

Interea Basileæ consultabant Patres per plures menses quem Eugenio subrogarent, adeò distractis, & variantibus sententijs, ut nullus contentionum exitus esse videretur. Franci (quorum præcipua in eo cœtu erat autoritas) id agebant, autore Papyrio Massono, ut Ioannes Ludouici Aureliæ Ducis ex Valentina Insubri maior filius, Comes Engolismæ, & Petracoriorum eligeretur. Pari studio in id incumbibat Philippus Maria Mediolanensium Dux Ioannis aunculus. *Datus hic erat (ait*

Basileenses
Ioannem Engolismensem
ad Pontificatum vocant.

Papyr. Masson.
in Eng. 4.

idem autor) obses à fratre, Anglis anno 1413. cum nonum ætatis annum vix decurrisset. Iuueniles tamen annos in illo velut carcere sic religiosè consumpsit, ut de eo in Pontificem subrogando Basileæ deliberatum sit, propter heroicæ virtutes, quibus eum affluere notissimum erat; & si frustra, quòd Deus post annos exilij sui triginta duos, longique carceris molestias in Anglia

perpeſſas, uxorem ei, ac liberos, nepotéſque, ac pronepotes potentiſſimos, ac maximos deſtináſſet, Franciſcum primum Gallia Regem, eiúſque filios. Huic autem Ioanni, & Carolo filio eius, Aloyſiæque Sabaudæ uxori quid acciderit mortuís, referre placet, ne id factum quod reuera maximè impium eſt, vlla unquam deleat obliuio. Quieuerant uſque ad annum 1562. Nam tunc Grandimontanus Caluinianæ ſeruiens ſectæ, eius generis copias Engoliſmam rapuit, urbem Aquitania ſecundæ ad Carantonum amnem Auſonij verſu celebrem: Ab illis immanitate barbaris imagines in templis ſunt diruta, & ornamenta, veſtéſque Sacerdotum in priuatos uſus, & caſtrenſes tunicas; ſepulcra etiã Principum Regij nominis ſunt aperta, Ioanniſque, & Caroli filij, Aloyſiæque nurus cadauera reperta: ſed horum quidem aër ubi attigit, ſtatim in cineres abierant: At Ioannis mirati ſunt integrum, & incorruptum permanciſſe. Itaque vnus ex his Ioannes Ruſſierus, qui ſe Flandrum Centurionem vocabat, Engoliſmæ natus, adacto in viſcera lato pugione, in Principem illum nefariè ſauit, naſumque praſcidit: poſtea cateri milites caput ei crudeli feritate ſecuerunt, relicto trunco in illa ſubterranea fornice, in qua ſuneratus olim fuerat. Triennio poſt

Ioannis de-
mortui cor-
pus, diu in-
corruptum.

Hæreticorū
immanitas.

Carolus Rex Christianissimus, fraterque eius Henricus, unà cum Catharina matre in illū fornicem descenderūt Religionis causa, ut piè truncum illum veneratētur. Anno autem 1568. Vrbe à Calvinianis capta, truncus optimi, sanctissimiq; olim Principis erutus è sepulcro, ac militari ioco diu per templū, quod Petro dicatum est, brachijs tractus, modò pedibus raptatus: Denique ab impijs in frustra concisus est. De cuius eximjs virtutibus, pietate, vitæ instituto, sanctitate, atque obitu deposuerūt anno post mille quingentos decimo octauo coram Antonio Stanno Engelfmensi Episcopo testes septuaginta omni exceptione maiores, & in depositione illorum, quæ apud me est, reperi deliberatum esse de Ioanne in Pontificem eligendo. Hæc Massonus, & ex eo, Sammarthani fratres in Ioannis Elogio. Quæ pluribus retuli, ut hinc Pogij, Blondi, aliorūque artes retegantur, qui Basileensibus nihil aliud quàm quæstum, & lucrosam nundinationem propositam fuisse calumniantur. Ego certè eorum, qui talem, tantūque virum promouere studebant, si cætera adfuissent, non nisi rectum, sincerūque propositum dicere possum: cū enim in eodem homine sanctimoniam vitæ singularem,

*Lib. 5. histor.
Geneal.*

Quid in eo
deligendo
spectarent
Basileenses.

vnà cum autoritate, & potentia propè Regia coniunctam viderent, ab illa, morum reformationem in Ecclesia (qui præcipuus erat Concilij scopus) ab hac, præsidium aduersus impiorum conatus providebant: vt minùs mirum videri debeat, si quam de Ioanne Gallo spem frustra conceperant, in Amèdeo, maximi vtique nominis Principe, deinceps collocarint.

XLIV.

Ad Amèdeum
animum con-
uertunt.

Sed hæc qua via, & ratione processerint, non meis, sed oculati vtique testis Æneæ Syluij verbis hîc recitabo, si priùs ex eius Retractatione pauca præmiserò. Quam quidem Retractationem eo edidit consilio, vt ea quæ contra Romani Pontificis Primatum, & autoritatem in suis opusculis scripserat, reuocaret, suaderetq; omnibus, vt Ænea reiecto, Pium audirent, nec priuatum hominem, quàm Pontificem pluris facerent. Cæterùm vt ea damnat, quæ Catholicæ doctrinæ quoquomodo aduersantia publici iuris fecerat, ita ijs, quæ ad historiam pertinent, fidem haberi posse declarat, cùm disertis verbis profiteretur se veritatis fuisse studiosissimum, neque odio, aut adulatione, corruptum: *nihil, ait, mentiti sumus, ni-*

hil ad gratiam, nihil ad odium retulimus.
 Hunc igitur veritatis retinendæ adedò
 studiosum indagatorem audiamus, me-
 mores tamen illum tum de Eugenio
 malè sentientem, nonnulla spargere,
 quorum deinceps illum pœnituit. Et
 erit operæpretium veteres Ecclesiæ ri-
 tus in conclauibus, vt vocant, cogendis
 agnoscere, maximè cùm facile non sit
 vsque adedò exactam celeberrimæ a-
 ctionis descriptionem alio in autore
 reperire, ita vt Franciscus Modius Pan-
 dectarum Triumphalium accuratissi-
 mus Collector, huius Conclauis for-
 mam, tamquam omnium quas legisset,
 aut audisset perfectissimam Christianæ
 Reipub. spectandam dederit.

XLV.

Postquam igitur placuisse Patribus
 dixit Æneas, vt quando Cardinales
 deessent, quibus ius eligendi Pontificis
 præcipuè competit, tribus grauissimis
 Theologis delectus electorum com-
 mitteretur, qui (sicut in Constantiensi
 Concilio factum erat) ex quatuor præ-
 cipuis Nationibus viros eligerent omni
 exceptione maiores, ex quibus Con-
 claue componeretur; Hi ergo, inquit
 Syluius, quarto Cal. Nouemb. ex iussu
 Concilij relaturi, quos, legerant in

Electio-
 nis
 modus ex Syl-
 uij lib. 2. de
 Concil. Basil.
 quem descri-
 psit Francisc.
 Mod. in Pan-
 dectis Trium-
 phal.
 Triuiri legē-
 dis Electorib⁹
 deputati.

congregationem venerunt, quò loci iam omnes, vt aiunt, incorporatorum cœtus confluxerant, nec illa die ex his qui poterāt, quisquam defuit. Et quoniam nulli vnquam tres viri se aperuerant, quanto secretior res erat, tanto desideratior omnibus videbatur. Confabulari autem omnes inuicem, multa de tribus viris dicere, multa etiam de nominatione vaticinari, & alij istū, & alij illum electorem futurum contendere, & vt affectio, & verisimilitudo trahebat, quemque sic ratiocinari. Quia tamen nihil certi habebant, mira omnibus erat audiendi cupiditas. Et alij quidem festiuas induerant vestes, alij seruitores nouos conduxerant, alij etiam domum amicis commendaauerant, qui se futuros in numero electorum arbitrabantur: Fit enim nescio quo modo, vt se quisque supra virtutem æstimet suam; quorū ambitio magis postea irridetur, quàm impleatur. Cardinalis autem Arelaten. in tantā re anxius, & pluribus occupatus negotijs, aliquanto tardiùs venit, quàm tempus exegit, expectationemque sui non sine admiratione omnibus præbuit, qui tamen ad subsellia resedit, mora sua
primitus

primitus excusata: Hodie, inquit, magna res agitur, in nominatione, quæ statim aperietur, status Ecclesiæ pendet: si tres viri, quibus rem commisistis bene egerint, fateor quippe tardiusculè me venisse: si autem malè, nimis citò adsum. Quæ verbis, & trementi voce, & ore pallido, atque ex abundantia cordis pronunciauit: qui sic locutus, aspectu tristis, animo turbatus, & oculis minax cunctis terrori erat: tantùmque mentis mœrorem ostendit, vt plurimi conlacrymati sint, qui eius in fronte statum suum condiscunt. Verebatur namque optimus ille Pater, ne tres viri, spretis maioribus Prælati, plures ex inferioribus acceperissent: quæ res eò erat suspectior, quoniam nunquam scire aliquid de mente triumvirorum potuerat: qui vt corrugatam tunc Cardinalis frontem inspexerunt, quasi post coruscantem aërem ad sustinendam procellam se parauerunt. Timor tamen omnibus fuit, ne illo iterum die scinderetur Ecclesia, periculosiorq; illo tumultus formidabatur, quæ loci aliàs electio peperit. Iam enim vt quisq; mente conceperat, sic aut laudationi, aut vituperationi triumvirorum se accingebāt,

H

'XLVI.

Triumviri rationem deletionis sui reddunt.

Quibus cognitis, visum est tribus viris, ante aperturam tabularum, parumper fermocinari, & animos audientium prius placare, quàm læderentur, nominationisque suæ tunc causas aperire, cum audiri possent: scientes quia post vulnus inflictum nemo benignus est auditor. Locutus pauca prius est Abbas Scotus triumvir, & post eum Ioannes Segouius: ut igitur nulli se spretos crederent, qui forent omissi, præfatiunculam istiusmodi præmiserunt: cogitatum se maximum habuisse, quos viros intra cōclaue reciperent, quosque extra dimitterent, opusque sibi visum fuisse non minùs extrà, quàm intus viros habere sensatos, qui & conclaue tuerentur, & fieri nouitates in Synodo prohiberent; idque ex Platonis summi Philosophi præceptis se didicisse, qui Rectores Ciuitatum sic curare totum Reipublicæ corpus iubet, ne dum partem aliquam tueantur reliquas deferant: quæ res eos etiam commouerit electores quoque sic per provincias nominare, ne honoratæ aliæ, aliæ neglectæ viderentur: in electis verò magnam curam habuisse, ne vel Episcopum sine plebe, vel Abbatem sine

Monasterio fumerent : In omnibus autem per se nominatis , aut bonitatem singularem, aut nobilitatem cum bonitate , aut summam scientiam cum bonitate , & nobilitate se inuenisse : & in Episcopis quidem cum Cardinali , qui Episcopus esset , numerum esse Apostolis æquatū : Abbates septem, Theologos quinque , inter luminatos, ac doctores nouem, omnes autem in presbyteratus ordine constitutos. Alios quoque officiales à se nominatos, & dignitatibus esse , & virtutibus insignitos. Vicecamerarium quidem vnum, custodes conclauis octo : cæremoniarum Clericos duos : promotores duos. Procuratorem Fiscalem vnum : Soldanum vnum : quam circa nominationem habuisse se, & ad deputationes , vt iniunctum sibi fuerat, oculum.

XLVII.

Quibus dictis aliquantisper multitudinem placauerūt, factoque miro inter omnes silentio , apertæ sunt nominationis tabulæ , quas Ioannes Segouius legit, fuitque omiffus in illis nationum ordo : onerosum enim triumviris putatum est nationem nationi præferre. Ideoque vt quisque prior , aut prælatura , aut dignitate fuit , sic prius est no-

Quæ nationes Electores dederint.

minatus. Ego autem nequaquam timebo nationum seruire ordinem, qui Constantiæ fuit seruatus; nec mihi inuidiam timeo, quia nec præpositis gratiam, nec postpositis iniuriam faciam; ordinem namque istum, neque nobilitas, neque maioritas, sed tempus peperit, quia ut quæque natio verbum Dei prius suscepit, sic prior habetur: nec aut laudi est mihi, aut vituperio, dummodo Christianus sim, maiorum meorum, vel matutina, vel vespertina conuersio: nec plus habet in Euangelio, qui manè ad vineam venit, quàm qui vesperi. Nationem tamen Italicam etiam sedes Beati Petri, & Romanum Imperium facit priorem: seruabimus ergo ordinem nationum, facilioremque legentibus præstabimus intellectum. Illud tamen prius sciendum est, Cardinalem Arelatensem, non nominationis triumviralis gratia, sed iure proprio ad electionem venisse; ideoque primum eum extra nationum ordinem pono; eundemque locum cæteri Cardinales habuissent, si qui aut reintegrati Ecclesiæ, aut Eugeniana labe minimè commaculati in tempore aduenissent. Primus itaque omnium ele-

torum Cardinalis fuit Arelatensis, vir & Constantiæ insuperabilis, & prudentiæ incomparabilis, cuius virtuti haud ascribere titubauerim quæcunque in Concilio gesta sunt, quia nec sine illo prælati perseverassent, nec alicuius Principis umbra protexisset: sed pergo ad nominationem.

XLVIII.

Electores
Italici.

Ex Italica natione recepti sunt Episcopi, Guilielmus Vercellensis, vir & in Concilio notus, & in patria dilectus, & origine quidem Gallicus, dignitate verò Italicus, & in quo prædecessoris odor sui Eusebii adhuc spirat: Georgius Augustensis ex clarissima Salutiarum familia genus ducens, ac non solum sanguine, sed animi quoque generositate & virtutibus nobilis: Ioannes Eporediësis, & literis, & probitate clarus, ac senilem prudentiam in ætate adhuc iuuenili ostendens. Ludouicus Taurinensis claris ortus parietibus, & scientia iuris eminens, & moribus utique honestis excultus. Abbates; Aleramus S. Benigni Fructuariensis, vir tam moribus, quam ætate grauissimus, cui ex nobilissima domo de Carrecto origo est, quæ tantæ olim sublimitatis fuit, ut Imperatores quoque habere meruerit. Et huic qui-

H iij

dem Germanus est Matthæus Albigaunenſis Episcopus, cuius omni in re prudentiam per plures annos sacrum Concilium demiratum est; & eorum sanè qui alterum videt, vtrunque videt, sic est vterque, & habitu corporis, & viuendi consuetudine assimilis. Iacobus de Secusia, & annis, & prudentia antiquus. Doctores, frater Ioannes de Montecanuto præceptor domus Sancti Antonij de Rouersio, cuius in toto ordine Sancti Antonij magna æstimatio est, quique post magnum Abbatem Secundus habetur, & hic in Italia beneficium habet, in Gallia parentes. Frater Bartholomæus de Prouanis, præceptor domus de Clauasio eiusdem ordinis, vir bonitate non minùs, quàm doctrina amabilis: cùmque ijs viris ad eligendum Romanum Pontificem Italicorum natio est admissa.

XLIX.

Electores
Franci.

Ex natione Gallica, quæ & ipsa secunda est, cuiusque in Ecclesiam Dei permaxima extant beneficia, nominati sunt ex Archipontificali dignitate, Ioannes Tarentasiensis, vir vita præstans, & omnis inimicus ambitionis, quique inuitus ad tantam dignitatem vocatus fuit. Ex Pontificali, Franciscus Geben-

nensis antiquus Romanæ Curix officialis, vir, vt parui eloquij, sic magnæ intelligentiæ, & cuius iudicium in omni re ardua sit præponendum. Bernardus Aquensis, Iurisconsultus admodum oculatus, subtilisque: quia tamen ob notissima corporis impedimenta, infestamque sibi podagram, hîc se excusauit, Lodouicus Massiliensis in eius locum suffectus est, vir animo vastus, & ab omni simulatione alienus: quem talem putâ, qualem audis: nusquam fallax, nusquam deceptor: Et hic sententiam in Gabrielem latam publicè legit, cùm ille ex Romano deiectus Pontificio fuit. Ex Abbatiali Raymundus Conchenfis, scientiam iuris Pontificij apprimè callens, multaque in rebus conciliaribus experientia tritus: quique pro sancta Synodo compluribus legationibus functus est. Ex gradu Theologico, Nicolaus Tibout Normannus, vir quondam negotiosæ, nunc autem nimium senescens otiosæ virtutis: Ioannes de Valle Brito, & patriam virtutem, & ingenium ostendens: Thomas verò de Corcellis triumvir fuit. Ex Iurisconsultis, Guilielmus Hugonis Archidiaconus Metensis, vir nec prû-

dentia vlli prædictorum, nec scientia inferior. Hi omnes cum Cardinali Arelatenſi ex tota Gallia ad electionem Romani Papæ vocati ſunt.

L.

Electores
Germani,

Ex natione Germanica, quæ omnium eſt ampliffima, recepti ſunt ex Episcopali præminetia, Fredericus Baſileenſis nobilitate generis, & humanitate in omnes eximius. Ex Abbatiali, Conradus de Lucella Ciftertiensis Ordinis, vir, vt Monachum decet, & à pompa sæculi, & ab omni ſuperbia remotus, ac Thomas de Scotia triumphans. Ex doctoreali Derzelaus Archidiaconus Cra-couiensis, Polonus genere, conuerſatione ſuauiſ, & doctus. Ioannes Vuiler, Decanus Baſileenſis, vir manſuetus, & ſciens plura quàm prædictus. Henricus de Iudeis in ſplendida Vrbe Coloniensi humanitate, ac doctrina patriam redolens. Iacobus de Saltzburga, Canonici Ratiſponenſis, vir neque precibus, neque minis commutabilis. Chriſtianus autem de Gretz (vt ſuprà diximus) iam in conſortio triumphatorum erat aſſumptus.

L I.

Electores
Hiſpani,

Ex natione Hiſpanica, quæ & ipſa vaſtiſſimos habet, ac pernobiles campos, quatuor Chriſtianis Regibus, &

vno infideli regnata, hi sunt ad electionem magni pastoris accersiti. Pontifices octo, Dertusensis Consilij utilis, & animi stabilis, totaque conuersatione perlepidus; hic in ea sessione, qua lata est in Gabrielem depositionis sententia, præfedit: nec post, quamvis plurimi pestem fugerent, de recessu habuit mentionem: fidus semper & Arelatensis comes, & Ecclesiæ filius. Georgius Vicensis summa doctrina, & grauitate, quo nemo pluribus, nemoque grauioribus apud Principes Concilij causa legationibus usus est, quas cum magnis vitæ periculis, magnisque peregit sumptibus; qui etiam illud singulare fecit. Is enim ut vidit Principes Gabrielis causam tueri, & Oratoribus suis præfinita loqui præcipere Eugenianis: legatione Regis sui, quam tunc apud Synodum gerebat, se abdicauit, ne cum alijs Principum nuntijs dicere aduersus conscientiam cogeretur. Quod si alij fecissent Episcopi, nequaquam auctoritatem Ecclesiæ Principes cum sua neutralitate paruipendissent: Sed omnium malorum, quæ in Ecclesiam irruerunt, partem maximam ipsimet induxerunt Sacerdotes. Ludo-

uicus Vifensis, vir, & amicus amico, & conuerfatione perplacidus; hic Orator Ioannis Portugalliæ regis præftantiffimi in Concilio fuit, quo vita functo etiam in Concilio manfit, tribusque ipfius Concilij honorificentiffimis legationibus functus eft. Iuit ad Græciam cum viro prudentiffimo Ludouico Laufanenfi, quem & viarum, & periculi, & honoris habuit comitem. Iuit Coloniam, & ad Ducem Burgundiæ potentiffimum, collega Ludouici protonotarij: & ambo quidem in reditu per quendam ex Comitibus Palatinis Rheni capti funt, & iuffu Gabrielis in custodiam mancipati. Qua in re virum fe priscæ virtutis Vifensis ostendit. Namque cùm libertas fibi abeundi dimiffio collega fieret, nunquam fe inquit carceres egressurum, nifi cum socio. Iuit & in eas Galliæ partes, quibus Britannia hodie nomen eft, Ducisque illius excellentiffimi animum ad Concilium flexit. Abbates recepti funt Petrus Sancti Cucuphatis, vir folers, & Monasteriorum gubernationi aptiffimus; ac Antonius Auralis, & aspectu, & alloquio gratus. Doctores, Bernardus Buseho, Canonicus Illardenf. iu-

dicij non minùs recti, quàm firmi, & Raymundus Albioli Canonicus Tirafonensis sensum habens, & mores ætati conuenientissimos: Ioannes quoque Segouius triumuir ex hac natione electioni interfuit. Hi quoque ex quatuor nationibus nominati ad eligendum Papam fuerunt. Anglici verò idcirco recepti non sunt, quia non aderant, nec alij assumi poterant quàm præsentés.

LII.

Officiales
Conclauis.

Officiales autem circa conclaue necessarij vocati sunt, Ludouicus Episcopus Lausanensis Vicecamerarius, vir summi exercitij, summæque vigilantia, & ad officium sibi commissum non solum aptus, sed necessarius: cuius in negotijs singulis diligentia, in sacro Concilio, & in omnibus rebus bonitas in tota Christianitate perspecta est. Custodes Conclauis Perceuallus Bellicensis Episcopus, non minùs re bonus quàm aspectu. Nicolaus Grosseranus genere nobilis, & fidelitate insignis, quem, & pro seruitio Ecclesiæ, & pro defensione fidei spoliari beneficijs non piguit, veritatem cum paupertate, quàm mendacium cum diuitijs eligentem. Ioannes Sancti Michaëlis, de Clusa Taurinensis Diocesis, præstanti ingenio. Et

Franciscus Abundantiæ, tam scientiâ,
 & virtute, quàm temporalibus bonis
 abundans. Monasteriorum Abbates,
 Franciscus de Fuxe, Theologus, pro-
 fessione minor, eloquentia magnus.
 Guilielmus de Constantia Canonicus
 Spirensis antiquus Pontificij iuris in-
 terpres. Ioannes de Turicella, Deca-
 nus Segobricensis Iurisperitus, ac
 Theodoricus Nagel Canonicus Rigen-
 sis probitate cognitus. Clerici gratia
 Cereemoniarum, Æneas de Piccolo-
 minibus Senensis, Canonicus Triden-
 tinus, ac Michaël Brunon, Canonicus
 Belluacensis in eo exercitio longo tem-
 pore tritus. Promotores, qui antea in
 Concilio per plures annos negotia pro-
 mouerant, viri docti, & constantes, Hu-
 go Gerardi, & Ioannes Slitzenerode:
 Procurator fiscalis qui antea fuerat,
 vir exercitatus Robertus Magnani.
 Soldanus verò Petrus de Atro, qui et-
 iam ab initio nascentis Concilij eo in
 officio laudabiliter se habuerat.

Hi fuerunt viri conscripti ex nomi-
 natione trimvirali, qua per Ioannem
 Segouium lecta (vt antea diximus) ex-
 hilaratus est Cardinalis animus, qui
 vsque ad illam horam trepidus, stupi-

dúsq; permanserat , nec persuaderi sibi poterat nominationem istiusmodi fieri. Vt autem vidit Episcopos, & Abbates in magno numero assumptos , & nationes, quæ in Concilio erant , æquis portionibus honoratas , & animi simul vigorem , & frontis recepit colorem. Factúsque lætus sereno vultu concionem quoque exhilarauit, quæ illo mœstitiam ostendente, non tristis esse non poterat. Habuit ergo Cardinalis de nominatione facta magnifica verba, triúmque patrum virtutem magnopere commendauit, qui in Concilio se semper bene habuissent, & nunc optimè: posteaque concionem dimisit; eaque die occupati omnes fuerunt ad præparandos in conclaui necessarios conuictus.

LIII.

Serò autem singuli electores ad Cardinalis domum vocati, de cameris diuidendis intra conclaue sermonem intra se habuerunt. Et quoniam camerarum magna differentia erat, videbatur Prælatis diuisionem secundum dignitates fiendam: atque vt quisquis dignior, & antiquior esset, sic prior locum sibi assumeret. Nec ferendum esse dicebant, vt Cardinalis, & Archiepis-

Camera cō-
clauis distri-
butæ.

copus cum doctoribus veniret ad sortem : quo casu ridiculum esset, si Cardinalem infrà, & Doctorem suprà locari contingeret. Cùmque Prælati essent numero plures, omnesque vno ore loquerentur, desperata res videbatur de sortibus cogitare : vtcumque tamen res iret, visum doctoribus est etiam pro se verba facere. Dicebant igitur priscas consuetudines non debere rescindi : in omni conclaui obseruatum, vt cameræ per sortem diuiderentur, neque id inter Cardinales tantùm, sed etiam inter Cardinales, & alios : fuisse Constantiæ Cardinales admodum multos, non tamen respuisse cum Episcopis, & Doctoribus sortem subire. Prælatos autem nimium sibi ipsis fauere, qui cùm essent numero plures, sententiam magis vocibus, quàm rationibus obtinerent : si sine sorte fiat electio camera- rum, timendam esse collusionem inter electores, timendum quoque schisma, ne stantes infrà & rigentes frigore, locatis suprà inuideant. Quibus rationibus Cardinalis euietus, in sententiam Doctorum consensit : ac post eum vir bonus Episcopus Dertusensis prophetatus est. Si quis enim est, (ait) cui no-

citura fors sit, ego ille sum, quem vltimum fors efficiet: ne tamen aut prifcas confuetudines euertamus, aut inuidiofi Doctoribus fimus, vrilius puto rem fortibus tranfigi: eiufque in fententiam conclusum eft, eademque ipfa hora miffi funt ad conclaue, ex omni ftatu electorum cum Cardinali Arelatenfi, qui fortès fuper cameras, ex confilio Vicecamerarij iacerent. Scripta igitur funt electorum nomina fingulatim per fchedulas, quæ omnes claufæ, ac permixtæ, in quodam birreto reconditæ funt, atque exinde ad primam, digniorémque cameram ventum eft, vbi tunc Cardinalis Arelatenfis manum iaciens in birretum, fchedulam, quæ fibi fortè obuénit, recipiens legit, eamque Vicemerarius in fronte ipfius cameræ confixit: ficq; fucceffiuè per ordinem factum eft, vt intraturi fequenti die electores conclaue, eam fibi cellam noscerent affignatam, vbi fuo nomini obuiarent: fuitque primus omnium Decanus Bafileenfis, vltimus verò (vt vaticinatus extiterat) Dertufenfis Epifcopus. Miraque in re hac diftributio fortis fuit, aut potiùs diuina difpensatio, quæ confilia hominum re-

probans, Doctorem primum, Episcopum autem postremum fecit, cum statuissent antè Prælati cellulas sibi digniores ascribere: id tamen in utroque bonitatis est visum, ut neque Decanus ex primo loco superbierit, neque ex ultimo Dertusensis Episcopus condoluerit, sed illum indignè se credere, istum dignè locatum humilitas faciebat.

LIV.

Electores
omnes ad sa-
cræ Syna-
xim accedunt.

Sequenti autem die, quæ fuit Veneris 3. Cal. Nouemb. habita est generalis congregatio, conclusæque sunt proximarum deputationum deliberationes. Sessioque mox secuta est: diuina autem officia Cardinalis Arelatensis celebrauit, quo nemo ceremonias nouit meliùs. Sermonem autem ad electores post Euangelium decantatum, Marcus insignis memoriæ Theologus habuit, qui enumeratis depositi Gabrielis criminibus, suadere electoribus nitebatur, ut virum assumerent, qui contraria imitaretur prioribus, quique omnia euitans Gabrielis vitia, ut ille calumnijs odiosus fuit, sic se iste assumendus iustitia præstaret acceptum. Erat templum ubique populo plenum, stabant inter columnas superiores nobiles

biles Urbis matronæ, respectumque in concionem habentes ordinem rerum non sine deuotione considerabant. Aderat Ioannes de Tierstein Comes, qui loco Imperialis protectoris cathedram adimplebat. Aderat Consulatus urbanus, & alij complures nobiles, rem insolitam conspecturi: seruabaturque inter omnes silentium; extra Ecclesiam quoque Ciues in armis erant, si quod scandalum pararetur prohibitori. Tantusque ad spectaculum eius rei confluxerat populus, ut neque in templo, neque in plateis recipi posset, magnaque vndique intra Ecclesiam haberetur pressura. Ut igitur Cardinalis Arelatensis intra Missarum solemnia communicasset, vocati sunt ad altare communicaturi, etiam secundum ordinem electores. Tumque Archiepiscopus Tarentasiensis, & decem alij Episcopi communicarunt, post autem septem Abbates, exinde quoque Theologi, ac demum Iurisconsulti nouem qui accedentes altare genibus flexis, & lacrimis vbertim fufis, sacratissimæ suscepunt Eucharistiæ sacramentum. Erátque venerandum spectaculum, tot eximios antistites, totque præclaros

Patres, nudam ante Dominicum sacramentum ostentantes caniciem cerne-
re, & alios quidem orantes, alios verò
illacrimantes conspicerere. Deuotionem
autem maximè Cardinalis adau-
gebat, qui Pontificalibus indutus vesti-
bus nudato, & caluo capite Domini-
cum corpus quibusque ministrabat, &
confessionem in re tali solitam singulis
repetebat: ac secutus pijsissima Saluato-
ris Domini nostri Iesu Christi vestigia,
quolibet deosculabatur: hortatus plu-
rimùm vt quàm quisque posset, pura
anima susciperet Dominum: Quam
rem sic ordinatè, sic solemniter, sic de-
uotè peregit, vt ex videntibus nemo
tenuerit lacrimas, nisi qui pectus ha-
buit aut saxeum, aut ferreum.

L V.

Iurandum
præstant.

Posthæc finita Missa, & congrega-
tione generali peracta, Prælati omnes
infulas, & vestimenta sessioni accom-
moda susceperunt. Inuocata altis vo-
cibus per omnes Patres Spiritus Sancti
gratia, peractisque litanij, & orationi-
bus, ac omni solemnitatem sessionis im-
pleta, Ludouicus Episcopus Lausanen-
sis ambonem ascendit, triâque illic per
ordinem legit. Primò responsionem
Synodalem ad famosum Gabriëlis li-

bellum , cui principium est , Moyſes. Secundò limitationem quandam circa decretum , de electionibus dudum in Synodo editum. Tertiò verò nominationem triumviralem , quam ex certa ſcientia ſacrum Concilium approbavit. Quibus lectis interrogari Patres, Vtrum placet ? reſponſum eſt ab omnibus, Placet. Et hinc requiſiuit Lauſanenſis iuriſiurandi formam ab electoribus præſtandam publicè legi; Electorèſque iuxta Concilij ordinationem iurare. Primus igitur Cardinalis Arelatenſis aperto decretorum libro , formam iuramenti cunctis audientibus legit, móxque requiſitus, vt ita iuraret; Ego (inquit) Reuerendiſſimi Patres, Forma iuramenti. coram Domino meo Ieſu Chriſto cuius modò ſacratiffimum corpus indignus peccator manducaui, cuique in tremendo , & magno finali iudicio de omnibus per me factis rationem ſum redditurus, promitto, iuro, & voueo, quoniam in hoc electionis negotio, ad quod nunc volente Concilio mittimur, nihil aliud quaeram, quàm populi Chriſtiani ſalutem, & vniuerſalis Eccleſiæ bonum. Idque mihi curæ erit ſtudere, ne autoritas generalium Con-

ciliorum vilipendatur, ne fides Catholica expugnetur, néve Patres in Concilio persistentes opprimi possint: hoc quæram, hoc sollicitabo, ad hoc viribus totis incumbam; nihil in hac re, aut mei, aut meorum amicorum causa faciam, sed solum Deum, & Ecclesiæ suæ vtilitatem respiciam: hoc animo, hac mente, hoc denique corde conciliare suscipio iuramentum. Fuitque eius sermo, & viuax, & termicus, omniumque astantium commouit animos. Post eum Electores alij suo ordine iurauerunt. Quæ res electioni post factæ maximam præbuit autoritatem.

Magna ex
hoc iuramen-
to electioni
accedit au-
toritas.

Quis enim non illum Summo Pontificio dignum putet, qui tot Sacerdotum, Episcoporumque iudicio sit comprobatus? præsertim, cum illi antea suscepto Dominico corpore iusiurandum præstiterint, nullum se electuros, nisi quem senserint tantæ idoneum dignitati. In ea etiam sessione, & Vicecamerarius, & Custodes conclauis, & clerici ceremoniarum, & promotores iureiurando promiserunt officium sine fraude exercere. Quibus peractis omnibus, hora iam post meridiem tertia, adhuc populo ieiunante cantatum est

vndique, Te Deum laudamus, & organis respondentibus alternatim, vsque ad finem completus est hymnus.

LVI.

Solemni pō-
pa ad concla-
ue pergunt.

Quo facto, egressi sunt pueri in stolis albis admodum multi longum processionis ordinem facientes, quos secuta pars cleri vr bani est: Et pōst veneranda incorporatorum multitudo cum Doctoribus, & vniuersitatum Oratoribus, qui longis, honestisque vestibus, orantes incedebant. Exinde Sacerdotes vr bani, excolendas Sanctorum Reliquias in vlnis gestantes proficiscebantur. Mox verò Ludouicus Lausanensis Crucem argenteam ante se habens, sequentibus quatuor Clericis incedebat. Pōst verò Cardinalis Arelatensis adhuc, & mitra, & auratis fulgens vestibus, deuoto, & desideranti populo benedicens. Exinde infulati Episcopi, & Abbates ad processionem ornati innumerabili populo subsequente procedebant, sicque alijs orantibus, alijs suspirantibus vsque ad ostium Conclauis est processum, armatis hinc, atque inde propter custodiam conclauis existentibus. Vt verò ad conclaue ventum est, receptis electoribus, dimissi sunt cæteri. Intromissi sunt etiam domino-

rum seruitores concessi. Non tamen ostium conclauis statim est clausum, sed vsque ad nonam ante medium noctis horam familiaribus patuit, res deferentibus opportunas, permissiq; vsque id temporis sunt amici ad amicos accedere. Cardinalis autem sic processionaliter ingressus, sequentibus electoribus in sacello quod celebrandis Missis paratum erat, ante altate, & ante ipsum Christi vexillum genibus flexis, & nudo capite orationibus Deo porrectis, & domui, & habitatoribus benedixit: sicque positis pluuiialibus, & mitris, illuc se quisque recepit, vbi nomen suum recognouit. Cum verò iam noctis venissent tenebræ, ingressus est Protector cum quibusdam ciuibus, vt quisquis locatus esset, visurus & voluntatem magnam ex tanto ordine suscipiens: post eum verò intrauit Lausannensis Vicecamerarius, & ipsum secuti sunt custodes conclauis, aliqui ex ijs singulas cameras diligenter rimati, & personarum, & rerum examen habuerunt, excussuri extra conclauem, si quid contra leges reperissent, nihilque præter ordinem inuenientes abierunt. Et hora (vt dictum est) nona, tam intrà,

quàm extrà obferata est ianua, & vndique admoti pefſuli, cum catenis tenacibus.

LVII.

Conclauis
forma,

Sed quoniam de Conclauis sermo est, necessarium existimo ipsius formam conscribere. Domus erat in medio vrbs, apud plateam cathedralis Ecclesiæ, loco edito, & patenti, quam nobiles quondam in vsum struxerant chorearum, & suprà, & infrà perlatas habentem aulas: & superiorem sanè, quoniam igne poterat caleſceri, hyemi, inferiorem, æſtati deputauerant. Hic igitur Conclauis haberi posse est visum, vt esset domus orationis, vbi fuerat lasciuiæ campus; & succederent mores, vbi vitia triumpharant. Constructæ ergo illic sunt, & suprà, & infrà mansiunculæ opportunæ, quarum numerus æquatus est electoribus, vna superadiuncta, quæ cæremoniarum clericis deferuaret. Fuit autem structura earum admodum facilis: nec enim aut saxo, aut robore ligneo parietes instruxerunt medios, sed positis in columnarum morem ex abiete sudibus cortinas simplices, visûque penetrabiles pro parietibus texuerunt. Camerarum forma plerunque quadrata fuit, per breuis tamen,

I iiij

& angusti vix lecti, vniūſque menſæ capax: luce autem omnes ferè carebāt, exceptis admodum paucis, quæ ſpiracula quædam in angulis conclauis habuerunt. In medijs verò cellulis perpetua manſit obſcuritas; nec ſine candelâ, aut legere, aut eſſe potuit quiſpiam. Nóxque vna ijs fuit dierum ſeptem: ac cameræ inferiores plus etiam incommodi habuerunt, quia in ſolo poſitæ frigidiffimo, loca piſcibus magis, quàm humanis apta corporibus præbuerunt. Quocirca omnes, qui eas inhabitauerūt, rheumaticum morbum ex humore nimio contraxerunt, & tamquam alter alterum irrideret, tuſſientes inuicē reſpondebant, nec illi frigori vilum erat remedium: veſtes enim, & villoſæ pelles magis grauabant, quàm calefacerent: ignem verò habere loci anguſtia, nec periculum, nec fumus permittebat. Murus Conclauis, & groſſius vndique, & altus fuit. Omnésque fenestræ clauſæ fuerunt: nec appropinquare muro aliquis poterat, niſi armati cuſtodes qui die, noctūque intra ipſos cancellos excubabant. In media verò parte ipſius conclauis in modum fenestræ oſtiolum fuit, & hoc quidem dua-

bus exteriùs clauibus, vna interiùs clau-
debat. Et illarum quidem alteram
Vicecamerarius, alteram Protector cu-
stodiuit. Illam verò Cardinalis Arela-
tensis habuit: nec vlli vnquam tradidit,
nisi ceremoniarum clerico Æneæ, cùm
aut admittendi cibaria, aut emittendi
cœnarum reliquias fuerat tempus: bis
namque ante prandium, & totiens post
prandium referabatur ostiolum. Et bis
quidem recipiebantur fercula, bis au-
tem remittebantur fragmenta.

LVIII.

Ministerij
ordo.

Quibus in rebus hic modus obserua-
batur. Erant (vt antea diximus) in con-
clauis familiares, qui dominis suis ele-
ctoribus seruiebāt, Doctoribus singuli,
prælati bini: extra verò, vt quisque
potuit, sic habuit seruitores. Et illi qui-
dem qui extrà remanserunt, cibaria
comparabant, quæ horis indictis in li-
gnea capsâ depictâ quam cornutam ap-
pellant, vsque ad conclauis ostium de-
ferebantur: & ne suspicio veneni esset,
degustare tam pocula, quàm cibaria
cogebantur. Exinde per custodes con-
clauis examen fiebat, ne vel litera, vel
aliud quiduis præter eorum scitum in-
tromitterentur. Quare omnia in manu
Vicecamerarij præsentabantur. Et ille

extendens ad ostiū manus præsentabat Æneæ ceremoniarum clerico, cui soli cum socio licebat adhærere fenestræ. Itaque nec qui extrà erant, mandare aliquid in conclaue poterant, nisi per Vicecamerarium: nec qui intrà, dictare aliquid foris, nisi per clericum. Et oportebat omnia alta voce, & Latina dicere, vt qui Protectoris erat interpres, intelligeret, quæ mandarentur: cū verò emittendi reliquias cœnarum hora aduenerat, vocabantur per clericum cæremoniarum familiares cum cornutis: qui venientes ad cancellos interiores ipsi clerico omnia assignabant, & ipse extra fenestram Vicecamerario contradebat: Mittebantur etiam extrà paropsides, & alia mensarum ornamenta, quæ lauacro indigebant. Et ea etiam perquirebantur, ne quid ab intrà emitteretur litteratum: fueruntque aliquæ deprehensæ, quæ stultitiam magis familiarium, quàm rem proderent: nonnulli etiam in ipsis vasorum fundis sculptentes literas, commonere amicos tentauerūt: sed inuentis omnibus, nec graue aliquid, nec quod ab electoribus proueniret compertum est. Vt verò perquisita singula erant, quæ extrà

mittebantur , quidquid cœnarum supererat , pauperibus Christi dabatur ; qua ex re plus quàm ducenti vitam trahabant : quocirca cùm omnibus longissima videretur conclauis mora , solis huiusmodi pauperibus est visa breuissima. Illud etiam custodes Conclauis libenter obseruabant, ne ad electorum escam diuersæ species cibariorum deferrentur. Et oportebat quidē aut carnibus tantum , aut piscibus vesci ; aut si neque hoc, neq; illud placebat, ouis, & caseo. Rursusq; qui carnibus utebatur, vna specie contentari debebat: nec qui bouem habuit , vti etiam oue potuit. Id quoque in piscibus fuit, nec enim cui murena est intromissa, offerri quoque anguilla potuit. Si quis autem in legem cōmisit, partem alteram in ostio perdidit; idque cùm prima die familiares incautē commisissent , & dominis suis quasi nuptias celebrātibus dubiam afferrent cœnam , omnes in ostio spoliati sunt, nec plus vna specie intromissum est. Quos inter Cracouiensis etiam Archidiaconus diminutionem tulit. Cui cùm aues, & arietinæ carnes afferrentur, subtractæ auiculæ sunt , orante in porta famulo , vt quod plus esset id

Viſus ratio.

Lepida narratio.

Cardinalis
Arelatensis
abſtinentia
mira.

Domino dimitteretur : ſperabat namque ex ariete partem , ex auibus autem partem non ſperabat : Dominus tamen auiculas præoptaſſet, ideóque cùm ſpolium ſenſit vbique conqueſtus eſt , publicéque teſtatus , nunquam ſe diem poſtquam Sacerdos fuit tuliffe peiorem. At cùm rogaretur , ne admirationem haberet , quoniam idem obtigiſſet Cardinali : Proh ; (inquit) Cardinalem mihi æquiparas , hominem Gallicum , parcum , euentrem , aut (vt veriùs loquar) non hominem ? Ego apud eum meo infortunio ſum locatus , omnia quæ facit perluftris mihi cortina indicat , nec adhuc aut bibere eum , aut comedere vidi : & quod mihi moleſtius eſt , inſomnes noctes , inſomnéſque dies ducit (quamquam nulla eſt apud nos dies) aut legit ſemper , aut negotiatur : nulla ei minor , quàm ventris eſt cura , mihi nihil cum eo commune eſt. Ego Polonus ſum , ille Gallicus ; mihi ardet , illi friget ſtomachus ; illi ſanitas , mihi mors ieiunium eſt. Ego ni multum comedam , & multum dormiam , citò deficiam. Illi è contrario omnia ſunt. Ieiunent Gallici , & Poloni comedant. Quo dicto cunctos in riſum

vertit. Et quoniam de hoc faceto, & hilari homine facimus mentionem, id quoque non præteribo, ea namque infelicitas eius fuit, ut famulus eius, qui extrâ mansit, semper ad ostium veniret ultimus cum cibarijs. Ex quo ortum in ostio prouerbum fuerat, ultimum esse, qui prior esuriret. Fuit autem hæc lex de cibarijs antiquitus aliter instituta: primis enim tribus diebus nulla erat cibariorum apud veteres limitatio. Quarta die, ad vnam speciem redigebantur. Nona verò sublati alijs solum panis, & aqua electoribus tradebatur. Clemens autem uti clementia cupiens, rigorem legis in modum qui nunc seruatur moderatus est. Id quoque inter electores seruatum extitit. Patentibus namque pransitatum, & cœnitatum est cubiculis, ut sic oculis omnium testibus factis luxuriæ modus fieret. Et cibaria quippe inter se missitare non licebat, vinum licebat. Rigidusque huiusmodi legum non solum obseruator, sed custos etiam fuit Ioannes Segouius, qui non aliter violare alienas leges exhorruit, quàm suas proprias apud Romanos Arrius Restio, de quo illud memorabile fertur, eum foris quoad

vixit, postea non cœnasse, ne testis fieret contemptæ legis, quam ipse bono publico pertulisset.

LVIII.

Ordo in occupationibus, & eligendi ratione.

Sed (vt eò redeam quò sum digressus) electores postquam obseratum ostium fuit, ac postquam aliquantisper in suis conuenerant mansuiculis, egressi ad visitandum se inuicem sunt, atque vt quisquis in sua camera esset prospiciebant : quibus in locis non aliter se vicissim recipiebant, ac si ex longa peregrinatione redissent : eaque visitatione ad magnam noctis partem producta, tandem ad quietem est itum : horaque post medium noctis tertia ad matutinas singuli experfecti sunt : orantesque vsque ad quintam, exinde Missarum officio se tradiderunt, & alij quidam in suis cellulis, alij verò in communibus altaribus celebrabant. Episcopi namque altaria plerumque portatilia apud se traduxerant, vt possent complurimi celebrare. Vt verò dies illuxit, vniuersi ad communem Missam venerunt : qua completa, & decantato hymno quo Spiritus Sanctus euocatur, habitis in Concilio patribus, de modis in conclaui obseruandis consultatum in medio est. Isque communi

consilio receptus est ordo: statutum est singulis noctibus, quatuor suprà, & quatuor infrà ex seruitoribus assumi vigiles, qui noctes interpartientes, curam haberent, ne vel ignis, vel alia quævis res nocumento esse posset. Cui rei nemo vigilantius incubuit, quàm Rubinus antiquus Cardinalis de Cypro nubilissimi familiaris. Cuius excubatione nequaquam dubitauerim pleraque euitata fuisse discrimina. Exinde cautum erat, vt post mediam noctis horam inter quartam, & quintam cui-gilatio per omnes fieret: tùmque vsque ad septimam, vt cuique animo esset, aut oraret, aut celebraret. Postea verò ad communem Missam omnes accederent. Qua peracta, & Spiritus almi efflagitato patrocinio, concilium iniretur: vtque in eo scrutinium fieret, & eo finito, prandium haberetur. Ac deinde, vt quemque voluptas traheret, sic vel legeret, vel quiesceret, vsque ad horam post meridiem tertiam: quo tempore iterum intrantes Concilium illorum merita in examen ducerent, qui præcedenti scrutinio nominati fuissent; maturè inter se se consulerent, quo nunc Ecclesiæ modo ferri auxi-

lium posset. Dimisso verò Concilio; hora circiter post meridiem septima cœnaretur, ac post horis tribus ad quietem se cuncti redigerent. Eo modo tam diem, quàm noctem partiti sunt.

L X.

Conuersatio
electorum
sancta.

Omittam illam sacratissimam vitam, beatam, & omni stricta religione mundiorẽ? vbi nam gentium talis Patrum est chorus; vbi tantum scientiæ lumen? vbi prudentia? vbi bonitas est, quæ horum patrũ æquari virtutibus queat? O integerrimam fraternitatem! O verum orbis terræ Senatum! quàm pulcra, quàm suavis, quàm deuota res fuit, hîc celebrantes Episcopos, illic orantes Abbates, alibi verò Doctores diuinas legentes historias, audire? & vnum ad lumen candelæ scribentem cernere, alium verò grande aliquid meditantem tueri? Carthusiam Gallici, Delfinatus, siue Sabaudix commendent, potuitne vnquam religio hac excellentior inueniri? Ac ego existimo illis in locis irriguos magis fontes, & splendidas cellas, aliâque ædificia esse admirationi, quàm homines. In nostro verò Conuentu, cetera contemnenda, viri dumtaxat admirandi fuerunt. Quorum modestiam nemo potuit satis contemplari;

templari; nullæ illic rixæ, nullæ contentiones; omnia in amicitia, omnia in dilectione fiebant. Illic cùm exeuntem cellam quempiam ex antiquioribus vidisses, non alium certè videre putasses quàm vel magnum Antonium, vel Paulum Simplicem, & illum sanè Hilarioni, illum Paphnutio, illum verò Amoni æquiparasses. Plus etiam hoc in loco, quàm in Antoniana solitudine reperies. Siquidem Hieronymo etià, & Augustino obuiasses; quorum literæ in cōclauis fuerunt, in heremo non fuerūt. Custodiebatur inter dominos magna charitas, inter famulos bona dilectio, inter vtrosque optimū silentiū. Et isti in dominos obedientes, illi in seruitores benigni erant: nulla superbia, nullus liuor, nulla simultas vigeat: suus cuique status placebat: nihil secretum, nihil occultum fuit; omnia scire vicinum oportuit, quæ fecit vicinus.

Sed neque mihi tacendi familiares videntur, quorum numerus fuit duo, & quinquaginta. Itaque omnes animæ quæ ingressæ sunt conclaue, tres de nonaginta dinumeratæ sunt, fueruntque inter seruitores, complures & docti, & ornati viri. Erant cum Cardinali Are-

LXI.

Famuli, seu
Conclauistæ
quales.

K

latensi Stephanus Plonerij, Petrus de Tridia, Doctores, & Archidiaconi: cum Archiepiscopo Tarantasiensi, Antonius Piceti Iurisconsultus, qui auditor etiam Rotæ aliquando fuit. Cum Basileensi Episcopo, officialis suus, vir non minùs doctus quàm facetus. Fuerunt & alij complures, & docti, & egregij viri. Quapropter facilè potest quis dominorum excellentiam recognoscere, vbi virtutes familiarium non ignorat.

LXII.

Sortiendi
ratio.

Sed iam tempus admonet, vt scrutiniorum seriem referamus, & modum: Eo ergo in loco vbi & Cardinalis, & Vicensis Episcopi cella fuit, atque aliæ nouem, hinc, atque hinc sedilia posuerunt. In summo loco ara erat sacra, & ante ipsam puluinar Cardinali stratum. Ad cuius dextram sedebat Archiepiscopus Tarantasiensis, & ad sinistram Dertusensis Antistes, & successiue hinc, & inde gradatim reliqui electores assidebant. Ante ipsum verò Cardinalem scabellum, supra scabellum ex argento peluis stabat. Huc audita Missa, & decantato Spiritus Sancti hymno, singuli electores venerunt, & eorum quilibet schedulam suam iecit in pel-

uim. Easque postmodum singulatim Cardinalis recepit, & legit, atque ut ipse legerat, quatuor alij ex electoribus electionem ipsius scribebant. Scriptio autem schedularum huiusmodi erat: Ego Georgius Vicensis Episcopus, eligo in Pontificem Romanum illum, vel illum; poteratque vnum vel duos vno in scrutinio nominare. Et inscribebat se quilibet electorum nomine proprio, ut sic in electione schedularum seipsum quisque recognosceret, possitque contradicere, si aliter quam ipse diceret scripsisset: quæ res excludebat omnem dolum. Ut autem omnes schedulæ lectæ erant, & nominationes eorum scriptæ, fiebat per scrutationem numeri ad numerum collectio. Et nisi aliquem in vnum duas schedularum partes reperiebant concurrere, easdem igne cremabant.

Igitur primo scrutinio confecto compertum est plurimos esse in Papam nominatos, nullum tamen habere voces sufficientes, septemque & decem eo die ipso ex diuersis nationibus ad Pontificatum fuisse vocatos constat; vnus tamen omnes superauit vir præstantissimus Amedeus Dux Sabaudie, Deca-

LXIII.

Primo scrutinio diuisa suffragia,

Plura tamen cæteris ha-

sunt in communi sermones multi de vita, & moribus eius. Et alij non esse homini laico citò imponendas manus dicebant, quòd videretur omnibus monstri simile, Principem sæculi ad Romanum Pontificium accersiri: quæ res nimium Ecclesiasticis derogat viris, quasi nullum haberent tantæ dignitati idoneum. Alij hominem, qui fuerit coniugatus, cuique proles esset, ineptum Sacerdotio existimabant. Alij Romanum Episcopum legis Doctorem esse oportere asseuerabant, multisque literis præpollentem. Quæ verba, ut audierunt, alij mox assurgentes, longè aliter dixerunt. Ac Amedeum quidem, & si Doctor non foret, peritum tamen & doctum esse: qui cum aliàs in iuuentute sua literarum studijs insudasset, non titulos, sed scientiam quæsiuisset: eumque diuinum officium optimè nosse, & horas canonicas obseruare, septièsque dietim Domino dicere laudes.

Quæ electionem eius dissuaderent.

Obiecta refelluntur.

LXV.

Quòd si de vita, inquit alius, huius Principis edoceri vultis, iam me (obsecro) audite, qui cum & intus, & in cute noui: nempe hic homo ab incunte ætate, ac lacteis (ut aiunt) annis magis

Encomium Amedei.

**Pueritia in-
genua.**

religiosè vixit quàm seculariter, paren-
tibus quidem obediens, & pædagogis
obsequiosus: semper autem Dei timo-
re imbutus, nec vnquam aut vanitati,
aut lasciuiæ operam dedit, nec vnquam
puer de domo Sabaudia natus tantam
præ se indolem, aut spem tulit. Quibus
ex rebus qui eum intuebantur, ma-
gnum sibi aliquid portendebant. Nec
fefellit opinio; siquidem vir postquam

**Adolescentia
exercita.**

adoleuit, animum semper ad alta le-
uans, apud inclytæ memoriæ Sigismun-
dum Cæsarem forense certamine Ge-
bennensem euicit Comitatum, mox-
que deinde familiam suam honoribus
cumulans, Dúcales suscepit infulas. Ac
si scire cupitis eius regimen & quale, &
quantum fuerit, illud primùm cogno-
scite, virum hunc post obitum Patris,
iam annis circiter quadraginta regnas-

**Iustitiæ stu-
dium.**

se: cuius tempore regina virtutum sem-
per Iustitia floruit. Audiens enim per
se ipsum subditos, nunquam vel inopes
opprimi, vel circumueniri imbecilles
permisit. Ipse pupillis tutor, ipse viduis
aduocatus, ipse pauperibus protector
fiebat: nunquam in territorio suo, aut
rapinis locus, aut latrocinij spatuit: di-
uites, ac pauperes æquali iure apud se

habebat, nec terricolis onerosum, nec aduenis importunum se exhibens: nulloque in patria grauis exactio pecuniarum fuit, satis se diuitem existimans, si Patricolas abundare cognosceret: sciens quia boni pastoris esset non deglubere oues suas, sed tondere. In eo tamen *Pacis amor.* præcipuè solers exhibuit studium, ut & pace subditi eius fruerentur, & nulli sibi finitimi causam succensendi haberent. Quibus artibus non solum paternum dominium tranquille gubernauit, sed alia quoque spontè ad eum venientia superadiecit: nulli vnquam intulit bellum, illato verò resistens semper de pace magis, quàm de vindicta cogitauit; & hostes, & singulos beneficio potius vincere, quàm gladio studuit. Vxorē unicam duxit, eamque virginem, & nobilem, & formæ, & prudentiæ admirabilis: familiam omnem suam non solum manus, sed oculos etiam abstinentes habere voluit: fuit in eius domo summa honestas, summa obseruantia morum, & in sæculari palatio claustralis obseruabatur religio. Ac ubi *Vitam solitariam instituit.* thori consors vitam commigrauit in aliam, ubi Ducatum eius firmatum, & ad posteriores sine controuersia ventu-

Pietatis exercitia.

Tribus quotidie Missis deuotè adest.

rum perspexit, animum, qui semper religiosus, & dedicatus fuerat, patefecit, & qualem in corde gestaret voluntatem demonstraui. Contempto namque sæculi fastu, omni que pompamundiæ despecta, vocatis secum charissimis amicis, in heremum concessit: ubi constructo miræ deuotionis, & artis Monasterio, in seruitium Dei se relegauit, & tollens Crucem suam, sequutus est Christum. Quò loci per plures annos conuersatus, singularis sanctimonix dedit odorem: vestes quidem non alias induens, nisi quæ possent frigus arcere, epulasque non alias sumens, nisi quibus pelli fames valet: vigilansque ad plurimam noctem, nullam vnquam diuini officij horam neglexit: Cùmque ibi pulcherrimum Deo, & Beato Mauritio sacellum construxisset, & honorificum Sacerdotum collegium ordinasset, diebus illic singulis tres Missas, duas quidem legi, vnâ autem decantari audiuit: tantus illo in Monasterio seruatus est rigor disciplinæ, tanta honestas, tanta religio, vt nusquam sub cœlo putem, aut sanctiorem, aut deuotiorem inueniri locum. Quocirca non nouiter (vt quidam antè sentire

sunt visi) hic Princeps ad Ecclesiam venit, qui natus Christianus, ex progenitoribus iam mille annis, & vltra Christianis nunc Deo in Monasterio seruit.

LXVI.

Illud autem mihi risu magis, quàm responso dignum videtur, quod de filiis est obiectum; etenim cur filij, præsertim natu grandes, Pontifici Patri sint impedimento? Nunquid ait scriptura: Væ soli, quoniam si ceciderit, non habet subleuantem se? hoc imputari Principi modò non poterit. Sunt enim illi filij duo, & forma, & ingenio admodum præstātes. Quorum alter Princeps Pedemontium, alter Comes est Gebennensium. Hi patriam Sabaudia, absente patre, gubernabunt, indigentique sibi auxilia subministrabunt. Iam enim regere, ac præesse populis didicerunt: En quid mali hoc est, habere Romanum Antistitem potentes filios, qui Patrem contra Tyrannos iuuare queāt? Proh, Reuerendissimi Patres, sanè quò magis huius peruersi temporis procellam intueor, quò magis angustias animo euoluo, quibus Ecclesia in hac nostra tempestate percutitur, cò magis non vtile tantum, sed necessarium esse arbitror, hunc ipsum eligi Principem:

A filiis non
timendum,
sed bene spe-
randum.

Eius opes &
potentia Ec-
clesiæ neces-
saria.

existimabóque misericordiam Domini
super nos factam, si eum videro huius
cymbæ suscepisse gubernaculum. Con-
siderate (oro) paulisper, quibus in ter-
minis sumus, quibus angustijs premi-
mur, quibus periculis agitamur? quis
Principum est huic sacro Concilio o-
bediens? Alij nec Concilium hîc esse
fatentur, nec mandata nostra suscipiūt:
alij verbo hîc esse Concilium dicunt,
facto apud Florentiam fore ostendunt.
Quamvis enim verbis, & literis Eccle-
siam hîc esse non negent, promotiones
tamen apud Gabrielem depositum pro-
curant. Hic est status Ecclesiæ, his pro-
cellis navis illiditur: surrexerunt filij
impij aduersus matrem, qui nec susce-
pti lactis, nec materni laboris memores
eam spernunt, eam lacerant, eam co-
laphizant. Quid hîc fiendum est? nu-
dumne hominem eligemus, qui nostris
Principibus magis derisui, quàm vene-
rationi habeatur? non sunt hodie sæcu-
la, quæ virtutem respiciant: Probitas
(vt est apud Satyricum) laudatur, &
alget: Pauper loquutus est, & dicunt,
quis est hic? Bona est equidem virtus,
sed multum interest ad nostrum propo-
situm, an in potente sit, an in paupere:

vobis eligendus est gubernator, qui non solum consilijs, sed etiam viribus nauim regat: validus ventus est, nisi & Consilium bonum sit, & brachia fortia, frangetur malus, & periclitabuntur omnes. Exemplum recens ante oculos est, quia virtutem impotentem nihili pendunt Principes. Nunquid maxima virtus hinc ostensa est, qui nullum timentes, aut vitæ, aut bonorum periculum pro veritate Christi tandiu pugnistis? Debuerant Principes terram deosculari, vbi gressus vestri fuissent: quia tamen potentes Prælati ac famosi Cardinales à nobis defecerunt, videtis quid Principes fecerint. Aspicit tamen ex alto maximus, atque optimus Deus talia, hisque (vt puto) resistet insolentibus. Sæpius illorum opinioni assensus fueram, qui expedire dicebant, temporale dominium ab Ecclesia secerni. Opinabar namque & Sacerdotes Domini ad diuina mysteria reddi expeditiores, & Principes sæculi erga clerum fieri obedientiores. Nunc autem didici, quoniam ridiculosa est sine potentia virtus, nec aliud est Romanus Pontifex sine patrimonio Ecclesiæ, quàm Regum, & Principum seruus. Quod præ-

uidens Diuina pietas Romanam Ecclesiam dotari per Constantinum, & locupletari voluit, vt qui spreto spirituali gladio, aduersus fidem, & bonos mores tumultuarentur, potenti brachio possent compesci. At cùm hodie terræ Ecclesiæ, partim per Gabrielem, partim per alios occupentur Tyrannos, prouidendum nobis est, vt virum talem eligamus, qui & recuperare Patrimonium queat Ecclesiæ: & in quo Christi Vicarius non contemnatur: cuiusque potentia clypeo eorum contumacia conteratur, qui rationem contemnunt, & veritatem. Ad quas res nemo (vt mihi videtur) aptior est Amedeo Duce Sabaudia, qui alterum in Italia, alterum verò in Gallia pedem habet: cui omnes ferè Christianorum Principes, aut sanguine attinent, aut amicitia fauent: eiusque quanta sit virtus, iam supra retulimus. Quid igitur hunc hæreamus eligere? nemo est quem magis dari sibi aduersarium Gabriel quàm istum timeat. Pereat igitur eo gladio quo putauit. Nemo est qui magis pacare Ecclesiam quàm iste possit. Quæritis in Pontifice deuotionem? nemo est eo deuotior. Quæritis prudentiam? iam

Peroratio.

intelligitis ex anteaſta vita quis ſit. Quæritis iuſtitiam? Populus eius eſt teſtimonio: ſiue potentiam, ſiue virtutem efflagitatis, hîc omnia ſunt: quid moramini? Agite (obſecro) bonis ominibus hunc eligit: hic fidem augebit, hic mores reformabit, hic autoritatem Eccleſiæ conſeruabit, hic aduerſarios reprimet, hic pacem Chriſtiano populo condonabit. Non audiftis eos, qui de futuris prædicant, has fluctuationes Eccleſiæ prænûntiantes, annû qui iam inſtat quadrageſimû, his terminû tribulationibus aſſignare? nunquid iam dudû audiftis Papam his tēporibus eligi debere, qui conſolaturus Sion omnia ponat in pace? & quis erit (obſecro) ille, qui talia queat implere, niſi iſtum aſſumamus? Credite mihi, ſcripturas impleri oportet, & trahet (vt ſpero) animos veſtros, etiam ſi nolimus, Deus: tamē vos quod rectû, & ſanctû eſt volētes potiûs agite.

LXVII.

Hæc cûm ille dixiſſet, maxima electorum pars ſibi fauendo arrifit, eamque habuerunt verba efficaciam, vt ſequenti ſcrutinio perfecta res ſit. Nonis enim Nouembris dum clerus Ciuitatis circa conclaue cum Reliquijs ſanctorum ſtaret, & proceſſio Prælatorum

Concordibus
votis eligitur.

Spiritus Sancti gratiam inuocaret; hora circiter ante meridiem decima, aperto scrutinio, & facta collatione (vt moris est) numeri ad numerum, compertum est, Amedeum Ducem Sabaudiaë religiosissimum Principem, iuxta decretum Concilij, in Papam fore electum, sexque & viginti voces in eum concurrere. Quapropter subito inter omnes coorta lætitia est, omnesque rem gestam amplissimis verbis collaudarunt. Quocirca vocatis notarijs, & intromissis testibus, confectum est de ipsa electione chirographum. Qua re sic peracta, remissis testibus, horam circiter post meridiem primam, ad eas fenestras, quæ in plateam versæ erant, factus est impetus, omnesque valuæ securibus infractæ, atque illinc miranti populo nouitatem, crux argentea est ostensa. Erat iam tota Ciuitas in platea, omnisque multitudo in fenestram tendebat oculos, electum sibi nominari desiderans. Tunc

Publicatur.

Cardinalis Arelatenfis facto signo crucis, in nomine Patris, & Filij, & Spiritus Sancti, electi Pontificis nomen publicauit, & oratione præmissa, populo benedixit. Postque hora iam tertia, prælati cum pluuialibus, & mitris, ac clerus

urbis cum reliquijs ad cancellos conclauis venientes electores similiter exornatos ad maiorem Ecclesiam reduxerunt: vbi gratiarum actionibus magnis Deo adhibitis, iterum populo, qui erat innumerabilis, publicata per Cardinalem electio est: ac deinde cum maxima omnium iucunditate hymnus lætitiæ, & organis, & humanis vocibus est decantatus, & cōgregatio dissoluta. Quocirca laudent omnes populi Deum, quia pastorem habemus, qualem ipse dedit amandum bonis, & malis timendum.

Haftenus Æneas, quid verò deinceps fecerint Patres ex ipsorum verbis intelligemus. *Post varia scrutinia tandem, aiunt, compertum est Religiosum, & nobilem virum Amedeum Ducem Sabaudie in solitudine Ripallia Gebennensis Diæcesis, iam à pluribus annis in virtute continentia honestè conuersantem, & virtutum Domino in spiritu humilitatis, ac simplici, & humili habitu deseruientem, in Summum Pontificem uniuersalis, & Romana Ecclesia esse electum, iuxta præfati decreti nostri 37. sessionis dispositionem. Qua quidem electio postmodum aperta fenestra Conclauis, fuit per prædictum dominum Cardinalem Arc-*

LXVIII.

Electores è conclau egressi templū adeunt.

Conc. Basil.
Sessio. 39.

latensem publicè nuntiata, decantatoque
Te Deum laudamus, per omnes suprà dictos
 ad eligendum deputatos, concorditer super e-
 lectione ipsa Deum glorificantes, & orationi-
 bus convenientibus subiunctis, ipsi à concla-
 ui exierunt in pluuialibus, & mitris, aliis-
 que habitibus condecensibus; prout statui
 uniuscuiusque competebat, concomitanti-
 busque Prelatis, & alijs suppositis huius
 sacri Concilij, ac processionibus omnium
 Collegiorum, & Conuentuum huius Ciui-
 tatis Basileensis, cum reliquijs, & decen-
 tibus ornamentis, populique multitudine co-
 piofa, Ecclesiam maiorem Basileensem adi-
 erunt, ubi ipsi Prelati, & alij de sacro Con-
 cilio unanimiter Deo gratias retulerunt.

Iterum publi-
 cature electio. Iteratoque sapè dictus dominus Cardinalis
 Arelatensis in ambone, presentibus omnibus
 electoribus deputatis, & in hoc consentien-
 tibus, atque id ipsum approbantibus, retulit,
 quomodo ipsa electio, ritè & canonicè fue-
 rat celebrata, Notarijs Apostolicis, qui in
 conclavi fuerant, etiam idem attestantibus.

Synodus ele-
 ctionem con-
 firmat. Qua omnia considerans hac sancta Syno-
 dus, & spem magnam gerens in Domino,
 quod prefatus Amedeus pro sapientia, ex-
 perientia, iustitia, clementia, & ceteris
 virtutibus suis plurimos fructus salutis ef-
 ficiet in populo Dei, fidem conservanda,
 mores

mores reformando, pacemque componendo inter Principes Christianos, atque populos, velut sanctitatis amator, & pacis cultor, qui cum omnibus Pacem, & cum nullo differentiam, aut discordiam habere famatur, domui suae benè, & laudabiliter prepositus, grandiumque populorum prudentissimus gubernator, & in rebus Ecclesiasticis, & spiritualibus non mediocriter exercitatus, habita super hoc in quatuor deputationibus omnium suppositorum huius sacri Concilij concordia, & unanimi deliberatione, & demùm in generali congregatione conclusione subsecuta, ipsam laudat electionem, recipit, & approbat, & ex abundanti, & ex certa scientia hoc praesenti decreto ratificat, & confirmat, declarans eundem Amedeum absque ulla exceptione ab uniuersali Ecclesia teneri, haberi, & reputari debere electum in verum, & legitimum summum & Romanum Pontificem. Et hoc ipsum per praesentis decreti publicationem ad notitiam volumus deduci cunctorum. Datum in Sessione nostra publica, in maiori Ecclesia Basileensi solemniter celebrata XV. Kal. Decembris Anno à Natiuitate Domini 1439.

Post cuius quidem decreti publicationem praefata Synodus dilectissimum Ecclesiae filium Ludovicum tituli S. Caeciliae presby-

LXIX.

Legati ad Amedeum missi.
Sess. 40.

rum Cardinalem Arilatensem vulgariter nuncupatum, & de latere, & alios Legatos, & Oratores suos, videlicet plerosque Episcopos, Abbates, Magistros, & Doctores iuris diuini, & humani, nobilem virum Ioannem, Comitem in Teyrstein, Protectoris dictæ Synodi Imperiali auctoritate deputati vicegerentem, & certos milites ad eundem electum transmittendos duxit, ut ipsi electionem præfatam præsentarent, & consensum eius exposcerent, & requirerent, iuxta formam in decreto 37. sessionis præfatæ Synodi statutam, & ordinatam. Quibus quidem Legatis, & oratoribus in præfati electi præsentia constitutis, ipsūque præsentato sibi (die videlicet Iouis decimo septimo mensis Decembris Anno à natiuitate Domini millesimo quadringentesimo trigesimo nono) decreto electionis prædictæ ex parte eiusdem Synodi supplici precum instantia repetitis vicibus requirentibus, quatenus pro consolatione Ecclesiæ Dei, in maximis, his temporibus, aduersitatibus, & tribulationibus constituta, electioni huiusmodi acquiescere, & consensum præstare, aliāque ad quæ iuxta decretum 37. sessionis huiusmodi tenebatur, facere, & adimplere dignaretur: idem electus tunc in magna (ut cernebatur) spiritus

Amedeus re-
luctatur.

anxietate constitutus, mærore compressus,

cum hinc desiderium quietis, cui sub suavi contemplatione deposita temporalium negotiorum cura vacare delegerat, in solitudine predicta retraheret, & humana conditionis infirmitas oneris, & laboris magnitudinem refugeret, hincque vniuersalis Ecclesie auctoritas, & Reipub. necessitas impelleret: & licet diutius trepidauerit ignorans quid consultius ageret in pramissis, post multiplices seorsum cum grauib. personis habitas consultationes, metuens etiam (ut dicebat) ne ipsius sic ad vniuersalis Ecclesie, & Reipub. ministerium necessitate cogente vocati, contradictionis reluctatio diuinam contra se indignationem prouocaret, & grauioris forsax dispendij in Ecclesia Dei, occasionem induceret, non honoris, aut temporalium rerum cupidine ductus, sed obsequendi necessitate impulsus, & affectu publicæ salutis procuranda in humilitatis spiritu tanti oneris sarcina humeros supposuit, & se Apostolica sollicitudinis iugo submisit, electionique de eo facta genibus flexis, exortisque lacrymis etiam infra statutum ad hoc in decreto 37. sessionis huiusmodi terminum ad laudem Dei omnipotentis deuotè consensit, & humiliter acquieuit, ac per dictum Cardinalem, quo vocari vellet nomine interrogatus, (prout moris est in Romanum pro tempore

Virgetur à legatis etiam intentata ira celesti.

Gemebundus assentitur.

Pontificem electo) Felix nomen duxit sibi eligendum, chlamydi & caputio, quibus tunc utebatur, depositis, etiam genibus flexis, professionem iuxta præfata 37. sessionis continentiam, atque formam emisit, & propria manu scripsit, die, & anno superius expressis.

LXX.
Inauguratur.

Quibus peractis Cardinalis, alijque legati, & oratores prædicti iuxta commissionem, & potestatem eis traditam, ipsum electum, depositis sibi indumentis consuetis, per traditionem vestis albi coloris, & annuli, de Papatu investierunt, & alba, pluviati, cæterisque ornamentis Papalibus congruentibus induerunt, & in Cathedra posuerunt ipse Cardinalis, alijque Episcopi, Prælati, & Principes, Comites, Barones, & Nobiles, reuerentiam, & obedientiam Romanis Pontificibus exhiberi solitas sibi exhibentes, præcedente in processione solempni cruce, more Papali (ut decuit) ad Ecclesiam Monasterij Sancti Maurij ordinis S. Augustini in sancta solitudine constitutam processerunt. Et dū ipse electus fuit ante altare prostratus diu orauit, & hymni Te Deum laudamus, decantatione finita, & Pater noster, & alijs suffragijs, & Collecta consuetis per dictum Cardinalem dictis, eundem electum inthronizauerunt,

*ipsum super altare maius dictæ Ecclesiæ ele-
vantes. Demum ipse electus adstantibus ibi-
dem solemnem benedictionem dedit, & in-
dulgencias concessit, in his omnibus decenti-
bus, & congruis solemnitatibus observatis.
Quæ quidem præmissa omnia sex notarijs
publicis, & decem ad hoc specialiter requisitis
testibus, plerisque prælatis, Principibus, Ba-
ronibus, Nobilibus, Magistris, Doctoribus,
& alijs insignibus, & notabilibus viris ibidẽ
presentibus, & ita attestantibus gesta fuere,
provt instrumentis publicis, quorum tenores
ipsa Synodus præsentis decreto habet, & ha-
beri vult pro sufficienter expressis, plenius
continetur.*

Hæc Romam allata, & toto Chri-
stiano Orbe diffusa, Eugenium terrore,
Ecclesiam vniuersalem sollicitudine,
fideles anxietate impleuerunt. Tamet-
si enim dubitare iam nemo possit quin
Eugenij Pontificatus fuerit legitimus,
ac proinde minùs valida Felicis electio,
ea tamen erat illorum temporum fa-
cies, quæ doctissimis, integerrimisque
obscura, & perplexa faceret omnia:
reliquis provt, vel discordijs imbuti,
vel auditionibus præoccupati, certiora
videretur ostendere. Non alius per eos

LXXI.

Quis tum
Christiani
orbis sensus.

dies sermo Principum, priuatorumve aures domi, forisve tenuit, nec licentiùs vnquam scripturientium libido in famam summorum virorum lasciuijt; hic incredibilibus, & in miraculum corruptis narrationibus vulgi auiditatem pascere, ille atrocibus inuentis tanto faciliùs populum inlicere, quanto immania quæque citiùs diuulgantur, & veris antehabentur. Camerinam hanc non moueo, quæ vtinam diutiùs quàm par fuisset suo fœtore Christianam Rempublicam non impleuisset. Hoc agam, quod ab initio proposui, vt Eugenium venerer, & Fœlicem ab ijs vindicem calumnijs, quibus illum malè sani hominès imperiuerunt. Arque, vt via, & ratione procedam;

Eugenius re vera semper Pontifex verus, Amedeus tamen innocens.

LXXII.

Amedei Innocentiam qui astruant.

In dubio licet ei parti adhærere, quæ probabilior videtur.

Turrecrema.

sum. de eccle.

lib. 4. p. 1. c. 14.

Illud in primis velut certum, indubitatumque mihi sumam, constantem esse omnium Theologorum sententiam, licuisse semper fidelibus, quoties in Ecclesia exortum est schisma, duobus, vel plurib. Pontificibus Romanam Sedem sibi vindicantibus, vel ei adhærere quem legitimum probabiliùs habent, vel si æquè incertum est, neutrum determinatè sequi, sed paratos esse illi obedire, quem Ecclesia legiti-

mum aliquando decernet. Atque hoc *Sylu. v. schisma. Gers. tract. speciali ea de re.*
 quidem adeò cum veritate coniunctum
 est, vt Diuinæ prouidentix certo con-
 silio factum sit, nonnulli vt homines
 vitæ sanctimonia, & miraculis clarissi- *Nonnulli sã-
cti pseudo-
Pontifices
coluerunt.*
 mi quibusdam constantissimè Ponti-
 ficibus innocenter adhæserint, quos
 Ecclesia in album suorum Rectorum
 non admisit: vetera non reuocabo, sed
 ea dumtaxat, quæ Amedeo spectata.
 Certè Beatissimus Iuuenis Petrus Lu- *B. Petrus Lu-
cemburgicus.*
 cemburgicus virtutibus, & prodigijs
 propè infinitis quàm Imperatoria stirpe
 illustrior, Robertum Genuensem (cui
 in sua obedientia Clementi septimo
 nomen erat) non modò semper vt legi-
 timum Ecclesiæ Romanæ Præsulem
 coluit, sed ab eo dignitatibus ornari se
 passus est, Canonicus primùm Pari-
 siensis eius autoritate factus, mox Ar-
 chidiaconus Carnotensis, tum Meten-
 sis Antistes, postremò Cardinalis ti-
 tuli Sancti Georgij ad velum aureum:
 tot, tantisque interea clarus miraculis,
 vt magni ad eum vndique concursus
 fierent: cùmque Auenione, vbi sede-
 bat Clemens, anno salutis 1387. ad me- *Molanus in
natal. SS. Bel-
gij ad 6. non.
Iul.*
 liorem vitam concessisset, tantum eius
 meritis Deus tribuit, vt intra proxi-

mum ab eius felici transitu biennium
 nongenta sexaginta quatuor miracula
 ab eo edita in publicas tabulas sit rela-
 tum ; hodiéque magna veneratione
 sanctissimæ eius exuviæ apud Cœlesti-
 nos eiusdem Ciuitatis coluntur. Quid
 splendidissimum illud Dominicanî or-
 dinis lumen S. Vincentius Ferrerius ?
 an non clarissimis coruscabat miracu-
 lis , etiam tum cùm Petro Lunensi ,
 (qui se Benedictum XIII. vocabat)
 à confessionibus erat , eiusque Apo-
 stolici Palatij Magister ? vt in eius vita
 Petrus Kanzanus , & qui eum descri-
 psit Bzouius pluribus commemorant.
 Quid fœlicissima Virgo Coletta , quam
 Deus ad instaurandum Sanctæ Claræ
 ordinem in fœda collapsum , vnâ ex
 omnibus delegerat , quantis cœlitus
 aucta est beneficijs ? quàm raris illustra-
 ta prærogatiuis , illo ipso tempore ,
 quo Antonium à Chalanco eiusdem
 Benedicti à latere Legatum ad Chri-
 stianissimum Francorum Regem Pari-
 sijs adibat , vt per eum sibi liceret ijs
 exire septis ; quæ nuncupato voto sibi
 præscripserat ? Num eundem Benedi-
 ctum , præeunte Blancha Sabaudica
 Geneuensi Comite, Auenionem adiit,

S. Vincentius
 Ferrerius.

Tom. 15. ann.
 Eccles. Ann.
 1419.
 B. Coletta.

Iacobus Fo-
 derens in vita
 eius, & in Hi-
 stor. Prouinciæ.
 S. Bonaventura
 ex 3. p. chron.
 S. Franc.

eoque auspice vota emisit quibus D. Claræ Regulā profiteretur, Religioso flamine capiti eius ab eodem imposito? Certum igitur est non ideo vexandam esse alicuius conscientiam, quòd ei Pontifici pareat cuius ad eam dignitatem sit ambiguum ius, modò temerè illi non se addicat. Quare non erat cur tantoperè Amedeo deinceps nonnulli insultarent, Quòd Archipræsulem Florentinum S. Antoninum sibi aduersantem haberet. Cur enim Amedeus non crederet idem illi, quòd plerisque sanctitatis laude clarissimis contigisse, ut zelo erraret, qui secundum scientiam non esset? Vitia, utcumque errores, nisi cum homine non exuimus.

*S. Antoninus
Amedeo nihil
officit. 3. par.
tit. 22. c. 10.*

Ad hæc certum quoque est tum cùm passim ambigitur an is, qui se pro Pontifice gerit, dignitatem illam vitio sibi arroget, illum nequaquam peccaturū, qui moderatoribus conscientiae suae grauib, & idoneis dicto audiens, in electionem consentiet, quam illi sinceram, probamque iudicabunt. Ita factum est, ut Gregorius sextus, & Clemens secundus Pontificatum ritè tenuisse credantur, licèt inuito Benedi-

LXXIII.

*Vitio electus
potest aliquā-
do innocēter
electioni cō-
sentire.*

Electus defenditur, non item electores.

cto nono, cui tamen vt vero Pontifici diu Ecclesia vniuersalis auscultarat: taceo reliquos, ne vulnera obducta refricem. Ac tametsi, vel errore præcipientes, vel prauis cupiditatibus incensiferrentur electores, dum omnis ab electo temeritas abesset, non minùs Deo gratus existeret. Hic Doctorem omnium sensus: Reliquum igitur est, vt videamus, non quidem, an Basileenses à flagitio fuerint immunes in his, quæ aduersus Eugenium statuerunt; vt enim plures temporum illorum iniquitas facillè absoluerit, fieri certè vix potuit quin in aliquibus schismatis huius culpa hæserit: vt vt sit, in illos nunc minime inquirò, id meditor, vt in medio ponam Amedeo non fuisse integrum post hæc tempora, vel in Eugenio personam Pontificis agnoscere, vel de suæ electionis integritate dubitare; ac proinde immeritò tanquam noxæ alicuius reum ob Pontificiam dignitatem acceptatam ab inuidis postulari. Quod utique compertissimum erit, si docuero, primùm quàm validis adductus fuerit argumentis, vt Eugenium Pontificatu lapsum sibi persuaderet. Deinde quàm multa, minimèque obscura legitimæ

electionis habuerit documenta.

Principia Pontificatus, haud satis moderatè Eugénius habuisse ferebatur; adeò vt Philippus Bergomensis (quamquam cætera in laudes eius effusus) & Platina dicere non dubitarit

eum diuina, humanaque omnia perturbasse.

Accedebat Francisci nepotis intemperantia, cuius inuidia flagrabat Pontifex: hinc secretà primùm odia, dein vagi rumores, postremò contemptus, ac ferè vno tempore subditorum omnium discessio, initio à Romanis facto violentas manus inijcere in eum parantibus, ni cucullo induto fugam maturasset; quo comperto fremere populus, vestigijs hærere, ac tantùm non telis opprimere cymba se proripientem, *inclamantes furem, prædonem, ac pædiconem*, ait Ciaconus, ac largis probris odium exsaturantes. Nec minùs infestos Bononienses, reliquòsque Ecclesiastici status populos expertus est, vt minimè mirum sit externis eum parum beneuolis vsus, qui suis adeò esset exosus. Assiduis igitur probris, contumelijs, maledictis, omnibùsque dehonestamentis, quæ oris humani duritia extudit, oneratus, Patribus qui Basileæ con-

LXXIV.

Quænam Amædeo persuaderent Eugénium iure depositum.

In chron. An. 1431.

Eugénius omnibus iniustus.

In Eugen. 4. Plat. Græ.

uenerant monendus, atque ad officium reuocandus visus est. Verùm siue illi plus æquo sibi arrogabant, siue ipse nondum satis domitas habebat cupiditates, monita illa morbi irritamenta potius fuere, quàm leuamenta. Cætera quæ deinceps consequuta, Basileensibus Concilium efferentibus, Eugenio contrà annitente, satis superque commemorata sunt: sanè constat Imperatorem, Francorum, Hispaniarumque Reges, omnesque ferè Principes Christianos, famosissimásq; toto orbe Vniuersitates adèd malè de Pontificis causa sensisse, vt tandem manus dare, & Concilij iudicium subire sit coactus.

Sessio. 16.

Hæc Amedeum latere non poterant, quo nemo in tuenda Eugenij autoritate, sicuti vidimus, vel promptior, vel studiosior extiterat: postquam igitur ad extrema ventum est, quid mirum si Amedeus ea de Eugenio tandem credidit, quorum vniuersam propè Europam autorem habebat? Hoc posito fundamento, reliqua facilè superstrue-

LXXV. bantur.

Quibus argu-
mentis addu-
cebatur, vt
crederet Con-

Etenim ita differebāt Oratores Concilij, cùm Amedeum electioni renitentem experirentur, Concilium legitimè

fuisse congregatum, ad reformationem Ecclesiæ in capite, & in membris, prout in sanctissima Constantiensi Synodo fuerat decretum: Eugenium, qui caput erat, præ cæteris reformatione indiguisse, ut qui in ea prorupisset scandala, quæ Christiani nominis dignitati vehementer officerent; nihil intentatum Patres reliquisse, ut eum ad resipiscentiam adducerent: obstinasse illum per duos annos, totisque viribus annisum esse, ut Concilij auctoritatem eluderet; victum tamen precibus Imperatoris, & aliorum Principum, in gratiam cum Patribus rediisse, decreta sua reuocasse, Concilij acta confirmasse, seq; ipsum Concilio spontè subieciisse; multa deinceps communi consensu gesta fuisse, ac præter cætera præsentibus legatis Pontificijs, minimèque reclamantibus renouatum decretum de auctoritate Concilij supra Papam. Verùm cum in pristina relaberetur, in Concilium insurgeret, nec modò Constantiensibus, & Basileensibus statutis, sed suis ipse contra fidem datam aduersaretur, neque Ecclesiam (quam vniuersale Concilium repræsentat) audiret, meritò eam vindicem expertum, quam

cilium Basileense legitimum esse.

Ioan. de Turrecem. lib. 2. cap. 10. negat acta fuisse confirmata, sed dicitur progressum Concilij approbatum.

Matrem recusasset, pati illum quæ sibi imprecatus esset, si pactis non stetisset. Non esse integrum homini Catholico de eius abdicatione dubitare, qui eo ipso quòd duorum Conciliorum Apostolica autoritate confirmatorum decreta (quæ velut certissimam fidei regulam Ecclesia semper agnouisset) pertinaciter respuerat; hæresim sciret, ac proinde Pontificio lapsus esset existimandus. Neque nouum, aut insolens esse, Pontifices Romanos solio dimoueri, Ioannem vigesimum secundum, & Gregorium duodecimum nuper (vt antiqua taceantur) neque vitio creatos, neque alia hæresi infectos quàm quòd Concilium sibi posthabuerent, gradu motos: ac licet ipsorum consensu factum plerique tueantur, certum tamen esse neque sponte consensisse, & eum qualemcunque consensum reuocasse, idque alterius mortem, alterius longum carcerem monstrasse. Imò statuisset Patres Constantienses nihil morari eorum consensum, & inuitos, reclamantesque compellere: itaque Basileensibus præiuisse, vt quod nunc exemplis tuerentur, posteris exemplum traderent. His alijsq; ma-

chinis viri grauissimi iuxtà, ac disertissimi Amedeum oppugnabant.

Sed nihil æquè commouebat, ac eorum autoritas quorum in Concilio præcipuas fuisse partes nouerat, magna enim omnem in partem exempli vis: at cum anceps animus opinione perplexa distrahitur, pietatis, integritatis, ac eruditionis, ea est efficacia, vt sapientissimus quisque eos libenter accedat, quos his virtutibus valere fama celebrat. Aderant autem Basileæ viri, & vitæ sanctimonia, & doctrina sacra paucis illorum temporum comparandi, quorum sententijs velut certissimis oraculis nemo ferè erat, qui non spontaneus acquiesceret. Interest Amedei nostri innocentia, vt præcipua illius confessus capita noscantur. Princeps occurrit Ludouicus Alemanus tituli sanctæ Cæcilie Cardinalis, Arelatenensis vulgò nuncupatus, quem tanto libentius probris eripio, quanto religiosius est consecratos, & diuis ascriptos pia oratione tueri: Tametsi enim in ijs quæ aduersus Eugenium gessit errasse illum nunc in comperto sit, zeli tamen quàm offensionis plus in eius actionibus fuisse ausim affirmare; neque nouum est E-

LXXVI.

Electionem legitimam esse suadebat autoritas, & sanctitas electorum.

Ludouicus
Alemanus
Cardinalis
Arelatenensis
vir sanctus.

Natales eius.

Studia.

piphanios, Chrysostomis; Augustinos, Hieronymis; imò Petris, Paulos resistere. Galli non renuentibus Italis tanti viri natales sibi vindicant: Constans tamen est apud Salutienses Subalpinos fama eum gentilem suum esse, ex oppido S. Michaëlis ad Vallem Macram, in quo oppido vicus est, itémque turris, quæ ab Alemannis nomen habent. Alemannorum autem nobilissimam familiam, è Germania, quam Alemaniam vocant (vnde & illis nomen hæsit) ortam esse perhibent, easque partes insecuisse Othonibus in Italia latè dominantibus. Ludouico pater fuit Antonius nomine, cui frater Franciscus apud Arelatenses diuersatus, vbi etiam nepos Ludouicus meliõris literaturæ tyrocinium posuit: tantóque deinceps studio libris incubuit, vt inter doctissimos illius æui meritò censeretur: quo factum est, vt Amedeus Cardinalis Salutiensis eum in domesticis habere voluerit, enituitque inter paucos Auenione, in Aula Pontificia, vbi Maclouiensis Antistes, dein Præsul Arelatensis est factus. Petrum Lunensem, vt ferè Galli omnes, principio coluit, tergiuersantem deinde deseruit: Præcipua apud Alexandrum,

xandrum, ac Ioannem gratia, tantique sub Martino nominis, ob Bononiam conseruatam, & Ecclesiæ iura constā-
tissimè defensa, vt non modò purpura illum honestarit, sed præcipuis quibus-
que negotijs ministrum adhibuerit; tanta porrò vitæ integritate, morum
suauitate, doctrinæ opinione, abstinē-
tiæ rigore, aduersorum tolerantia, ac
mentis æquabilitate, vt illius solo no-
mine satis sibi tuti Basileenses videren-
tur. Quid illum Eugenio commiserit
non inuenio, nisi quòd vir Ecclesiasticæ
disciplinæ tenacissimus ferre non pote-
rat Eugenij indulgentia in suos solui
eas leges, in quibus condendis Con-
stantiensis Synodus tam impensè incu-
bisset. *Cumque Cardinales ex urbe profe-* Pius 2. in Bulla
retract.
cti (verba sunt Pij 2.) Eugenio infensi vi-
tæ eius, morésque carperent, accederentque
in horas cateruatim Curiales noui, qui (vt
est omnis multitudo maledica, & inimica
Principi) Eugenij nomen modis omnibus la-
cerarent, non credebat mentiri alios,
qui nesciret ipse mentiri. Hæc veriora
quàm quæ cæteri de Duce Mediola-
nensi finxerunt, in cuius gratiam Euge-
nio fuerit infestior: nam vel *Ænea* Lib. 2. de Con-
cil. Basil.
Syluiò teste, nemo adeò in Arelaten-

Num. 51.

Miraculis
clarus.Sylu. c. 42. lib.
de Europa.

Chron. lib. 15.

sem exarsit, vt Mediolanensis Orator qui nec probro abstinuit, mira Cardinalis firmitate frontis, quasi assiduis in se conuicijs depudere didicisset. Non repeto Elogia, quibus eum Archidiaconus ille Polonus (vti suprà retulimus) ornabat: id affirmo, tanto illum zelo diuini cultus flagrasse, tanta in proximis caritate, tantòque in se odio incensum, vt multis miraculis post mortem editis testari voluerit Deus qualis eius vita fuisset, cui sic mori contigisset: autores eius rei habeo non vnos. Pius 2.

in libro de Europa sic scribit. *In Arelate ad sepulchrum Ludouici Cardinalis S. Cecilia eius urbis Episcopi, quem Basilea in consessu Patrum praesidentem vidimus, magna miraculorum opinio orta est, & invalidorum frequens undique concursus spe sanitatis factus.* Pium ferè descripsit Philipp. Bergomensis in chronico. *Lud. inquit, Arelatensis vir doctissimus, atque eloquentissimus, qui Basileensi Synodo ex consensu omnium Patrum praefuit, his temporibus cum multa edidisset opuscula, & quidem digna, non sine magna sanctitatis opinione decessit. Et eam ob rem ad eius sepulcrum magna miraculorum opinio orta est, & infirmorum magnus concursus. Accedit*

Vernerus illorum temporum æqualis. *In fasciculo Ludouicus Alemandi, inquit, Episcopus Arelatensis vir sanctæ vitæ, ac miræ patientiæ, singularisque columna Concilij Basileensis, cui diu præsedit, multis coruscat miraculis.*

Totidem ferè verbis Philippus de Li- *In Fel. 5.*
gnamine in chronologia sua quam Six-

to 4. Pontifici Summo dicauit. Hinc *Lib. 3. histor. Sab. c. 34.*
factum est, vt Paradinus in chronico

illum, *scientia incomparabilem, & miraculis editis celeberrimum* vocet, cui consen-

tians Vandeburchius, *miraculis mortuum* inclaruisse commemorat. Facit cum istis

Prouincialium Antiquitatum inuesti- *In Amed. 8.*
gator Nostradamus; Ludouicus, inquit, *Histo. prou. par. 6.*
Alemandus Cardinalis Arelatensis, Archi-

presul vir sanctæ vitæ, & patientiæ inaudita: singularis columna Concilij Basileensis celeberrimi, cui diu præsedit, multorum, & grandium miraculorum famâ illustris.

Quæ verò fuerint ea miracula declarat eius Epitaphium Altæcombæ in Sabaudia apud Cistercienses Gallica lingua exaratum. Amabat siquidem vir sanctus locum illum velut orationi (cuius erat studiosissimus) opportunissimum, habetque vetus traditio ibidem ex corporis ergastulo euolasse (quod Arelatensis Ecclesiæ dyptica 17. Sept.

M ij



anni 1450. contigisse habent) quamquam sacrae eius exuuiæ magna ex parte Arelatem deinceps translatae sunt, Cuius pastorem suum ne mortuum quidem abesse ferentibus. Sacellum tamen Altæcombæ illi extructum, nomen eius Beatis insertum; Inuocato eius Patrocinio, ut Confessoris Pontificis, numini in Missa litatum est in hæc verba: *Sacerdos, & Pontifex, & virtutum opifex Cardinalis gloriose, Pastor bone in populo in patria Prouincie: qui placuisti Deo viuens religiosè, intercede pro nobis in cælis victoriam, ad Dominum Deum cantans melodiosè, Alleluia.*

In Missæ sacrificio inuocatur.

Ora pro nobis S. Ludouice Cardinalis, ut per te eruamur ab vniuersis malis.

Oremus.

Deus qui meritis, & intercessionibus Beati Ludouici Alemandi confessoris tui, atque Urbis Arelatensis Episcopi, & S. Cacilie presbyteri Cardinalis dignaris mortuos suscitare, cecos illuminare, claudis gressum, & surdis auditum restituere, concede propitiis, ut omnes, qui eius implorant auxilium, petitionis suæ salutarem consequantur effectum. Per Dominum, &c.

Miræus dies.
Iul.

Denique Clementem septimū Pontificem M. autorem habemus omni exceptione maiorem, qui anno 1528. hunc eundem Alemannium Fastis Beatorum ascripsit, vt constat ex Diplomate à Miræo edito in Fastis Belgicis.

Hoc autorem, & hortatorem præcipuum Amedeus ad regimen Ecclesiæ capessendum ferebatur, hunc habebat, & dignitatis auspicem, & si renuere pergeret, diuinæ iræ denunciatores acerri-
mum; quid igitur mirum si Eugenium iure depositum, seque ritè electum tandem persuaderi sibi passus est?

Secundum Arelatensem proximi autoritate fuere Triumviri, quibus Electorum nominandorum ius Basileenses permiserant: eos Ciaconus insignis è Dominicanæ familia scriptor, *viros graues, prudentes, eximieque probitatis* agnoscit. Erant autem isti Thomas Abbas de Dunduno ordinis Cisterciensis, Diocesis Candidæ casæ, Thomas de Corcellis Canonicus Ambianensis, & Ioannes de Segouia Archidiaconus de Villa Vissosa in Ecclesia Metensi; cuius, vt de cæteris ta-

LXXVII.

Triumvirorum
sanctimonia,
& maxime
Ioannis Se-
goniensis.
Ciaconus, in Felice.

ceam, tanta erat autoritas, vt etiam *Lib. 1. de Const.*
amuli eius virtutem hominis, summamque *Basili.*

Cap. 42. lib.
de Europa.

In Chron. An.
1449.

Dominicani
& Franciscani
electionem
Amedei pro-
bant.
Lib. I. de Conc.
Basil.

Idem lib. 2. de
Conc.

Archiepisco-
pus Lugd.

bonitatem, vel inuisti reuererentur, inquit Syluius. Qui ne partibus id elogium dedisse videatur, longo pòst tempore fato functum his laudibus prosequutus est. Ioannes Segobiensis homo Hispanus, moribus, & doctrina illustis, qui cum summos Theologiae Praeceptores doctrina aequaret ab Amedeo dum se Papam dixit Cardinalatus eminentiam accepit, cui sub Nicolao Quinto renuntiavit: imò, & Pontificatum Caesariensem exiit, ut se in paruum abderet Monasterium, in quo magnam (ait Philippus Bergomensis) sanctitatis vitam exegit. Nec deerant è Religiosis ordinibus viri doctrina, & probitate clarissimi, quos Amedeus conscientiae suae sponsores haberet: Aeneas sanè commemorat, Nicolai cuiusdam Burgundionis ex ordine Praedicatorum opera maximè, & solertia factum esse, ut Eugenius haeticus haberetur, quem alibi, virum ingenio, & sollicitudine admodum praestantem appellat: & cum in eo res esset, ut de summa concluderetur, Franciscus de Fuxe, & Andreas Hispanus professione Minores, gradu Theologi, auribus Arelatensis imminebant: neque tacendus hoc loco Christianissimi Regis orator Amedeus Talaruensis Archiprae-

ful Lugdunensis, vir (ut in historia sua Paradinus aduertit) Religiosissimus, Sanctissimus, Doctissimus, optimisque Antistitis emendatissimum exemplar, qui nihil carni, & sanguini, nihil potentia, aut gratie daret: cuius in hac controuersia quis esset sensus, aperit Æneas his verbis. Rogatusq; sententiam Lugdunēsis Archiepiscopus Orator Regius, vir inter omnes, & probitate vite, & scientia copia eminentissimus, postquam hereticum esse Eugenium pluribus rationibus comprobauit, amare conquestus est, illorum ignauiam plurimum detestatus, qui talem hominem Romano Pontificio præfessent; omnesque astantium animos commouit, ut secum calamitates Ecclesie deplorarent.

nēis magnæ integritas vir, eandem laudat
Hystor. Lugd. lib. 2. c. 97.

Lib. 1. de Conc. Basil.

Ita zelus suadebat, sed qui non secundum scientiā esset.

LXXVIII.

Haud scio tamen an maior ab vllò quàm à Nicolao Panormitanorum Præsule, & Ludouico Romano Iuriconsultis ea tempestate longè doctissimis autoritas Concilio accederet, quæ Amedeum ad eiusdem Concilij partes traheret. Certè Pius II. non alio firmiore clypeo innocentiam suam tegere se posse credidit, quàm si tantos obtenderet viros, quibus non acquiescere quasi nefas videbatur. Adiuuerunt, inquit, per id temporis duo viri ex Italia Ba-

Panormitan⁹ Antistes & Ludouicus Romanus Basil. Concilium probant.

Pius 2. in Bulla retractil.

silecense Concilium, Nicolaus Panormitanus

*Archiepiscopus, & Ludouicus Pontanius
 Apostolica Sedis Notarius Alphonsi magni
 Regis Oratores, qui velut duo orbis sidera,
 seu Pontificij iuris, & totius Ciuilibs sapientie
 duopræcipua lumina, & clarissima censeban-
 tur. Hi dictis, scriptisque Concilij gesta pro-
 babant, Eugenij facta damnabant, atque
 ita damnabant, ut nemo (verba sunt e-
 iusdem) Eugenij errata magis quàm Pa-
 normitanus publicaret, cuius maximè opera,
 & suasu & decretum Monitorium aduersus
 eum fuisset, & suspensio admissa. Nec mi-
 nùs studiosè Ludouicus, quem iterum
 his laudibus Syluius extollit: vir totius
 humani generis gnarus, cuius tanta memo-
 ria fuit, ut nulli veterum cedere putaretur,
 siue Simonidem, siue Theodectem, siue illum,
 qui à Pyrrho missus ad Senatum venit, Cy-
 neam, siue Carneadem, Seriphium, Metro-
 dorum, Hortensium, siue qui horum vltimus
 fuit Lucium Senecam de diuinitate memo-
 ria commendemus. Erat enim memor om-
 nium, quæ ipse unquam, aut legisset, aut
 audisset, nec oblitus eorum erat aliquid,
 quæ ipse vidisset. Nec ut cateri Iuriscon-
 sulti principia legum in disputando al-
 legabat, sed quasi codicem legeret, sic tex-
 tum memoriter referebat. vir non Roma-
 tantum, sed cælo dignus: Et cui nemo mor-*

*Lud. Romani
 elogiũ ex lib. 2.
 de Conc. Bas.*

talium comparandus videretur, non admirationi, sed stupori futurus omnibus populis, si, ut equum videbatur, etatis tempora duplicasset. Sed invidit fortuna Italiae, nec tantum scientiarum lumen crescere passa est: immisit pestiferum morbum, virumque vix trigesimum egressum etatis annum abstulit.

Hic igitur tantus vir non modò tres articulos quibus Concilij supra Pontificem autoritas stabilitur, sua sententia confirmabat, sed etiam à Concilio missus Orator in Germaniam, eos doctissimis quibusque suavit. *Nec nos fugit* (aiebat

Sylu. lib. 1. de Conc. Basil.

Amedeus Lugdunensis Antistes Christianissimi Regis Orator) *Ludovicum Protonotarium has veritates Louanij & Colonie predicasse, easque illinc universalis studij autoritate firmatas reportasse. Nec verbis modò, sed scriptis etiam Concilium propugnasse suadent illa eiusdem Syluij verba, cum obitum eius, & Patriarchæ Aquileiensis deplorat. Iamque duas Concilij columnas prostratas esse dicebant, Protonotarium, & Patriarcham, quoniam in re alter, facto alter veritatem synodi defendissent. Imò verò usque adeò se Ludovicus Concilij propugnatorem gerebat,*

Louanienſes, & Coloniēſes Concilio aduerſus Eugenium ſubſcribunt.

idem.

ut Eugenij iussu paratæ sint illi insidiæ,
in quas cum incidisset, longo carcere

LXXIX. maceratus est.

Panormitan⁹,
& Ludouicus
vacillant, sed
non spontè.

Neque tamen diffitebor tum Panormitanum, tum Ludouicum vacillasse, & visos in gratiam cum Eugenio redire; nam cum venisset in spem Alphonsus Aragonius (cuius Oratores erant) fore ut Eugenijs deserto Renato Andegauensi ad se transiret, Regnumque Neapolitanum fiduciario iure sibi permetteret, suis Oratoribus seuerè mandauit, Eugenij partes, quàm possent acerrimè propugnarent; sed turpius erat quàm tantos viros deceret tam facilè sententiam mutare: ne tamen non obsequi viderentur, articulos illos quorum causa tota proruperat controuersia, veros, & iustos confirmabant; quod tamen inde necessariò conficiebatur, Eugenium abdicari meruisse, concedere detrectabant. Quamquam ita molliter

*Lib. 1. de Conc.
Basil.*

Ludouicus, *ut satis appareret*, obseruante Syluio, *nihil magis eum cupere, quàm quod peteret non impetrare*: Et sanè nisi ita res se habuisset, nequaquam eo è viuis erepto altera Concilij columna (sicut suprà dictum est) corruisse fuisset credita. Animosior in speciem Panor-

mitanus, vt ex crebris eius apud Æneam disputationibus videre est. Cæterùm neque de Concilij autoritate dubitare se profitebatur, neque id agebat, vt decreta eius antiquarentur, sed vt Eugenio tempus prorogaretur, idque etiam adeò inuitus vrgebat, vt Syluius affirmet *sola necessitate compulsus, vt Principi suo obediret*, ea molitum: *vbi ta-*

men (Syluius loquitur) *veritas esset non ignorabat, nec libenter ei resistebat, sapius-* Lib. 1. de Conc. Basl.

que ego illum in sua bibliotheca de suo Principe vidi conquestum, qui aliorum monita sequeretur. Hinc facilè iniuriarum rei

tenentur, qui Panormitanum ambitus postularunt, vt qui se totum ad Amedei gratiam finxisset, Purpuræ consequendæ studio; quique asseuerarunt ipsum

Paradinus, & Vanderturch. in Amed. 8.

Amedeo cedere meditati pertinaciter obluētatum, ne dignitatis iacturam faceret; qua etiam priuatum illum contendunt, tam vanè, vt compertum sit quatuor antè annis, quàm Felici cum Nicolao V. conueniret, migrasse Panormitanum, tantumque ab Amedeo demerendo abfuisse, vt nullus in Concilio Eugenij abrogationem diutiùs distulerit. In quo sanè Amedei modestia singularis extitit, qui noluit, vt Pa-

Panormitanus ab Amedeo Cardinalis distulit.

normitani virtuti, & meritis legati persona officeret, quam inuitus sustinuisset: maximè cum alioqui Concilij doctrinā semper esset amplexus. Satis igitur quis esset animi sui sensus Panormitanus aperuit cum Amedeo electo continuo adhæsit; hætenus enim dum resistit, legatus videri; deinceps Panormitanus esse amavit. Cum igitur Oratores, qui Amedeum adierant, ingentia hæc Panormitanorum, & Romanorum nomina extollerent, premerentq; optimum Principem, vt famam suam illorum suffragijs permitteret, quem amabo non expugnassent? Maximè cum non iam singulos, sed totas cateruatim Academies obtenderent, quæ vno ore Concilio contra Eugenium subscriberent; ita enim Ludouicus Romanus è Colonienfi, & Louanienfi, & è Parisiensi Nicolaus Amici luculentis autoritatibus afferebant.

Celeberrimæ
vniuersitates
stant à Basi-
leenfibus.

LXXX.

Antistites
magni in ex-
tremis positi
Sacramenti re-
ligione adhi-
bita Eugeniū
respuunt.

Ac ne quid omnino deesset, busta quoque sollicitabant, vt formidine diuini iudicij cogerent, quem humanis rationibus non vincerent. narrabant enim Episcopos Ebronensem, & Lubecensem, ac Abbatem Vrgeliasensem

cùm ad suos redirent morbo percussos non satis sibi consultum putasse, nisi publicè Eugenio renuntiassent: *Nam ubi adesse migrationis horam sensere* (10- Lib. 2. de Conc. quor cum Ænea) *compluribus ad se viris* ^{Basil.} *grauibus accersitis, coram ipso Christi corpore, quem statim sumpturi, & ante cuius tribunal intra paucas horas comparituri erant, Vos omnes, qui adestis, dixerunt, orate Deum, ut illos conuertat, qui Gabrielem pro Summo Pontifice recognoscunt, quia in eo statu saluari non possunt; se in fide Basileensis Concilij morituros professi, absque ulla trepidatione dormientibus similes ad Dominum migrauerunt.*

LXXXI.

Hæc verbis ad terrorem compositis viri disertissimi auribus Amedei intonabant, vrgebantque vehementer, multa cumulantibus argumenta, quibus diuinam in eius electione prouidentiam elucere confirmarent. Et quæ enim vnquam, aiebant, purpuratorum Patrum comitia, vel seueriore disciplina, vel maiore pietate, vel libertate securiore celebrata? Quàm concordibus Patrum suffragijs (licet aliquos in eodem cœtu haberet Amedeus infensissimos) cooptatus? Quanto omnium ordinum plausu renunciatus esset?

Comitia in quib. electus Amedeus magna sanctitatis specie celebrata.

nec defuisse euidentissima diuinæ mentis signa, quando copotissimum temporis articulo conuenissent Patres, quo sanctorum Reliquiæ toto conclauicircunfusæ, vnâ cum totius populi votis numen propitiarent. Addebant satis constare Patres eum elegisse quem sanctissimum putarent, quando Ioannem Engolismensem miræ sanctimonix virum prius optassent, ac deinde Franciscum de Maresine Carthusiensem

V. sup. num.

67.

Petrus in E-
lucid. Chron.

Carth.

LXXXII. Generalem Religiosissimum.

Amedeus à
temeritate,
non ab erro-
re absolutus.

Tot argumentis victus Amedeus nisi Pontificiam Prouinciam ab omni temeritatis labe nitidissimus adijisse credatur, nullus sanè conscientijs nostris securitatis locus superesse videbitur: quis enim vel plura vnquam humanæ sapientiæ præsidia adhibuit, vel sponsoribus vsus est locupletioribus quàm Amedeus noster? Quid igitur? Aliæ sunt diuinæ, aliæ humanæ sapientiæ leges; ludit illa in orbe terrarum, & illudat vel oculatissimis, ne plus æquo sibi placeant, tuncque se maximè cæcutire intelligant, cùm lynceos habere oculos opinantur: verum vt hoc agnoscere demissi animi est, ita errare hominis: sed neque hic error innocentiam exuit,

neque hominem reum facit, imò (quæ diuinæ sapientiæ laus est, vel maxima) feliciùs sæpe errant, qui se ad eorum, qui vulgò sapientes habentur nutum totos fingunt, quàm qui præfidenti audacia nullum in consiliorum suorum conscientiam admittunt. Ego sanè cum Petro Lucemburgico, Vincentio Ferrerio, aliisque bene multis errare malim prudentium monitis acquiescens, quàm cum plerisque casu potiùs quàm consilio bene sentire. Dabo igitur Amedeo, quod sanctissimis viris contigisse, vt innoxio errore hominem se esse testatus sit; at temerè fecisse, vel culpam contraxisse aliquam, tam iure inficiabor, quàm id iniuria proterui homines calumniandi libidine commenti sunt. Quanquam autem Amedeus ab omni iniuria tutus proiecti in mare scopuli instar assilientes conuitiorum fluctus ita semper fregerit, vt nulla sæuitiæ vestigia tot sæculis verberatus ostendat, facere tamen hoc loco non possum, quin strepentes circa illum oblatrantis inuidiæ hirritus compescam.

Princeps infremat Blondus, cuius nomine audito statim intelligunt omnes Blandum Mercenarium, tam seruiliter

Amedeum nonnulli frustra calumniantur.

LXXXIII.

Blondus Calumniatorum

Princeps

Decad. 3. l. 10.

¶ Dec. 4. l. 1.

nationibus intelligere quas ad examen vocare non pigebit: has autem ex vnus Blondi officina depromam, tum quòd eius opilio Poggius fabulis, anilibusque deliramentis scribendis otium consumpsisse passim censeatur, tum quòd quæ maximè virulenta apud alios sparsim extant, ea Blondus in vnum coacta quasi validiore conatu expressurus in Historiam suam coniecit. Huius igitur machinis disturbatis, occæcatisque tormentis, quidquid est apud alios, confossum confectumque putandum est. Sic gitor Blondus.

LXXXIV.

Blondi pri-
mus impetusi

Cùm Albertus Auster Cesar declaratus arcendis à Pannoniæ finibus Turcis intentus, diem obisset, congregata apud Basileam factio Conciliaris, illius liberata metu, in facinus quod tam perditè tamque afflictim diu concupierat prorupit, Amedeo Sabaudie Duce in Romanum Pontificem declarato, cuius electionis modum paucis absolvemus.

Quid ais, Blonde, Basileenses mortuo Alberto metu liberatos ad Amedei electionem se accinxisse? At quomodo sibi ab Alberto metuerent, quem Concilij defensorem habebant; à quo Ba-

Albertum
Imp. Basile-
ensem in-
fensum ca-
lumniantem

N

Conradum Vuinspergenscm Protectorem acceperant? Quare (Sylvius loquitur) ut alienatum ab Eugenio aduersarij, sic Patres sacri Concilij optimam erga se fore mentem Cæsaris cognouerunt: quia nec protectorem misisset, nisi legitimum Concilium reputasset, nec rursus Concilium in Basilea esse putauisset, si Eugenio fidem habuisset. Neque verò Protectorem tantum, sed Oratores etiam in Concilio perpetuos habuit Episcopum Lubecensem, ac Georgium tam literata, quàm armata, ut ait Sylvius, insignem militia. In Concilio verò Florentino Burgundionis Ducis Oratores subscripsisse lego, Cæsareos non lego: ut vel hinc palàm sit à Basileensibus stetitisse Albertum, Sigismundi decessoris sui vestigijs insistentem. Sed vnde Basileensibus ex Alberti morte animus meditata perficiendi? Eugenium iampridem gradu mouerant, principiò Octobris de electoribus deligendis deliberarant, Triumuiris in eam rem tertio Id. Octob. deputatis, qui 4. Kal. Nouembr. ad Patres de suis suffragijs retulerunt, postri die, tertio Kal. itum est in conclaue, ac post septem dies, Nonis scilicet Nouembr. renunciatus Pontifex Ame-

Basileensibus
imponit.

deus. Quid interim Albertus? *Hic cum intellexisset* (vtor verbis Philippi Bergomensis) *Turcos Smederonem Raxia Vrbem obsidere, ad eam liberandam multo cum exercitu eò processit. Verùm morbo dysenteria in via contracto, infecto negotio Vienne repetere statuit: sed in itinere eo morbo affectus, relicta uxore pregnantē, confecto testamēto in villa quæ Longa dicitur, 6. Kal. Nouemb. vita decessit.* Biduo igitur antequam Patres conclaue ingrederentur vixerat Albertus: vin' igitur Blonde tanta pernecitate nuncios è Pannonia Basileam aduolasse, vt Patres de Cæsaris interitu certiores facerent? Ne si festinantis quidem calami tui pennas addidisses, tantum itineris emensi essent. Præproperus es fraudum, Blonde, dūmq; maturè ringeris, canem te prodis festinantem, quæ cæcos parit catulos. Sed perge.

In chron. av.
1449.
Mendacij tenetur.

Is etenim (Amedeus) quem ante proximum decennium multis narraſſe nouimus prædictum sibi à Pythonibus futurum vt Pontificatu Romano decoraretur, Ducatus, Dominiſque quod poſſideret ingentis curam natis ſpecie reliquit, Anachorita vita ſolo habitu inſtituta, & ſi remoto ab urbibus viſco, cum paucis nobilibus ſimili opertis pallio

LXXXV.

Atrox Blondi calumnia quæ Amedeum ad ſtriges ablegat.

degit, omnia, ut erat solitus, Ducis, atque Domini Prouinciarum munera exercebat.

E fabulis fidem querit.

Solemne est fabulas texentibus Deū semper aliquem è machina deuocare, qui impeditos casus, & perplexas ambages explicet: neque enim spectatorum oculos tenerent nisi incredibilia, & in miraculum corrupta proponerent. Sentiebat Blondus frigida fore in vulgus commenta sua, nisi prodigio aliquo inclarescerent. Tiresiam ergo in scenam dedit, qui præstigijs suis nec opinantes fascinaret, dum Amedeo tanto ante sacras infulas ariolatur. At enim, Blonde, quem nobis mirabilium istorum autorem laudas? *Novimus*, inquis: nimirum te in Arcanorum suorum conscientiam Amedeus adhibebat, ut hæc nobis secreta referares? Adcōne verecundiam omnem prostituisti, ut Religiosissimum, sapientissimūque Principem strigibus implicares, itaque dementatum effingeres, ut dæmonum artibus gloriaretur? Dolebat tibi crebris toto orbe sermonibus Amedei sanctimoniam celebrari, altamque animi demissionem extolli, quæ ipsum in solitudinem abdidisset; corrumpenda illustri mendacio tantæ

virtutis fama tibi videbatur; nec difficile populo imponitur, qui ut plurimum, & in Dominantes iniquus est, & eorum Consilia ex euentis iudicat, falsisq; in eos auditionibus statim accedit. Amedeum igitur callidus impostor ad Pythones ablegat, infelices Genios sacræ illius militiæ auspices facit, quæ à Diuo Mauritio nomen habet, gaufape Ducem velut larua induit, qua hypocrisim suam tegat, socios illi tanquam voluptatum emissarios adiungit, totam denique ambitionis fabulam ita exornat, ut omnia inter se apta satis, nexaque videantur: & inualuit apud plerosque commentum Gobelino referente, incerto autore vulgatum. *Obierat* (inquit) *uxor Amedei quæ unica eius fuerat: striges, ut aiunt, futura vanè predicentes Amedeum adiere, ei que summum Pontificatum obuenturum prädixerant, quòd in Concilio deponendus esset Eugenius, & ipse instituendus Amedeus: siue hac spe ductus, siue suo pte ingenio repleto quidem charitate, & religione, &c.* Modestè sanè, ut qui antea ctæ Principis optimi vitæ longè quàm in certis rumoribus tribuendum censeret; quapropter rectè paulò infrà, *calumniato-*

Lib. 7 comment. Pij 2.

Num. 20. &
seqq.

Contradictio
evidens in
hac calumnia.

Amedeus
fine anni tri-
gesimi noni
est electus.

Martinus
principio tri-
gesimi primi
vixit: Eug-
enij ei suffe-

ribus dumtaxat suspectam fuisse mutationē adiungit, dicentibus Amedeum scilicet sperare Papatum, atque idcirco heremitam factum. Verū facile est ex ijs quæ suprà narrauimus sincerum Amedei propositum agnoscere, quod tanto antè animo præceperat, tantæque religione perfecerat, publicæ rei, & tranquillitati suæ in commune consulturus: Id tota eius vita innocentissimè acta, id religiosorum hominum amor, diuinarum rerum studium, Monasteria constructa, & tota Ripalliensis secessus moles proclamabat, frustra tanto molimine excitata, si occultæ machinationi tantum obtendebatur. Denique sponte laxatur hæc machina hiantibus fraudum commissuris: aiunt enim striges ei Pontificatum denuntiasse, quod in Concilio deponendus esset Eugenius, At quomodo *ante decennium* id narrare poterat Amedeus, vt sibi compertum affirmat Blondus, cum neque Concilium tunc ullum Basileæ esset; nec Eugenius in Pontificem electus? Et si iam ab initio Concilij venerat in illam mentem Amedeus, cur adeò sollicitè Eugenij partes fouebat, vt non alio defensore ma-

gis Eugenius ipse gloriaretur? Cur in Patribus cum eo conciliandis adeò studiosè per Oratores suos incumberebat? Cur potius quem ruentem videbat,

Aus Concilium Basileæ aperuit. 19. Julij eiusdem anni.

non propellebat? Cur heremum tunc non cogitabat cum Imperatorem, Regesque omnes, cum è Purpuratis Patribus doctissimos quosque, ac Religiosissimos Concilium celebrantes, Eugenium damnantes videbat? At ille non nisi integra pace se abdidit, exeunte scilicet anno sæculi eius trigesimo quarto, cum Nonis Februarij eiusdem anni Basileenses in gratiam cum Pontifice rediissent: ut vel hinc nemini latere possit quàm in Amedeo alia omnia cogitantem sit iniquus, qui simulatione pietatis in supremam dignitatem grassatum esse ex falsis auditionibus criminatur. Et verò cur Iacobum Borbonium Hungariæ, & Siciliæ Regem paucis ab Amedeo mensibus Franciscanis Patribus post omnium fortunarum suarum euerisionem additum, captandi pariter Pontificatus gratia Religiosam induisse vitam similiter confingere non licuisset?

Observatio per necessaria.

Christi, 2. par Vesont.

Sed ne deinceps bladiatur sibi Blondus, dabo illi pro incertis rumoribus

LXXXVI.
Sriptores Amedeo ætate suppages ab

omni ambitu
eum absolunt.

quos adducit, testes locupletissimos, qui Amedeum ab omni simulatione absoluant, nec nisi sanctimoniam in eius secessu agnoscant. Princeps erit Pius 2. non ille quidem adhuc Concilij fautor, sed Amedeo è viuis erepto factionis expers. *Cùm Amedeus (inquit) admirandus adaucto paterno imperio, parta undique pace formidandus, cumulatis opibus, sapientia plenus, vicinis populis, ac Principibus videretur, relictis Principum, & gloria fastibus in heremum se recepit. Cardinalis S. Crucis apud Gobelinum, non satis admirari, aut collaudare Principis conuersionem poterat. Idemque Gobelinus, seu veriùs Pius 2. Amedeum suopte ingenio, repleto quidem charitate, & religione, relictò Ducali fastigio, & omni sæculi pompa procul, eiecta gubernatione subditorum primogenito commissa ad heremum concessisse prædicat. Vernerus Amedeo coætaneus, & illum, vt opinor, sublegens Philippus de Lignanime; Felix (aiunt) fuit Dux Sabaudie Princeps deuotus, ac senex. Ioannes Sabellicus, etsi postea mutationem imputat, in solitudinis tamen capeßendæ proposito nihil, nisi sanctum agnoscit: Vixerat is, ait, annos circiter quadraginta in florentiss*

Lib. de Europa,
cap. 42.

Lib. 7. comment.
Pij 2.

In fasciculo
Temp.

In chron.

Ennead. 10.
lib. 3.

simo Principatu. Subijt inde tedium rerum humanarum, instituitque heremiticam vitam. Sumpsit & pallium heremiticum; per quæ magnum erat nomen sanctitatis adeptus. Marius Belga Ludouici 12. Historicus: Amatus (sic Amedeum vocat) in heremodogens per aliquod tempus unâ cum decem nobilibus ætate prouectis vitam solitariam vixit, prominentem barbam alens, vestimentum vile indutus, ac clauam nodosam manu gerens, &c. cum autem sanctitatis, ac innocentie opinione celebris esset, à Concilio Basileensi Pontifex est electus. Philippus Bergomensis illi ætati super: Vir cerse (Amedeus) omnium virtutum claritate adornatus, quas ob res Imperium suum ultra citraque montes mirum in modum auxit. Qui cum gubernacula sue gentis xl. annis tenuisset, parta undique pace, multis cumulatâ diuitijs, relictis Principatus sui gloriæ fascibus, Ludouico unigenito (primogenitum dicere voluit) Imperio tradito in heremum se tradidit, atque recepit; ubi aliquandiu cum sancte vixisset, tandem summi Pontificatus honorem accepit. Nauclerus; Vixerat is (Amedeus) annos circiter 40. in florentissimo Principatu: subijt deinde rerum humanarum tedium, instituitque heremiticam vitam.

Lib. de schismat. cap. 14.

Erat in numero sociorum.

In chron. an. 1438.

Lib. 2. Gener. 42.

Lib. 3. Geograph.

Raphaël Volaterranus: *Sabaudia Ducēs Saxonum Ducibus, ac stirpe Augusta originem ducunt annos propè cccc. Inter quos Amedeus ab Imperatore Friderico (Sigismundum voluit dicere) Dux primus fuit appellatus, qui defuncta uxore, reli-*

Lib. 2. Geograph.

ctaque Regni cura Ludonico filio cum paucis suorum secessit in agrum Gebennensem, studio rerum diuinarum prope lacum Lemannum Cœnobio constructo. Eadem totidem verbis repetit Munsterus quam

Lib. 28. chrono. German.

quam Catholicis Principibus parum æquus. Mutius, & ipse Sectarius: Ducatus administratione relicta, vitam spirituales contemplatiuam amplexus erat, vestitu, & tota victus ratione religiosam ducebat vitam. Iacobus Spiegel doctus Austriados à Bartholino conscriptæ interpres: Gebennensem agrum Patrum nostrorum memoria nobilitauit secessus Amedei primi Sabaudie Ducis, qui deinde ob abstinentiæ, clarique nominis famam, inuitus in Consilio Basileensi Pontifex factus est. Nec modò vicinos sanctimonix Amedei fama, sed totam latè Europam peruaferat. Græcum autorem

In commentar. ad lib. 5. Austria.

Lib. 6. rerum Turcic.

Læonicum Chalcondylam testem habeo: Ea tempestate, inquit, Germani Basilea erant congregati, dissidentes sententijs

contra Eugenium Pontificem, quem reprobantes crearunt Pontificem nomine Felicem, virum inter ipsos in primis spectata probitatis. Meritò igitur Paradinus in *Lib. 3. Histor.*
chronico asserit, Basileenses ideo A- *Sab. 6. 32.*
medeum delegisse quòd Religiosissimum,
sanctissimúmque Principem esse nossent.

Nec dissimilia ante eum Champerius; Nota erat, inquit, Patribus pietas singu- *Champer. in*
laris, & sanctitas Amedei; ideòque illum *Amed. 8.*
Pontificem crearunt, ut Ecclesia laboranti succurreret. In eundem sensum recen-

tiores. *Vanderburchius; Eugenio Pon-* *In Amed. 8.*
tificatu priuato Amedeum sanctitatis, pie-
tatisque apud omnis ordinis homines opinio-
ne clarum in eius locum substituunt. Facit

cum istis Ioannes Mariana: *Amedeus ab-* *Histor. Hisp.*
dicato Principatu, ac aula cultu relicto in *lib. 21.*
heremum abijt purioris vitæ studio incen-

sus, sex senioribus ex suorum nobilitate Co- *In necessitudi-*
mitibus. Huc pertinent illa Petri Mat- *nibus Franco-*
thæi verba. Amauerat hunc secessum A- *Sabaudicis.*

medeus, ut Mundo illuderet: ut ipsi illude-
ret Mundus, illum inde abducit. Et mul- *Lib. 7. Histor.*
to illustriora Ioannis Baptistæ Pignæ; *Etsens.*

Ripallie Amedeus magna demissione age-
bat, & procul à sæculi curis, vnis spiritali-
bus attendebat. Neque omittendus O- *Lib. 3. de Pon-*
nufrius; Amedeus Ducatu relicto, Christi *tif. & Card.*
creatione

amore succensus solitariam vitam elegerat. Hic cœlibè ac religiosè viuens à Patribus Concilij Basileensis ob multa crimina Pontificata Romano abrogato Eugenio Quarto in eius locum Pontifex M. est factus. Et paulo infra ; Amedeus in solitudine Ripallia Gebennensis Diœcesis vitam Angelicam agens in Pontificem R. electus est.

LXXXVII.

Quid nationes omnes de heremitica Amedei vitam senserint.

Hæc sunt quæ de Amedeo norunt Itali, Galli, Belgæ, Germani, Helvetij, Hispani, Burgundi, Græci, (nostros enim, hoc est Sabaudos nequis calumniatur missos feci) hæc inquam de Amedeo norunt nequaquam suspectæ factionis viri, secessisse videlicet illum ut Principum, & gloriæ fastus relinqueret, ut se ad Deum conuerteret, ut in heremo sanctè viueret, ut rerum diuinarum studio se traderet, ut vitam spiritualem contemplatiuam amplecteretur, ut vestitu, & tota victus ratione religiosam duceret vitam: idque Christi amore succensum, charitatè, & Religione motum, ac tædio rerum humanarum, & purioris vitæ studio: vnde meritò apud omnes audiret Princeps deuotus, spectatæ probitatis, sanctitatis, & innocentiae opinione celebris, omnium virtutum claritate adornatus,

abstinentiæ fama clarus, Angelicam vitam agens: Vnde igitur habet Blondus, vnde nouit dæmonis artibus ambitiosè factum esse, quod totus orbis sanctissimè, religiosissimèque factum testatur, & suscipit? Sed illum porrò audiamus.

LXXXVIII.

Concilio autem Basileensi interea quamdiu Romani Pontificis Eugenij consensu celebratum fuit, paucos prestiti fauores: sed postquam Pontificem, & orbis Christiani Principes illud tanquam perniciosum detestari vidit, omnes eo augendo, manúque tenendo adhibuit vires, adeò vt quibus temporibus proximo superiore exactò biennio suspensionis ab administratione primùm, deinde priuationis machinationes in Pontificem sunt intentate, impulsì à Duce Sabaudia Clerici aliorum qui apud Basileam interfuerunt impietati, numerum aquauerint.

Blondus Amecci gesta in Concilio criminatur.

Quàm omnia ad inuidiam, ad fraudem, ad calumniam ornata? Sed illud primum à te quæro, Blonde; quamdiu de Pontificis consensu celebratum, hoc est, quamdiu legitimum fuerit Concilium? An vsque ad proximum ante Eugenij abdicationem biennium, vt innuere videris? Cur igitur decreta respuuntur, quæ per plures in ante an-

Blondus se ipse impedit,

nos in eo edita leguntur? Quando igitur deesse illi autoritas cœpit? An cùm illi tres articuli promulgati sunt, qui Pontificiæ autoritati detrahunt? At statim ab exordio Concilij sunt promulgati; numquam igitur legitimo Concilio fauit Amedeus. An cùm Eugenius suos legatos reuocauit? At reuocationem hanc damnauit Eugenius; & irritam esse iussit: sed quando Amedeo fauere cœpisti, cùm eius beneficia commemoras; dic amabo, Blonde, qui sint hi fauores vel pauci quos legitimo

Diffimulat egregia Amedei in Eugenium beneficia.

V. sup. nu. 7.

& num. 8.

Concilio præstitit? Ego enim multa, eaque valde illustria Amedei in Eugenium beneficia lego, in Concilium verò non lego. Audio sanè Eugenium Amedeo *gratias habentem, quòd intentus ac feruens esset ad defensionem, & conseruationem honoris ipsius, ac dignitatis, & autoritatis Apostolica sedis.* Scio eundem Eugenium scribere *se à multis fide dignis quotidie audire, & veraciter informari quantum Amedeus intentus esset, & omne studium suum apponeret ad honorem, & statum suum (Eugenij) & Romana Ecclesiæ conseruandum; ac proinde fidem eius & deuotionem plurimùm in Domino commendare, hortarique ut in similibus bonis*

operibus, quibus multos alios superavit, se ipsum superare conetur. Noui Amedeum per suos oratores in Concilio euicisse vt quam tantopere desiderabat Eugenius prorogationem illam obtineret; Hæc tibi Blonde obscura esse non poterant, qui Eugenio esses à secretis: quid? hisne cuniculis in Pontificatum irrepebat Amedeus; his machinationibus Eugenium euertebat? Cur hæc tacebas, vt nescio quos fauores Concilio paratos referres? Nullus sanè dubito quin semper Amedeus Concilium vti debuit, reueritus sit, nihilque non egerit apud Pontificem vt autoritatem illius illibatam esse pateretur: idque litteræ ipsius Amedei ad Concilium scriptæ declarant: sed si verum amamus, erit vtique fatendum Basileenses Amedeum Eugenio quàm sibi longè fauentiorem existimasse. Quid quod affirmare non verebor exacerbatos ex illis in Amedeum plurimos quòd eum Eugenio quàm par esset amiciorem crederent? Quò factum est, vt vehementer de illis in causa Lausanensis Episcopi expostularet, vt qui duriùs in eum quàm in barbarum, & ignotum hominem se gessissent: *Numquam* (in-

✠ num. 10.

*In Appen. ad
Conc. Basil.
pag. 233.*

Amedeum
Basileenses
minùs sibi
æquum puta-
bant.

Seueriùs cum
illo agunt.

quit) potui obtinere quod uni Sarraceno non fuit denegandum. Sed in rem erit controuersiam hanc non transmittere le-

LXXXIX. uiter.

Magna Basileenses inter & Amedeum controuersia pro Episcopatu Lausansenfi.

Vacauerat fortè per eos dies Episcopatus Lausanensis in ditione Ducis Amedei positus. Hic, vt iure nominationis vteretur, quod Pontifices olim, & recèti memoria Martinus Quintus illi attribuerat, Ioannem de Preugino ad eam Sedem vocabat, factione tamen quorundam Canonorum ius electionis sibi vindicantium, Ludouicus de Palude cooptatus iuerat in possessionem: Grauius iniuriam tulit Amedeus, & ne in posterum serperet damnum, cum Eugenio per legatos suos Nicolaum Festi, & Ioannem Championis egit, vt Ludouicum gradu moueret, aut aliò transferret. Eugenius Iudices dedit, Iordanum de Vrsinis Episcopum Sabinensem, & Angelotum tituli Sancti Marci Cardinalem, suos ad Basileensem Synodum legatos cum literis ad Amedeum, quarum initium est.

Eugenij ad Amedeum littera.

Eugenius, &c. Ex his quae per singulos dies de constanti deuotione tua nobilitatis sentimus, clarè contuemur supra cetera, quae

*qua ad tuam gloriam ordinantur, splendē-
re sinceritatem fidei qua Progenitores tui
Romanam Ecclesiam, Sedem scilicet Beati
Petri, magna semper cum reuerentia colue-
runt: unde præclaris tuis exigentibus me-
ritis Paterna inclinamur affectione ad ea,
qua decus, & bonum tuæ Nobilitatis aspi-
ciunt, &c.* Cætera delegationem tan-
tū habent cum reservatione Ec-
clesiæ Matifconensis: *Datum Romæ
Anno 1433. prid. Id. Mar.* Fine anni
Pontifex Ioannem Episcopum dixit,
commendatitij in eius fauorem Ame-
deo datis prid. Non. Nouembris: sed
erat Ludouicus Concilio acceptissi-
mus, quēque præcipuis legationibus
adhibuerat, interque primos audiebat:
& agrè ferebant Patres Amedeum à
Pontifice pendere voluisse; cū de-
creto facto statuissent stante Concilio
Prælatos ab eo esse constituendos. Ob-
stinavit igitur in proposito Ludouicus,
Patribus eius causæ fauentibus. Immi-
nuta verò Pontificis autoritate (id enim
temporis ad eas incitas venerat, ut
suis antiquatis, Concilij decreta con-
firmare necesse haberet) non poterat
Amedeus non interpellare Patres ne
iniuriam sibi fieri paterentur. Sed quo-

Commendat
eius in te be-
neuolentiam.

Amedeus à
Concilio ad
Eug. prouo-
cat.

Hinc Basileen-
sium in eum
odia.

Blondus im-
postura con-
uipitur.

nam sciebat illos maiorem partem
alieniore à se animo esse; Armigerum,
& Fecialem (Heraldum vocant) pro
tribunali dum ius diceretur adesse ius-
ferat, qui si causa caderet, à Concilio
ad Pontificem prouocarent: nec falsa
auguratus est, sententia secundum Lu-
douicum dicta, damnati Amedeus, &
Ioannes electus, statimque interposi-
ta prouocatione, tanta in prouocantes
vociferatio est sequuta, exardescenti-
bus plerisque omnibus, ut vix ab illis
manus abstinerint. Et sanè Basileen-
ses nihil molestius vrere quàm huius-
modi prouocatio poterat. Nam cum
tantam Concilij auctoritatem esse de-
cernerent, ut nemini ab eo ad tribunal
aliud appellare liceret, exemplum tan-
ti Principis periculosissimum fore ani-
mis præcipiebant. Ille verò nequis de
sua mente dubitaret, oratoris sui pro-
uocationem non modò ratam habuit,
sed denuo coram legitimis testibus, &
Præsidibus, verbis ore proprio conce-
ptis appellauit. Hic verò lectori æsti-
mandum relinquo quàm consentanea
veritati Blodus scribat, cum Amedeum
omnes vires *augendo, manutenendoque*
Concilio adhibuisse scribit; in quem Ba-

fileenses velut decretorum suorum violatorem palam infurgerent. Neque verò in hac vna controuersia diuersus abiit à Basileensibus noster Amedeus. Sententiam illi in Antonij Vadimontani, & Renati Andegauensis lite pro Ducatu Lotharingæ, secundum hunc dixerant : illi Amedeus ita fauit, vt eius potissimum opera æmulum in potestate habuerit. Quòd si sagacissimus Princeps agitabat animo Pontificatum Concilij suffragijs obtinendum, an non demereri Patres, fauorem eorum eblandiri, illorum statuta laudare, amplecti, cæterisque exemplo præire debuerat ? Obseruatione porro dignum est hæc ab Amedeo gesta post aliquot dumtaxat menses quàm exiit Imperio Ripalliam secesserat; vt vel hinc manifestissimi teneantur mendacij, qui simulata Religione Basileenses sibi conciliare voluisse calumniantur. Etenim fine anni trigesimali quarti abdicarat ille se, Ludouico sibi suffecto : causa autem Lausanensis per primos sequentis anni menses est agitata ; literas siquidem expostulatorias dedit Amedeus ad Concilium prima die Maij anni trigesimali quinti, quarum aliquot capita fidem.

Vaudetb. in
Amed. 8.

Nota.

X C.

dictis factura recitabo.

Expostulatio
Amedei ad
Concilium.
In Append. ad
Conc. Basil.
pag. 233.

Confusus, ait, de V. R. P. benigna supportatione, conqueri compellor apud eos hostibus seclusis, super eo quod nuperrimè dilecto fideli scutifero Oratore, ac Procuratore meo ad hoc deputato Ioanne Championis in conspectu vestro in Ecclesia majori Basileensi, ubi ut credo debebat, & debet sibi, & omnibus seruari totalis immunitas, & plena securitas personaliter constituto, post intimatam eisdem P. V. & parti aduersæ videlicet dicto D. Ludouico aduersario, & hosti meo ibidem tunc presenti appellationem iustam, à quadam prætensa sententia generaliter, ut fertur, in causa Lausanensis Ecclesiæ, sicut placuit in fauorem dicti aduersarij contra Reuerendum in Christo Patrem D. Ioannem de Preugino Episcopum Lausanensem nuper lata, quæ utinam pro honore Concilij sine alio prauio moderamine, & causæ maturiori iustificacione nunquam fuisset promulgata: statim insurrexerunt quidam ex Procuratoribus, nec non Procurator fiscalis, ac etiam Procurator fidei, qui tamen ut prudens, fuit alijs magis temperatus, licet urgeretur, & cum clamore valido petierunt, quatenus idem scutifer, & Procurator meus caperetur, & grauiter puniretur, eo quod huiusmodi appellationem intimaucrat: surrexerunt e-

Amedei Oratores in Concilio iniuriôsè habiti.

tiam innumerabiles alij cum clamore, & strepitu pariter acclamantes, Capiatur, incarcerationetur. Nec defuit aliud verbum violentum, nisi ut crucifigeretur. Hostis insuper predictus particulariter debitum suum hostilitatis, hoc idem vociferando persoluit; in quo mihi quamplurimum complacuit, quia qualis erat, & est apud me, inimicum meum se palam declarauit. Quod tanto molestè fero, quanto ipse prodijt ex Vassallis meis, quorum meritis prateritis ex hoc, & alijs operibus suis reddidit se indignum perpetuum. Vnde super hoc quòd in praesentia vestra clamigarat se ex parentibus magnis (quorum aliqui defuncti sunt in parentum meorum obsequio) traxisse originem, fateor, verum esse hoc quod dicit, quia ex bonis, & fidelibus parentibus ortus est, qui tam erga me, quàm inclytos progenitores meos, debitum fidelitatis firmiter exhibuerunt: vtinam non fuisset idem aduersarius degener, contra me, & iustitiam meam attentando; quamuis cum diuino, & Dominorum meorum auxilio, non poterunt ipse, & sui prauallere: scio enim remedia mea quibus utar loco, & tempore contra ipsos. In hoc autem quòd allegat magnitudinem parentum, allegat veritatem; sed non credat aliquis me non habere sine comparatione potiores se; habeo enim per

Dei gratiam Vassallos, & subditos insignes in bono numero, Ducali, Marchionali, Principali, Comitali, Baronali, & Banneriali dignitatibus insignitos, ultra valuasores, &c. Tum deinceps; Nunc habetis efficacissimum meae voluntatis indicium in hoc quòd non per procuratorem, sed in propria persona coram authenticis personis appellavi. Miror qualiter, & quomodo V. R. P. tot vicibus permiserunt, & permittunt se à praedicto aduersario, & eius fistulis dulce canentibus sic decipi: sed omnibus consideratis non admiror, quia facies dealbata multos fefellerunt, atque fallunt. Non credebam tamen quòd ad placendum uni Monacho Iustitiam iusti iniuste auferre satagenti, maxime ex actu ordinatissima iustitia, videlicet appellationis, debuissim in persona mei scutiferi, & procuratoris sic offendi, & etiam in sedibus Oratorum meorum praegravari. Non enim sic turbari debuissetis ex appellatione supradicta. Et maxime contra me qui me conscium alicuius offense sacro Concilio, vel alicui ex eius suppositis huc usque illata non sentio. Quinimò ad profectum, & augmentum ipsius Concilij vjs possibilibus, tam erga sanctissimum Dominum nostrum Papam, cuius sanctitatem plus debito, sed Dei Zelo, hac de causa frequenter

Quomodo se
erga Conci-
lium gesserit.

stimulaui, & nimis exasperaui: quàm erga Principes consanguineos, confœderatos, & amicos cum omni feruore laboraui. Nescio tamen unde fuit, quòd supplicatio per me iterata, & reiterata (videlicet pro causa Ecclesie Lausanensis, quæ mea fuit, est, & erit) aliquibus probis auditoribus peritis, & partibus non suspectis committeretur, via, & ordine iuris tractanda, & definienda, nunquam potui obtinere, quod uni Sarraceno non fuit denegandum; nisi quia sic placuit illi bono D. Ludouico, & suis fautoribus satis mihi notis; scio enim, & fateor indubitanter in ipso sacro Concilio plures, & plures adfuisse, & adesse Dominos sapientissimos, iustos, mansuetos, & pios, quibus præmissa attentata tanquam iniqua displicuerunt, & displicent, quos inde culpæ nescirem, nisi ex hoc, quòd alijs partialibus forsan ex metu, vel falsa persuasione consenserunt. Hæc mira libertate Amedeus; quæ si quis hominis Concilij auram captantis iudicet, næ ego Amedeum captasse non inficiabor. Erat in eo Principe facilis cæterarum rerum contemptus, auctoritatis tamen retinendæ præcipuum studium. Quare sic deinceps in hac se causa gessit, ut cùm statuissent Basileenses, quod quæcunque appellationes à Concilio e-

*Iniquis secū
agi queritur
quæ cum Bar-
batis.*

*Euiſt. vt pro-
uocatio sua*

creuerat : & ipse in rem præsentem veniens insigni pompa medius in confessu Patrum spectatus est ; quo factum est, vt *Concilium à Sigismundo incrementum* In Eugen. 4. *habuisse* Platina verissimè affirmaret. An Albertus eius in Imperio successor ? at Protectorem Concilio dedit Conradum Vuimpergensẽ. An Christianissimus Rex ? At Oratores suos in eo habuit constantes, & Amedei Lugdunensis Antistitis, eiusdem legati, oratione maximè permoti sunt Patres ad Eugenij abdicationem. An Reges Hispaniarum ? At nulli frequentiores in Concilio Prælati Hispaniensibus : & quamuis Aragonum Rex ad extremum mutata velificatione Eugenio studuerit, nunquam tamen Oratores eius Pannormitanus, & Romanus, vel auctoritatem Concilio deesse, vel articulos de auctoritate Pontificia conditos veritati repugnare contenderunt. An Germaniæ Principes ? At potentissimus inter illos Vulielmus Bauariæ Dux diu protector in Concilio sedit. Et ex eadem familia Albertus, ac Stephanus fratres constantissimè Felicem semper coluerunt : quos imitatus est Albertus alius Austriæ Dux Cæsaris frater : Eugenium

v. sup. num.

76.

verò reliqui Germani, non nisi paucis ante obitum eius diebus Pontificem agnouerunt. Quinam igitur amabo sunt illi Principes, quos Concilio infensos fuisse Blondus prædicat? Credo cum ex Europæis Burgundionem priuatis odijs incensum recensuerit; non alium faciliè numeraturum; Sed habet Blondus cum libet in signis suis Principes, sicut totas videt in Concilio Sabaudienſium Clericorum legiones aliorum numerum æquantes, quas quidem illum sibi obieciſſe crediderim, vt eſſet in quem cæco impetu Andabatarum more pugnaret; ſed eius vanitatem, quæ ſequuntur aperient.

XCII.

Proteſtationẽ
ab Oratorib⁹
Principum
contra Amedeum factam
ſingit Blõdus.

Quibus in rebus adeo contraria ſenſit Philippus Mediolanenſium Dux, vt licet illi gener eſſet, & multa ſibi olim cum Eugenio Pontifice interceſſiſſent odiorum, atque inimicitiarum cauſa, magnam ſuorum partem ab eo conciliabulo reuocarit, paucos verò, qui manſerunt, nedum illis actiõibus intereſſe voluerit, ſed contrà ſimul cum alijs Principum Oratoribus proteſtari curauerit.

Refelluntur,
qui Ducem
Mediolanenſem Amedeo
ſocero ſuo

Ego te Blonde libenter hîc adiuuo, vt Amedeum inuidia liberem quam apud plurimos eo nomine contraxit, quaſi Eugenio Ducis Mediolanenſis

artibus deposito, focerum iste suum suffici per suos maximè obtinuerit: quod si falsum esse contendis, mei quoque testes idem dicent: nullus enim, Æneateste, vel studiosiùs, vel ardentius depositionem Eugenij prorogari institit Archipræsule Mediolanensi, qui protestationi quoque vnà cum alijs Principum Oratoribus accessit, quam Panormitanus Aragonensis Regis sui nomine fecit: sed tantum abest vt hæc protestatio, vel contra Amedeum esset, vel contra eius sententiam, vt oratores eius cum aliorum Principum oratoribus perpetua consensione conspirarent. Quorsum igitur illa protestatio? Habebant in mandatis Principum legati, vt pacem componere Eugenium inter, & Concilium omni via, & ratione tenderent, atque inter se statuerant *nihil se recepturos ex his quæ durante pacis tractatu inter eos incæpto, vel Papa contra Concilium, vel Concilium contra Papam fecisset.* Quare cùm Basileenses in eo essent vt decernerent tres illos articulos, ex quibus (si vt fidei veritates admittebantur, quod sanè neque potuit, neque debuit admitti) necessariò conficiebatur Eugenium hæreticum esse,

ad Pontificatum obtinendum autorem fecerunt, in quibus *Parad. l. 3. histor. Saubaud. cap. 31.* Sequuntur S. Antoninum non satis istarum rerum diligentem.

Videnda responsio Synodalis ad schedulam Francisci de Barbavaria Oratoris Ducis Mediolan. Edita Colou. p. 128. Quam protestandi causam Principum Oratores habuerint. Sylu. lib. 1. de Conc. Basil.

ac proinde Pontificatu lapsum, ita ut nullus deinceps paci locus relinqueretur; Panormitani protestationem sequi, si fortè ita intercedere possent, deliberarunt: Verùm Arelatensis nihil ista moratus, *non passuram* contendebat *Ecclesiam*, ut iudicio Principum res sua, fideique terminetur. Nec enim Spiritum S. Principibus, sed ipsos Principes illi subesse. Quare cùm ex Prælatiis trepidare aliquos cerneret, nonnullòsque se abdere, plurimas Sanctorum Reliquias tota urbe, ait Syluius, perquiri iussit, ac per Sacerdotum manus in sessione portatas absentium Episcoporum locum tenere: quæ res maxime deuotionem adauxit, in tantum ut vocato postmodum de more Spiritu Sancto, nemo lacrymas contineret. Erat namque per totam Ecclesiam tenerrimus, ac suavis fletus bonorum virorum, qui lacryman-tes diuinum auxilium implorabant, quique matri Ecclesie, ut opem ferret, magnū Deum deprecabantur. Inter alios quoque magnificus ille Baro Imperialis Protector, uberrimas Ecclesia lacrymas prestabat, & inter flendum haud modicam tali actu consolationem recipiebat. Quadringentos in subfellijs sedisse ibidem commemorat, qui magna consensione sessionem il-

Ibidem.

Ibidem.

Iam celebrarunt; illique ipsi Prælati, qui in rem præsentem venire non sustinuerant, per suos tamen procuratores adesse voluerunt. Sed nequis Amedeum leuitatis infimulet, quòd cùm minimè ignoraret repugnantibus tum aliorum Principum, tum suis delegatis ea esse in Concilio determinata quæ abdicationem Eugenij inuoluebant, non debuerit postea eandem abdicationem, neque suam consequenter electionem ratam habere, audiendus omnino Syluius, qui sua cum planè narratione absoluit.

XCIII.

Ea, inquit, quæ sequuta est Veneris die vigesima Maij, Oratores Principum præter omnium spem generali congregationi, & actibus Conciliaribus se miscuerunt, eo vel saltem factopræterita sessione præstantes assensum, in qua celebranda si Patres errassent, nequaquam fas erat Oratores Principum cum eisdem Patribus Concilium celebrare: sed existimati sunt remorsu conscientia tacti iam abhorrere quod egerant: quod de Oratoribus Casareis, ac Gallicis nequaquam fuit obscurum. Lubecensis namque Episcopus id sibi absentia causam prestitisse dixit, quoniam iussu Casareo ad pacem

Principum
Oratores protestationem
reuocant, &
Concilio accedunt.
Sylu. lib. 1. de
Conc. Bas.

fuiſſet deſtinatus , ex qua re non decuiſſet eum alicui negotio intereſſe , unde ille perturbaretur , cum quo pax eſſet pertractanda , ſed tamen ſeſſionem præhabitam plurimum commendare , decretumque eadem promulgatum optimum ſe ac ſanctiſſimum credere , veritates quoque in eo contentas apud ſe ſemper indubitatas fuiſſe , eiſque & nunc & uſque ad mortem velle adherere. Turonenſis autem Archiepiſcopus plurimarum literarum , & ornata Prælatuſ eloquentia , pro ſe , ac ſuis collegiſ loquens : Audiſſe ſe inquit , inter aliquos ſibi eſſe detractum , quòd in ſeſſione illa ſanctiſſima Regem ſuum non honoraffent , quem maximè tueri fidem , ac exaltare deceret , qui ideo eſſet præ cæteriſ Regibus nomen ſortitus Chriſtianiſſimum ; habere ſe tamen non illegitimam excuſationem , quando eos qui eſſent ad pacem miſſi , nihil omnino agere conueniret , quò ſuam impedirent legationem. Duo quoque iniuſtitia fore genera , quibus aut fienda non fierent , aut fierent non fienda. Primum quoque non ſemper obligare , quòd oporteret temporis , loci , perſonarumque rationem habere ; ultimum verò ſemper tenere. Neque in eo ſe inciſſe , qui nihil turpitudinis admiſſent : Circa primum tamen poſſe aliquibus videri ſe erraſſe , quòd in veneranda

sessione non affuissent; sed esse quoque hic quod responderent; quia si sessionem illam adfuissent, inutiles postmodum tractatui pacis cum Eugenio se reddidissent: Ideoque licet desiderassent tam sancto negotio interesse, secutos tamen se fuisse exinde exemplum Pauli, qui licet cuperet dissolui, & esse cum Christo, adhuc tamen ut magis prodesset Ecclesie differebat: sicq; se nunc fecisse, quoniam non idcirco abfuissent, quia de conclusionibus dubitarent, quas veras, sanctasque reputarent, & quibus usque ad martyrium adhererent: sed ne tractatui pacis, pro qua venissent, redderentur inepti; se tamen quod suis non fecissent in personis, domesticorum impleuisse, quos omnes honorare sessionem iussissent.

Hæc de protestatione, quam neque Oratores Principum aliorum, neque Mediolanensis in Amedeum edidit, tamen si iidem Oratores eam postea reuocarint: neque vel minimo indicio colligi potest Amedeum circa Eugenij depositionem aliud à cæteris Principibus, nedum Mediolanensi sensisse. Autores certè habeo non contemnendos, qui Mediolanensem Ducem asserunt ingentem Amedeo Felici nuncupato exercitum obtulisse, quo viam sibi in Ita-

*Gobelin. lib.
7. comment.
Pg 2.*

Amedei modestia.

Eugenius bellinimium studiosus.
In Chron. an.
1431.

liam aperiret, Eugeniũque Romã exturbaret: cui tamen Felix dicto audiens esse recusarit, minimè decorum ratus, vt qui pacis artes Princeps semper coluisset, armorum strepitu Pontifex gauderet. Et verò sciebat nihil vsque adedò Principes Eugenio inconciliasse, *quàm quod præter Pontificis dignitatem* (verba sunt Bergomenfis) *minum in modum bella amasset.* His si Blondus attendisset, ingeniosiore penicillo fabulam suam delineasset. Nunc reliqua officinæ eius chromata videamus.

XCIV.

Confertur
Blondi Im-
postura.

Quare cum ad Idoli creationem est ventum, ex quinque orbis nationibus quæ Concilia constituere consueverunt, selecti sunt quibus suffragium ferre concessum est tres, & triginta, quorum duo de viginti ex Ducis Sabaudie dominio fuere; cum tamen cæteros homines sordidos, & maiori ex parte ob admissa apud suos flagitia sedibus proprijs pulsos illius largitione corruptos fuisse constiterit.

Cæca mentendi libido.

Haftenus Blonde nobis compertum erat, te aduersus omnem prudentiam animum emunitum habere; sed mihi nunc videris non pati hanc controuersiam transire sine aliqua stuporis tui nota: cætera enim fraudũ callidus artifex credi

credi poteras, hoc loco præter supinitatem quid accussem vix habeo : nisi fortè vt in præceps datis corporibus nullum sui arbitrium est, ita animus tuus in iram odiúmque proiectus impetum non cohibet, *sed consilium omne* (vt cum Seneca loquar,) *& pœnitentiam, irrenocabilis precipitatio abscidit, & non licet cò non peruenire, quò non ire licuisset*: rapiat te oportet, & ad imum agat tuum pondus, & iam vitiorum natura procliuiis. Amedeo affectatam in rem Ecclesiasticam Tyrannidem, affectu rapiente obieceras : resistere amplius, aut morari calumnia deiecta non poterat; impellenda igitur potiùs, & grauiore mendaciorum pondere vrgenda: quid enim aliud in extrema tua oratione quàm cæca, & sola stupiditate admiranda audiuntur mendacia? nam vt omittam non minùs inuidiosam, quàm vanam obseruationem tuam de quin-

Vana Blondi
obseruatio,

nax, & intenta Blondi præcipitat indignatio, ruinis simillima euadit, quæ super id quod oppressere franguntur: sic ille dum fidem facere tam luculento mendacio nititur, fidem amisit. Est quippe certissimum Sabaudienses alijs excludendis pares non fuisse, & potuisse reliquos Pontificem dicere, quamuis reclamantibus istis, quando ad legitimam electionem dux dumtaxat suffragiorum partes satis essent.

XCV.

Sed ceteri (ait Blondus) erant homines sordidi, proscripti, & largitionibus corrupti, ut ad Sabaudienses accederent. Itane calumniam Blonde perbibisti, & visceribus immiscuisti, ut nullum sine maledicti amarore verbum ex ore acido prodire possit? ergone illustrissimorum, doctissimorumque virorum latus fo-

Fœda in electores de Simoniacalumniæ.

diendum ducebas, ut per illorum vulnera peteres Amedeum? Tibi igitur Antistites, Abbates, Doctores omnes in Concilium ire iussos (quorum aliquos Principum, Regumve familijs insertos fuisse in comperto erat) sectores esse nefarios, gentis suæ propudia, infames simoniacos, sine teste, sine auctore, sine vlllo argumento mentienti posteritatem credituram sperasti? Si

turos profitentes? Mihi sanè memoria repetenti præcipua Purpuratorum Patrum Comitia, in quibus Pontifices olim electi sunt, non aliud occurrit, in quo plura Religionis, Christianæque pietatis vestigia sint relicta, ut in his, vel horum plurimis felicitas potius in cognoscenda veritate adfuisse quàm studium in ea persequenda in illo considerari videatur.

Sed ut electores iuxta ac electum à Blondi criminationibus liberem, dabo testes affectu vacuos, nulla cuiusquam gratia, aut odio motos, qui non modò Amedeum ab ambitu absoluunt, sed eum ad hanc dignitatem capeffendam præter spem, imò inuitum, & reluctantem adductum esse confirmant. Philippus Bergomensis sæpe laudatus id disertis verbis asserit. *Amedeus heremita dudum Sabaudie Dux ad Pontificium inuitus delectus fuit.* Mutius non dissimilia scribit: *Hic igitur (Amedeus) ex heremitica vita ad culmen Pontificium præter omnem expectationem vocatus.*

In eandem sententiam Iacobus Spiegel, Volaterranus, & Munsterus totidem verbis: *Ob abstinentiæ,* aiunt, *clarioris nominis famam inuitus in Concilio Bas-*

XCVI.

Amedeum inuitum ad Pontificium vocatum multi asserunt.

In Chron. an. 1438.

Lib. 28. chron. Germ.

In 5. Austr. Lib. 2. Geogr.

censis vocabatur, è vestigio non adiit? Cur magnam sequentis anni partem in secessu egit, nisi quia ægrè tranquillam quietæ vitæ stationem deserebat, vt infido, & scopulis, tempestatibûsque horrido mari se committeret? Sciebat vir sapientissimus, adeò iniquis rerum æstimatoribus se vsurum, vt si citra exitum propositi sui subsideret integritas, damnaretur: ita enim natos homines vt apud plerosque vel gloriam virtutis interciperet fortuita felicitas, vel infelix virtus amitteret gloriæ titulum. Accedebat arcta illa quasi Religiosæ vitæ necessitudo, quæ illi cû suis Comilitonibus intercedebat, è quorum diuelli complexu non ferebat. Illud quoque metuebat sagacissimus Princeps, ne suus ille ordo, cuius tanto molimine fundamenta iecerat, nondum satis firmata compage per absentiam suam solueretur: Quæ cogitatio tanto acriùs eum mordebat, quanto impensiùs suis inuentis velut proprio fœtui homines indulgent. Prima igitur post initum Pontificatum cura fuit, vt sacræ militiæ de Magistro prospiceret, qui eam iuxta leges à se conditas temperaret. Fuit is Claudius de Saxo, vt

ex Bulla super ea re edita est manifestum, quam hoc loco inferere placet, ut Amedei propositum clariùs innotescat.

XCVIII.

Amedeus Decanum Mauricianis militibus dicit.

FELIX EPISCOPVS Seraus servorum Dei, Ad futuram rei memoriam. Dandum cum inter presentis seculi fluxus, & rerum mundanarum varietates, curis adeò implicaremur innumeris, ut plasmatori omnium Domino pro bonis largituè receptis ad debitas laudes, & gratias (provi corde gessimus, & animo) assurgere sapiùs non valeremus, cerneremùsque dies nostros continuo transire, & properare ad exitum. Nos almiferi Spiritus Sancti gratia commoniti ad hoc, ut quietiùs, deuotiùsque gratijs, & laudibus predictis vacare valeremus ad locum Ripallie Gebennensis Diœcesis, in quo antea unum Monasterium Canonorum Regularium ordinis S. Augustini ereximus, & fundauimus, nostros dirigentes affectus simul, & incolatus, certas ibidem mansiones solitarias pro nostra, & aliorum sex militum usu & habitatione ad Dei laudem, & gloriam, ac Beati Mauritij honorem erigi, & construi fecimus: ubi primùm redacti cum totidem militibus se nostris votis conformantibus incepimus viuere, atque viximus solitariè sub nuncupatione, &

Mauricianorum militum instituta.

vocabulo Militum Sancti Mauritiij, diuinis officijs, & suauibus contemplationibus sub humilitatis habitu in Ecclesia dicti Monasterij, & aliàs conuenienter, & deuotè intendendo, nobis insuper eisdem militibus Decano constitutis. Cùm autem postmodum sacra generalis Synodus Basileensis in Spiritu Sancto legitimè congregata vniuersalem Ecclesiam representans, Nos illic constitutos licèt immeritos ad Summi Apostolatus apicem, & Sancti Petri Sedem duxisset eligendos: Nos qui ad acceptandum tanti regiminis onus, ad quod nos utique indignos non immeritò censuimus, ex parte Dei omnipotentis, & ipsius Ecclesie repetitis vicibus requisiti, tandem electioni huiusmodi in Christi nomine consensum prabuimus, onúsque Apostolica seruitutis in nos, Domino ex alto propitio, deuotè suscepimus: Cupientes locum prædictum continuò salubriter vigere, nec non ipsos milites, quibus afficimur, ope nostra quantum valeamus, & possumus in suis laudabilibus vita, & proposito conseruare, ac dirigere continuò ad existentiam salutarem, eisq; nostri loco idoneum surrogare Decanum, & ad dilectum filium Clandium de Saxo militem Dominū Rouoria propter suæ nobilitatis, & virtutum merita, clarámque vitam, qua

Amed. electioni suæ reluctatur.

& stabilimenta dudum adhuc per nos in minoribus constitutos in premisis, & circa ea facta, & edita in omnibus, & per omnia pareant, atque obediant, eiusque salubria monita, & mandata suscipiant humiliter, & deuotè curent adimplere. Volumus autem, & presentium serie ordinamus, ut Claudio, vel pro tempore existente Decano militum huiusmodi cedente, vel decedente, dilectus filius noster Nobilis vir Ludouicus, & successores sui Sabaudie Duces pro tempore existentes alium ex militibus predictis, qui tunc erunt magis habilem, & idoneum, de quo ipsis visum fuerit, alijs militibus etiam tunc existentibus predictis modo parili in Decanum perficere, & deputare debeant pleno posse. Nulli ergo omnino hominum liceat hanc paginam nostre constitutionis, deputationis, mandati, voluntatis, ordinationis, & potestatis infringere, vel ei ausu temerario contraire. Si quis autem hoc attemptare presumpserit, indignationem omnipotentis Dei, & Beatorum Petri & Pauli Apostolorum eius se noverit incursum. Nec miretur quis quod Bulla exprimens nomen nostrum non est appensa presentibus. Nam hi qui fuerunt hactenus in Romanos electi Pontifices ante sua consecrationis, & coronationis solemnia in suis bullandis literis,

Patris luminum concedente clementia, à quo dona, bonaque profecta procedunt uniuersa, Sanctissimus D. noster Felix electus Quintus, propria nominatione Amedeus, & iure hereditario Dux Sabaudia, Chablaisij, &c. ad prefate sue Ducalis dignitatis fastigium tenera in sua aetate fuit vocatus, ipsius, & uniuersae suae ditionis, ac Reip. eiusdem Regimen longauis temporibus eam operam dederit, ut in augmentum se se in dies Deo propitio propagauerint, & successiue eorum felicitatem anhelans; Cernens etiam amplas naturae dotes, & plurima virtutum merita, quibus ipse plasmator noster illustrem primogenitum suum D. Ludouicum de Sabaudia Pedemontium Principem iam floridam aetatem attingentem premuniuit, ut opere commodo suam Rempub. ab ipso Deo eidem ad regendum, & protegendum commissam, in posterum cum ad aeterna vocaretur, regeret comprobare: Salutiferas ades quas in honorem S. Mauritij martyris apud Ripalliam miro, & honorabili, decentique modo Religiosè constituit, ingressus est; Eundem D. Ludouicum eius primogenitum, & Locumtenentem Generalem suum constituerit, ipsèque huiusmodi sibi iniuncto munere, paterna insequendo vestigia, Accedente eidem praelatorum, ac procerum,

ter cetera de dignitatibus, principatibus, dominijis, rebúsque & bonis suis, per legata, institutiones, fideicommissa, aliásque vias, & modos legitimos plenius disposuerit, quibus per infra scripta in aliquo derogare non intendit. Hinc est quòd idem præfatus Sanct. D. noster in Christi Vicarium nuper electus, ante aliqualem Sacrorum Ordinum ingressum, ex eius certa scientia, & potestatis plenitudine præfatum Illustrem D. Ludouicum de Sabaudia primogenitum suum, in sui præsentia, atque eius Venerabilis Consilij, cuius ad hoc Tribunal elegit specialiter, propter hoc constitutum recipientem, & ita fieri humiliter supplicantem, à patria potestate, & ipsius nexibus, quibus Romano iure prius subditus existeret, exemit, liberauit, emancipauit, & extra eiusdem Patriam potestatem posuit, ac plenaria reddidit libertati, eundem sui iuris pleno iure efficiens per præsentem. Retentis tamen in sua Patria potestate Illustribus* Amedeo Comite Ver-

* Hic est ille
qui deinceps
Beati nomen
meruit.

cellarum, ac Ludouico, &c. In pretium autem huiusmodi emancipationis, ipse Sanctiss. Dominus noster Electus eidem Illustri D. Ludouico primogenito suo præsentem, & stipulanti dedit, cessit, remisit, & perpetuò tradidit, datque, donat, cedit, & remittit per præsentem titulo pura, perfecta, simplicis,

nus senex iter ingreditur ingenti suorum caterua stipatus (Quatuor millia nobilium virorum in equis adfuisse leguntur) magna omnium populorum quocunque transiret gratulatione exceptus. Basileam 24. Iunij anni quadragesimi post millesimum quadringentesimum tenuit , vbi adeò celebri apparatu , & aduenarum concursu tiaram accepit Pontificiam, vt non aliam augustiorem inaugurationem apud veteres potuerit vir doctissimus Franciscus Modius reperire , quam velut formulam in Pandectis suis triumphalibus exhiberet. Eam sicuti reliqua elegantissimè Syluius expressit in suis ad Ioannem Segouiensem literis quas hîc subijcio.

Q

VENERABILI, ET
doctissimo viro Magistro Ioanni de
Segouia Theologo excellenti, San-
ctissimi Domini Nostri Felicis ad
dietam Bituricensis Oratori.

ÆNEAS SYLVIVS
Senensis Domino suo Ioanni
de Segouia, sacrae Theologiae
Magistro, S. D.

CI.
Solennis co-
ronatio Fe-
licis.

CORONATIONEM Summi
Pontificis vario rumore notam esse
tibi, tuisque collegis arbitror. Quia
tamen varia apud vos conscripta esse opinor,
que inter se non cohereant, dignum ipse
putavi meis literis satisfacere veritati, vo-
bisque ibidem sitientibus harum rerum nar-
rationem efficere veridicam, remque (ut
gesta est) ad unguem referre: atque (ut
breuior sim) iam incipio. Romanorum Pon-
tifices coronari in generalibus Concilijs raro
auditum est; tu tamen & Alexandrum Pi-
sis, & Martinum Constantia coronatum au-
disti; sed precedet huius coronatio tanto illas,

quanto & Felix illos nobilitate anteit. Ita enim iudicium eorum est, qui & illas, & hanc contemplati sunt. Referam igitur ego de hac, sed paucis: non enim ut historicus scribo, sed ut seruus Domini res gestas epistolari genere doceo. Transeo electionem de hoc Principe, autoritate huius Synodi factam, quam alio loco non paucis verbis scripsi: prætereo legationem sibi missam, & consensum per eum præstitum, de quibus tu planè instructus es.

Pergo ad coronationem, quæ nono Kal. Theatri descriptio.
Augusti celebrata est in Ciuitate hac Basileensi. Ipse autem Dominus noster triginta ante diebus, octauo Kalendas Iulij ingressus erat: cuius introitus suum habere tractatum meretur, sed non omnia uno in tempore scribi possunt. Locus est ante cathedralem Ecclesiam late patens, ubi spectacula populo sunt: illic sublimis ianulus constructus est, & super illum altare, excelso in angulo: de super preciosi panni, ne vel pluuia, vel Sol noceret. Prospectus exinde in omnem plateam fuit: huc clerus, & vniuersa nobilitas, ipsæque coronandus Pontifex conscendit. Existimati sunt hominum circiter duo milia tribunal conscendisse. Venerat præcedenti Sabaudienſi
die Ludouicus Sabaudia Dux, ipsius Romani insignis apparatus.
Pontificis generatus: vir comis aspectu, & Ludou. Dux.

Philippus Comes Gebennensis.
Ludouicus Marchio Salutarum.

Quatuor Equitū millia.

Quinquagin-

affatu placidus, consilio, & animo iusto: statura illi mediocris, & oculi praelbi. Cum ipso autem Summo Pontifice alter generatus profectus erat Philippus Comes Gebennensis, summa virtute, & honesto corpore, honestisque moribus adolescens: sociusque illi Ludouicus Marchio Salutarum fuit, quo in homine nescias formam, vel eloquentiam magis admirare. Magna præterea tam Ducem ipsum quàm etiam Summum Pontificem tota Sabaudia sequuta nobilitas erat, sui Principis visura coronationem: contenderantque ita (ut fit) singuli spectabiliores venire. Itaque fuit magnus virorum, magnusque equorum apparatus, quorum numerus ad quatuor millia dijudicatus est. Ex Alemania Marchio de Roetelin iuuenili ætate decorus, flauos vento crines fatigans. Conradus de Vuinsperg Romani Imperij hereditarius Camerarius, annis, & sensu senex. Comes de Tierstein cui nemo forma comparandus iuueni viroque fuit, nec adhuc senem senex aequalem habet. Oratores Argentinensis, Bernensis, Friburgensis, Solodorensisque: omnis circumuicina nobilitas confluit. Tantæque forensis populi multitudo concurrat, ut nulla capi platea posset; ac si iocari licet, quicquid vini erat sit bibitum. Capita hominum ad quinquaginta

*millia credita sunt. Ciuitas verò mille robustos iuuenes in armis habuit, ne quid tumulti, ne quid rixarum fieret prohibitu-
ros: aciem non minùs timendam quàm admirandam: horum alij tribunal, alij palatium obse-
ruare; tecta omnia domorum fenestrasque & arbores viri, fœminæque obsederant. Platea verò sic populo plena fuit, ut nec sinapis grano dedisset locum.*

ta millia ho-
minum con-
fluunt.

CII.

*Quibus omnibus expectantibus, aduenit in ipso diei ortu Felix electus, veneranda canicie, decorus aspectu, & facie tota prudentiam præferens singularem. Statura hominis (ut filiorum) communis, forma e-
gregia, quantum seni datur, pilus albus, cutisque, sermo paucus, & morosus. Ante ipsum Prælati infulati, & clerus urbanus cum reliquis introierant. Locatus ille in præemi-
nenti sede est: ceterisque confidentibus, & factò ubique silentio, ceremonie inchoatae sunt: qua re sic peritum se Felix ostendit, ut nihilo monitoris eguerit. Putassetque nemo patrem illum secularibus negotijs quadra-
ginta, aut eo plùs annis versatum, tantum unquam ocù potuisse habere, ut ritum Eccle-
sia sic imbiberet. Castigabat itaque ipse per se aliorum errata, nec aliquid vel minimum extra ordinem fieri ferebat. Celebrauitque Missam suam, & cantando, & legendo, plus-*

Felix proce-
dit.

Celebrat.

Ministrant
filij.

quam dici posset solenniter, nihil omittens, nihil peruertens. Mira res omnibus, & spectaculo digna videbatur; Patrem illic grandæum celebrare, illic prolem insignem celebranti seruire. Quasi enim nouella oliuarum circum altare duo nati officiosè, attentèque, quantum laicis permittitur ministrabant; meritòque dici hunc Felicem omnes aiebant, qui post exactam laudabiliter in seculo vitam, post administratam feliciter Ducatum, generosamque sobolem educatam, ad regimen vniuersalis Ecclesiæ accersitus à Deo esset. Vidisses plurimos præ letitia lacrymantes, benedicentèsque Dominum qui ad tantum spectaculum viuere eos permisisset, qui rem suis oculis intuerentur, antea nec visam, nec auditam ulli.

Tiara insignitur.

Vt igitur finita Missa est, Summusque ipse Pontifex consecratus, sacer Tiaras triplici corona insignis, compluribus gemmis prælucidus allatus est. Spectantèque vniuersa multitudine, & animam comprimente, Ludouicus Cardinalis (cui id officij quod Hostiensis Episcopo debetur, Synodus commiserat) quasi fructum suorum laborum iam colligens, coronam ipsam excellentis precij (quamplurimi ad triginta millia aureorum censuerunt) felici capiti Felicis imposuit; moxque per vniuersos acclamatum est, ut

Tiara prætiū.

vita Papæ esset, postmodumque plenaria indulgentia, quas nunquam antea populus ille habuerat, concessa sunt. Completisque Processionis coronationis solennibus ex tribunali in pro- ordo.
*cessionem est itum, omnesque in equis per ordinem progressi sunt, qui huiusmodi est habitus: Primi omnium laici & vulgaris turba famulantium. Secundo nobilium distincta familia. Tercio nobiles ipsi & milites. Quarto loco Barones, Comites, & Marchiones. Quinto, Dux ipse consilio suorum comitatus, aureis vestibibus in terram demissis. Inter eos ut potuit, expompare nixus est quilibet. Hic qui ostro, & auro tecti: hic saga militum gemmis, & argento onusta: hic tuba tibicinésque, & mimorum cohors præludens: varia vestes, varia ornamenta, ut nulli sat vidisse sit visum. Post hos urbanus clerus in pedes Reliquias Sanctorum vectitans, & puerorum cantantium candidus ordo. His succedebat umbraculum rubei croceique coloris, & apud illud scutiferi, quos honoris vocant, locati erant, rubeos gestantes pileos. Iuxta hos fuissent præfecti navales, si qui adfuissent, sed loco illorum heremita Ripallia, quos milites Sancti Mauritij vocitant, suffecti sunt; viri graues, & Equites Mauriciani.
 duo pramaturi, qui Felicis Papæ & seculi, & religionis fuerant comites, & qualis ha-*

bitus illius antea fuisset, in suis habitibus pramonstrabant, plurimùmque reuerentia videbantur mereri. Illinc Prioribus quibusdam pluuialia sine mitra gerentibus locus fuit. Mox succedere Scriniarij & Aduocati pluuialia ex transuerso gestitantes, habitum cantui quem habuerunt valde conformem. Idem gestamen debitum his qui sequebantur Iudicibus, quod minimè obseruatum est in curiâ Promotorum: habuerunt autem cappas, & pileos tanquam Prelati. Hos sequuti sunt Abbates, & inde Episcopi ornati pluuialibus, infulatique equis insidentes phaleratis. Hoc in ordine prateriimus duodecim equos, qui ante umbraculum candore niuali, quales Rhesus ad Troiam duxit, rubeo tamen tegimine vestiti collo tenus procedebant. Secundum Episcopos Saluatoris nostri Domini Iesu inter magna luminaria corpus deferebatur. Cuius conducendi cura Ioanni Episcopo Argenti Theologo non minùs utilis, quàm laudata doctrinæ, tanquam Sacristæ commissa erat. Sequenti in ordine duo Cardinales, duoque Episcopi Dertusensis, Vicensisque, qui Diaconorum Cardinalium tenebant locum. Vltimo in loco summus ipse Pastor aureo tectus papilione triplicem gestans coronam, populoque benedicens, vnus omnium oculis desideratus, in-

cessu maturo procedebat, Marchione de Rotelim, & Conrado de Vuinsberg equum eius ductantibus. Post eum Thesaurarius, clericique camera, & qui pecunias in populum iaciebat, ornatu decenti veniebant. Simul quoque Principum qui aderant Oratores, magnaque & confusa populi multitudo. Sicque per plurimos Civitatis recessus est itum, donec Iudei illum expectantes nova, & fallaci spe ducti, legem Mosaicam obtulerunt, quam ipse laudans, ritum damnauit eorum. Exinde verò in cænobium Prædicatorum ventum est, ubi Fratres cum Priore obuiam procedentes, Papamque ante Altare statuentes clauis cænobiij sibi dederunt. Moxque finito letitia cantico, hora iam post meridiem tertia magis ad quietem, quam ad prandium, quamuis adhuc ieiunus foret, dimissus est Felix.

Ad Dominicanorum Templum adit.

CIII.

Alterâ die illuc ad Missam omnes conuenere, quâ finita, consummatisque nonnullis, quæ restiterant ceremonijs, prælatis omnibus qui interfuere, duo argentei nummi, & unus aureus traditus est: atque exinde tota multitudo ad conuiuium conuocata, ubi nec lex Orchia, nec Fannia, nec Licinia locum habuerit, nullaque alia sumptuaria, quibus, vel pretium eduliorum, vel obsoniorum copia præscribitur. Cœnitatum est,

Visceratione, & publicas Epulas facit.

ut libuit, lautè, sumptuosèque, pransitatum quoque; dubium est enim, prandium an cæna fuerit: horis circiter quatuor, homines plùs mille cænati feruntur. Pincerna Summo Pontifici pulcherrima proles, duo filij fuerunt, Architriclinus Marchio Salatiarum. Ad horam tertiam post meridiem cessatum est. In hora verò quinta, eodem ordine quo itam erat reditum: ductusque Papa ad Virginis templum, quod est Basileæ præcipuum, in Palatium per posticum ad quietem redijt. Hac de coronatione Domini nostri Sanctissimi Felicis Quinti volui ut scires: tu nunc quibusvis communica, dàque operam, ut Patrem hunc quem tanti facio, quàm primùm repetas, feliciàque de vestra Conuenta nobis reportes. Vale, ex Basilea, Idibus Augusti, Anno Domini millesimo quadringentesimo quadragesimo.

CIV.

*Quàm latè
patuerit Fel-
cis obedien-
tia.*

Quæ autem deinceps à Felice gesta, quantàque integritate cuncta sint administrata scribere animus erat, nisi Geneuenses, meliores nobis tabulas inuidissent, ex quibus, sicut hætenus fecimus, temporum illorum memoriam fideliter hauriremus. Nam cùm diu in ea vrbe (cuius etiam post abdicationem suam Episcopatum retinuit) sedisset, factum inde est ut acta eius

in publicas auctoritates (Registrum vocant) relata , apud eos manerent. Itaque etiamnum hodie in publica illius Civitatis Bibliotheca sex , septémve volumina videre est , quibus epistolæ , bullæ , cæteraque id genus continentur , quæ toto nouennio ab eo sunt profecta. Venio tamen in spem fore ut Geneuenses in animum aliquando inducant hæc Sabaudicæ domus monumenta , nullo suo damno , magna Serenissimi Ducis voluptate , vel gratum munus ei , vel iusto redempta pretio sponte concedere. Interea ut innocentiam Amedei nostri luculentioribus prodam documentis , nonnulla perstringam ex quibus fieri coniectura poterit , quàm multos in obedientia sua haberet ; nam & hoc ad conscientiam eius pertinet , quam tanto securiorem ducere poterat , quo plures , religiosioresque Prælatos secum sentire agnosceret. Qui vel odio vel incuria veri scripsere , Heluetios dumtaxat , & Sabaudos ab Felice stetisse ; reliqui maiorem Europæ partem in obedientiam eius transisse narrant. Sabellicus sanè (quanquam Eugenio Veneto amicior) ita scribit. *Fauere nouo Pontifi-* *Enn. lib. 3.*

Registorum
eius libros
Geneuenses
habent.

Lib. de schif.
cap. 14.

ci (Felici) Carolus Gallia, & Alfonsus Aragonia Reges, Philippus Vicecomes, & Fridericus Imperator. Amedeo, inquit Ioannes Marius Belga, Pontifici creato Imperator Fridericus tertius pater Maximiliani Imperatoris, Carolus septimus, Alphonsus Rex Aragonia, Philippus Maria Dux Mediolanensis adhaerunt. At Dux Burgundiae quantumvis inter ipsos esset affinitas, ei ut dicunt contrarius fuit, quod Amatus ipsum in bello, quod ante aliquot annos contra Ducem Borbonium mouerat, deseruisset. At fertur Burgundum pace cum Borbonio facta tunc Duci Sabaudiae significasse, se quodam tempore huius futurum memorem, idque usque ad tempus Concilij Basileensis fecit. Nec dubitandum cum eius autoritas, ac existimatio tunc permagna esset, quin facile Felici nocere potuerit. De eadem re sic Christophorus Hartmannus: Felicis electionem probarunt, obedientiamque promiserunt Albertus Dux Austriae Caesaris frater, Albertus, & Stephanus Duces Bauaria, Magnus Magister Borussia, Elizabetha Alberti Caesaris vidua cum suis Bohemia, & Vngaria Regnis, Sabaudia, magna pars Insubria, Heluetia: Adhaerunt etiam Concilio Rex Franciae, & Dux Burgundiae, &c. Mihi non nisi

In Annal. He-
remi B. Virg.
ann. 1440.

certa scribere meditati illud succurrit, vt ex ijs quæ per eam in diuersis Prouincijs gesta sunt, in cognitionem veniamus eorum qui eius se Regimini permittebant.

Cùm igitur cætera omnia singulari prudentia, & castissima integritate moderaretur, tum in Prælati Ecclesiæ legendis diligentiam adhibebat summam: Purpuram Ecclesiasticam Christi sanguine tinctam sanguini suo (licet plures ex filio Ludouico nepotes haberet) numquam immiscuit: sed eam virtutis præmium, non necessitudinis pignus esse voluit. Episcopos celeberrimarum Ecclesiarum ad eam dignitatem euexit, Argentinensem in Germania, Nouariensem in Longobardia, Lausanensem in Antuatibus, in Hollandia Traiectensem, in Germaniæ Italiaeque finibus Tridentinum, Dertunensem in Hispania, Vicensem in Lusitania, in Frisia Frisingensem, in Sicilia Panormitanum, in Polonia Gnesensem. E Gallia plures ostro donati, Parisiensis, Lugdunensis, Turonensis, Nannetensis, Castrensis, Aquensis. Nec Sabaudiam suam frustrari hoc honore sustinuit, assumptis ex ea Tarëta-

CV.

Cardinales de diuersis prouincijs creat.

Nullum tamen ex consanguineis.

Ex Onufrio, & Ciacconio.

siensi, Geneuensi, & Maurianensi. Verum qui erga familiæ suæ Principes inexorabilis fuit, aliarum virtutem facile cohonestauit. Nam Alexander Ducis Moscouiæ filius, Tridentinorum Antistes, Ioannes Frisingiorum, Bauarici, Ioannes Nannetensium Regij apud Britannos sanguinis, in eorum numero sunt quos Cardinales ab eo dictos recensuimus. His ego Bartholomæum Vitelescum, virum non minùs ea tempestate sanctimonix fama quàm maiorum nobilitate, & rebus præclarè gestis celeberrimum accenseo, quamuis renitente Ciacono, qui delatum quidem ipsi à Felice, sed recusatum honorem illum narrat. Ego verò contrà contendendo sanctissimum virum Felici acquiescuisse, suamque operam in grauissimis Ecclesiæ negotijs commodasse. Extant pleraque acta eius Iudicialia, & in his sententia ab eo lata in causa Ludouici Episcopi Taurinensis, & Abbatis de Ripallia, cuius sententiæ principium sic habet: *Nos Bartholomæus Tit. S. Marci miseratione diuina Presbyter Cardinalis, Cornetanus vulgariter nuncupatus.*

Integra acta communicauit mecum Ill. ac Reu. Arch. Taurinensis Philibertus Millietus.

C V I.

Gallia tota illū veneratur.

Eius igitur latissimè patuisse auctoritatem necesse est, ad quem è tam diuersis

Regionibus Principes viri, ac Prælati
 adirēt eius dictis audientes futuri. Cer-
 tē Galliam vniuersam ei obsequentem
 fuisse non modò ex Metropolitano-
 rum, & Primatis ipsius consensu intel-
 ligimus, sed ex ipsius Regis Caroli fa-
 ctis; eius enim precibus adductus est
 Felix, vt quos dixi è Francorum nume-
 ro in Senatum suum adlegeret, eum-
 que ipsum qui Carolo erat à confessio-
 nibus Ioannem Nannetensem eodem
 honore prosequeretur. In Germania, Et Bauaria.
 tametsi multos haberet in partibus, at-
 que in primis Potentissimos Bauariæ
 Duces Albertum, & Stephanum (Sa-
 baudis semper mira consensione deuin-
 cti fuere Bauari) & ipsius Cæsaris fra- Et Austria.
 trem Albertum, conuenerat tamen
 inter Electores, vt medijs starent, & ter-
 tiam quodammodo factionem compo-
 nerent, quam neutralitatem dixere:
 Cùm tamen ad suas quas vocant die-
 tas ter coissent, *Pauci sunt inuenti, in-* Lib. 28. chron.
quit Mutius, qui non consentirent Conci- Germ.
lio Basileensi contra Eugenium. Sed erant Germani cæ-
 in illis, qui iactarent vtilia opera volun- teri Neutra-
 tate inchoari, occasione perfici: ser-
 uendum itaque tempori, & dum in
 arcto essent Eugenij res, redimenda

Adhæſionem
cum Eugenio
fœdè pacifi-
cantur.

Cap. 42. lib.
de Europa.

Hiſtor. Huſſ.
lib. 9.

Lib. de Mori-
bus Germanor.

eſſe priuilegia quæ aliâs haud facilè pa-
rarentur. Inſtare igitur illi, vrgerè, &
diſceſſionem ab eo palam minari ni po-
ſtulatîs annueret. Trepidare Eugenius,
adcoque conſternari, vt paucis ante-
quam è viuis excederet menſibus mul-
ta illis indulſerit, quæ laxiorem in Ger-
mania deinceps fecere diſciplinam Ec-
cleſiaſticam. Id ſcilicet Syluius è lega-
tis vnus alio colore diſſimulare voluit,
his verbis. *Cum ſex Principes Electores in
eam ſententiam fœdus inſiſſent, vt niſi Eu-
genius poſtulatîs eorum annueret, (poſtula-
bant autem res prorsus negandas) in Ame-
dei quem Felicem Quintum appellabant,
obedientiam tranſirent, illorum Conſilia
Federicus peruerſit, &c.* Sed Doct̃or Co-
cleus rem vt erat fideliter narrauit. Ro-
ma, ait, Eugenius Papa ab Oratoribus Ger-
manorum perſuaſus, & exoratus ad tollen-
dam inclite nationis neutralitatem, longam
Concordiæ Bullam edidit, in qua ſanè pacis
gratia multa Germaniis diſpenſatione indul-
ſit, admiſit, approbanit, & ratificauit,
quæ tempore ſchiſmatis facta, citra, &
contra Sedis Apoſtolice autoritatem per ſe ſe
inualida erant. Senſit Pius hæc vera eſſe,
quare alio loco ſatis habuit dicere: *Eu-
genio in lecto agritudinis conſtituto nos,*
inquit,

inquit, *ad eum venimus ab Imperatore Friderico transmissi, & nationis Germanicæ nomine neutralitatem abdicauimus, obtentisque nonnullis literis (erubuit scilicet plura diuulgare) quibus desiderio Germanorum fieret satis, obedientiam Romano Pontifici restituiamus.*

CVII.

Fridericus
Imperator
in eum incli-
nat.

Sed quoniam Friderici Imperatoris meminimus, cui se parti addixerit interest referre. Sabellicus, & Ioannes Marius Belga Felici illum inscribere, non nemo alius Eugenio; ego veriùs dixerim fecisse illum quod plerique omnes idæui Principes, vt nunc se Felicianos, nunc Eugenianos prædicarent, vt se nunc hîc, nunc illic varia aperiebant commoda. *Mira rerum mutatio* (aiebat per hæc tempora Syluius) *qui antè fauebant Concilio, iam impugnant, & qui impugnabant, modò fauent. Lusus iam Ecclesia est, qualem de pila fieri videmus, dum huc, atque illuc impellitur lusorum ietibus percussa: sed aspicit ex alto Deus, &c.* Eadem cum Cardinali Arelatensi expostulabat, cùm ita ad eum scriberet anno 1443. *Post hac, inquit, significabas recessum illorum Cardinalium ex Basilea, quos abijisse inuitos asseruisti. Cupiebásque vt omnia Maiestati Regia re-*

Principum
inconstantia.
Epist. 10.

Epist. 183.

serarem: sed iam omnia ex Italia erant sibi nota; nec latet Regem nostrum plerosque Principes esse qui magis sua quarunt, quam qua Iesu Christi. tum subdit: Scripsit nuper Serenitas Cæsarea sacro Concilio in favorem Henrici viri optimi, & literati (is erat Cancellarij Cæsarei frater) ut eum Frisingensi Ecclesie præsiceret Episcopum. Æstimavi tantum Principem exauditum iri; præter opinionem accidit ut preces eius reiectæ fuerint. Interim electus est per capitulum siue iure, siue iniuria Cardinalis Sancti Martini. Is recursum ad vos habebit confirmationis causa. Rursus scripsit Cæsareum culmen ut supersedere velitis, &c. Urget maximè tota epistola, ut Cæsari gratificetur. Obsecro, si Fridericus Felicem damnabat, cur Concilium legitimum habebat, ab eoque postulabat Episcopi confirmationem? Certè si verum amamus, Cæsari Pontifex erat ille futurus, qui maiori præmio inuitasset. Fridericum, ait Bergomenis, ut tenacem omnes accusabant, & ad promissa minùs attentum: percrebuerat autem latè rumor ingentem esse apud Felicem pecuniarum vim, quam illi per tot annos pacificè regnanti succreuisse putabant: huic igitur Fridericus inhiabat: cogitanti

*In chron. an.
1441.*

verò qua via eam corraderet, succurrit, Amedeo filiam esse quam ducere posset, si dotem illi Pater grandem diceret: eius rei causa Basileam iter flexit; cum Felice in arcano locutus est, spe iniecta ut si inter eos de nuptijs conueniret, palam se ipsi adiungeret: sed ubi sensit Amedeus non tam necessitudinem suam, quàm opes quæri, quamquam alia suadentibus Patrum plurimis, negotium elusit, cupiditati Cæsareæ imparem se professus. Cæsar spes suas frustratas grauitertulit, sed ut erat tegendis consilijs artifex optimus, Felici corruptelæ meditatæ famam inussit, ut auiditatis suæ infamiam tegeret; quæ omnia deinceps mirificè auxit Syluij (qui deserto Felice Cæsari factus erat ab epistolis) ingeniosa dicacitas: sed ego Nauclero potiùs accedo, qui neutri vel infensus, vel obnoxius, nulla neque assentandi, neque detrahendi libidine, ab oculato teste, quæ de hac re accepisset ingenuè tradit: *Audi me ego, inquit, à quodam Pralato, qui Concilio interfuit, renuisse Felicem dotis tantum dare, licet Concilium omnino suaserit dandum.* Hacigitur statione deserta Cæsar quò se benignior ventus intendebat, vela

Fridericus
Felicis opibus
imminet.
Gener eius
fieri tentat.

Eluditur à
Felice.

Vol. 2. Gener.
48.

conuertit, & reapse verum esse demon-
strauit, quod Iulianus Cardinalis apud

CVIII. Gobelinum differebat.

Felici opes
sua damno-
sa.

Apud Gobeli.
l. 7. Comment.
Pg 2.

Nam cum Eugeniiani magnopere sibi
à Felice metuerent, quòd opes inæsti-
mabiles seposuisse crederetur: *Nihil est*
(aiebat Iulianus) *quod tam nobis profit*
quàm pecuniosum aduersarium existimari;
cuncti ab eo aurum petent, neque impe-
trantes, inimici abibunt. Nec vana (subdit
Gobelinus) *Iuliani opinio fuit. Carolus*
Francia Rex cum aureorum triginta millia
petiuisset, neque impetrasset, Engenium ei
praposuit. Idem fecit Dux Mediolani qui
centum millibus aureis, & Bononiam ven-
dere, & Nicolaum Picininum cum nouem
millibus equitum in eius exercitum frustra
tentasset ascribere. Solebat Amedeus dicere,
cum aurum ab eo peteretur, pulcherrimam si-
bi sobolem esse, nolle se filios inopes relin-
quere. Certè si largitionibus aditum si-
bi ad supremam dignitatem emuniuis-
set, ijsdem artibus quibus parauisset re-
tinere studuisset: idque vel maximè
Felicis laudibus accrescit, quòd suis
opibus tueri noller oblatum sibi Ponti-
ficatum, quem alienis Eugenius iure
sibi debitum conseruare non dubita-
ret. Certè sciebat Felix non alijs addu-

Eugenio Ca-
rolus nun-
quam adhæ-
sit, nec Feli-
cem, vt vult
Gobel. de-
seruit.
Mediolanen-
sis insidiatur
opibus Ame-
dei.

Etum suasionibus Alphonsum Aragonum Regem ut Eugenio aggregaretur, quàm his legibus, *ut Eugenius Renato* (non sine magno Gallici nominis decore) *abdicato Alphōsum Regem Neapolitanū decerneret, appellaretque; Ferdinando Regis filio* (licet notho) cui Rex post mortem Regnum destinauerat, potestatem succedendi faceret, Terracinamque Regno adijceret. *Alphonsus contra Eugenij auctoritati se subijceret; nec patiatur tres ex suis qui Cardinales sub Amedeo Sabaudienſi creati fuerant, reuertentes pro Cardinalibus suscipi haberēve.*

Alphonsus Aragonum Eugenio magna mercede accedit. *Æn. Sylu. lib. de Eur. c. 65.*

CIX.

Interea dum pro se Principum quisque, opes, potentiam, securitatem infauſta ut plurimum nundinatione emercatur, Eugenius ad plures vocatur, anno sæculi eius post quadragesimum septimo, quo cum odia quibus orbis exarſerat expirarunt. Vir fuit ingentis, excelsiq; animi, dubio (si principia Pontificatus spectes) vitiorum, virtutumque temperamento; & præualuisse illa videbantur, nisi primi Regiminis mala, vltimi virtutes oblitterassent: nunquam fortasse Imperio dignus, nisi imperare prohibitus eſſet. In eius locum Romæ ſuſſectus eſt bonarum ar-

Eugenij obitus, pacis initium.

Felix ad pri-
stinum seces-
sum respectat.

tium instaurator, literarumque Pater
Nicolaus V. mitissimi vir ingenij, qui
pacis, quàm belli artibus inclarescere
optabat. Id ubi Amedeo auditum,
sensit se propitio numine diutius in eo
gradu stare non posse, in quem non
sponte conscenderat: & instabat vlti-
ma senectus, quam improbis conatibus
in nouas spes disponere, hominis vide-
ri poterat in funeris sui pompam labo-
rantis: iterum igitur portum respectare,
sanctum otium reuoluere, consilia o-
disse, quæ quietem excusserant, in v-
na secessus amantissimi cogitatione
conquiescere, eius oblectatione inci-
tari ad dulcissimum votum, tantoque
proniùs ista sibi persuadere, diu iam in
hoc consilium imminente affectu.
Hæc quanquam inaugurato Nicolao
statim agitauit, quia tamen infirmitatis
humanæ natura tardiora sunt remedia
quàm mala, in alterum atque alterum
annum processere. Nec Liberis ingrata
erat Patris deliberatio, in tepeſcente ſci-
licet gloriæ æſtu, quem prima accen-
derat species Pontificatus, & ſucce-
ſcentibus in dies incommodis, quæ ni-
mius initio ardor ſuppreſſerat. Sed ni-
hil æquè vrebatur animum quàm cum

Consilium
probant Li-
beri.

parentem suum audiebant vltimis apud maleuolos (& erat ingens numerus postquam Principum deferbuerat gratia) probris differri : nunquam hactenus laceffitam familiæ suæ famam, vel næuo, vel næui opinione, apud posteros sordidandam, nisi dum recens macula est elueretur. Sed nihil temerè in tam arduo negotio statuendum, magnis consilijs adita Christianæ Reip. Procuratio, maioribus descendenda : prouidendum in primis ne non tam recessisse, quàm deiectus esse videatur; non minorem spontaneæ abdicationis, quàm inuitæ assensionis gloriam fore. Hæc dum secreti Pater Filiusque agitant, placuit Caroli Francorum Regis interuentu præcipuo cuncta componi, adhibitis aliorum etiam Principum Ministris: sic potentissimum Regem, Ecclesiæq; pacificandæ studiosissimum demeritum iri, & dignitati consultum, dum eius, cæterorumque Regum precibus datū erit, quod nulla vi extorqueri possit. Procliuem ad ista viam esse, quando Christianissimus Rex per literas sæpe Felicem de concilianda pace interpellarit, Ludouicóque Duci autor fuerit vt patrem ad eam flecteret.

De exequendo deliberant.

CX.

Ludouicus
Regem Fran-
corum adit.

His in arcano imbutus consilijs Ludouicus Dux, profectiōem in Bituriges adornat, vbi Rex per eos dies concederat. Opporunus venisse omnibus creditus est; Carolo in primis, qui mentem continuò fatigabat qua via Pacem Ecclesiæ sinceram redderet. At vbi Ludouici animum non tractabilem modò, sed penè vota sua anteuertentem vidit, exultare scilicet ille magnificè, & rem propè confectam habere. Multus igitur illis per eos dies sermo, Delfino in consiliorum arbitrium aduocato: & quia Nicolaum venerari certum erat; eos enim, qui sibi assidebant, & maximè Cardinalem Arelatensem, sensim ad suum sensum adduxerat Amedeus; id tantum agebatur quàm integra Felicis fama esset exequendum. Colloquio super ea re habendo Lugdunum deligirur: eò legati Francorum, Siciliæ, Angliæque Regum, Treuirenensis Antistes, atque oratores Coloniensis Præsulis, & Saxoniz Ducis (cui hæc vnio maximè cordi erat, credo ob antiquas familiæ suæ cum Sabaudienſi necessitudines) conuenerunt. Affuit quoque à Felice missus Cardinalis Arelatensis, vnà cum Moniouensi Præpo-

Colloquium
super ea re
Lugduni ha-
betur.
Meminit Genab.
40. 1449.

sito; nec minore zelo ille Nicolao accessit, quàm ab Eugenio discesserat: Amedei tamen honori tanto impensius studendum affirmabat, quanto caritatis in Ecclesiam suæ illustrius documentum parabat. Consuli ante omnia Pontificem placuit, ut de eius in Felicem animo certiores facti, felicius omnia componerent. At dissidia extinguere propè ambiciosius votis optabat Nicolaus; sic igitur ille rescripsit.

CXI.

Nicolaus, &c. Regis Pacifici, in cuius Nicolai Papæ decretum in fauorem Felicis.
ortu Angeli in terra bonæ voluntatis hominibus pacem pronunciauerunt, & in cuius manu est orbis terra, & plenitudo eius, vices licet immeriti gerentes in terris, summo desiderio, & cordis affectione operam damus quantum nobis ex alto conceditur, ut pacem optatam Ecclesiæ & animarum Christi fidelium, quorum cura nobis cælitus est commissæ, salutem per Dei ineffabilem misericordiam, Catholicorum Principum interueniente opera consequamur. Sanè enim post turbulentas tempestates, quibus hætenus temporum culpa Ecclesiæ Dei quassata est, per opus, & diligentiam Oratorum carissimorum in Christo filiorum nostrorum Franciæ, & Angliæ Regum Illustrium, qui prout Catholicos Principes decet unitatem ipsius Ec-

*clesiæ summo studio procurarunt, speremus
 in Domino per concessionem, & renuncia-
 tionem Amedei olim Sabaudia Ducis, Pa-
 cem, & unitatem ipsius Ecclesiæ futuram, &
 omnes Christi fideles unum Pastorem, & u-
 num ovile recognituros. Nos si, & postquam
 ipse Amedeus, omni iuri, quod in Papatu
 se habere pretendit, omnibus eius insignibus
 depositis plenè, & legitimè renunciaverit, &
 cesserit, ac nos Christi verum Vicarium reco-
 gnoverit, prefatum Amedeum autoritate
 Apostolica de fratrum nostrorum S. Roma-
 na Ecclesiæ Cardinalium consilio assumimus
 in Episcopum Sabinensem S. R. E. Cardi-
 nalem, ac eum Collegio Cardinalium aggre-
 gamus, & ex nunc talem haberi, & reputa-
 ri volumus, & censemus; nec non priorem
 titulum, & locum digniorem inter Cardina-
 les ex nunc ei damus, & dandum fore de-
 cernimus per presentes, ei que ex tunc pileum
 aliâque Cardinalatus insignia damus, &
 concedimus, ita ut illis quemadmodum cate-
 ri Cardinales uti liberè & licitè possit, &c.
 Reliqua pertinent ad annuos redditus,
 & beneficia ecclesiastica quibus eum
 gaudere volebat.*

CXII.

Nouo decre-
 to iterum Fe-
 licis famæ
 consultitur.

Non fiebat Amedeo satis hoc rescri-
 pto, neque paci satis consulebatur:
 quid enim fieret illis omnibus, qui in

eius partes abierant? quid ijs, qui ab eo beneficia, aliáque priuilegia impetrarant? eóſne ad extremum defereret, qui extrema omnia pro eo pati decreuerant? Quæ priuatim ad ipſum pertinerent, impetrari haud ægrè ab Amedeo poſſe arbitri norant; ijs verò, quæ ſuorum commodis officerent, inexorabilem non dubitabant: muneris tamen ſui eſſe rebantur, vt de eius potiſſimùm dignitate ſolliciti eſſent, qui vt in comune conſuleret ſui propè obliuiſcebatur. Soluta itaque Conuentu Lugdunenſi viſum eſt Legatis præſentem adire Felicem, Geneuæ vt plurimùm per ea tempora commorantem; ſed illi dum ſe accingunt quid interea Romæ fieret audiamus: Eodem tempore miſſi ab iſſdem Principibus ad Nicolaum Oratores alio mitiori reſcripto ab eo impetrato Felicem deliniendum putarunt; Nam cùm nihil eum vehementiùs vexaret, quàm famoſis libellis lacerata fama, & Pontificio fulmine deuotum ſuum, ſociorúmque nomen; inducenda erat maledictorum memoria, & deuotiones non tam exolucendæ, quàm irritas fuiſſe, vanáſque declarandum, quod concepta formula fecit Nicolaus,

Bulla Nicolai
qua irrita esse
iubet quæcū-
que in Ame-
deum dicta,
facta, scripta-
ve sunt.

Tanto nos, inquit Pontifex, pacem, & tranquillitatem cunctorum fidelium procurare conuenit, quanto desideramus fructus uberrimos inde sequi; In eo quippe cor nostrum suauissimè delectatur, quod diebus nostris sanctam Dei Ecclesiam in pacis, ac unionis pulchritudine & debita integritate florentem videre valeamus. Cum itaque superioribus temporibus propter diuisiones subortas inter felicitis recordationis Eugenium Papam Quartum predecessorem nostrum, & tunc Basileense Concilium, plurimum turbata, ac varijs modis afflictæ fuerit Ecclesia Dei; iam autem diuina fauente, ac dirigente clementia tractatu Oratorum carissimorum in Christo filiorum Francorum, Angliæ, ac Renati Sicilia Regum, nec non Delfini Viennensis Primogeniti Francorum Regis Illustris, integra pacis, ac unionis consequendæ dispositio optima videatur, Amedeo in sua obedientia Felice Quinto nominato iuri, quod in Papatu se habere asserit, cedere volenti, eis qui olim Basileæ, nunc autem Lausana sub nomine generalis Concilij permanserunt, & permanent, concurrentibus in id ipsum, aliasque ad pacem Ecclesiæ laborantibus. Cupientibus igitur quantum Omnipotens donauerit id agere, quoad uniuersi fideles ipsius pacis iucunditate fruantes

animorum coniunctione sibi inuicem cohaereant, & reiectis, quae ex discordia exorta fuerant, status uniuscuiusque, honor, fama, & reputatio illasi, & integri remaneant; Literas, Processus, mandata & decreta quaecunque; nec non excommunicationis, suspensionis, & interdicti, Anathematizationisque etiam, priuationis beneficiorum, &c. per praefatum Eugenium praedecessorem nostrum, in quibuscunque literis suis, & quorumcunque tenore, & sub quacunque data existant, etiamsi cum approbatione Ferrariensis, seu Florentini, aut alterius Concilij generalis, siue per nos, aut per alium, siue alios, ipsius, aut nostra, seu quauis alia auctoritate contra dictum Basileense Concilium, & eos, qui sub nomine Generalis Concilij, tam in Basileensi, quàm Lausanenſi Ciuitatibus memoratis fuerant, & perseuerauerant ut praefertur, ac in praesentia perseuerant. Nec non contra praefatum Amedeum Felicem Quintum in sua obedientia nominatum, ac quasuis personas ecclesiasticas seculares, vel regulares, ac etiam laicales eisdem coniunctim, vel diuſim adhaerentes, assistentes, obediētes, obsequentes, recipientes, ac quouis modo fauentes, eosque sequentes, qui sunt, & fuerunt cuiuscunque dignitatis, praeminētia, status, gra-

Imò induci,
& obliterari
penitus man-
dantur.

us, seu conditionis existant, etiamsi Pontificali, Cardinalatus, Regali, aut Ducali dignitate praeſulgeant, &c. Motu proprio, & ex certa ſcientia, ac de Sedis Apoſtolica poteſtatis plenitudine, nec non de venerabilium fratrum noſtrorum S. R. E. Cardinalium conſilio, & aſſenſu decernimus, & declaramus nullum effectum penitus ſortiri; ſed perinde haberi debere, ac ſi nullatenus emanaffent: eaque omnia & ſingula cum inde ſequentiſ in Regiſtris ipſius Eugenij prædeceſſoris, & noſtris, & alijs locis quibuſcunque aboleri, & deleri mandantes omnino tollimus, caſſamus, irritamus, & annullamus, ac pro infectis haberi volumus. Datum Romæ apud S. Petrum, Anno Incarnationis Domini 1448. 15. Kal. Febr. Pontif.

CXIII. ann. 2.

Mora paci
iniecta.

Aſſerta in poſteros aduerſus omnem detrectatorum petulantiam hoc diplomate videbatur Amedei, & partium fama: ſed quoniam eadem in pari occasione nonnullis ſe ſe abdicantibus fuerant conceſſa, non videbatur ſatis tanto Principi conſultum, ſi ad aliorum exemplum traheretur, & in eundem cum hiſ ordinem cogeretur. Conſtans igitur omnium qui hætenus cum coluerant ſententia erat, ipſum à reliquiſ

eximium esse faciendum, & præcipuo aliquo honore venerabilem posteritati tradendum. Æqua postulari legati fatebantur : quare sicut Romæ olim triumphare vetitis, triumphalia tamen permittebantur ; ita Felici Pontificem eiuranti, Pontificalia non tolli haud incommodum videbatur. Sed suspecta Romanis erat vel larua Pontificatus, & meminerant in arena plures esse qui per ipsa feriant ornamenta. Hic scopulus dum superatur, in annum extractum est negotium, & in tempore occurrisse Bolomerio videbatur, ut per hanc moram cuncta disturbaret. Floruerat is Amedei gratia diutissimè, & occulta fideratione sic eum afflauerat, ut in consiliorum consciētiam vocaretur à Principe non audituro quid expediret, sed propè imperata facturo ; adeò nulla est tanta hominis sapientia, quæ non aliquando cæcutiat. Ille quem velut alterum Salomonem, vel æmulis testibus, orbis pars melior adibat, homuncionis genium reuerebatur, qui qua virtute graciosus esset haud facilè dixisses. Is igitur ut latiùs regnaret, abdicationi semper infensus, proiecta ut erat audacia, hoc rerum articulo senem

Bolomerius
abdicationē
dissuadet.

*Parad. & Vanden-
derb. in Amed.,
8. & Gobel. l.*

*7. Comment.
Pij 2.*

superciliosè adortus, illi vilitatem sui, populorum rumores, Principum despicientiam, æmulorum triumphos tantum non exprobrabat. Adeone odiosum esse ipsum sibi, ut inimicis favere sustineret, quibus nihil acceptius esse posset, quàm si dimisso Pontificatu fateretur, vel leuiter à se susceptum, vel ambitiosè quæsitum? Certare scilicet Reges solita in eum inuidia, quam specioso amicitiae nomine adumbrata, ut illi tanquam victimæ pompam adornarent: & ire illum tam sponte ad aram, in qua odijs, & ostentui inimicorū, risuique totius orbis Christiani esset immolandus? Hæc aliâque inuidiosissima oratione exaggerata, tanta tempestate Amedei mentem inundarant, ut periculum esset ne littus propè tenentes in altum reueheret. Sensit Ludouicus Dux à quo vento fœda hæc procella sæuaret. Consulti proceres, vno ore omnes pronuntiabant, fatis vrgentibus Bolomerium extrema hæc ausum, ut impotentis felicitatis aliquando pœnas daret. Quæsitores illi in occulto dati, qui vbi multis ex capitibus reumprehenderunt, in carcerem rapiunt, à carcere damnatum

in

Quæsitores
Bolomerio
dati.

in Lacum Lemanium præcipitem a- Damnatur.
gunt, fluctibus satiandum, qui fluctus
in Republica perpetuos excitarat.

CXIV.

Defunctus hoc periculo Ludouicus Conuentus
instaurando fœderi animum denuò ad- Genevæ ce-
ijcit. Et venerant, vti deliberatum erat, lebratur.

Genevam Regum, Principumque le-
gati frequentes. Francus, Anglus, Sicu-
lus, Delfinus, aliique Prælatos pruden-
tia, & eruditione præceptos destina-
rant : aderat & cum Francis Comes
Dunensis in nominatissimis ea tempe-
state Princeps. Horum se arbitrio to-
tum permisit Amedeus, nec frustra;
eorum quippe industria singulari, &
zelo studiosissimo factum est, vt his le-
gibus cum Nicolao Pontifice conveni-
ret. Nicolaus verus Pontifex esto. A-

Pax firmatur.
Pacis leges.

medeus omne ius ad Pontificatum ei-
rato, & Nicolao obediens esto. Nico-
laus eos honores, qui decreto Lausa-
nensi continentur, Amedeo decernito.
Quæcunque ab eo dum Pontificem
ageret, acta, indulta, concessa sunt,
rata, firmæque esse iubeto. Sed hæc ne
quis temere ficta suspicetur, publicis
de more tabulis firmanda sunt. Sic igi-
tur habet decretum Lausanense.

CXV.

Sacrosancta Lausanensis Synodus in Spi- Honores A-

medeo decre-
ti in Synodo
Laufanensi, &
à Pontifice
probat. *Extat apud
Paradin. &
Vanderb.*

Amedeus de
Ecclesia im-
pèsè meritus.

*ritu Sancto legitimè congregata, Reueren-
dissimo & carissimo filio Amedeo, pridem
Felici Papa Quinto, Salutem, & omnipo-
tentis Dei benedictionem. Tam maximè de
venerabili Ecclesia meritus es, ut præsentes
habeant uberrimam tuarum laudum memo-
riam, futuris quoque tui nominis felix sem-
piternaque recordatio relinquatur. Tu ad
Ecclesia subsidium euocatus, quanta un-
quam fuit persecutione vexata venisti. Tu
illi profusa liberalitate, summa industria,
exacta diligentia, dedita opera opitulatus es.
Tu tandem tranquillam populo Christiano
concordiam reddidisti, pariter & pacem. Le-
guntur quàm multi qui belli, pacisque tem-
pore inseruierunt Ecclesia commemorandis
per omne saeculum obsequijs: sed personæ
causa, rerum, temporisq; disparitas super
eminentiam meritorum coarguunt. Nouis
orbis uniuersus sanguinis tui Regiam clari-
tatem: vidit, & audiuit quàm continuas
solicitudines, indefinensque certamen, pro
autoritate sacrorum generalium Concilio-
rum, & veritate Catholica sustinendis no-
biscum inisti, opulenta quiete abiecta retror-
sum. Nunc autem dum per tua humilitatis
excelsum medium pax in omnes Christianos
diffunditur; quo te namine nisi ZELA-
TOREM CONCORDIÆ,*

Zelator con-
cordiæ, pacis
auctor.

PACISQVE AVCTOREM

appellent? Quas ob res congratulationibus, promeritisque honoribus personam tuam prosequi cupiens hac sacrosancta in Spiritu Sancto congregata Synodus vniuersalem Ecclesiam representans, & inter cetera considerans, qui te ipsum parui facere voluisti, ut pacata, quietaque exaltaretur Ecclesia; Te

Sabinensem Episcopum, Sanctæ Romanæ Ecclesiæ Cardinalem, Sedis Apostolicæ in terris, & iurisdictionibus dilectorum Ecclesiæ filiorum, nobilium virorum Ducis Sabaudie, &

Cardinalis
renuntiat. ur.

Principis Pedemontium, ac Montisferrati, & Salutarum Marchionum, in Comitatu, & territorio Astensi, nec non in Prouincia

Sedis Apostolicæ legatus,
Vicariûsque
perpetuus.

Lugdunensi citra Sagonam, atque Augustensi, Lausanensi, Basileensi, Argentinenensi, Constantiensi, Curiensi, & Sedunensi Ciuitatibus, & Diœcesibus Legatum, Vicariûmque perpetuum facit, creat, & nominat.

Tibi que in sancta Dei Ecclesia primum post Romanum Pontificem locum pro tempore constituit, consignat, & decernit: qui quidem tibi ad suam præsentiam accedenti assurgat, dumtaxat oris osculum exhibendo.

Primus post
R. Pontif.

Atque ut altissimi in terris honoris quem sola dilectione vniuersalis pacis contempsisti, multa manifestaque in tua persona signa remaneant; tibi ut habitum, & insignia Pa-

Cui ipse Pontifex assurgat;
& oris osculo
excipiat.

S i j

Insignia Pa-

palia nonnul-
lis demptis
retineat.

palia, demptis delatione Corporis Christi, annulo Piscatoris, cruce in pedibus, ac umbraculo, deferre, ac insignijs, ac potestate legati uti quoties te extra terminos tue legationis egredi contigerit, valeas. Nec non ut in curia Romana, vel generali Concilio personaliter comparere minimè tenearis concedit, & indulget per presentes. Datum Lausana, &c. Septimo Kal. Maij, Anno à Na-

CXVI. *tiuitate Domini M. CCCCXLI X.*

Nicolai Pa-
pæ, & totius
Ecclesiæ pro
hac pace effu-
sæ lætitiæ.

Extant huius honoris Amedeo habiti nonnulla monumēta in insignibus, quæ post abdicationē eius iussu efficta sunt; habent enim pro crista seu Apice, alibi Claues Pontificias sine Tiara, Tiarā alibi sine clauibus; documentum posteris non indecorè gessisse Pontificatū, cuius memoriam vellet esse perennem. Hæc Lausanenses; quid Pontifex? ille scilicet in gaudium effusus nec se præ lætitiæ capiens, aris aduolui, largissimas Deo gratias exoluere, supplicationes per omnia vrbs, imò orbis templa edicere, exemplóque omnibus ad litan- dum honori diuino præire; tanta, tam- que prona omnium ordinum consen- sione, ut nullam mundo multis inantē annis feliciorē illuxisse diem populo- rum illa vox testaretur:

Fulsit lux mundo, cessit Felix Nicolao.

Eaque concordia (ait Bergomensis) *In chron.*

non modò latatus est populus Romanus, sed etiam totus mundus à tanta seditione liberatus. Nicolaus verò, ne ingratus Deo tanti beneficij videretur, supplicationes admodum celebres cum populo, & clero habuit. Idem

& omnes Italiae populi effecere. Sed ne Nouis decretis consultitur famæ Amedei.

intra verba hæreret Pontificis gratia, tribus Bullis eadem die (quæ fuit decima quarta Iunij eiusdem anni quadregesimi noni) editis volūtatem suam testatus est. Prima rata habet omnia indulta, priuilegia, beneficia, honores, & dignitates, quæ tum Amedeus (quem semper Felicem Papam Quintum olim in sua obedientia nominatum nuncupat) tum Synodus Basileensis, ac deinde Lausanensis contulerunt; vt vel hinc approbata esse constet quæcunque in Amedei honorem decreto illo Lausanensi, quod recitauimus, constituta leguntur. Secunda seuerè præcipit, vt si qui bonis exuti, beneficijs deiectioni, vel aliquo honore deturbati sint, eò quòd Felicem Eugenio antehabuerint, continuò in suarum omnium rerum possessionem redeant, easque sibi tanquam proprias asserant.

Tertia denique irrita esse iubet quæcunque in eundem Amedeum, & fautores eius vel Eugenius, vel Nicolaus, seu quivis alius decreuisset, eorûmque memoriam damnat, & penitus interdicat. Quæ omnia tam illustribus formulis, tam in Amedei honorem compositis verbis sunt concepta, vt nihil vel ad memoriam honorificentius, vel ad commendationem exquisitius potuerit excogitari. Sed præstat præcipua horum rescriptorum capita recitare.

CXVII. Ac primum quidem sic habet.

Bulla Nicolai
Papæ super
approbatione
actorum
in Conc. Bas.
& Lausan.

Exstat in Edit.
Colon. pag. 96.

Nicolaus, &c. Vt pacis, qua nihil desiderabilius in vniuersali Ecclesia, amplissimè diffundatur, & perduret serenitas, & omnium corda, quos exagitauit, & defatigauit diuiso, unitas integra ad cuiuslibet status, & honoris prosperitatem consolidet, libenter secundum nostra, & Apostolica auctoritatis plenitudinem, magnitudinèque voluntatis omnia complectimur, per quæ non solum super presentibus & futuris, sed & præteritis, vt firma illibataque permaneant, debite prouisionis adhibeatur remedium. Cum itaque post crebras, variâsque conturbationes, quibus multis ab annis sancta Dei subiaceat Ecclesia, causantibus diuisionibus, quæ inter felicis recordationis Eugenium

Papam Quartum Prædecessorem nostrum, & tunc Basileense Concilium viguerunt, hoc in nostro tempore ex altissimi Dei providentia ineffabili, interpositione tractatûque O-ratorum carissimorum in Christo filiorum Francorum, Angliæ, & Renati Sicilia Regum, nec non Delfini Viennensis primogeniti Francorum Regis Illustris, Pacem Ecclesia redditam videamus: Dum percipimus Venerabilem, & Carissimum fratrem nostrum Amedeum primum Cardinalem Episcopum Sabinensem in nonnullis Prouincijs Apostolica Sedis legatum Vicariûmque perpetuum Felicem Papam Quintum tunc in sua obedientia nominatum, iuri quod in Papatu asserebat se habere ad huiusmodi pacem Ecclesiæ obtinendam cecisse. Eos vero qui Basileæ, postmodûmque Lausana sub nomine Generalis Concilij hætenus congregati permanserunt, ordinasse, & publicasse nobis tamquam unico, indubitato Summo Pontifici obediendum esse à cunctis fidelibus, & præfatam Lausanensem dissoluisse congregationem. Desiderantes igitur toto affectu ea perficere quibus Christi fideles suppressis, & extinctis dissensionum, & differentiarum Seminarijs communi fruantur concordia, cuiuslibet eorum status, honoris, & reputationis, & quietis stabilitate firmata. Quas-

cunque promotiones, electiones, confirmationes, postulationum admissiones, translationes, commendas, administrationes, & provisiones, reservationes, uniones, & incorporationes, renocationes, pallij dationes, consecrationes, benedictiones personarum, de ordine ad ordinem translationes, infeudationes, absolutiones, liberationes, Quittationes super quibuscunque debitis ratione decimarum, indulgentiarum, Annatarum, Dispensationes, tam super etatis, quàm natalium & aliarum inhabilitatum defectus, &c. Ac omnia & singula tam iustitiam quàm gratiam concernentia siue in foro conscientie, aut contentioso, in personis & locis quæ tempore concessionis, & aliorum promissorum obediuerunt prefato venerabili, ac carissimo fratri nostro Amedeo Cardinali, Episcopo, legato, & vicario supradicto, tunc Pape Felici Quinto nominato, ac congregatis antè dictis, seu eorum alteri, aut alterius eorum autoritate, etiam de latere legatos, seu delegatos ab eis potestatem habentes coniunctim, vel diuisim qualitercunque facta, gesta, concessa, indulta, data, disposita, & ordinata, etiamsi maiora, aut grauiora, aut alterius cuiuscunque naturæ à promissis existant, & specialem requirentia expressionem, cum omnibus, & singulis inde sequenti. Ac

etiam omnia & singula per ordinarios in dictis locis facta pro bono pacis, & unionis Ecclesie Motu proprio ex certa scientia, & de Apostolica potestatis plenitudine, de consensu venerabilium fratrum nostrorum S. R. E. Cardinalium presentium, serie approbamus, ratificamus, & etiam confirmamus, ratâque & firma fieri volumus, &c. Cætera deinceps in hunc sensum fusissimè, quibus omni studio cauet Pontifex vt nihil grauius illis accidat, qui Felicè coluerant, & omnia ab ijs gesta, ex eorum sententia succedant; ijs quæ in oppositum ab Eugenio; vel alio quouis statuta essent omni autoritate detracta.

Secundum diploma post exordium totidem ferè verbis cum superiore conscriptum, *omnes personas cuiuscunque dignitatis, ordinis, & c. quæ ratione adhesionis, fauoris, & obedientie Felici, seu Concilio prestita, Beneficijs, pensionibus, feudis, iurisdictionibus, & c. per literas prefati Eugenij aut aliàs priuate fuerint, aut destituta, ad Ecclesias, Monasteria, dignitates, Castra, Dominia, & c. restituit, & bona huiusmodi in illum statum pristinum, in quo ante tempus, & tempore priuationis, & destitutionis, huiusmodi erant, ac si factæ non fuissent, pro bono pacis, & unionis Ec-*

CXVIII.

Bulla eiusdem Nicolai, qua Basileenses eorūque fautores in integrum restituntur.

clesia realiter, & cum affectu restituendas, ac reintegrandas fore decernit, & declarat, & c. quæ cautiones omnes adhiberi solitas habent.

CXIX.

Bulla tertia qua irrita esse, & obliterari iubentur quæcunque in Amedeum, & eius fautores scripta sunt.

Tertium ea dumtaxat repetit, & confirmat, quæ anno superiore 15. Kal. Febr. concessa fuerant per eam Bullam quam suprà descripsimus: sed quia tunc non planè fuerat compositum fœdus, ideo placuit hoc anno nouo rescripto decerni, & promulgari, nempe ut quæcunque odiosè facta, scriptæve essent obruerentur, ac quantum fieri posset ex hominum memoria obliterarentur, *perindeque haberentur ac si nullatenus emanassent, eaque omnia & singula cum inde sequutis de Registris ipsius Eugenij, ac locis alijs quibuscunque aboleantur, & deleantur.*

CXX.

Refelluntur qui Felicem necessitate adactum cessisse criminantur.
Gobelinus.
Sabellicus.
Platina.
Ciaconus.
Simoneta.

Hæc de Felicis abdicatione ex antiquarum tabularum fide haud paulò certiora protulimus, quàm quæ vel indiligentia, vel malignitas quorundam turpissima interpretatione corrumpit; cùm scribunt Felicem quasi ex vltima desperatione, cùm iam se omnibus contemptui esse cerneret, nec spes vlla esset obedientiæ nanciscendæ, Friderici Imperatoris seu precibus, seu minis ad-

ductum fuisse ut cedere vellet. Etenim si adeò conclamata erat, ut fingunt, Felicis autoritas, quid necesse erat tot tantorumque Regum tanto tempore interuentum adhiberi? Quorsum tot honores, priuilegia, ac prærogatiuæ non Amedeo modò, sed fautoribus eius decreta? Vnde illa in tota Repub. Christiana gesticientis lætitiæ effusa significatio? Num horruerat Christianus orbis aliorum schismatum monstra? Num iactata erat grauissimis procellis Ecclesia? Nulla tamen tam læta celeusmata, nullos tam sinceros plausus aut veriores acclamationes editas legimus, quàm cùm auditum est tantum Principem omnium penè Christianorum Regum affinitate subnixum, tam illustre, tam sanctum, tam inauditum præbuisse veræ demissionis documentum. Neque ille sanè sic euiluerat ut non instaurare, si animus fuisset, partes posset, nec minùs se nascenti Nicolao, quàm adulto, confirmatòque Eugenio præstare formidabilem: sed hanc aciem non erat ingressus ut in Ecclesiam, sed pro Ecclesia staret: persuasum illi erat vexillum Pontificium de signiferi manibus extortum grandi Christiani exer-

citus periculo iacere; illi erigendo magnis hortatoribus piam manum accommodauerat; nunc videt adesse qui fidenti animo superis fauentibus signum gerere possit, cur illi non concedat, missionemque emeritus impetret honorariam? Non igitur renitenti extortum à Cæsare Pontificij vexillum, sed à volente sponte permissum; Et quorsum amabo Cæsarem hîc miscent, qui nullus planè huic negotio interuenit? Pontificis appello diplomata, quæ retuli: Reges Principesve alios commendant; qui in partem huius sollicitudinis venere; Cæsaris ne verbo quidem meminerunt: vt vel ex hoc commento de reliquis, quæ in Amedeum conflata sunt, coniecturam capiamus.

CXXI.

Felicem sponte se abdicasse testes minimè suspecti affirmant.

Qui verò nulla gratia, aut ambitione, bonæ tantum conscientiae pretiores illorum temporum tradidere, tabulis nostris sua narratione fidem faciunt, Felicemque non inuitum, non oblutantem, non in extremis positum, sed pronum, ac suæ spontis pacem orbi dedisse memorant. Genebrardus *L IBERE se Pontificatu abdicasse* pronuntiat. Onufrius, *Papatum SPONTE deposuisse, omnesque Cardinales ab eo crea-*

In chron. an.

1439.

Lib. 3 de creatio. Pontif.

ros, aut qui ei adhaerant, & adhuc vive-
bant in Cardinalium numerum receptos. Fa-
cilè, inquit Mutius, boni bonis iunguntur: Lib. 28. chron.
Germ.
nisi enim uterque Pontifex, (Nicolaus

inquam, & Felix) bonus fuisset vir, non
ita coniungi potuissent; videbatur enim dif-
ficillimum. Nam habebat Felix totum Con-
cilium Basileense à sua parte: neque dici
potest quòd desperarit rebus suis; magnis e-
nim, Potentibusque AMICIS IN-
VITIS renunciauit Pontificatum. Fuit

enim vir Pius, minimèque ambitiosus.

His gemina scribit Philippus Bergo-

menis: vbi enim Nicolai electionem In chron. an.
1447.
commemorauit, id à Deo (inquit) fa-

ctum fuisse animaduertens Felix, è vestigio
ad tollendum omne schisma Pontificatu se

SPONTE abdicauit, & per Oratores
suos eum Pontificem verum salutauit: qua-

propter Nicolaus visa hominis humanitate,
statim galerum Cardinalatus eidem solen-

niter transmisit, atque Sabaudia, & Ger-
maniae totius legatum ex latere creauit, &

quidquid in Pontificatu sanciuerat approba-
uit. Hæc ille in Nicolao; paria in Feli-

ce: Veruntamen, ait, cùm pacis, & humili-
tatis amator existeret, mortuo Eugenio Pon-

tifice, NULLIS PULSATVS
PRECIBVS, Nicolao Pontifici eius

do ingenio fata obiurgaturus, sed serenamente, vultúque pari placidus, lætúque ac velut sibi ipsi superstes, euolat ad ambitum secessum, in quo anxietatis illius, & turbulentæ vitæ scrupulose cum præsentium bonorum libertate securus componat. Felix vel eo ipso Princeps quòd veram felicitatem in arcano quàm in publico faciliùs inueniri, securiùs regi, dulciùs possideri agnouit. Latere amabat Amedeus, sed nullos Deus minùs latere patitur quàm qui mundo delitescere ambiunt, ut se totos ipsi impendant, hocque illi præstent ne tanta eius opera sine teste sint. Amedeum ex illa velut nube quam sibi circumdederat instar Solis omnium oculis gratissimi, breui erumpere, illustribusque miraculis tamquam radijs iussit inclarescere: quod illorum temporum vicinus Bergomensis affirmat his verbis, *Deficiens demum in senectute bona post obitum etiam miraculis multis clarus effulsit.* Vixit Amedeus principio anni Iubilei (quingagesimi scilicet post millesimum quadringentesimum) pro fluxu & expiraturo, constans, & perenne celebraturus in Cœlis Iubileum. Scio de tempore alios alia tradidisse, sed

Sanctitatem
eius Deus
miraculis il-
lustrat.

In chron. av.
1438.

*dum legationem in nonnullis Italia, Gallia
& Germania partibus exerceret, prefatum
Ducem, aut suos heredes, & successores
quosunque impeti, perturbari, & inquieta-
ri non contingat, de omnibus, & singulis do-
miniorum, terrarum, possessionum, locorum,
Castrorum, & iurisdictionum, nec non ioca-
lium, & bonorum mobilium quorumcunque
emptionibus per prefatum Amedeum Papa-
tus, & legationis predictorum tempore factis
& contractis, prefatum Ducem tenore pre-
sentium ex certa scientia absoluimus & li-
beramus, & c. quæ solennes clausulas
habent. Datum Romæ apud S. Petrum, An-
no Incarnat. Dom. 1450. prid. Kal. Mart.
Pontif. nostri ann. 4.*

Facere non possum hoc loco, quin
singularem Dei prouidentiam erga Ec-
clesiam suam magnopere suspiciam &
extollam: Laborauerat illa iam toties
procaci Pontificum schismaticorum
ambitione lacerata, quos neque pio-
rum preces, neque sceleris pudor, ne-
que conscientia stimuli à proposito re-
uocarant: alios diuturno carcere mace-
ratos, alios longo exilio multatos, hor-
rendis alios de cælo tactos supplicijs vi-
tam prius quàm pertinaciam exuisse
ingemuerat. Quibus igitur artibus,

CXXIV.

Amedeus
sua demissio-
ne cuncta
deinceps
schismata ex-
tinxit.

qua via vsque adeò exitialis Lerna tolli poterat? Vide numinis sapientiam. Schismaticis ceruices excindit, cùm robustius attolli credebantur. Quis enim cùm videret potentissimum Principem, Regijs necessitudinibus nixum, opibus præpollentem, sapientiæ fama Salomoni æquatum, sanctitatis opinione celeberrimum, non paucorum factione, sed generalis Concilij votis Pontificem creatum; quis inquam non crederet extrema omnia priùs ausurum, quàm aliquid de suo iure cuiquam concessurum? Sed aliud Deo visum erat: Amedeum namque præ cæteris in Basileensibus Comitij eligi voluerat, vt esset qui præsentì Ecclesiæ statui, & futuro, raræ, & si verum amamus, inauditæ demissionis exemplo consuleret. Neque enim existimandum est illis dumtaxat temporibus opportunam fuisse tanti Principis virtutem, vt pacem Ecclesiæ redderet, quam quiuis fortè alius contumaci duritia respuisset; verùm posteris etiam vtilissimam, vt exemplo eius omnis ætas disceret, *Solum Regnum esse, nolle regnare cùm possis.* Cuius exempli tantam vim fuisse hætenus Christiana Respublica com-

PACIFICVS. " 295

probauit, vt post illa tempora nemo
adeò proiectæ fuerit audaciæ, vt in le-
gitimos Pontifices ambitiosus Æmulus
insurgere tentarit. Nisi fortè agnoscere
malimus adeò Numini supremo acce-
ptam fuisse optimi Principis, eximiam
erga Ecclesiam charitatem, vt eius me-
ritis dederit, ne vllus deinceps sponsam
suam Antipontifex procaretur: sicque
PACIFICVS noster AMEDEVS
orbi Christiano optatam daret pacem,
æternámque impetraret. Sic auguror,
& voueo;

Votum secundet qui potest nostrum Deus.

FINIS.

Ad maiorem Dei honorem, & S. R. E.
gloriam, cuius iudicio Commen-
tarius iste submissus esto.

